

Ad Vnem
Frñ Joseph Vincenzij Mazzoni

XXXIV

Galle

1711

The time
of the day

THEOLOGIA

SCHOLASTICO-DOGMATICA

JUXTA MENTEM

D. THOMÆ
AQUINATIS

AD USUM DISCIPULORUM

EJUSDEM ANGELICI PRÆCEPTORIS

ACCOMMODATA

PER F. VINCENTIUM LUDOVICUM GOTTI

Ordinis Prædicatorum, Sacræ Theologiæ Magistrum, Doctorem
Collegiatum, & in Patria Bononiensi Universitate
Controversiarum Fidei Publicum Professorem.

TOMUS I. IN PRIMAM PARTEM

De Prolegomenis, & Locis Theologicis.



BONONIÆ MDCCXXVII.

Ex Typographia Bononiensi Sancti THOMÆ AQUINATIS.

SUPERIORUM PERMISSU.

1874

INCREATÆ ÆTERNÆ
 OMNIUM CREATRICI
 INCARNATÆ
 HOMINUM REPARATRICI
 DIVINÆ SAPIENTIÆ



D tuæ Supremæ Majestatis
 Thronum, & Creationis, ac Redemptionis

a 2

titulo

titulo, omnia mea, me ipsum humillimè prostrernere, summa Religionis est. Huic tamen generali debito (quod in omnibus aliis qualibuscumque à me editis Operibus persolvere curavi) specialiorè rationem, adfert hæc Theologia, quæ tota tua est. Tota, inquam, non solum nomine, quia *sermo de Te*, sed ipsa re. Hæc enim Te in Te meditatur, dum Dei existentiam, essentiam, attributa, tuæ omniscientiæ profunda, tuæ voluntatis arcana, æternæ tuæ generationis abdita inaccessa penetrare, quantum potest, conatur. Hæc Te in tuis operibus investigat, dum de Te omnium Creatore, hominum Redemptore, Auctore gratiæ, & gloriæ, ultimo omnium Fine (nam propter Te ipsum omnia operatus es) sermonem instituit. Quid ni ergo ad Te, à quo exivit, ad quem spontè vadit, cujus ope compacta est, revertatur, & in Te, propter quem est, requiescat? Hoc probè noscens Thomas Aquinas, quem tuæ mentis fidelem Interpretem Ecclesiæ tuæ obtulisti, & tua speciali gratia mihi prælegisti Magistrum, omnia sua scripta ad Te non semel detulit, tuoque su-

premo

premo, ac infallibili judicio examinanda, præsentavit. Ne dedigneris ergo, ut Magistri premens vestigia Discipulus, Theologicum hunc cursum tibi sistat venerabundus. Thomæ Magistri scripta comprobasti, *Benè*, inquit, *scripsisti de me Thoma*. Mercedem pro labore exhibuisti, *Quam ergo mercedem accipies?* Absit, ut à Te id præsumam inter Thomæ Discipulos infimus. Spero tamen, fore, ut ea, quæ de Thoma excerpti, ab iis, quæ de meo adjunxi, secernens, quæ Thomæ sunt, iterata commendatione excipias, quæ verò de meo adjunxi, misericordi indulgentia non repellas. Opus certè, ut par erat, non implevi. Id, in quo veritatem sum assecutus, totum tuum est; Id verò, in quo eam assequi non licuit, meum est: meum, inquam, non animo, & voluntate (quam, Tu scis, Tibi Primæ, ac Æternæ Veritati, tuæque Ecclesiæ sui Pastoris voce, quæ tua est, loquenti, subjeci, & subjiciam semper) sed mentis debilitate, nimirum, non quia volui, sed quia nescivi, aut scire nequivi. Adsis ergo. Thomæ Doctrinam, ejusque Scholam tuo supremo patrocinio su-

scipe

scipe , fove , tuere , defende , tui luminis
radio perfunde , ut quæ Magister docuit ,
intellectu conspiciere , & quæ egit , imitatio-
ne valeant semper complere Discipuli . Mi-
hi verò Gratiam tuam clementer imparti-
re , dùm vixero , ut tandem id , quod Tho-
mas petiit in mercedem , mihi vertatur in
misericordiam , & gratiam , & ad æternam
gloriam , ad Te ipsum nempe , valeam per-
venire . Ità supplex humillimè deprecatur .

Fr. Vincentius Ludovicus Gotti
Ordinis Prædicatorum Sacerdos .

LECTORI ^{vii}



Religiosa Obedientia factum in hac mea Theologia tibi exhibeo, quisquis sis, amice Lector; Hinc cessabit admiratio, si quam fortè conceperis; cur post Theologicos cursus à Viris omnigena scientia præclarissimis adornatos, evulgatosque, in arenam ego prodire ausus fuerim. Scias ergo oportet hujus mihi demandati Operis consilium. Multi sanè, & quidem doctè elaborati, Theologici cursus apud Nostrates, sive prælo jam editi, sive manu exarati, in dies, Discipulorum, & nostris, oculis subjiciuntur. Sed quorum non modica pars purè scholasticis questionibus, & metaphysicis subtilitatibus ac tricis plus aquo indulgens, Juvenes penè jejunos dimittat in Veritatibus verè Theologicis, & solum ad nauseam usque refertos disputationibus ad fidei negotium, aut Sacram Eruditionem minimè conducentibus, aded, ut interrogati de Catholica Veritate adversus hæreticos, & de controversiis, quæ à Lutheranis, Calvinistis, Anabaptistis, Socinianis, & id genus hominibus Catholicos secerunt, nec controversiæ statum (ne dicam nomen) exponere norint, ac Theologicam metam attigisse sibi adulentur, etiam si quid inter illos, & nos, seu quid illos invicem intersit, nec à limine conspexerint.

Verùm utinam novum esset hoc infortunium! Utinam hoc præcavissent, animumque ad seria, veroque Theologo digna convertentes, magis, quàm Aristotelem, Scripturam Sacram, Traditiones, Concilia, Patres consulissent, in eis-
que

que exercitatos sese ostendissent Theologi quidam, qui cum Luthero negotium susceperunt! Huic audacissimo Apostata ansam procul dubio præripuissent eos increpandi, subsannandi, nec non dicendi (tom. 1. in respons. ad Silvestr.) si apud Jure-Consultos proverbium recipitur: *Turpe est Juristam loqui sine textu*: Tu vide, quàm sit honorificum, Theologum (qui maximè omnium debet) loqui sine textu; quem Apostolus (*Ephes. 6.*) jubet calceatum esse pedibus in præparatione Evangelii; Et Episcopum potentem, non in syllogismis, & opinionibus hominum, sed in Doctrina sana, nimirum ea, quam alibi inspiratam vocat. Hoc enim consilium si fuisset servatum; minus nunc Ecclesia haberet inutilium questionum, & opinionum, & plus Evangelii, & Christianæ veritatis. Pudere debuisset Catholicos Theologos audire Lutherum tali reprehensione ipsis, eorumque Scholis insultantem, atque saniori consilio animum, ac mentem ad seria convertendo, apostatici nebulonis, ejusque gregalium impudentes cachinnos collatis manibus propulsare, opportunum fuisset. Verùm res in deterius ruit. Succedentibus seculis, quibus hæretica pestis non modicam Europæ partem invasit, Sacramenta majori ex parte sustulit, ab Eucharistia Christum ejecit, Sanctis Cultum, Sacris eorum, & Christi Imaginibus venerationem denegavit, ritus abolevit, Cælibatum, Jejunia exulare fecit, Romanum Episcopum ea, quæ à Christo donatus semper viguit, auctoritate nudare tentavit, nec non antiquam, veramque fidem falsis dogmatibus deturpavit, ementita jactantia nil aliud, quàm Sacram Scripturam in ore gestans, ejusque Sacros Textus in suos, pravosque sensus, vel repugnantem, detorqueus: quis non putasset, tunc ad

Scri-

Scripturas , ad Traditiones , ad Concilia , ad Patres , ad Disciplinæ veteris studium Catholicis Theologis confugiendum , fuisse , ut iisdem , quibus se triumphare existimabat , armis errorem obruerent , obstrepentis hæresis ora contunderent , simplicesque à deceptione liberarent ? Ità sanè faciendum fuisse quisquis prudens existimabit . At non ità à plerisque factitatum est . Non desuere quidem , qui sancto pro Christi , ejusque fidei gloria zelo accensi , id pro dignitate præstiterint . Sed major Theologorum portio , Domitianum imitata , muscarum aucupio (inutitium dico , & purè metaphysicorum studio) occupata permanfit , cùm hostes fuerant debellandi .

Abfit tamen invidia verbo . Nec enim existimet quispiam , me Scholæ detrabere , dùm sacrorum dogmatum studium promoveo . Hoc fuit Lutheri genium , quod detestor . In Scholam tota hæreticorum rabies invehitur , cujus armis in dies ad mortem usque vulnerantur , & transfiguntur . Nec minima Scholæ auctoritas esse potest , quam parvi facere sine fidei discrimine nemo unquam potuit . Connexæ quippe sunt , ac fuere semper , post natam Scholam , Scholæ contemptus , ac hæresum pestes . Scholastica usum defendam , imò & necessitatem demonstrabo . Scholasticas disputationes nec S. Thomas omisit ; cur eas omittet Discipulus ? Integra veri Theologi mæsis est , nedum in doctrina sana exhortari ; sed & eos , qui contradicunt arguere . Hoc autem sine Theologia argumentativa , seu scholastica quomodo præstabit ?

Jamque palam fieri incipiet præsentis Operis Idea . Cùm enim aliqui res dogmaticas purè dogmaticè tractaverint , plerique scholasticis purè scholasticè vacaverint , desiderari videbatur Opus utrumque conjungens , & dogmaticum , & scholasticum , quodque sic scholasticis vacaret , ut dogmatica non

x
omitteret, sed illa istis amico fœdere copulans, scholastica, quantum fieri potest, dogmaticè, dogmatica verò scholastica methodo persolveret. Hoc mihi demandatum prosequi, quantum potero, conabor, omnemque à me detergere suspicionem, ne, dum dogmatica propono, Scholæ quidquam me detrabere quis putet. Solùm hoc Lectorem meum moneo, eam me vocare Scholæ doctrinam, quæ Sacrarum Litterarum fundamentis constituta sit, non eam, quæ Sacris Litteris longum vale dixerit. Theologo quidem in famulatum philosophica interdum accersere S. Thomas non damnat: nec ego improbo. Eos solùm repudio, quos Theologos adscriptitios vocat Canus (lib. 8. Loc. Theol. c. 1.) qui quæstiones verè Theologicas, aut omitunt, aut aliis inutilibus toti vacant, aut si Theologica tractant, ea non Theologicè, sed vanis, invalidisque ratiunculis, magnum pondus rebus gravissimis detrabentes, absolunt. Eos pariter probare non possum, nec debeo, qui quasi ad discordiam nati, tùm optimè se disseruisse putant, cùm contra alios dixerint, ut non tam pro veritate certare, quàm Adversarios convincere velle videantur, & concertationibus, ac rixis totas chartas implentes, veritatem involvunt potiùs, quàm detegant.

Horum non paucos esse in Ecclesia hisce temporibus nemo non videt, ex Scholasticis nedum, sed ex iis, qui se venditant Dogmaticos, qui nempe in sui ingenii ostensionem, & pompam, novas doctrinarum merces ex suæ mentis officina exponere plus æquo satagentes, nec non critici nomine gloriantes, vel cuncta in dubium vocant, vel (quod majus est) nihil, nisi novum, ac priscis Doctoribus, nec non venerabili antiquitati adversum, ac si omnes cæci fuerint, ipsi soli perspicaces, & occulati existant, suis scriptis evulgare gestiunt.

Utrius-

Utriusque generis vitium meus Candidatus evadet, si exactè custodierit Apostoli monitum, qui discipulos suos Timotheum, ac Titum sanis imbuens consiliis, Timotheo inquit (ep. 2. c. 2. v. 23.) Stultas, & sine disciplina quæstiones devita, sciens, quia generant lites: servum autem Domini non oportet litigare, sed mansuetum esse ad omnes, docibilem, patientem &c. Tito autem (c. 3. v. 9.) Stultas, ait, quæstiones, & genealogias, & contentiones, & pugnas legis devita; sunt enim inutiles, & vanæ. Monita hæc religiosè servabit, si ad Magistrum suum S. Thomam sedulus adspiciat, qui suæ Summæ, ac Scriptis nullam quæstionem, imò & articulum interserit, qui non, vel aliquem errorem exterminet, vel alicujus utilitatis pro Ecclesia Sancta Dei existat; quod suis in annotationibus ad Summam Doctus æquè, ac Venerabilis Vir Fr. Seraphinus Capponi à Porrecta ad oculum sigillatim ostendit. Qui insuper ingenio, animoque adedò docilem sese exhibet, tantaque veneratione Patres, Veteresque prosequitur, ut in iis quoque, in quæis reperit singulares, si nihil contrarium Ecclesia statuerit, eos non deserat penitus, sed quæstionem problematicè absolvens, suum eis honorem servet, vel si ab Ecclesia sensu dissentire videantur, benigna interpretatione ad sanum, verumque sensum eos trahere conatur. Qui demum S. Augustini vestigia adedò fideliter premit, ut Augustinum contractum eum Jansensus nuncupaverit, & indrovisa semper fuerit Augustiniana, ac Thomistica doctrinæ fortuna, nec ullus à Thoma unquam dissentire potuerit, quin dissenferit ab Augustino, nec Augustinum relinquere, quin & Thomam reliquerit.

Hoc & ego religiosè persequi, meumque Candidatum ejusmodi genio imbuere, quantum potero, conabor. In scholasticis

questionibus, quas pertractare necesse fuerit, eas eligam, quas alicujus utilitatis fore dignoscam, ceteras vel omittens, vel calamo strictiori percurrans. Controversias, quæ Catholicas Scholas dividunt, sic percensebo, ut meæ quidem Scholæ sententiam pro viribus tuear, sed contendendi, ac rixandi animo prorsus deposito, cæterarum invidiam declinem. In dogmaticis porro, ac Fidem quomodolibet tangentibus totus ero, ut eis Studiosum pro merito instructum reddam. Non latet, me difficillimam provinciam assumere, meisque viribus longè superiorem. Non latet, divisis utrimque studiis, quibusdam Scholastica in totum mancipatis, quibusdam Dogmatica unice vacantibus, arduum fore, ut uniuscujusque partium votis satis faciam. Verùm si quis hujusce Operis ideam, Tyrones nimirum imbuendi, pacato animo revolvat, faciliè acquiescet, si ea tantum, quæ magis necessaria scitu, & captui incipientium accommodata sunt, me tradidisse contentus, ne labor in immensum abiret, pro uberiori rerum disquisitione ad Auctores, qui de singulis ex professo tractaverunt, Lectorem plura desiderantem dimiserim. His expositum volui Candidato meo hujusce laboris consilium. Superest, ut, & ego, & ipse ad Deum confugientes, lumen ad rectè in doctrina percurrendum, & Spiritum veritatis, qui Spiritus pacis est, non dissensionis, humiliter petamus; quod, Angelico nostro Præceptore è Cælis intercedente, nos obtenturos fore piè speramus. Vale

CATALOGUS

Eorum, quæ hic Primus Tomus in Primam
Partem pertractat.



TRACTATUS PRIMUS ISAGOGICUS.

Q U Æ S T I O P R I M A .

De existentia, necessitate, divisione &c. Theologia.

DUBIUM PRIMUM.

An existat Theologia, & an sit necessaria?

- | | | |
|---------|--|---------|
| §. I. | <i>Varie Theologiæ acceptiones.</i> | pag. 1. |
| §. II. | <i>Necessitas Theologiæ ad cognoscendas res ex revelatis.</i> | 4. |
| | pag. | |
| §. III. | <i>Necessitas Theologiæ ad res naturali ratione vestigabiles.</i> | 6. |
| §. IV. | <i>Quid nomine Theologiæ, seu Sacræ Doctrinæ intelligat D. Thomas?</i> | 7. |

DUBIUM SECUNDUM.

De Theologia Positiva, & Scholastica.

- | | | |
|--------|--|-----|
| §. I. | <i>Quodnam sit inter utramque discrimen?</i> | 9. |
| §. II. | <i>Antiquitas utriusque Theologiæ.</i> | 12. |

DUBIUM TERTIUM.

De utilitate utriusque Theologiæ, Positivæ, & Scholasticæ.

- | | | |
|-------|-------------------------------------|--------|
| §. I. | <i>Utilitas Theologiæ Positivæ.</i> | 17. |
| | | §. II. |

xiv		
§. II.	<i>Utilitas Theologiae Scholasticae.</i>	20.

DUBIUM QUARTUM.

Quid sit, quidque requiratur, ut aliquid sit dogma fidei?

§. I.	<i>Resolvitur dubium.</i>	27.
§. II.	<i>Quibus notis dogma fidei discernatur?</i>	30.
§. III.	<i>Quid sit Doctrina purè Theologica?</i>	36.

DUBIUM QUINTUM.

De variis errorum gradibus.

§. I.	<i>Quædam præmittuntur.</i>	40.
§. II.	<i>De propositione, seu doctrina hæretica.</i>	42.
§. III.	<i>De propositione erronea, & errori proxima.</i>	43.
§. IV.	<i>Aliæ species propositionum censurabilium.</i>	44.

DUBIUM SEXTUM.

An omne dogma Catholicum sit Fidei dogma, & an omne Fidei dogma sit articulus Fidei?

§. I.	<i>Resolvitur prima Pars.</i>	49.
§. II.	<i>Resolvitur secunda Pars.</i>	51.

QUÆSTIO SECUNDA.

De natura Theologiæ.

DUBIUM PRIMUM.

An Theologia sit verè Scientia?

§. I.	<i>Quædam prænotantur.</i>	54.
§. II.	<i>Conclusio.</i>	56.
§. III.	<i>Objectiones contrariæ.</i>	57.

DUBIUM SECUNDUM.

An nostra Theologia subalternetur scientiæ Dei, &
Beatorum, & an maneat in Patria?

- | | | |
|---------|----------------------------------|-------|
| §. I. | <i>Resolvitur primum dubium.</i> | 61. |
| §. II. | <i>Resolvitur secunda Pars.</i> | 62. |
| §. III. | <i>Argumenta contraria.</i> | ibid. |

DUBIUM TERTIUM.

An nostra Theologia sit entitativè supernaturalis?

- | | | |
|---------|---------------------------------------|-------|
| §. I. | <i>Quædam notantur.</i> | 66. |
| §. II. | <i>Conclusio.</i> | ibid. |
| §. III. | <i>Argumenta contraria solvuntur.</i> | 70. |

DUBIUM QUARTUM.

An Theologia nostra sit speculativa, an practica,
an utrumque?

- | | | |
|---------|-------------------------------|-----|
| §. I. | <i>Quædam præmittuntur.</i> | 73. |
| §. II. | <i>Conclusio.</i> | 74. |
| §. III. | <i>Objectiones solvuntur.</i> | 75. |

DUBIUM QUINTUM.

An Theologia sit certior, digniorque aliis scientiis; & an
sit etiam Sapientia?

- | | | |
|---------|---|-----|
| §. I. | <i>Quædam notatu digna pro prima parte.</i> | 77. |
| §. II. | <i>Primæ Partis resolutio.</i> | 78. |
| §. III. | <i>Resolutio secundæ Partis.</i> | 82. |
| §. IV. | <i>Resolutio tertiæ Partis.</i> | 83. |

DUBIUM SEXTUM.

An Deus sit objectum Theologiæ.

- §. I. *Resolutio dubii.* 85.
 §. II. *Solvuntur contraria.* 87.

DUBIUM SEPTIMUM.

An Theologia sit argumentativa?

- §. I. *Resolutio dubii.* 90.
 §. II. *Quomodo sit argumentativa circa sua principia?* ibid.

QUÆSTIO TERTIA.

De Locis Theologicis.

DUBIUM PRIMUM.

Quid, & quotuplex sit Locus Theologicus?

- §. I. *Resolutio dubii.* 93.
 §. II. *An ex omnibus præfatis locis æqualiter argumentari possit Theologus?* 94.

DUBIUM SECUNDUM.

De Sacræ Scripturæ usu in argumentis Theologicis.

- §. I. *Quid sit Sacra Scriptura, & quotuplex?* 95.
 §. II. *An ex quolibet Scripturæ sensu Theologus possit argumentari?* 97.
 §. III. *Resolutio quæsti.* 102.
 §. IV. *Quænam Scripturarum editio deservire possit Theologo ad certò probandas suas conclusiones?* 104.

DUBIUM TERTIUM.

De Loco à Traditionibus.

- §. I. *Quid, & quotuplex sit Traditio Sacra?* 108.
 §. II. *Regulæ pro secernenda Traditione Divina à purè Apostolica, & Apostolica à purè Ecclesiastica.* 110.
 §. III. *Resolutio dubii.* 111.1

DUBIUM QUARTUM.

De Loco ab Ecclesia.

- §. I. *De Ecclesia definitione.* 111.2
 §. II. *Resolutio dubii.* 113.
 §. III. *Solvuntur argumenta.* 117.

DUBIUM QUINTUM.

De loco ab Auctoritate Conciliorum.

- §. I. *Quid sit Concilium, quibus constet, & quotuplex sit?* 126.
 §. II. *Duæ priores resolutiones.* 128.
 §. III. *Resolutio præcipua de Concilio congregato, & confirmato auctoritate Papæ.* 130.
 §. IV. *Solvuntur, quæ contra præcedens assertum militant.* 133.
 §. V. *Solvuntur argumenta ex prætensis Conciliorum erratis.* pag. 138.
 §. VI. *Auctoritas Conciliorum non Generalium.* 143.
 §. VII. *De Concilio Generali per Legatos Rom. Pont. celebrato.* pag. 145.
 §. VIII. *De Patribus Concilii.* 147.
 §. IX. *Auctoritas Concilii relatè ad Sacram Scripturam.* 149.

DUBIUM SEXTUM.

De Loco ab Auctoritate Summi Pontificis.

- §. I. *Aliqua prænotantur.* 152.
 Tom. I. c §. II.

- §. II. *Romani Pontificis infallibilitas asseritur.* ibid.
 §. III. *Referuntur contraria motiva, & solvuntur.* 160.
 §. IV. *Argumenta ex Pontificum erratis, & invicem pugnantibus definitionibus.* 172.
 §. V. *Argumenta ex testimoniis Pontificum, & Conciliorum.* pag. 178.

DUBIUM SEPTIMUM.

Locus ab auctoritate SS. Patrum.

- §. I. *Quædam præmittuntur.* 186.
 §. II. *Adsertiones statuuntur.* 188.
 §. III. *Solvuntur argumenta contra ultimam conclusionem.* pag. 195.

DUBIUM OCTAVUM.

Locus ab auctoritate Theologorum Scholasticorum.

- §. I. *Aliqua præmittuntur.* 199.
 §. II. *Statuuntur adsertiones.* 200.

DUBIUM NONUM.

Locus ab auctoritate Juris Pontificii Doctorum.

- §. I. *Theologi, & Canonistæ invicem comparantur.* 203.
 §. II. *Resolutiones dubii.* 205.

DUBIUM DECIMUM.

Locus à rationis naturalis, & scientiarum naturalium, & Philosophorum auctoritate.

- §. I. *Resolutio primæ partis.* 210.
 §. II. *Locus ab auctoritate Philosophorum.* 212.
 §. III. *Locus à Juris Civilis auctoritate.* 216.

DUBIUM UNDECIMUM.

Locus ab Historiæ humanæ auctoritate.

- | | | |
|---------|---|------|
| §. I. | <i>Historiæ humanæ Theologo utilitas.</i> | 217. |
| §. II. | <i>Historiæ humanæ in Theologicis auctoritas.</i> | 219. |
| §. III. | <i>Regulæ discernendi inter Historicos.</i> | 221. |



NOS FR. THOMAS RIPOLL

SACRÆ THEOLOGIÆ PROFESSOR,

Ac totius Ordinis Prædicatorum humilis Magister
Generalis, & Servus.

HArum serie, nostrique auctoritate Officii licentiam concedimus Rev. Adm. P. Magistro Fr. Vincentio Ludovico Gotti Provinciæ nostræ utriusque Lombardiæ imprimendi cursum *Scholastico-Dogmaticum* ab eodem compositum; postquam fuerit revisum Opus, & approbatum ab A.A. R.R. P.P. Magistris Fr. Hieronymo Caravadosi, & Fr. Dominico Antonino Pazzaglia ejusdem Provinciæ; servatis etiam aliis de Jure servandis. In nomine Patris, & Filii, & Spiritus Sancti. Amen. In quorum fidem &c.

Datum Romæ in Conventu nostro Sanctæ Mariæ super Minervam die 27. Julii 1726.

Fr. Thomas Ripoll
Magister Ordinis.

Loco ✠ Sigilli.

Registr. fol. 12.

Fr. Dominicus Ponsi
Mag. Exprov., & Socius.

Novo

NOvo cumulat honorè à Reverendissimo meo P. Generali Fr. Thoma Ripoll, post approbatum illud egregium Sacri Cēlibatus Defensorium, ab A. R. P. Fr. Vincentio Ludovico Gotti de Bononia Sac. Theologiē in nostra Provincia Magistro, ac in Patria Universitate publico Controversiarum Fidei Professore compositum, hoc aliud, in debitæ meæ obedientiæ Tesseram, ejusdem Auctoris insigne Opus lustrandum assumsi, cui titulus est: *Theologia Scholastico - Dogmatica, juxta mentem Divi Thomæ Aquinatis ad usum Discipulorum ejusdem Angelici Præceptoris accommodata* in plures Tomos divisâ.

In hoc à nostra Schola exoptatissimo opere, comprehendente pro nunc, dissertationes Polemicas, & Scholasticas in Primam Partem Summæ Angelici Præceptoris: totum inveni, tūm ad Catholicæ Ecclesiæ, tūm ad Thomisticæ Scholæ firmanda dogmata apprimè elaboratum. Quâ parte Dogma Catholicum propugnat, nonnisi Divinarum Scripturarum, Sacrorum Conciliorum, probatorumque Patrum linguis loquitur; Quâ parte verò Scholasticas enucleare aggreditur difficultates, & præcipuè subtiliores, De Scientia, De Voluntate Dei, De Prædestinatione, De Trinitate &c., nonnisi quàm DD. Augustini, & Thomæ calamo scribit, aded, ut meritò dicere possim: Nostrum Vincentium Ludovicum esse simul *Augustinum, & Thomam contractum*; Ambosque in hoc suo verè aureo Opere, tanquam rarissimi pretii splendidissimas gemmas, mirâ arte tenere inclusos. Quamobrem hunc eruditissimum laborem, ad evidentem tūm Catholicæ Ecclesiæ, tūm Thomisticæ nostræ Scholæ utilitatem assumptum, publicâ luce dignissimum censeo.

Dabam Bononiæ in Ædibus SS. Patriarchæ Nostri Dominici idibus Augusti 1727.

Fr. Petrus Hieronymus Caravadosi de Nicæa Sacrae Theologiæ Magister, & in Archigymnasio Ord. Præd. actualis Baccalaureus Manu propriâ.

Exi-

EXimium Opus, cui titulus, *Theologia Scholastico-Dogmatica juxta mentem D. Thomæ Aquinatis ad usum Discipulorum ejusdem Angelici Præceptoris accommodata*, ab Ad. R. P. Fr. Vincentio Ludovico Gotti Ordin. Prædic. S. Th. Mag. Doct. Colleg., & in Patria Bonon. Universitate publico Professore in Primam Partem elaboratum, mei summâ animi voluptate attentè perlegi; nec quidquam datum est reperire (sive Fidem spectes, sive Mores) quod umbrâ vel reprehensionis dignum videretur: quin potius sapiertiam, eruditionem, pietatem, modestiam omnia nactus sum redolere. In ipso enim Divinorum Scientia ita Scholasticæ partes agit, ut, adhuc hisce temporibus sibi adversis, tædio neminem afficere valeat; quippe quæ vanis speculationibus, superfluisque prætermiſſis quæſtionibus, neceſſaria dumtaxat omnino, verèque utilia pertractet. Dogmaticæ quoque adeò munia implet, ut penè ignores, an Studiosum magis delectet, quàm juvet. In utraque Auctor prolixitatem devitat, ne illâ nimium Tyrones defatigati plus legant, quàm discant, &, quantum patitur argumentum, unicè brevitati studet, sed mirum in modum perspicuitati tœderatæ, quòd difficiliora cuilibet, minùs etsi perspicaci ingenio, plana statim fiant, captuque facilia. Verùm (quod negotium facessit) doctrinam undequaque sanam tradit; Scripturis, Traditionibus, Conciliis firmatam; Patrum testimoniis roboratam; nec unquam solidis rationibus destitutam, præsertim ab Ecclesiæ luminibus Augustino, & Thoma plerumque mutuatis: Quorum sicut ubique vestigia fidelissimè premit, ita eorundem sinceram assequi mentem potissimùm curat. Idcirco non vererè dicere, Discipulo adaptari posse, quod de Sancto Præceptore scriptum est: *Stylus brevis, grata facundia: celsa, clara, firma sententia*. Hic demum habent Juvenes, unde non nominis, sed re Theologi evadant, veræque Thomisticæ scholæ reipsâ sectatores fiant: Fides arma reperit, quibus se ab omni genere hostium tueatur: Hæresis quæ argumenta meritò pertimescat. Dignum ergo Opus, quod in communem utilitatem Typis mandetur, ego infrascriptus existimo. Atque

que utinam jampridem in lucem prodiiſſet! & numeroſiores Doctrinæ ſuæ Angelicus Magiſter amatores ſortitus eſſet.

*Ità eſt Fr. Dominicus Antoninus Pazzaglia
de Bononia S. Theol. Mag. Ord. Prædic.*

*Vidit D. Auguſtinus Maria Alſeri Cler. Regul. S. Pauli, & in
Eccleſia Metropolitana S. Petri Bononiæ Pænitenſarius pro
Eminentiffimo, & Reverendiſſimo D. Dom. Jacobo Cardin.
Boncompagno Epifcopo Albanenſi, Archiepiſcopo Bononiæ,
& S. R. I. Principe.*

Die 26. Octobris 1726.

*Ad A. R. P. F. Aurelium Savini Sac. Theol. Magiſtrum Ord.
Servorum B. M. V., Conſultorem S. Officii &c., ut videat,
& referat.*

Fr. Vincentius Maria Mazzoleni Inquiſitor Gen. Bononiæ.

NOn quidd recognoſci indigere putaverim, ſed eâ, quâ decet, reverentiâ, Reverendiſs. Patris Magiſtri Vincentii Mariæ Mazzoleni, ſuper hæreticam pravitatem Generalis Inquiſitoris, tantum obſequendi cauſâ mandatis, perilluſtre hoc Opus, cui titulus, *Theologia Scholaſtico-Dogmatica &c.* perluftravi. Et ſanè, cum ejus maximi Viri, qui & ingenio, & prudentiâ, & morum integritate, cæteriſque virtutibus ſummoperè pollet; ejus maximè Viri ſit, cujus *Opera clariora ſunt Sole*, ut phraſi loquar S. Hieronymi, in Catal. Scrip. ſic de Cypriano effantiſ, labor ſit, ſtudiumque, quis non hoc fatiſ eſſe, ut cuncta, quæ in eo ſunt polita, atque edocta (ſicut olim de libris Hilarii teſtariſ fuit idem S. Doctor epiſt. 7. ad Letam) poſſe *inoffenſo pede decurri*, tutò judicet, & certò affirmet? Perlegi ergo ea, quæ in Primam Partem D. Thomæ univerſam pertractat, & unicè obedienciâ ductus, cognovi, quod mihi cognoscendum datum fuit; cumque de factò, ut juſto jam judicaveram judicio, antequam legerem, nihil, peni-

penitusque nihil, occurrat, quod, vel latum unguem, à sana deflectat doctrina: imò ità fidei ventilata mysteria; atque his affinia, & connexa scholasticorum placita, ut nil plus valeat desiderari, quid dicam? Dicam, meo videri, de tàm inclyto Ordinis Prædicatorum alumno, & tàm benemerito totius Ecclesiæ, totiusque litterariæ Reipublicæ perinsigni Scriptore jure posse affirmari, quod de D. Augustino perbelle inquit Fulgentius lib. 2. de verit. prædest. & gratiæ cap. 18., quodd videlicet: *posteris certandi, & vincendi ordinem; si quando victa pravitas, recidivo ausu infandum caput erigere niteretur, ostendit.* Dicam, luce publicà dignissimum esse Opus, ut, quam merentur, sibi omnium vindicent admirationem, quæ in eo elucescunt, *opportunitas in exemplis, fides in testimoniis, virtus in argumentis* (utor verbis Sidonii lib. 4. epist. 7.) *pondus in sensibus, flumen in verbis, fulmen in clausulis.* Ità sentio omnium minimus &c. die 14. Februarii 1727.

Fr. Aurelius Savini Ord. Servor. Mariæ Sac. Theologiæ Mag., Doctor Collegiatus, in Universitate Bononiæ publicus Lector, Ex-Provincialis, & Definitor perpetuus, necnon S. Inquisitionis Consultor &c.

Die 15. Februarii 1727.

Attentâ attestatione ut supra.

IMPRIMATUR.

F. V. M. Mazzoleni Inquisitor Gen. Bononiæ.

TRA-

TRACTATUS PRIMUS ISAGOGICUS.

QUÆSTIO I.

*De existentia, necessitate, divisione &c.
Theologia.*



Onsueverunt Artis alij, vel Scientiæ Tractatores, priusquam ad Artis, vel Scientiæ secretiora penetralia tyrones suos introducant, illis, velut in atrio, & vestibulo, artis, vel scientiæ naturam, proprietates, methodum, nobilitatem, utilitatem, necessitatem, cæterasque dotes exponere; quò ad illius existimationem, desiderium, atque amorem excitati, eam alacriores ingrediantur. Hoc vel maximè à me præstandum esse, cui ad Sacram Theologiam, artem artium, scientiam scientiarum juvenes instituere, ac præparare in munere contigit, nemo non videt.

Solent etiam, ne omni doctrinæ vento circumferantur, eis Doctorem aliquem præfigere, cuius vestigia premennes, ea, quæ salebrosa, & aspera occurrent, tuto pede valeant superare. Hunc ego Tyronibus meis propono, de cuius veritate doctrinæ nefas est suspicari, D. Thomam scilicet Aquinatem, Angelicum, fidumque Divinorum Oraculorum Interpretem, à cuius mente, nec ad latum unguem recedam; libertate tamen servatâ illis, de quibus non est explorata S. Doctoris mens, quod verius, aut verosimilius videbitur, opinandi.

Propositum meum in hoc opere mihi erit idem, quod sibi fuisse in sua summa adornanda, testatur S. Thomas in prologo ad eandem: nimirum, ea quæ ad Christianam Religionem pertinent, eo modo tradere, secundum

Tom. I.

dum quod congruit ad eruditionem incipientium. Quia verò hujus doctrinæ novitios in iis, quæ à diversis scripta sunt plurimum impediri consideravi. Partim quidem propter multiplicationem inutilium quaestionum, articulorum, & argumentorum. Partim etiam, quia ea, quæ sunt necessaria talibus ad sciendum, non traduntur secundum ordinem disciplina.... Partim, quia eorum frequens repetitio, & fastidium, & confusio generabat in animis auditorum. Idcirco quaestiones, articulos, & argumenta inutilia, vel penitus omittam, vel si opus erit, aliqua dicere, sobriè pertractabo. Secundò ea, quæ maximè circa dogmata sparsim ab Auctoribus dicta sunt, suis disponam locis. Tertio tandem à jam dictorum repetitione, quantum fieri poterit, abstinbo.

DUBIUM I.

An existat Theologia, & an sit necessaria.

§. I.

Varia Theologiae acceptiones.

Theologia, si nomen species, idem est, ac *Sermo de Deo*: est enim vox confurgens ex græco nomine *Theos*, latinè *Deus*, & græco *Logos*, latinè *Sermo*. Quare quicumque Sermo de Deo, sive Sacer sit, sive Prophanus, sive de Deo vero, sive falso, sive serius, sive fabulosus, Theologiæ nomine insigniri potest. Et sub hac generali ratione, ait D. August. l. 8. de Civit. Dei c. 1., Theologiæ nomine: significari intelligimus de divinitate rationem, sive sermonem.

A

II. Hinc

II. Hinc & ipsi Pagani suam iactabant Theologiam, quæ de suis falsis diis sermonem habebat, quam referente D. Augustino l. 6. de Civit. Dei c. 5. in tria genera distinguebat Varro, in mythicam, seu fabularem, vel fabulosam, quâ utebantur Poetæ, maxime in Theatris, multa contra dignitatem diis assignentes. In physicam, seu naturalem, quâ utebantur Philosophi, naturam, ac genus deorum investigantes. Et in civilem, quâ utebantur Cives in Urbibus, maxime Sacerdotes, dum, quos deos publicè colere, quibus Ritibus, quibus Sacrificiis deberet, populum erudiebant. Prima (dicebat Varro) maxime accommodata est ad Theatrum; secunda ad Mundum; tertia ad Urbem. Quasi quod alii dii pertinerent ad Mundum, alii in Templis adorarentur, alii riderentur in Theatris, ut notat S. Augustin. ibi cap. 6. Melius ergo Varro dixisset, tres omnes illas species fabulosas esse. Triplicem hanc Theologiæ speciem reprobavit Apostolus Rom. 1. teste D. Thom. ibid. l. 2. c. 7. in fin. his verbis: *Videtur autem Apostolus triplicem Theologiam tangere Gentilium. Primò quidem civilem, qua observatur à Pontificibus in aedificatione Idolorum in Templis; & quantum ad hoc dicit: & mutaverunt gloriam incorruptibilis Dei. Secundò Theologiam fabularem, quam Poeta trahunt in Theatris; & quantum ad hoc dicit: qui commutaverunt veritatem Dei in mendacium. Tertiò Theologiam naturalem, quam observaverunt Philosophi in Mundo, partes Mundi colentes, & quantum ad hoc dicit: & coluerunt, & servierunt Creaturæ potius, quam Creatori.*

III. Quanquam autem Sacrum Theologia nomen prophaverint Gentiles, illud tamen in vero sensu usurpare veriti non sunt Sacri Doctores, ut de vero Deo cognitionem, sermonem, & translationem exprimerent. Quare Theologia dividi consuevit in naturalem, & supernaturalem. Supernaturalis in beatam, infusam, &

acquisitam. Acquisita in positivam, & scholasticam, & hæc utraque in morale, polemicam, & mysticam.

IV. Naturalis Theologia dicitur Dei, rerumque divinarum scientia, quæ solo rationis lumine paritur; qualis est metaphysica in ea parte, quæ de Deo disserit; qualis & illa, quæ Philosophi cum cognovissent Deum, non sicut Deum glorificaverunt, ut ait Paulus Rom. 1. 21., & hæc ex creaturis ascendit ad Deum, teste eodem Paulo v. 20. *Invisibilia ipsius (Dei) à creatura Mundi per ea, quæ facta sunt intellecta, conspiciuntur.*

V. Supernaturalis vocatur ea, quæ supernaturali lumine paritur, idque vel per lumen gloriæ, vel per infusionem, vel per discursum ex revelatis; unde in Beatam, infusam, & acquisitam dividitur.

VI. Beata, seu Beatorum propria dicitur, quâ Beati lumine gloriæ perfusi clarè, & intuitivè, seu, ut loquitur D. Paulus 1. Cor. 13. v. 12. *non per speculum in enigmate, sed facie ad faciem vident Deum sicuti est.*

VII. Infusa verò dicitur, quæ non nostro studio comparatur, sed à Deo per infusionem in nos descendit: qualis fuit illa, quâ divinitus imbuti, & Spiritu Sancto assistati Christi Discipuli, ceperunt loqui magnalia Dei; quos ideò in Petro Apostolorum Principe D. Dionysius in suo de Divinis Nominibus libro, Theologos appellat, dicens: *Aderat, & Petrus, Supremum Decus, & antiquissimum Theologorum culmen.* Huic addi posset lumen propheticum, quo Propheta sæpe multa de Deo, & rebus divinis loquitur, sed, quia istud non insidet menti Prophete per modum habitus, sed advent per modum impressionis transeuntis, ut docet D. Thom. 1. 2. qu. 68. art. 3. ad 3., & 2. 2. qu. 171. art. 2. in C., nec est virtus intellectualis, nec Theolog ca, ut docet D. Th. in 3. dist. 23. qu. 2. art. 3. qu. 1. ad 4., ideo ad Theologiam, quæ est habitus, & virtus intellectualis, non pertinet.

VIII. Acquisita Theologia dicitur illa, quæ proprio labore, & studio comparatur per discursum, quo ex principiis revelatis, & creditis fide divinâ, aliqua veritas concluditur. Quælis est ea, quâ, qui præditi sunt, vulgò dicuntur hodie Theologi, & de qua, quia Viatorum propriâ, erit nobis hic potissimum quæstio; quæque propriè loquendo nihil aliud est, quàm quædam ex principiis revelatis, & Fide Divinâ creditis discursiva scientia; Et hæc, ut dixi, dividitur in positivam, & scholasticam; & utraque in moralem, polemicam, & mysticam.

IX. Theologia acquisita positiva dicitur, dum discurrendo probat conclusiones suas per principia positiva; hoc est per principia, quæ non probantur, sed supponuntur, & creduntur, quia accepta à Verbo Divino scripto, vel tradito, nobisque per Ecclesiam propositis. Theologia namque nititur Verbo Dei tanquàm principio. quod teste Apostolo *Ephef. 1. 20. Est fundamentum Apostolorum, & Prophetarum: præter quod aliud nemo potest ponere. 1. Cor. 3. 11.* Diciturque *positiva*, vel quia circa jus positivum divinum explicandum, exponendum, confirmandum tota versatur. Vel quia Positiones, & Theses statuit graviores fidei controversias, ac principes veritates concernentes, quibus fides roboretur, ac stabiliatur; ideoque dogmatica, etiam dici solet, cum circa fidei dogmata versetur. Vel denique, quia non disputatoriâ, & regulis dialecticæ methodo accommodatâ, sed fufiori, positivo, & oratorio stylo.

X. Scholastica Theologia sic dicta, quia in Scholis traditur, & discitur, eadem quidem est, ac Positiva (ut dicitur) sed strictiori modo, & methodo Dialecticæ regulis accommodatori, à Scholarum Magistris proponitur, ut validius possit Catholicus contra fidei hostes procedere, & eorum tela retundere. Est autem Theologia Scholastica ex iisdem principiis procedat, ac positiva, interdum tamen suas conclu-

siones confirmat extraneis argumentis, utens scientiis inferiogræis in obsequium sui, & quasi vocans ancillas ad arcem, ut Catholica fides extraneis etiam confirmata argumentis, facilius persuaderi possit his, qui foris sunt, & cuilibet poscenti, de fide nostra ratio reddi possit. Cæterum Scholastica Theologia, ait D. Th. 1. p. qu. 1. art. 3. cum ex sibi propriis discurret, non minus, ac Positiva, ex Verbo Dei procedit. Sed de his iterum.

XI. Utraque tum Positiva, tum Scholastica, Moralis dicitur, si regulas ad mores nostros informandos præscribat. Polemica verò, seu bellatrix, si de rebus controversis, maxime contra Infideles, eos arguendo, & contra eos pugnando pertrahet. Mystica tandem, seu affectiva vocatur, dum affectus nostros movet, ac dirigit in Deum. Ut enim docet D. Th. ad *Heb. 5. 12.* aliæ scientiæ illuminant solum intellectum, ut cognoscat verum; at Theologia non solum illuminat mentem ad cognoscendum verum Divinum, sed etiam nutrit, & roborat animam movendo affectum, ut dirigatur ad amandum Deum hic in via, donec illum tandem consequatur in Patriâ. His ergo positis, de existentia, & necessitate Theologiæ quæremus cum D. Thom. 1. p. qu. 1. art. 1. primò in genere, deindè in specie; an scilicet præter Theologiam naturalem detur, & dari debeat Theologia supernaturalis, seu ex revelatis de Deo discurrens.

XII. Circa hoc noto primò, Veritates, quæ de Deo cognosci possunt, alias esse, quæ lumine naturalis rationis ex effectibus creatis investigari possunt: alias esse, quæ naturalis rationis lumen prorsus excedunt.

Noto secundo, necessarium dici dupliciter: uno modo absolute, & in se, alio modo ad finem aliquem consequendum; non enim absolute necessarium est habere equum, vel navim, sed necessarius quidem est equus ad equitandum, navis ad navigandum,

quia sine equo non possum equitare, nec sine navi navigare.

Noto tertio, necessarium hoc modo sumtum, aliud esse necessarium necessitate præcepti, aliud necessitate medii, & etiam præcepti. Primo modo audire sacrum diebus festis necessarium est ad salutem, quia præceptum; secundo modo Baptismus parvulis necessarius est ad salutem; tertio modo idem Baptismus necessarius est adultis, quia hi sine Baptismo vel in re, vel in voto nequeunt salutem consequi, & insuper Divino Mandato tenentur eam per Baptismum procurare.

Noto quarto, necessarium ad finem posse dici dupliciter. Uno modo, itaut sine illo finis nullatenus haberi possit, sicut equitare non potest haberi sine equo, & hoc vocant necessarium simpliciter: alio modo, itaut sine illo finis quidem haberi possit, sed commodius habeatur cum illo; sicut itinerari possum quidem sine equo, aut rheda, eundo pedester; commodius tamen, & facilius itinerabor equo vestus, vel rheda: & hoc vocant necessarium secundum quid, seu ad bene, vel melius esse.

XIII. Noto quinto, necessarium modo explicatum posse dici tale, vel respectu alicujus totius communitatis tantum, vel etiam singulis illius communitatis. Sic communitati necessarium est aliquem esse fabrum, cæmentarium, medicum &c. necessarium tamen non est singulis esse fabros, cæmentarios, medicos &c. e contra manducare, bibere, ad vitam necessarium est, nedum toti communitati, sed etiam singulis illius communitatis. His ergo prænotatis quærimus, an Sacra Theologia necessaria sit ad cognoscendas veritates de Deo, nedum rationis lumen excedentes, sed etiam lumine naturali vestigabiles. Rursus quæ necessitate; & denum, an singulis, an verò tantum Reipublicæ Christianæ.

§. II.

Necessitas Theologia ad cognoscendas res ex revelatis.

XIV. Dico primo. Præter philosophicas disciplinas necessaria est homini aliqua Sacra Doctrina, quæ ex revelatis procedat: ita D. Th. 1. p. qu. 1. art. 1., & probō. Necessaria est homini doctrina, quæ possit cognoscere determinatè suum ultimum finem, ut possit ad illum determinatè tendere, ac sese, suasque actiones in illum dirigere: agens enim cognitione, & ratione præditum non potest finem determinatè intendere, nisi illum determinatè præcognoscat; quia nihil volitum, quin sit prius cognitum; & si determinatè suum finem non cognosceret, in incertum scopum collimaret: sed ad cognoscendum determinatè suum ultimum finem necessaria est homini doctrina sacra procedens ex revelatis: ergo &c. minor probatur. Finis, ad quem homo ultimò ordinatur, est Deus clarè visus, seu beatitudo supernaturalis; sed hæc sine doctrinâ ex revelatis procedente, non potest ab homine cognosci, excedit enim comprehensionem naturalis luminis, & rationis, juxta illud *Isaia 64. v. 4. A seculo non audierunt, neque auribus perceperunt: oculus non vidit, Deus absque te, quæ præparasti expectantibus te.* Quæ D. Paulus transferens in suam primam epistolam ad Cor. c. 2. v. 9., ait sicut scriptum est: quod oculus non vidit, nec auris audivit, nec in cor hominis ascendit, quæ præparavit Deus iis, qui diligunt illum: *Isaia* autem, & Paulum de supernaturali hominis beatitudine fuisse locutos testantur, nedum D. Thom. hic, in cap. 64. *Isaia*, & in cap. 2. prima ad Cor. lect. 2. Sed etiam S. Cyprian. *epist. 66.*, & S. Hieronym. in cap. 64. *Isaia*. Ergo ad cognoscendum &c. necessaria est homini doctrina ex revelatis; quare D. Paulus loco laudato, cum de Sapientia Dei dixisset:

quam

quam memo Principum hujus seculi cognovit: subdit: nobis autem revelavit Deus per Spiritum suum.

Probatur secundò à posteriori. Quotquot ex Philosophis veteribus conati sunt hominis beatitudinem cognoscere, nedum non sunt eam assecuti, sed in turpissimos errores inciderunt; unde octo supra ducentos & octoginta, sibi invicem contrarios enumerat Marcus Varro. Quin Aristoteles ipse, Philosophorum Aquila, scopum hunc attingere nonquivit. Agens enim de hominis ultima felicitate, nullibi docuit, Deum clarè videndum, ac intuitivè, esse ejus ultimum finem: imò *1. 1. Ethic. c. 7.* finem ultimum hominis constituit in cognitione substantiarum separatarum. Ubi enim *cap. 5. & 6.* varias retulisset, & rejecisset veterum Philosophorum circa hominis beatitudinem sententias, duplicem ipse statuit hominis felicitatem, Moralem, & Civilem; alteram Speculativam, & Contemplativam. Moralem, & Civilem *1. Eth. cap. 7.* statuit in operatione secundum optimam virtutum, quam aiebat esse prudentiam; ita ut hominem moraliter, ac civiliter beatum, tunc existimaverit, cum sapienter, & ordinatè omnes suas actiones componeret. Speculativam autem, & Contemplativam *10. Eth. cap. 6. 7. & 8.* in operatione omnium perfectissima collocavit, qualem censuit esse cognitionem Dei, ac substantiarum separatarum, abstractivam tamen, & discursivam. Signum est ergo, rationem naturalem non posse nos manuducere ad notitiàm verè beatitudinis, ac proinde hanc debere hauriri ex Magisterio Divino docente nos per revelationem. Quare D. Justinus Martyr *coher. 1. ad Græcos*, causam, cur Philosophi tantà, circa divinam, laboraverint ignorantia, cur inter se adeò discordes fuerint assignans, fuisse hanc dicit: Quid scilicet non à peritis discere voluerint, sed & ipsos humana mentis sua solertia, ecclesia clarè pervidere posse conspici fuerint, cum ne terrena

quidem perspicere quiverint. Ex quibus patet præsentem resolutionem procedere de necessitate simpliciter tali.

XV. Nec tamen hinc inferas, hominem fore deterioris conditionis quàm ceteras creaturas, & intellectum fore imperfectiorem sensu. Cum enim ceteræ creaturæ propriis, ac statutabilibus viribus suos fines ultimos consequi possint, imò & consequantur, solus homo finem suum ultimum nec consequi potest, imò nec propriis viribus cognoscere. Rursus cum sensus nullo egeat auxilio supernaturali, ut circa quælibet sua objecta feratur: oculus enim nativà suà activitate videre potest quodcumque visibile, solus intellectus viribus destitutus egebit supernaturali ope, ut cognoscat objectum suum Principale, quod est Deus.

Non inquam, quia ut ait D. Thomas *1. sent. qu. 1. art. 1. ad 3.* hoc axioma: Illud quod per se suam perfectionem consequi potest, nobilius est eo, quod per se consequi non potest, valet quidem in his, quæ acquirunt æqualem bonitatem, pro fine, sed illud quod acquirit bonitatem perfectam, licet pluribus auxiliis, & motibus, est nobilius eo, quod imperfectam bonitatem acquirit paucioribus, vel per se ipsum, sicut dicit Philosophus in *1. de Cælo, & Mundo text. 3.* Homo autem respectu aliarum creaturarum ordinatur ad acquirendam nobiliorem perfectionem, nimirum ipsius Divina Gloria participationem, propter quam factus est. Et ideo licet ad illam nedum acquirendam, verum & cognoscendam, egeat pluribus auxiliis, & motibus, quàm ceteræ creaturæ ad suos fines, non erit deterior, aut imperfectior illis. Hoc idem docet S. Doct. *1. 2. qu. 5. art. 5. ad 3., & qu. 14. de veritate art. 10. ad 5., ubi ait: Ad quintum dicendum, quod homo perfectior est aliis animalibus, nec tamen determinata sunt sibi ab ipsa natura, quæ sunt necessaria ad finem consequendum, sicut aliis animalibus propter duas rationes. Primò, quia homo ad altiore finem ordinatur; & ideo etiam si pluribus auxiliis indigeat*

geat

geat ad ipsum consequendum, & sibi naturalia principia non sufficiant, nibilominus perfectior erit. Secundò, quia hoc ipsum est in homine perfectionis, quia multiplices vias potest habere ad consequendum finem suum. Unde non poterat ei una via naturalis determinari, sicut aliis animalibus; sed loco omnium, quæ natura aliis animalibus providit, data est homini ratio, per quam, & necessaria hujus viæ sibi parare potest, & disponere se ad recipienda auxilia divinitus futura viæ.

XVI. Eadem ratione sensus non erit nobilior intellectu, quamvis sensus sibi sufficiat ad omnia sua objecta attingenda, intellectus autem non. Imò oppositum; ex quo enim sensus sibi sufficiat ad omnia objecta, inferitur, eum esse determinatum ad certa quædam objecta intra lineam, & certum naturalem modum operandi contenta, & proinde ad ea limitatum, & restrictum. At ex quo intellectus sibi non sufficiat, sed egeat ope, & auxilio exteriori ad aliqua sua objecta, inferitur, ejus spheram non esse determinatam ad objecta sola naturalia, sed extendi etiam ad objecta, naturæ captum excedentia; & proinde, quod intellectus possit elevari ad majorem perfectionem recipiendam, quàm possit ipse producere, summa perfectio illi est. Indiciū est enim, eum non perfici solum iis, quæ intra naturæ limites arcantur, sed protendi etiam ad ea, quæ supra naturam sunt, & aliquam excellentiorem perfectionem ad sui complementum exigere.

§. III.

Necessitas Theologia ad res naturali ratione vestigabiles.

XVII. **D**ico secundo. Ad cognoscendas etiam veritates illas, quæ de Deo possunt ratione humanâ investigari, necessaria est aliqua Sacra, & revelata Doctrina. Ita D. Thom. 1. p. qu. 1. art. 2. his verbis:

Ad ea etiam, quæ de Deo ratione humanâ investigari possunt, necessarium fuit homines instrui revelatione divinâ; quia Veritas de Deo per rationem investigata, à paucis, & per longum tempus, & cum admixtione multorum errorum homini proveniret.

XVIII. Ex his conficitur ratio probativa hujus asserti. Ad salutem cui libet homini necessarium est, certò scire de Deo etiam veritates illas, quæ naturali lumine investigari possunt: sed absque doctrinâ revelatâ hujusmodi cognitionem assequerentur pauci, nec nisi post longum tempus, & cum admixtione multorum errorum; ergo &c. min. probat, & explicat D. Th. lib. 1. contr. gentes cap. 4. Et quidem pro prima parte: quia à veritatis contemplatione plurimi impediuntur: quidam propter hebetudinem ingenii, quæ sic sunt indispositi ad sciendum, ut nullo studio possint ad hoc pertinere, ut summum cognitionis gradum attingerent, qui in cognoscendo Deum consistit. Quidam necessitate rei familiaris, oportet enim ex hominibus plures esse, qui temporalia curent, & ferè totum vitæ suæ tempus in hoc exercitio infumant, qui certè ab otio contemplationis arcentur. Quidam tandem impediuntur pigritiâ. Ad cognitionem enim divinorum multa præcognoscere oportet ex Philosophia, quæ faciunt, ut nonnisi post longum studium, & laborem ad illam perveniri possit, quem quidem laborem pro amore scientiæ pauci subire volunt.

XIX. Pro secunda parte probat. Cum enim ex dictis studium, & labor prærequiratur antequàm homo perveniat ad cognitionem de Deo, in tali opere multum temporis impendi necesse est. Cumque juventutis ætas, quæ diversis passionum motibus anima fluctuat, primum idonea sit quieti, quæ ad tam altæ veritatis cognitionem acquirendam necessaria est, fieret ut homines ad veritatem divinorum non pervenirent, nisi in extrema ætate.

XX. Tertia similiter pars ab eodem Ange-

Angelico Magistro 1. c. gentes c. 4. sic explicatur : Nam investigationi rationis humana plerumque falsitas admiscetur propter debilitatem intellectus nostri in iudicando , & phantasmatum permutationem . Et ideo apud multos in dubitatione remanent ea , qua sunt verissima etiam demonstrata , dum vim demonstrationis ignorant : & praeipue cum videant à diversis , qui sapientes dicuntur , diversa doceri . Inter multa etiam vera , qua demonstrantur , immiscetur aliquando aliquod falsum , quod non demonstratur : sed aliqua probabili , vel sophisticè ratione asseritur , qua interdum demonstratio reputatur . Unde ex Philosophis gentilibus , qui Deum cognoverunt , alii futurorum scientiam ei negaverunt , alii omnium rerum Providentiam , & Gubernationem , alii in alios multiplices , & turpissimos errores lapsi sunt . Concludit D. Th. , & ideo oportuit per viam fidei , fixâ certitudine , ipsam veritatem de rebus divinis homini exhiberi . Salubriter ergo Divina providit Clementia , ut ea etiam , qua ratio investigare potest , si de tenenda praeceperet : ut sic omnes de facili possent divina cognitionis participare esse : & absque dubitatione , & errore ; hinc est , quod Ephes. 4. dicitur . Jam non ambuletis , sicut & gentes ambulant , in vanitate sensus sui , tenebris obcuratum habentes intellectum . Et Ista 54. Ponam universos filios tuos doctos à Domino . Ita D. Th. 1. contr. gentes cap. 4. laudato .

§. IV.

Quid nomine Theologia , seu Sacra Doctrina intelligat D. Thomas .

XXI. **D**ubium hoc ex doctrina hætenus tradita statim emergit . Cum enim sacra doctrina , quam necessariam diximus , ad veritates , tum excedentes lumen rationis , tum ad eas , quæ rationis lumine sunt vestigabiles , sit doctrina ex Dei revelatione procedens , merito dubitatur ,

an sit doctrina immediate revelata , qualis est doctrina fidei , an verò revelata tantum mediatè , idest procedens ex principiis revelatis ad alia deducenda , qualis est doctrina proprie Theologica .

Videtur enim D. Thomas per Sac. Doctrinam intellexisse Fidem Theologicam , quia hanc dixit esse ad salutem necessariam , certum autem est ad salutem necessariam quidem esse Fidem , non verò Theologiam .

Videtur etiam intellexisse Theologiam condistinctam à Fide : nam de ea Sacra Doctrina , ut homini necessaria loquitur art. 1. , de qua art. 2. , dicit esse scientiam art. 3. , esse unam . scientiam art. 5. , esse digniorem aliis scientiis art. 8. , esse argumentativam : atqui fides neque scientia est . neque argumentativa ; ergo ex ordine , & coherencia doctrinae , videtur D. Th. loqui etiam in 1. art. de Theologia sub nomine Sacrae Doctrinae .

XXII. Cajetanus in comment. art. 1. dicit , Sacram Doctrinam neque sumi pro fide , ut distinguitur contra Theologiam , nec pro Theologia , ut distinguitur contra fidem , sed pro cognitione à Deo revelata , sive formaliter , sive virtualiter , abstrahendo à ratione crediti , & sciti , & de hac dicit esse necessariam ad salutem .

XXIII. Verosimilius tamen videtur D. Thomam nomine Sacrae Doctrinae intellexisse determinatè Theologiam . Id suadent nuper dicta , & ulterius , quia D. Thom. hoc art. 1. ad 1. hanc Sacram Doctrinam vocat Theologiam , eamque comparat cum aliis scientiis naturalibus , & distinguit ab eis . Item art. 2. Doctrinam Sacram vocat eam , quæ procedit ex principiis revelatis , quæ pro suis principiis habet articulos fidei art. 7. & 8. , à qui sola Theologia procedit ex principiis à Deo revelatis , habetque articulos fidei pro suis principiis ; ergo per Sacram Doctrinam intelligi Theologiam . Denique de ea doctrina hic loquitur , dum dicit esse necessariam , de qua in progymio

mio hujus quæstionis dicit, se investigaturum qualis sit, & ad quæ se extendat; non investigat autem in hac quæstione de Sac. Doctrina abstractè, & in genere, sed de Theologia; ergo de hac loquitur, dum dicit esse necessariam præter philosophicas disciplinas.

XXIV. At dices: Sacra Doctrina, de qua loquitur D. Thom., est necessaria omnibus ad salutem; Theologia verò non est necessaria omnibus ad salutem, non enim omnes salvandi, Theologi esse debent, sed fideles; ergo de fide, non de Theologia sermo est, vel de doctrina abstracte à doctrina fidei, & Theologica.

Respondeo tamen negando minorem, aliud enim est Theologiam omnibus hominibus necessariam esse ad salutem, aliud necessarium esse omnes homines esse Theologos, ut salventur. Sicut aliud est dicere, omnibus hominibus necessaria est medicina, ut sanentur, & aliud est omnibus hominibus ut sanentur necessarium est, quod sint medici. Sicut ergo verum est, cuiuslibet homini esse necessariam medicinam ut sanetur, absque eo, quod quilibet sit medicus: ita verum erit omnibus, seu cuiuslibet homini esse necessariam Theologiam ad salutem, etsi non quilibet homo sit Theologus.

Cum autem cuiuslibet homini ad salutem, ultra fidem, necessaria sit Theologia ostendo ex doctrina D. Thom. 2.2. qu. 6. art. 1. Fides etenim est quidem fundamentum salutis, sed ad fidem concipiendam duo requiruntur: unum, quod homini proponantur ea, quæ ipsi credenda sunt; alterum, quod homo assentiatur iis, quæ sibi per fidem proposita sunt ut credenda. Licet autem ad talem assensum homo principaliter inclinetur à Deo interiori movente per gratiam, Deus tamen viâ ordinariâ utitur ministerio alicujus exterioris inducentis ad fidem; Puta vel miraculi visi, vel hominis prædicantis, & persuadentis fidem, Rom. 10 v. 14. *quomodo credent ei, quem non audie-*

runt, quomodo autem audient sine Prædicante? ex quibus infert Paulus v. 17. *Ergo fides est ex auditu.* Si ergo viâ ordinaria nemo potest credere nisi audiat, nec audire sine prædicante, & intruente ipsum de credendis, cuiuslibet homini ad fidem gignendam, & nutriendam necessaria erit instructio, persuasio, & prædicatio; hæc autem habetur ope Theologiæ, unde D. Th. laudatus ad primum dicit: *quod per scientiam gignitur fides, & nutritur per modum exterioris persuasionis, qua fit ab aliqua scientia, & hoc ait exponens dictum D. Augustini lib. 14. de Trinitate c. 1., qui rerum divinarum scientiæ hoc tribuit, quo fides saluberrima, qua ad veram beatitudinem ducit gignitur, nutritur, defenditur, roboratur, quâ scientiâ non possunt fideles plurimi, quamvis polleant ipsâ fide plurimum. Aliud enim est scire tantummodo, quid homo credere debeat propter adipiscendam vitam beatam, qua non nisi æterna est, aliud autem scire, quemadmodum hoc ipsum, & ipsi optinetur, & contra impios defendatur, quam proprio appellare vocabulo scientiam videtur Apostolus.* Hinc licet multi consequantur salutem, qui Theologi non sunt, non tamen sine adjumenio Theologiæ, quæ in eis fidem gignat, nutriet, ac conservet. Quod verum est etiam de iis, qui de fide instruuntur a parentibus idiotis, rusticis, ita ut multos alios doctos viros de fide exponentes audiant. Nam licet parentes illi rudes, ac idiotæ absolute Theologi non sint, in tali tamen instructione, quâ filios docent de vera credulitate, idest quid credere debeant, quomodo se gerere pro adipiscenda beatitudine, quidve fugere, aliquid de vera Theologia participant.

XXV. Ex hæcenus dictis infertur, quod licet cuiuslibet homini necessarium non sit, quod verè, & propriè Theologus sit, & Theologiam calleat, necessarium tamen est Ecclesiæ Christi, seu collectioni fidelium, ut aliqui in

ca

ea Theologi sint. In omni enim republica bene ordinata necessarium est esse aliquos, qui doceant, dirigant, & instruant per discipulis, ac de fugiendis admoneant. Quod maxime in Republica Christiana verificatur. Si enim nulli essent Theologi, quomodo staret fides; quiseam tueretur ab heresibus, eam, ac fideles subvertere à veritate conantibus? Propterea Theologiam fidei hostes quovis tempore diſtinctis, scommatibus, maledictis inſecuti ſunt, ut eam à Catholicis exulare prorsus contingat, quò factos inermes expugnari facilius poſſint; Philistæos imitantes, qui ut legitur 1. Reg. 13. v. 19. ut Iſraelitas funditus proſtrigarent, fraude effecerant, ne faber ferrarius inveniretur in omni Terra Iſrael, aut ullus qui faceret gladium, & lanceam. Adeo ut cum venisset dies prælii non sit inventus ensis, & lancea in manu totius populi, qui erat cum Saule, & Jonatha.

DUBIUM II.

De Theologia Positiva, &
Scholastica.

§. I.

Quod nam sit inter utramque discrimen.

I. Dico primò. Utraque Theologia Positiva, & Scholastica est una, eademque essentialiter, solo accidentali quodam modo procedendi diversa. Probo primam partem. Utraque enim habet idem obiectum, Deum nempe sub ratione Deitatis cognoscendum per discursum. Utraque eadem principia agnoscit, easdemque fidei assertiones, sive scriptas, sive traditas, ex quibus suas conclusiones elicit. Utraque non hæret solis Scripturis Sacris proferendis, sed etiam colligit, & adicit indubias Ecclesie traditiones, evoluit Ecclesiasticam Historiam, Decreta Conciliorum

Tom. I.

scrutatur, Commentaria SS. PP. inquirat, ut ex eis latentem Catholicam Veritatem detegat, & aperiat. Utraque eodem modo acquiritur, nempe non per infusionem, sed humanis acribus, & discursu. Rursus aquisita positivà, nulla est difficultas formalis ad aquirendam scholasticam, aut e contra: quia nova difficultas formalis solum contingit in scientiis, in quibus principia, & lumen diversa sunt, quod in Theologia Positiva, & Scholastica non accidit; utraque enim procedit sub iisdem principiis, & lumine eodem; nempe virtualis revelationis.

II. Confirmatur hæc eadem pars. Magister sententiarum, qui, ut adversarii autumant, primus Theologiam ad methodum scholasticam tradidit, novam non condidit Theologiam, sed eam, quam SS. PP. ex Verbo Dei scripto, vel tradito libris consignaverant, solum sub nova methodo, & forma scholis accommodatori propoſuit, quam D. Thomas, Scotus, cæterique Theologi postea secuti sunt. Ergo transitus Theologiæ à merè positiva ad scholasticam merè accidentalis est. Quod magis urgetur. Nam omnes artes successu temporis accuratiori, ac subtiliori ingenio exercitæ sunt, quàm ab antiquis quondam exercerentur: quia tamen eadem semper principia fuerunt, idemque obiectum, eadem essentialiter sunt Artes antiquorum, ac modernorum. Ergo à pari.

III. Ex dictis eruitur probatio secundæ partis. Est enim utraque sub eisdem principiis, & lumine de suo obiecto discurre; Positiva tamen oratorio modo, Scholastica Philosophico, & ordinatiori: ideoque scholastica exactior est, & accuratior in suadendis veritatibus, quia strictiori formâ, & ordine syllogistico illas propoſuit, vim illationis delegit, & contraria sophismata dissolvit. Adde, Scholasticam plerumque Philosophiæ naturalis auxilium, & lumen ptere, nedum ut hæreticorum argumenta, & infidelium cæterorum contra fidei articulos

B

vi-

vibrata retundat naturali etiam, ac philosophico ratiocinio, sed etiam, ut fidei dogmata suadeat esse credenda, hoc etiam motivo, quod rationi naturali, & momentis philosophicis non sint contraria.

IV. Contra tamen objicies primo. Multi sunt, qui benè Theologizant Positivè, qui tamen non benè Theologizant Scholasticè; nesciunt captiosas hæreticorum artes detegere, eorum sophismata solvere, eosque falsitatis arguere; ergo Theologia Scholastica addit novam difficultatem, & consequenter novum habitum supra Positivam.

Respondéo distinguo antecedens. Qui tamen non benè &c. difficultate orta ex carentia principiorum, quibus Theologicè proceditur; nego antecedens: orta ex defectu artis syllogisticæ, & formæ arguendi; conc. antecedens: & distinguo consequens, novam difficultatem tollendam per habitum dialecticæ; concedo consequentiam, tollendam per novum habitum Theologiæ; nego consequentiam. Si enim quis perfectus Theologus positivus nesciat perfectè scholasticè discurre, hoc non est, quia ad benè scholasticè theologizandum requirantur diversa principia theologica, quæ illi defint; sed quia non benè callet regulas rectè argumentandi, atque sophismata eludendi. Verùm hæc difficultas vincenda est, non per novum habitum Theologicum, sed per habitum Dialecticæ, ad quem spectat Theologum methodo, & formâ arguendi informare; hæc enim difficultas non ex objecto, sed ex subiecto malè disposito oriretur. Sicut esset ei, qui gladium habens acutum, ex imperitia artis gladiatoriæ nesciret eo uti ad hostem feriendum.

V. Objicies secundò. Theologia Positiva non est argumentativa: Scholastica vero tota argumentationibus intentâ, ac litigiis plena; ergo essentialiter differt à Positiva.

Respondéo negando antecedens pro

prima parte. Si enim Theologia Positiva argumentativa non esset, nec esset Theologia, quæ essentialiter est habitus, quo ex principiis revelatis deduci possunt, & cognosci conclusiones. Neque à fide differret, cum Theologia viatorum in hoc differat à Fide, quod Fides res à Deo revelatas sine discursu credit; Theologia verò ex revelatis, vel circa revelata discurret. Quare D. Thom. 1. p. qu. 1. art. 8., ait quod Theologia non argumentatur ad sua principia probanda, quæ sunt articuli fidei, sed ex eis procedit ad aliquid ostendendum: sicut Apostolus 1. Cor. 15. ex Resurrectione Christi argumentatur ad resurrectionem communem probandam.

Imo prosequitur D. Thom. Theologia non solum argumentatur ostendendo alia ex suis principiis, verum argumentativè etiam aliquando procedit circa sua principia, vel ea explicando, velle defendendo. Sicut enim licet inferiores scientia, nec probent sua principia, nec contra negantem principia disputent, sed hoc relinquunt superiori scientia: suprema verò inter eas, scilicet metaphysica disputat contra negantem sua principia, si adversarius aliquid concedit, si autem nihil concedit, non potest cum eo disputare, potest tamen solvere rationes ipsius. Sic Sacra Scriptura (vel ut verius in Miss. Codice) Doctrina cum non habeat superiorem, disputat cum negante sua principia, argumentando quidem, si adversarius aliquid concedat eorum, quæ per divinam revelationem habentur: sicut per auctoritates Sacra Doctrina disputamus contra hæreticos, & per unum articulum contra negantes alium. Si verò adversarius nihil credat eorum, quæ divinitus revelantur, non remanet amplius via ad probandum articulos fidei per rationes, sed ad solvendum rationes, si quæ inducit contra fidem. Cum enim fides infallibili veritati innitatur, impossibile autem sit de vero demonstrari contrarium, manifestum est, probationes, quæ contra fidem inducuntur

int non esse demonstrationes, sed solubilia argumenta. Hæc D. Thom.: quæ in re Theologica præ oculis habenda sunt.

VI. Obijcies tertio. Theologia Scholastica ex principiis naturalibus procedit, & discurrit: Positiva autem ex revelatis, & solâ fide creditis argumentationis conficit: ergo ista differt essentialiter ab illa.

Respondeo dist. antecedens ex naturalibus principiis tanquam ex propriis, & necessariis; nego antecedens, tanquam ex extraneis, & probabiliter; conc. antecedens. Responsio hæc est D. Thom. 1. p. qu. 1. art. 3. ad 2., ubi docet, quod argumentari ex auctoritate est maximè proprium hujus doctrina, eo quod principia hujus doctrina per revelationem habentur. Et sic oportet quod credatur auctoritati eorum, quibus revelatio facta est. Nec hoc derogat dignitati hujus doctrina; nam, licet locus ab auctoritate, qua fundatur super ratione humana sit infirmissimus; locus tamen ab auctoritate, qua fundatur super revelatione divina est efficacissimus. Utitur tamen Sacra Doctrina etiam ratione humanâ: non quidem ad probandam fidem (quia per hoc tolleretur meritum fidei) sed ad manifestandum aliqua alia, qua traduntur in hac doctrina.

Cum igitur gratia non tollat naturam, sed perficiat, oportet, quod naturalis ratio subserviat fidei, sicut & naturalis inclinatio voluntatis obsequitur charitati. Unde & Apostolus dicit 2 Cor. 10. In captivitate redigentes omnem intellectum in obsequium Christi. Et inde est, quod etiam auctoritatibus Philosophorum Sacra Doctrina utitur, ubi per rationem naturalem veritatem cognoscere potuerunt, sicut Paulus ait. 17. inducit verbum Arati, dicent: Sicut & quidam poetarum vestrorum dixerunt, Genus Dei sumus. Sed tamen Sac. Doctrina hujusmodi auctoritatibus utitur, quasi extraneis argumentis, & probabilibus. Auctoritatibus autem canonica scriptura utitur

proprie ex necessitate argumentando. Auctoritatibus autem aliorum Doctorum Ecclesia, quasi arguendo ex propriis, sed probabiliter. Inmittitur enim fides nostra revelationi Apostolicæ, & Prophetis facta, qui canonicos libros scripserunt, non autem revelationi, si qua fuit aliis Doctoribus facta. Unde dicit Augustinus in epist. ad Hieronymum (olim. 19. nunc verò 82.) Solis eis scripturarum libris, qui canonici appellantur didici hunc timorem, honoremque deferre, ut nullum auctorem eorum in scribendo errasse aliquid firmissimè credam. Alios autem ita lego, ut quantalibet sanctitate, doctrinâque præpollent, non idè verum putem, quod ipsi ita senserunt, vel scripserunt. Hæc D. Thomas.

VII. Sed inquires. Si rationes naturales sunt à Theologo extraneæ, & solum probabiliter fudent: cur tantus labor à Scholasticis assumitur in iis congerendis? Quorsum libri contra Gentiles rationibus naturalibus pleni? aut ergo hi non tradunt veram Theologiam, aut in extraneis nimis morati sunt.

Respond.; veritates, de quibus agit Theologia, quasdam esse, quæ alio lumine, quàm divinæ revelationis cognosci nequeunt, ut est Mysterium. Trinitatis, Incarnationis &c., & ad has probandas rationes naturales congerere, ineptia esset. Utilis tamen est naturalis ratio (etsi non ad eas probandas) ad ostendendum eas non esse impossibiles, nec lumini naturalis rationis contrarias: quod fit, ut ait D. Thomas supra laudatus, solvendo argumenta, quæ ex ratione naturali in contrarium adduci possunt. Quasdam verò esse veritates, de quibus Theologia secundariò procedit, quæ licet sint à Deo revelatæ, & ut tales à Theologia considerentur, adhuc tamen ratione naturali demonstrari possunt, ut sunt Deum esse, esse unum, infinitum, immortalem, omnium provisorum &c., & ad istas contra Paganos stabiliendas ratio naturalis non est

penitus extranea, nec tantum probabiliter, sed demonstrativè concludit. Sancti ergo Doctores, qui ingenio speculativo præditi fuere, rationes philosophicas conati sunt asserere, vel ut ostenderent, ea quæ fidei sunt, rationi naturali non esse contraria, sicque Fidem Catholicam ab irrisione, & contemptu gentilium liberarent. Vel ut ea, quæ fides dicat, & etiam ratio naturalis evincit, duplici viâ ostenderent: & hæc regulâ usus est D. Thomas, maxime in libris contra gentes.

VIII. Hoc pro veritate dixi: non tamen animum habens tuendi abusum, qui inter Scholasticos irrepsit, nimirum intrudendi in suam Theologiam quamplures quæstiones purè metaphysicales, nihil fidei veritatem, sed solum humani acumen ingenii ostendentes. Hos enim à vera Theologia rejiciendos esse censeo, & in his non se gerere ut Theologos, sed ut Philosophos sustineo, ut inferius dicam.

§. II.

Antiquitas utriusque Theologiæ.

IX. **D**ico primo. Theologia generaliter sumta prout importat cognitionem de Deo, rebusque divinis habitam per discursum ex articulis revelatis est mundo cœva. Hanc enim fuisse infusam Adamo docet D. Thom. 1. p. qu. 94. art. 3., ait enim, *ex eo de supernaturalibus tantam cognitionem accepisse, quanta erat necessaria ad gubernationem vite humanæ secundum statum illum.* Eam postea habuisse reliquos SS. Patriarchas, & Prophetas propriis actibus acquisitam, non est probatu difficile; cum eam haberent articulorum fidei notitiam, ut illos possent filiis, ac nepotibus, quantum necessitas postulabat, explicare, & ex iis conclusiones, sive ad Sacrificium Deo soli offerendum, sive ad mores in vera pietate forman-

dos, & opera ad finem supernaturalem ordinanda pertinentes deducere. Antequam tamen doctrina revelata esset scripto tradita per Moysem, ac Prophetas, de credendis pro illo tempore instruebantur internâ revelatione Sancti illi Viri, quam deinde cæteris communicabant; & ex revelatis docebant eos ad alia discurrere.

X. Dico secundo. Hæc Theologia quâ ab initio Mundi homines imbuti fuerunt, dici potest Theologia Positiva. Quovis enim tempore necessaria fuit hominibus doctrina aliqua, quæ de inspiratis, ac revelatis à Deo discurreret, ea exponendo, ex illis alia inferendo, ac ab impugnatoribus ea tuendo; hic autem Theologiæ Positivæ character proprius est, quæ, ut vidimus, tota versatur, in rerum revelatarum explanatione, ut fideles instruat, mysteria referat, & ex iis alia inferat, & doceat: eam propterea Tertullianus lib. de Præscript. cap. 14. *scripturarum exercitationem* appellat. Sed de hoc infra dicitur, ubi de Theologiæ Positivæ utilitate, ac necessitate sermo erit.

XI. Dico tertio. Quovis etiam tempore fuit aliqualis usus Theologiæ, quam hodie Scholasticam vocant. Nota, me hic non sumere Theologiam Scholasticam juxta exactam, & accuratam methodum, quâ traditur, & discitur in Scholis hodie; sed eam sumere, prout est Theologia ex revelatis à Deo discurrens, & disputans, abstrahendo à tali, vel tali methodo. Ita cum Annato in apparat. ad Theolog. Positiv. lib. 1. artic. 3. & probro. Quovis tempore fuit necessaria aliqua fidelium quoad res credendas instructio; & necessarii semper fuerunt aliqui parati ad satisfaciendum omni poscenti rationem; & non tantum ad solum exhortandum in doctrina sana, quod Theologi positivi munus est, sed etiam ad arguendum eos, qui contradicunt: atqui hoc fieri non poterat, nisi aliquali servatâ methodo, & regulis boni discursus, & argumentatio-

tionis, quod Theologiam Scholasticam aqualiter sapit, quæ nil aliud est, quàm methodica, & argumentativa res divinas tradendi via; ergo quovis tempore &c.

XII. Confirmo. Certum est, primos primorum temporum Patriarchas, & Primarios populi ante Christum rectores habuisse fidei nostræ, saltem quoad generaliora mysteria, & præcipua capita, & præcipue de ultimo supernaturali fine consequendo per gratiam Mediatoris, cognitionem aliquam acceptam per fidem, quâ solâ placebant Deo, ut testatur Paulus ad Heb. cap. 11., & v. 6., ait *sine autem fide impossibile est placere Deo*. Certum pariter est, eos, cum pollerent ingenio, ac eruditione summâ, vitæque fruerentur multò longiori nostrâ, potuisse per discursum conclusiones varias deducere, easque suo modo probare, & contra impugnantes, oppositas solvendo rationes defendere; & denique hæc omnia tradidisse, ac explicasse aliis, filiis videlicet, posteris, & populis.

Atqui credibile non est, hæc omnia eos fecisse confusè, inordinate, absque ulla methodo, & arte discurrendi Dialecticè; si enim ordinem aliquem, & methodum, regulasque servasse credimus in tradendis mechanicis, ac naturalibus disciplinis: cur non servassent in Divinis, Supernaturalibus, & Theologicis? Iste autem ordo, quædam præformatio fuit initiis, qui strictiori, & exactiori methodo successu temporis in scholas inductus est.

XIII. Clarius id apparet in Novo Testamento exemplo Christi, Apostolorum, & Patrum, qui persèpe aliquâ arguendi, & discurrendi formâ usi sunt. Christus porro Matt. 22. v. 42., ut suam probet divinitatem, & se Dei, non tantùm Davidis, filium naturalem esse, ex illo Psalm. 109. *Dixit Dominus Domino meo, sic concludit: Si ergo David vocat eum, (Christum) Dominum, quomodo filius*

ejus est? quasi diceret: qui à Davide vocatur *Dominus*, filius ejus purè non est, & purus homo: Christus à Davide vocatur *Dominus*; ergo Christus non solius Davidis, sed etiam filius Dei est, non purus Homo, sed Deus simul, & Homo.

Secundò Matt. 22. v. 20. ut concludat, Cæsari solvendum esse tributum, ostensâ sibi in numismate impressâ Imaginem Cæsaris, quærit à Judæis *Cujus est imago hæc?* & respondentibus illis, Cæsaris esse, intulit: *reddite ergo quæ sunt Cæsaris Cæsari*. Nonne hoc idem fuit, ac dicere: quæ Cæsaris sunt, Cæsari reddenda sunt; numisma hoc gerens imaginem Cæsaris, Cæsaris est; ergo Cæsari reddendum est?

Tertiò, ut Phariseis probet matrimonium esse indissolubile, ex illo Genes. 2. v. 24. *propter hoc... & adhærebit uxori suæ, & erunt duo in carne una*, concludit Matt. 19. v. 6. *Quod ergo Deus conjunxit, homo non separet*. Hoc in forma arguendi idem est: quod Deus conjunxit homo separare non potest: Deus conjunxit virum cum uxore: ergo homo virum ab uxore separare non potest.

Quartò Luc. 20. v. 38. contra Sadducæos probat animæ immortalitatem hoc ratiocinio: Deus Exodus 3. dicitur: Deus Abraham, Deus Isaac, Deus Jacob: sed Deus non est Deus mortuorum, sed viventium: ergo Abraham, Isaac, & Jacob adhuc vivunt; sed non vivunt secundum corpus; ergo vivunt secundum animam; ergo anima est immortalis. Rursus cum vivere sit totius suppositi ex anima, & corpore constituti, si Deus est Deus vivorum, concludit, Abraham &c., vel adhuc vivere etiam secundum corpus, vel aliquando victuros; sed non primum, ergo secundum; ergo aliquando Abraham &c. resurgent; ergo resurrectio aliquando futura est.

XIV. D. Paulus item sub aliqua Scholasticæ Theologiæ forma locutus est, 1. Rom. 11. v. 5., & 6., dum sic ait electio ad fidem ex gratia est: *Reliquia*

liqua secundum electionem gratia salve facte sunt : sed quod ex gratia est, ex operibus non est, aliouquin gratia, jam non est gratia; ergo electio ad fidem ex operibus non est.

Secundò 1. Cor. 12. v. 12. ut probet, non habere idem Donum à Deo, nec omnes esse debere Doctores, arguit sic: omnes, qui baptizati sumus in uno spiritu, sumus in Christo, sicut membra in uno Corpore: sed non omnia membra ejusdem corporis eundem actum habent: *Si enim totum corpus oculus, ubi auditus? si totum auditus, ubi odoratus?* ergo non omnes habemus à Deo idem Donum, non omnes Doctores &c.

Tertiò 1. Cor. 15. 12. ex resurrectione Christi ad generalem mortuorum resurrectionem discurrit sic: *Si resurrectio mortuorum non est, neque Christus resurrexit, conceditis quod Christus resurrexit, si enim Christus non resurrexit, inanis est prædicatio nostra, inanis est fides vestra.* Ergo concedere debetis, dari resurrectionem mortuorum.

XV. SS. etiam PP. antiquiores aliqualem Scholasticæ Theologiæ usum habuisse testatur S. Hieronym. in *Cathal. Script. Eccles.*, dum S. Marci temporibus Alexandriæ Scholas Theologicas asserit, & in eis post Clementem Alexandrinum, Origenem Clementis discipulum docuisse notat *ep. 64. ad Pammach.*, & *Oceanum datâ*. Videri possunt Sancti Iustini pro Christianis apologia. Clementis Alexandrini Stromata; Eusebii demonstratio, & præparatio Evangelica; SS. Athanasii, & Hilarii Pictaviensis in Arianos scripta; Hieronymus contra Helvidium, Jovinianum, & Vigilantium. Augustini certamina contra Academicos, Manicheos, Donatistas, Pelagianos, & passim ubique deprehenditur aliquale Theologiæ Scholasticæ præludium, & argumenta nedum ex scripturis, sed ex Philosophis, ex ratione exacto ratiocinio deducta.

XVI. Sed dices primò. Communis

Doctorum consensus est, Theologiam Scholasticam ortum suum habuisse à Sancto Joan. Damasceno circa annum Christi 800.: augmentum verò suum à Petro Lombardo sententiarum Magistro circa annum 1160., & hodiernæ perfectionis statum, & usum à S. Thoma Doctore Angelico circa ann. 1260.; ergo ante Damascenum nullus erat Scholasticæ usus.

Respondeo hæc solum evincere ante Damascenum, Petrum Lombardum, & D. Thomam non fuisse Theologiam Scholasticam sub methodo adeo accurata, & stricta, sed quo modo in Scholis versatur; non verò ante illos non fuisse aliquam, sive perfectam, sive imperfectam; accuratam, vel non accuratam; scriptam, vel non scriptam; methodicam, & argumentativam res divinas tractandi viam; oppositum enim ostendi.

XVII. Fateor enim prioribus Ecclesiæ seculis positivam fuisse maximè frequentatam, & Patres oratorio, ut plurimum more potius, quàm scholastico processisse. Nemo tamen ibit inficias, ipsos, dum rem pressius agerent contra hereticos, aliosque infideles, strictam methodum arguendi, quâ utuntur modo Scholastici, aliquantulum usurpasse.

Cur autem antiquiores Positivum theologizandi modum frequentius usurpaverint, ratio esse potest; quia Theologia Positiva accommodatior erat Philosophiæ Platonici, quæ tunc in usu erat. Hæc enim allegoriis, & oratorio discursu plurimum utitur; cum Scholastica Aristotelicam, quæ per analysim, & pressiorem syllogizandi modum procedit, imitetur. Voluit autem Deus iustis de causis, ut nascentis Ecclesiæ filiis Platonica potius Philosophia deferviret. Primò, quia hic philosophandi, & ratiocinandi modus frequentior erat apud Judæos, & Gentiles, quorum errores expugnandi erant, ut iisdem armis, quibus se tuebantur vincerentur. Secundò, quia Platonica Philo-

sophia magis docilis erat, & aperta, idèdque magis idonea ad insinuandas Fidei Veritates, & suadenda Divina Myſteria. Tertio, quia cum Plato circa divina contemplanda totus fit, & plurimas Fidei Veritates, & nonnulla Myſteria ab Hebræis in Ægypto didicerit, eaque suis scriptis inferuerit: longè accommodatior videbatur ejus philosophia ad ea suadenda Philosophis, & Doctõribus Paganis, quàm Aristotelica, quæ circa naturalia tota occupatur, & vix res divinas scrutatur, ac investigat. Denique, quia Philosophia Platonica, cum parabolis, & allegoriis plurimum vigeret, & illustraretur, hisce involucribus supernaturalis Divinæ Veritatis radios temperabat, & ad captum fidelium adhuc infirmiorum, veluti lac parvulis propinabat, & infidelibus ipsius multa etiam abscondebatur, quibus apertè sibi expositis, scandalum potius, quàm fidem concepiſſent. Hinc etiam factum existimo, ut Primi Patres abstinerint, à redigendis in summas Theologicas Christianis Veritatibus; & variis de eis formandis quæſtionibus; ne & infidelibus abdita myſteria pateſcerent, & talibus quæſtionibus fidelium debilem adhuc fidem turbarent. Necessum ergo fuit, ut allegoria præcederet analysim, & ut novà semper accedente veritatum manifestatione, Catholica Fides in plano statueretur.

XVIII. Verùm ubi omnibus suis partibus solidè constitit Christiana Fides, ac Divinæ Veritates satis superque fuerunt evulgatæ, & in Sancto- rum Patrum scriptis hic, illicque sparsim disseminatæ, & ab illas impugnantibus, pro ut sese obtulit occasio hæresum insurgentium, solidis argumentis defensatæ: Tunc ad faciliorem illarum intelligentiam, & promptiorem earundem defensionem, oportuit, ut Theologi Catholicas Veritates in unum colligerent corpus, certum, ac methodicum in ordinem redigerent; & quæ PP. antiquiores sparsim, &

oratorio modo comprobant, ac defensarant, ad stricteorem Aristotelicam philosophandi methodum reformarent: tum ut nitidiùs Evangelicæ Veritates elucescerent: tum, ut hæreticorum technæ, & sophismata faciliùs apparerent, & solvi possent. Quod tamen non tollit, quin in veterum scriptis aliqua hujus methodi semina deprehenderentur, quæ hæc novà methodo accuratius exculta, majori luce perfusa in lucem prodierunt: hinc Sententiarum Magister, novi methodi Inſtaurator, ex scriptura, & PP. monumentis omnes ferè suas probationes firmat, & contraria solvit argumenta.

XIX. Obicies secundò. Theologia argumentativa, & consequenter scholastica reprobatùr à SS. Ecclesiæ Patribus, maximè à Sancto Ambrosio l. 1. de fide c. 5. dicente, *removenda sunt argumenta, ubi quaritur fides, & credimus piscatoribus, non dialecticis*. Et à S. Leone Magno *serm. 7. de natal. Dom.* pariter inclamante. *Abigatur procul terrenarum caligo rationum, & ab illuminata fidei oculo mundana sapientia fumus abscedat*. Ergo apud Sancti. Patres, nullus probatus viguit Scholasticæ Theologiæ usus.

Respondeo negando anteced., quod non probant allati textus. Ambrosius enim, & Leo non loquuntur de Theologia, quæ scientia est, sed de fide; solum contententes, argumenta, & humana ratiocinia ea sensu esse removenda, & abigenda, ut eis non nitatur fides nostra, nec potius rationi naturali, quàm divinæ credat auctoritati. Hoc vitio cettè non peccat Theologia scholastica, & argumentativa; nam dum utitur argumentis, & discursu à ratione naturali, non eis utitur ad probanda ea, quæ fidei sunt; sed vel ad ea explicanda, vel ad ea defendenda, ostendendo scilicet, ea non esse rationi naturali contraria; vel denique ad manifestanda alia, quæ in hac doctrina traduntur, ut supra diximus ex D. Thom. 1. p. q. 1. ar. 8.

1. art. 8., & præcipuè ad 2., ex quo ostendimus, Theologiam uti principis naturalibus, non per se, & tanquam propriis, sed per accidens, & tanquam extraneis, & quasi ex abundantia, ut fidei hostes cognoscant, veritatibus, quas ipsa dicat, etiam Philosophicas rationes deservire, & famulari.

XX. Nec poterant Veteres Patres damnare arguendi modum, quo ipsi per sepe usi sunt, dum contra Ethnicos, & Atheos (qui nullà alià, quàm discursu naturali, convinci possunt vià) pugnandi data fuit occasio, vel etiam contra hæreticos, qui Mytheria Fidei philosophicis argumentis quaterre conati sunt; ut Calvinistæ modò impugnant realem Corporis Christi præsentiam ex impossibilitate unius corporis simul existendi in pluribus locis, & quidem modo inextenso, & indivisibili, quorum Philosophica argumenta diluere non posset Theologus, nisi ad philosophica principia recurrendo. Ita propterea processerunt Sanctus Iustinus in Apolog. pro Christianis. S. Clemens Alexand. in suis Stromatum libris. S. Gregorius Nazianzenus, & S. Cyrillus dum ageret contra Julianum Apostatam. S. Gregorius Thaumaturg. ad Tatianum celebrem scriptit sermonem de anima, sic ab eo rogatus, nullis scripturæ testimoniis, sed solis argumentis, ac philosophicis demonstrationibus usus: *Iussisti (inquit) præstantissime Tatiane, ut cum efficacibus argumentis, siue demonstrationibus sermonem, atque disputationem de Anima tibi scriptam mitterem, eaque in re nullis scripturarum uterer testimoniis.* Magnus itidem Athanasius (teste Gregor. Nazianz. orat. in laudem Athan.) contra Arianos per sepe pugnavit, nedum scripturis, sed etiam philosophicis rationibus, ut probabilibus argumentis, atque ad persuadendum accommodatis. Sed quid plura? S. Paulus ut probaret. in Ecclesia non omnes debere esse doctores 1. Cor. 15., nonne id persua-

dere conatus fuit exemplo membrorum, quæ non omnia in corpore idem officium habent? Rom. 9. 21. Deum pro sua voluntate aliquos prædestinare, alios non, persuadet exemplo figuli, in cujus potestate est facere aliud vas in honorem, aliud in contumeliam; & ut ait D. Thom. cit. artic. 8. ad 2., *ad. 17.* inducit auctoritatem Arati Poetæ, ut ostendat Atheniensibus, Divinitatem inesse non posse auro, aut argento, aut cuilibet sculptili. Sicut ergo idem Paulus omnibus omnia factus, Hebræus Hebræis erat, & Paganis Paganus, ut omnes lucrifaceret: ita Theologus interdum fiat necesse est Philosophus Philosophis, ut istos facilius, ac luculentius lucretur, ac devincat. *Exhibenda enim cuique sunt, qua conveniunt, & familiaria sunt, ut per propria veniat ad fidem veritatis (inquit Melchior Canus.)*

XXI. Neque dicas, Paulum ipsum ad Coloss. cap. 2. v. 8. monere eos: *videte, ne quis vos decipiat per Philosophiam, & inanem fallaciam.*

Nam Paulus ibi non monet Colossenses, ut caveant à Philosophia, quando hæc inducitur ad confirmanda fidei dogmata, uti eam inducunt Theologi, & ipse eam induxit, ut nuper dicebamus: sed monet eos, ceterosque fideles, ut caveant à Philosophia, quando inducitur contra fidei dogmata: tunc enim vera Philosophia non cit, sed inanis fallacia, quia verum non est contrarium vero. Unde ait: *videte ne quis vos decipiat per Philosophiam, & inanem fallaciam, secundum traditionem hominum, secundum elementa Mundi, & non secundum Christum.* Loquitur ergo de Philosophia, quæ Doctrinæ Christi contraria est.



DUBIUM III.

De utilitate utriusque Theologiæ,
Positivæ, & Scholasticæ.

§. I.

Utilitas Theologia Positiva.

I. Dico primò. Theologia positiva Ecclesiæ Dei semper fuit utilis, imò necessaria. Huic asserto maximam lucem afferunt, quæ hætenus dicta sunt, maximè Dub. 1. §. 2. magis autem suadetur. Primò ex necessitate, quam semper habuit Ecclesia, ut in ea essent Doctores, qui Sacras Scripturas populo exponerent, illarum verum sensum aperirent, falsas interpretationes, atque hæreticorum fallacias detegerent, ac dissiparent: atqui hoc indicat necessitatem Theologiæ Positivæ, cujus hoc officium est: ergo &c. minor ex dictis apparet. Major verò probatur ex S. Paulo, tum ad Ephes. 4. 12. ubi dicit: Deum suâ erga Ecclesiam providentiâ ei varios dedisse Ministros, maximè verò Doctores.... in opus ministerii, in adificationem Corporis Christi. Et hoc ideo v. 14. Ut jam non sinus parvuli fluctuantes, & circumferamur omni vento doctrinæ in nequitia hominum, in astutia ad circumventionem erroris. Hinc ad Titum 1. v. 9. dicit, oportere, Episcopum esse amplectentem eum, qui secundum doctrinam est, fidelem sermonem, ut potens sit exhortari in doctrina sana, & eos, qui contradicunt arguere. Sunt enim multi etiam inobedientes, vaniloqui, & seductores, maximè, qui de circumfusione sunt, quos oportet reargui: qui universas domos subvertunt, docentes, quæ non oportet, &c.

II. Secundò probatur: hæretici Scripturas Sacras pravam in sensum detorquent, ut suis erroribus patrocinari videantur, et sic decipiant infirmos. Ita Tertullianus lib. de prescription. cap. 14. Scripturas obtendunt, &

Tom. I.

hæc suâ audaciâ, statim quosdam movent; in ipso verò congressu, firmos quidem fatigant, infirmos capiunt, medios cum scrupulo dimittunt, & c. 39. Nec periclitor dicere, ipsas quoque Scripturas, sic esse ex Dei voluntate dispositas, ut hæreticis materias subministrarent; cum legam: oportet hæreses esse, quæ sine scripturis esse non possunt. Idem sentit Origenes lib. 3. de principiis c. 11. Hilarius lib. 2. de Trinit. & S. Augustin. tract. 18. super Joan. his verbis: Neque enim nata sunt hæreses, & quedam dogmata perversitatis illaqueantia animas, & in profundum præcipitantia, nisi dum scriptura bona, intelligentur non bene, & quod in eis non bene intelligitur, etiam temerè, & audacter assertitur. Sed quid plura? Inspicite proximis seculis exortas hæreses, easque videbitis de scripturis gloriantes, & ad Scripturas malè intellectas, atque in suorum patrocinium errorum adductas, provocantes Catholicos. Necessum ergo fuit, & est, ut sint aliqui Catholici Doctores, qui genuinum Scripturæ sensum aperiant, & detegant insidias, quas fidelibus, ex depravato Sacræ Scripturæ sensu, struunt hæretici.

Hinc verè Ecclesiæ praxis quovis seculo fuit instituire Scholas, in quibus Theologia Positiva publicè tradere-tur. Hanc celeberrimam Alexandriæ olim fuisse refert Eusebius lib. 5. biflor. Eccles. cap. 10. Per idem tempus Fidelium Schola præerat vir doctrinæ causâ celeberrimus nomine Pantanus, quippe jam à præcis temporibus Sacrarum Litterarum Schola in ea Civitate fuerat instituta, quæ quidem nostrâ adhuc ætate perseverat, & ab hominibus; tum eloquentiâ, tum Divinarum Litterarum studio instructissimis obtineri dicitur.

III. Tertio probatur, Scripturæ Sacræ sensum adeo profundum, ac reconditum habent, torque, ac tantas difficultates in eo assequendo occurrunt, ut summâ opus sit eruditione, summoque studio ad eas exponendas,

C

ac

ac interpretandas, proindeque necessesse est, ut aliqui huic expositioni, ac explanationi totam dent operam: atque hoc fit ope Theologiae Positivae; ergo &c. Minor patet. Major, quam negant recentiores heretici; prob. ex D. Petro *epist.* 2. *cap.* 3. *v.* 16., qui de Pauli epistolis, ceterisque scripturis: *In quibus (inquit) sunt quaedam difficultates intellectu, quae indolli, & instabiliter depravant, sicut & ceteras scripturas ad suam ipsorum perditionem.* Id ipsum pene omnes SS. PP. testantur. Origenes *l.* 7. *contr. Celsum*: *Alii (inquit) quoque cordati viri scrutando Scripturam, intellectum ejus invenire potuerunt; licet et verba sit multis locis obscura.* Ambros. *epist.* 44. *Mare est Divina Scriptura habens in se sensus profundos, altitudinem Prophetico- rum enigmatum.* Sanctus Augustinus *lib.* 12. *conf.* c. 14., & *lib.* 2. *de Doctr. Christi.* c. 4. loquens de Scripturarum lectione, ait: *Sed multis, & multiplicibus obscuritatibus, & ambiguitatibus decipiuntur, qui temere legunt aliud pro alio sentientes; quibusdam autem locis, quid vel falso suspicentur, non inveniunt; ita obscure quaedam dicta, densissimam caliginem obducunt.* Cujus obscuritatis rationem reddens: *Quod totum (ait) provisum divinitus esse non dubito, ad edomandam laborem superbiam, & intellectum à sordibus revocandum, cui facile investigata plerumque vilescunt.* Augustino concinit S. Gregor. *homil.* 6. in *Ezech.* videndus.

Verum hæc SS. PP. doctrina hereticis recentioribus non placet, qui Sacram Scripturam Sole meridiano clariore esse venditant. Unusquisque pro cunctis Calvinus *lib.* 1. *instit.* c. 7. §. 2. ait: *Non obscuriorem veritatis suae sensum ultrò Scriptura præfert, quam coloris sui res alba, aut nigra, saporis suaves, & amara.*

IV. Quare contra illam obijciunt 1. *Psal.* 18. dicitur: *Præceptum Domini lucidum illuminans oculos.* Prov. 6. *mandatum lucerna est, & lex lux.*

2. *Petri* 1. *v.* 19. *habemus firmiorem, propheticum sermonem, cui bene facitis attendentes tanquam lucerna lucenti in caliginoso loco.* Ergo Scriptura nedum non est obscura, imò ipsa lux, lucerna est, quæ alias veritates illuminat, & patefacit. Ergo si Theologia Positiva ob id statuitur, ut Sac. Scripturæ obscuritates, & ambiguitates solvat, superflue statuitur.

V. Quæro primò ab adversariis: si Sacra Scriptura tota lux est, adeoque clara, & illuminans alia; Ideoque superfluit Theologia Positiva, quæ illam explicet. Cur ipsi insistant in edendis Sac. Scripturæ commentariis, & interpretationibus? cur ipsi Universitates, Scholasque publicas habent pro Theologiæ studio? cur denique in assignando vero sensu Scripturæ adeo inter se discordes sunt, ut nullâ viâ conciliari poterint, quod contigit in assignando vero sensu illius propositionis *hoc est Corpus meum*?

VI. Secundò respondeo, Prophetam, & Sanctum Petrum non loqui de Sacra Scriptura, quoad omnem sui partem, ita ut in omni sui parte sit aperta, & clara, sed solum quoad aliquam, & maxime quoad Præcepta Decalogi, quæ rationi naturali adeo sunt conformia, ut cuilibet ratione utenti per se pateant, ideoque dicit David: *Præceptum Domini lucidum: Mandatum lucerna est, & lex lux*, dicit Salomon. S. Petrus etiam loquitur, non de quocumque prophetico sermone, sed de prophetico sermone de Christo, & Lege Evangelica, qui quidem clarè adeo lucet, ut non nisi obsecratis non appareat. Ceterum ipse Petrus, ut nuper dicebamus, multa difficultates in epistolis Pauli, sicut & in cæteris scripturis adesse fatetur. Neque David ipse hoc negabat, dum, & in lege aliqua latentia observans, agebat *Psal.* 118. *Da mihi intellectum, & scrutabor legem tuam: revela oculos meos, & considerabo mirabilia de lege tua.*

Illu-

illumina super servum tuum, & doce me justificationes tuas. Ad quæ respiciens Sanctus Hieronymus, ep. ad Paulinum: si tantus (inquit) Prophetæ tenebras ignorantia consuevit, quâ nos putas parvulus, & pendè lassentes infestitia nocte circumdari? Hoc autem velamen non solum in facie Moysis, sed & in Evangelistiis, & Apostolis positum est nisi aperta fuerint universa, qua scripta sunt ab eo, qui habet clauem David, qui aperit, & nemo claudit, claudit, & nemo aperit, nullo alio referantur panduntur.

VII. Inquiunt tamen: Scripturæ Sanctæ non sunt intellectu difficiles, nisi superbis, & malitiâ excæcatis, dicente Paulo 1. Cor. 4. v. 3.: *Si opertum est Evangelium nostrum, in iis, qui pereunt, est opertum.*

At non vident, Paulum ibi non loqui de Sacra Scriptura, sed de Evangelio à se prædicato, subdit enim, *non enim nosmetipsos prædicamus, sed Jesum Christum Dominum nostrum; Quod certè opertum erat iis, qui ex malitia, & mentis excæcatione illud repellebant? Falsum pariter est, quòd solis superbis Sacra Scriptura sit obscura, & difficilis. Non enim superbus erat David, qui tamen à Deo pe-tebat Scripturarum, & legis intelligentiam. Superbus non erat Eunuchus ille Reginæ Candacis actor. 8., qui dum legeret Isaiam Prophetam, & nihil intelligens, eguit, ut Philippus ei explicaret. Intelligentia ergo, & interpretatio Scripturarum donum Dei est, nimirum interpretatio sermonum, vel donum scientia, sed hoc nunquid omnibus datur? Paulum audio dicentem, aliis dari, aliis non: 1. Cor. 12. v. 7. *alii quidem sermo Sapientia: alii autem sermo Scientia. . . alii interpretatio sermonum. Nunquid omnes doctores? nunquid omnes interpretantur? ibid. v. 30., & ad Ephes. 4. v. 12. posuit Deus, alios autem Pastores, & Doctores. Non omnibus ergo adest intelligentia, & interpretatio Scripturarum, sed quibus dat spiritus, divi-**

dens singulis prout vult. Et quidem valde miror, quòd continentiam, quia Donum Dei est, non omnibus etiam humiliter petentibus certò dari Protestantibus velint, Scripturarum autem intelligentiam, & interpretationem, etiam donum Dei sit, omnibus adesse contendant, & contra Apostolum velint, omnes esse doctores, omnes interpretari, habere omnes donum Scientiæ.

VIII. Obijciunt secundò. Si Sacra Scriptura aliquibus tenebris offundatur, eas tamen non ab homine exterius explicante, sed à Deo interiùs docente esse dissipandas. Deum autem cuique fideli adesse, donando lumen, ad veritatis cognitionem, juxta illud Isaia 54. v. 13. *Ponam universos filios tuos doctos à Domino; & Jeremia 31. v. 33-34. dabo legem meam in cordibus eorum, & in corde eorum scribam eam: non docebit ultra vir proximum suum, dicens, cognosce Dominum; omnes enim scient me à minimo eorum, usque ad maximum. Unde 1. Joan. 6. 2. v. 27. Inquit Joannes ad fideles scribens: *Non necesse habetis, ut aliquis doceat vos, sed sicut unctio ejus docet vos de omnibus.**

IX. Retorqueo argumentum: si fideles omnes immediatè docentur à Domino, & non est necesse, ut aliquis eos doceat; Cur dicit Paulus laudatis locis, in Ecclesiâ aliquos esse debere Doctores? Cur ipse tot epistolas scripsit, cæterique Apostoli, ut Ecclesias, quas fundaveant, erudirent? Cur Patres tot, tantaque scripserunt, homilias, sermones, tractatus ediderunt, ut instruerent populos? Cur Protestantes ipsi, Prædicantes, & Ministros alunt, & Catechismos ediderunt? hæc omnia superflua sunt, si fideles omnes docentur à Domino, si necesse non habent, ut aliquis doceat illos. Dicendum ergo, Deum quidem fideles suos lumine perfundere, sed sicut Ecclesiam visibiliter regit per Pastores; ita fideles visibiliter instrui vult per Doctores.

ita tamen, ut eorum exteriori doctrinæ cooperetur ipse suâ internâ illustratione, si obicem non invenient.

X. Respondeo ergo Isaiam, & Jeremiam statuere differentiam inter doctrinam Legis Mosaicæ, & Evangelicæ, quodd, ubi illa tradita fuit per homines, ista tradenda erat immediatè per ipsummet filium Dei, quod & expressit Sanctus Paulus ad Hebr. 1. *multifariam, multisque modis olim Deus loquens Patribus in Prophetis; novissimè diebus istis locutus est nobis in filio.* Quo fit, ut Christiani omnes dicantur *Theodidacti*, hoc est, à Deo edocti, vel immediatè, ut Apostoli, cæterique, qui Christum audierunt, vel mediatè saltem, ut cæteri fideles.

Vel dico, prælaudatos vates, ut exponunt Chrysostom., Theophil., & Oecumenius in cap. 8. ad Hebr., & Sanct. August. de gratia Christi c. 12. solum indicare, quodd tanta futura sit facilitas, & gratia Legis Evangelicæ, ut non sit opus magno labore ad discenda necessaria ad salutem; & tanta erit Spiritus Sancti illustratio, & tam obviu ejusdem impulsus ad credendum, sperandum, & amandum, ut externa fidei prædicatio, comparata ad internam illam vocationem, parum, & quasi nihil esse videatur.

Vel dico Prophetas præluisse illi mirando illapsui, quo in die Pentecostes Apostoli, alique Ecclesiæ nascentis filii erudiebantur, quibus cum baptismo Spiritus Sanctus, & cum eo dona scientiæ, prophetiæ, generalium linguarum &c. divinitus infundebantur, itaut idiotæ quique, & rudes in momento sapientissimi evaderent.

Sanct. autem Joannes ibi solum innuit, fideles, ad quos scribebat, & jam docuerat, per ea sola, quæ didicerant, fidem tueri, ac servare posse contra quamcumque aliam perversam Pseudo Apostolorum doctrinam, Spiritus Sancti internâ auxiliante gratiâ. Unde præmiserat hæc scripsi vobis de his, qui seducunt vos. Et vos unân-

nem, quam accepistis ab eo, manetis in vobis, ac si diceret: contra seductores nil aliud facite, nisi servate fidem, quam edocti estis.

6. II.

Utilitas Theologia Scholastica.

XI. **N**on loquimur de Theologia Scholastica, prout dicit aliqualem methodum, strictioremque discurrendi modum: hanc enim quovis seculo in usu aliqualiter fuisse supra ostendimus præcedenti dubio 6. 1. loquentes de utriusque Theologiæ antiquitate. Sed loquimur de Theologia Scholastica, prout in Scholasticas invecita fuit, redigens nimirum in summam, & methodum accuratam, & strictam tractatus, & quæstiones Theologicas, easque tractans modo formaliori, & dialecticæ regulis accomodatori.

XII. Dico secundò. Theologia Scholastica utilis est Ecclesiæ, imò & necessaria, sic, ut non plenè sufficiat Positiva, sed utraque requiratur. Id probat ipsum Theologi officium. Oportet enim imprimis, Theologum, sicut & Episcopum, non solum amplecti eum; qui secundum doctrinam est, fidelem sermonem, ut potens sit exhortari in doctrina sana, sed etiam eos, qui contradicunt arguere, & rationem reddit Sanctus Paulus ad Tit. 1. v. 11. *sunt enim multi etiam inobedientes, & docentes, quæ non oportet, infideles quippe multi, Judæi, Hæretici.* Secundò juxta Sancti Petri monitum ep. 1. cap. 3. v. 16. *Paratus esse debet ad satisfaciendum omni poscenti rationem de ea, quæ est in nobis, spe.* Denique ex Sap. 8. v. 8. *debet scire versutias sermonum, & dissolutiones argumentorum.* Atqui cum sola Theologia Positiva esto possit amplecti fidelem sermonem, & exhortari in doctrina sana, non tamen (saltem ita promptè, ac expedite) eos, qui contradicunt arguere, satisfacere omni poscenti ratio-

tionem, scire versutias sermonum, & dissolutiones argumentorum sine Scholastica posset, quæ docet accuratè argumentari, fallacias detegere, ac versutias sermonum, easque dissolvere: ergo &c.

Theologus ergo positivus Scholasticè penitus destitutus, esset veluti miles habens arma, carens verò arte, & dexteritate ea tractandi. Sicut ergo militi ars, & peritia tractandi arma, & eludendi hostium insidias necessaria est, ita Theologo peritia arguendi, & hostium argumenta eludendi: hæc autem ipsi præstat Theologia Scholastica. Propterea vel ipsos SS. PP. dum hæreticorum technas dissolverent, ad aliqualem Scholasticæ usum recurrissè supra ostendimus.

XIII. Secundò probat. Theologia Ecclesiæ utilis, ut ait D. August. *lib. 14. de Trinit. cap. 1.*, debet fidem pignere, nutrire, defendere, roborare: atqui hoc totum Scholastica præstat; fidem namque gignit, dum declarans, & explicans Scripturam Sacram, objectaque revelata proponit, dispositivè fidem in corde generat: *fides enim ex auditu, auditus autem per Verbum Christi. Rom. 10. 17.* Fidem nutrit; rationes enim, & similitudines, motiva, & exempla, quibus Theologi Scholastici fidei articulos elucidant, & credibilem demonstrant, foveant fidem, eam nutriunt, & augent. Fidem defendit dum hæreticorum falsa ratio, & malè philosophantium technas, & sophismata deriogens, ac dissolvens, fidei suam lucem restituit. Fidem tandem roborat, dum Theologicis discursibus ostendit, fidei articulos non esse contra, licet sint supra rationem naturalem: imò plerumque demonstrat, eos esse naturalibus principiis conformes, quo intellectus inclinatur, ut eis firmiorem, ac tenaciorè præbeat assensum, ex quo fides maximè roboratur, & firmatur.

XIV. Theologiæ Scholasticæ utilitatem probat ulterius illius toto literario in orbe usus, Eam omnes A-

cademiæ excolunt, ac profitentur. Eam commendat Ecclesiæ: Concilium enim Lateranense IV. magnificè laudat, & approbat Petri Lombardi Scholasticam docendi methodum, damnat e contra ejus impugnatores Abbates Joachimum. Concilium insuper Vienneñse tanti fecit Scholasticos Theologos, ut in quæstione de baptisimi parvulorum effectu, majorem sui temporis Scholasticorum partem sequendam esse decreverit. Varii Summi Pontifices eam probavere in S. Thoma Doctore Angelico, cujus summam Theologicam summis laudibus extulerunt, inter quos Urbanus IV., Innocentius VI., Jo. XXII., sicut Innoc. IV., & Alexander IV., quorum unus Alexandro Alesi mandavit, ut summam Theologicam conscriberet: alter verò jam conscriptam suo diplomate approbavit.

Et jure quidem merito: sicut enim nemo rationis compos vituperandum existimaret, qui scientiam aliquam ante perturbatam, inordinatam, indigestam ordinaret, in partes distribueret, omnia suis locis antea dispersa collocaret, multis etiam quæstionibus augeret, ac strictiori, & accuratiori methodo ea pertractaret, quâ ratione nemo damnat, imò quilibet laudat Aristotelem, qui hoc præstitit in Philosophia: sic tantùm abest, ut convitiis digni sint Theologi Scholastici, imò potiùs summam laudem apud omnes mereantur, quòd hoc idem in Theologicis peregerint, ordinando videlicet in unam summam, eæ quæ in SS. PP. erant dispersæ, novâ methodo ea donando, pluribusque augendo quæstionibus, fidei mysteria mirè illustrantibus, ea indagando, expendendo, excutiendo, & ab impugnationibus liberando.

XV. Soli propterea Theologos Scholasticos odio habent hæretici, eosque impudenter convitiis onerant. Eorum Scholas Cainitica castra vocat VV. cleffus: *Conventus idololatricæ, & impietatis scholas* Calvinus; *Antichristi*

Luo

Lupanaria Lutherus. Scholasticam Theologiam *prophanam* Melancthon, *negotium verò perambulans in tenebris* vocat Kenntius. Uno verbo quotquot invenerere Theologiæ Scholasticæ libros publico tradidere rogo VVitembergenses anno 1530., sperantes, ut olim Pagani Sacri Codicibus combustis Religionem Christianam extinguere, sic illi, Scholasticâ extinctâ, Catholicam Fidem defensoribus vacuum funditis evertere. Non desunt tamen aliqui Catholici, qui zelotæ, sed non secundum scientiam, scholasticam plus nimio deprimentes, soli positivæ, quasi sufficienti vacandum tyronibus suis suadent.

XVI. Contra eam ergo obijciunt primò. Scholastica longè abest à veterum Theologorum dicendi gravitate, & peritia: gravius siquidem illi tractabant Divina Mysteria, quia nihil, nisi auctoritate Scripturæ, aut Conciliorum definitionibus, vel Priorum Patrum sententiis dijudicabant. Formulas autem istas syllogisticas imbecillum mulcipientes, vel ignorabant, vel tanquam inutiles aversebantur, & respuebant. Theologi verò Scholastici, omisiss omnibus præfatis, quæ fidelis maxime decet, quæcumque ad rationis trutinam, dialecticæque regulas examinant. Insuper eorum stylus incultus est, & verba duriora, ac barbara, *materialiter, formaliter, reduplicativè, specificativè, metaphysicè, entitas, proprietas personalis, quidditas, ratio formalis &c.*, imò nonnunquam solecisticis gloriuntur, ut cum agentes de Sacramentis dicunt, ea causare gratiam *ex opere operato*.

XVII. Respondeo negando antecedens. Cum enim Theologia Scholastica, ut diximus, non differat essentialiter a Positiva, illdem utitur principiis, ac Positiva, & à doctrina antiquorum Patrum in hoc solum discrepat, quòd, quæ illi fustori, & oratorio stylo, ad vulgi intelligentiam accommodatori, integris libris, ac

voluminibus disputarunt: hæc brevi, & strictiori dialectico dicendi modo procedit, identidem ad rationes naturales recurrrens, non per se, & tanquam intraneas, sed ut extraneas modo supra à D. Thom. 1. p. *quæst. 1. art. 8. in corp.*, & ad 2. explicato. Quòd si aliqui Scholastici relicta Scripturâ, & Concil., & PP. auctoritate, plus æquo ad rationes naturales confugiunt, non Theologiæ, sed Theologorum vitium est, qui Metaphysicos potius se ostendunt, quàm Theologos.

Voces autem illæ, cæteròquin barbaræ, mire explicant, tolluntque æquivocationem, quæ circa Divina Mysteria orta est aliquando, & oriri posset, unicoque verbo id exprimunt, quod SS. PP. multorum verborum circumlocutione expresseverunt. Idèquè omnium consensu receptæ sunt, & factæ idioma Theologicum; unde qui istis alias substituere vellet, id tentaret, quod vir, qui receptum in aliquo Regno idioma, mutare conaretur. Neque curandum est, si ad clarius exprimendam veritatem interdum à grammaticæ regulis decedatur. D. Augustinus *serm. 3. in Psalm. 35.* non curavit dicere: *generat pro generatur*, & ut populus melius caperet, admittere barbarissimum. *Generatur quidem*, (inquit) *latine dicitur, & qui dat mutuum, & qui accipit: Planius autem hoc dicitur, si dicamus generat. Quid ad nos quid Grammatici velint? Melius in barbarismo nostro vos intelligitis, quàm in nostra disertitudine vos deserti eritis.*

His addo. Si ob incultum stylum scholastica despicienda est, despicienda etiam erit sacra Scriptura, quæ simplici, & inculto modo procedit. Sub rudi pallio sæpè latet eruditus Philoſophus, & montes magis asperi, & inculti interdum auri venas abscondunt. Veritas, præsertim divina, verborum lænociniis non indiget, ut fulgeat. Savius est sermone facili, & vulgari, & vocabulis rudioribus il-

lam

lam exprimere, quàm affectatà elegantia eam offuscare.

XVIII. At inquires præcitati Scholasticorum termini veritates magis offuscant, dum populo incogniti sunt. Insuper novi sunt: novitas autem in Ecclesia vitanda est.

Sed respondeo, quamlibet disciplinam suos habere terminos aliis incognitos, & pro docentium arbitratu excogitatos. Notos quidem solis illius disciplinæ professoribus, sed qui strictius, & plenius rei ideam expriment. Quid ni ergo Theologiæ hoc concedi poterit? Novitas autem, si in dogmate sit, mœuenda certè est, nec audienda; ut Vincentius Lirinensis in suo commentit. à capite 24. Non tamen novitas methodi doctrinæ, maximè si clarior sit, ac faciliior. Imò ad hoc Lirinensis cap. 22. Theologum adhortatur, dum super illa verba Pauli 1. ad Timoth. 6. v. 20. *O Timothee, depositum custodi, devitans prophanas vocum novitates*, ait, à Timothee, à Sacerdote, à Tractatore, à Doctore, si te divinum munus idoneum fecerit ingenio, exercitatione, doctrinâ, esto spiritalis tabernaculi Beſeleel, præſtoſas divini dogmatis gemmas exculpe, fideliter coapta, adorna ſapienter, adijce ſplendorem, gratiam, vernuſtatem. Intelligatur, te exponente, illuſtrius, quod ante obſcurius credeſtatur. Per te poſteritas intelleſtum grateletur, quod ante vetuſtas non intelleſtum venerabatur. Eadem tamen, qua didiciſti doce; ut CUM DICAS NOVE, NON DICAS NOVA. Eadem ergo ratione, quâ ad exprimenda myſteria nomina Incarnationis, conſubſtantialis, tranſubſtantiationis, & ſimilia inventa ſunt, novæ quidem exprimentia, ſed non nova; Sic à Scholasticis novæ voces repertæ, ut clariùs exprimerent ea, quæ obſcuriora videbantur, & ſi audulenta hæreticorum inſidias meliùs detegerent.

XIX. Obſticiunt ſecundò. Theologia Scholaſtica plura tractat ſcitu non neceſſaria, & ad ſalutem ſuperflua; ergo inutilis eſt.

Si respondeas, Theologiam Scholaſticam plura quidem tractare, quæ non ſunt neceſſaria ſcitu populis, idiotis, ac mulierculis, quarum eſt in Eccleſia tacere; non tamen quæ non ſint neceſſaria ſcitu Doctõribus, & Paſtoribus, quorum eſt alios in Lege Domini erudire, parvuli panem frangere, & eos, qui contradicunt arguere, & omni poſcenti rationem ſatiſfacere. Iſtos enim multa ſcire decet, aliis ſcitu non neceſſaria, quia licet ad ſalutem non conducant, conducunt tamen ad profundiorẽ aliquarum veritatum intelligentiam, quæ valde juvant ad Fidei Myſteria adverſus oppugnatores tuenda, ipſosque Theologos promptos, & faciles reddunt ad explananda parvuliſ pertinetia ad fidem. Et de iſtis cum agit Scholaſtica, non proinde ſuperflui dicenda eſt, alioquin ſuperflua dicenda eſſet Scriptura Sacra, dum agit de Coivo Elię, de Cane Tobię, de Aſina Balaam, ac de aliis hitoriiis, quæ ſcitu non neceſſaria populis, & ad ſalutem ſpectantia non ſunt. Quod tamen nullus dixerit.

XX. Urgebis. Scholaſtici plerumque vanis, & inutilibus quaſtionibus merè Philoſophicis, quæ nec ad fidei illuſtrationem conferunt Tyroneſ ſuos diuiniùs detinent: ergo ſaltem ex hac parte ſuperflua eſt. Quia hinc rixæ, diſſidia, contentiones interminabiles, quibus inutiliter prorsùs teritur tempus, oriuntur, & propter hæc, quaſtiones ad fidem neceſſariæ omittuntur.

Dicam abſque metu: hoc non Theologia Scholaſtica, ſed aliquorum Theologorum vitio vitendum eſſe. Theologia enim Scholaſtica ſuo Profeſſori præſcribit res fidei. vel fidem quomodocumque ſpectantes accuratè, & exactè tractare ex ipſius fidei principiis, nempe Verbo Dei ſcripto, & tradito, Conciliis SS. PP., & ex iis per legitimum diſcurſum conſuſiones inferendo, advocando identidem in præſidium, & ſanularum rationum natu-

naturalem. Quod maxime confert ad mysteriorum elucidationem, hæresum extirpationem, & fidelium instructionem. Nam, ut egregie ait nos-
ter Melchior Canus lib. 9. cap. 4. *Rationem si à Theologia submoveas, Theologia ipsa, & rem amittit, & nomen.* Itaque citato libro distinguit triplex Theologorum genus. Unum eorum, qui usque adeo argumentis à ratione ductis addixerunt se, ut sive disputent, sive scribant, *Scripturam Sacram, Sanctorumque Patrum libros ne legisse quidem videantur: Qui parum illis dissimiles sunt, quos Euseb. lib. 5. histor. Eccl. c. ultimo commemorat, in tantum stultitia prolapsos, ut si quis sermonem de Scripturis proposuisset, illi è contrario proponerent utrum ille sermo, de quo agebatur, conjunctum an separatim genus syllogismi faceret: de quibus rursus Eusebius: Derelinquentes, ait, Sanctas Scripturas Dei, geometriam tractant &c. i. de fuisse olim nonnullos, qui rationem auctoritati præferentes, rem Theologicam syllogismis absolverint, Augustinus in epist. ad Dioscorum 56. (nunc 118.), Bernardus quoque ep. 189., testes locupletissimi sunt.* Hoc verò seculo fuisse etiam in Academicis multos, qui omnem fermè Theologia disputationem sophisticis, ineptisque rationibus transegerint, utinam ipsi non fuisset experti. Egit autem diabolus, quod sine lacrymis non quod dicere, ut, quo tempore adversus ingruentes ex Germania hæreses, oportebat Schola Theologos optimis esse armis instructos, eo nulla prorsus haberent, nisi arundines longas, arma videlicet levia puerorum. Ita irrisi sunt à plebisque &c. hucusque Canus citato libro cap. 1., ubi plura eruditè accumulatur à studio legenda.

Alter autem error illorum est (prosequitur cap. 2.) qui solis Sacrarum Literarum testimoniis, aut interdum scriptorum veterum omnia definiunt, ab argumentis natura baud aliter abhorrentes, quàm si essent Theologia adversa, & inimica. In hoc errore (in-

quit cap. 3.) fuit Lutherus, qui non modò asseruit, Philosophiam esse Theologo inutilem, & noxiam, verùm etiam omnes speculativas disciplinas errores esse, & infra: *Erunt enim ii, si ita res procedit, optimi, præstantissimi Theologi, qui plurima loca memoriâ tenuerint, & quod Jurisperitis objicitur, qui Elenchi fuerint librorum, & indices.* Id quod in Germania regnante Lutero accidit, ut sutores, qui novum testamentum memoria mandarunt; magni, & præclari Theologi haberentur: atque adeo muliercula, quoniam Evangelia, & Paulinas epistolas memoriter recitare poterant, omnium Academicarum Theologos ad disputandum provocarent, auderentque viris concurrere, non virgines, sed mulieres corruptissimas.

Concludit ergo Canus laudatus c. 4. Theologum debere divina quidem callere, sed philosophicam ratiocinandi formam non ignorare. Theologus enim, seu Christianæ Doctrinæ Professor, duabus quasi debet indutus esse personis. Unâ communi, ex eo quod homo, & rationis particeps est, alterâ propriâ, unde Theologica argumenta expectantur. Cumque nec humanarum rerum intelligentia divinarum cognitioni obsit, sed eam potius juvet, illique inserviat; nec divinarum cognitio humanarum intelligentiam extinguat, quia gratia non tollit naturam, sed perficit, nec natura gratiam repellit, sed suscipit; hinc nec Sacra Theologia humana rationem abjiciet, nec ratio humana Theologiam, & neutram debet in alterius propria functione Theologus rejicere. Ita verum à falsis Theologis fecernit Auctor laudatissimus.

XXI. Quoad rixas, contentionesque, ac dissidia, quæ inter Theologos fervent, ac scholas dividunt. Dico in primis, ista non concernere fidei veritates, in quibus Theologi cujuscumque scholæ unius labii sunt, & sermonum eorumdem. Vel ergo sunt circa modum Fidei Veritates explicandi, vel circa quæstiones à Fidei

Ve-

Veritatibus prorsus extraneas, & vanas, atque Theologiæ fini inutiles. Si primi generis, nihil officiant; sunt enim velut diversæ viæ, quibus ad eundem terminum pervenitur. Imò varietas ista opinionum plurimum juvat ad magis illustrandam veritatem. Dum enim quisque suas partes tueretur, & conquistis undequaque rationibus, suam sententiam firmare, omnique eruditionis genere excolere nititur, infiniti scientiarum Theauri in Ecclesiæ decus, & ornamentum cumulantur: Interimque Catholica Veritas stat veluti regina circumamicta varietate. Si autem secundi generis sint, eas Theologia non probat, sed Doctores in vanis quætionibus operam, ac tempus terentes, ut Theologos respicere designatur.

XXII. Miror tamen, cur tantà fronte hæretici Theologorum nostratum culpæ audeant diffensionem. Quis enim nescit, quantis rixis, quamque insensis contentionibus Protestantis hæretici invicem pugnent? Ex unica Lutheri schola prodire statim Anabaptistæ, Confessionistæ, Sacramentarii, qui in diversas Sectas potest divisi, mirum est, in quot frustra Lutheranam hæresim conciderint. Neque enim in levioribus tantum, sed & in præcipuis fidei articulis invicem dissident, ita ut sibi invicem hæretici nomen communicent. Hæreticos sacramentarios vocat Lutherus: Sacramentarii, e contra, Lutherum, plenum os diabolis habere reponunt. Quodque inconstantia caput est, una eademque Secta in fidei articulis sibi ipsi non conitat; quos ante credebat, postea discredens, adeo ut Georgius Saxonix Dux à Catholicis rogatus, quid ibi crederent Lutherani, responderit: *Quid nunc credam, scio: quid sequenti anno credituri sint, ignoro.* Illique aptari possit, quod de Ariano scripsit Hilarius lib. 2. ad Constantium. Periculosum nobis, atque miserrabile est, tot nunc fides existere, quot voluntates: & tot nobis doctrinas esse,

Tom. I.

quot mores... dum, aut ita fides seribuntur, ut volumus, aut ita esse, ut volumus, intelliguntur... sic plurima ceperunt esse fides, ne ulla sit.... annuas, atque mensuras de Deo fides discernimus &c.

XXIII. Obiiciunt tertii aliqui, quibus tota Theologia sita esse videtur in historica factorum narratione. (Hi enim, per hoc, quidd sciant, quo anno celebratum sit hoc, vel illud Concilium, quæ hæresis in illo damnata, memoriterque sciunt aliquos Scripturæ textus, Theologos eximios apud vulgus se venditare solent) Sic. Omnes hæreses à Philosophis, & Scholasticis inventæ sunt: unde Philosophi à Tertulliano hæreticorum Patriarchæ vocantur. Ergo Scholastica odibilis est.

XXIV. Et confirmant: Apostoli non habuerant Philosophiam, neque Dialecticam, qui tamen fuerunt veri Theologi: ergo Philosophia, & Dialectica non est Theologo necessaria, alias Spiritus Sanctus, qui Apostolos docuit omnem Veritatem, has etiam disciplinas docuisset. Quare Socrates lib. 1. hist. cap. 8. refert, quidd cum Dialectici quidam in Concilio Nicæno suis argutationibus omnia turbarent, multique verborum suavitate allicerentur, laicus quidam ex confessorum numero, recto, ac simplici præditus sensu, cum Dialecticis congreditur, hisque illos verbis compellavit. Christus, & Apostoli non artem nobis Dialecticam, nec inanem versutiam tradiderunt, sed apertam, ac simplicem sententiam, qua fide, bonisque artibus cūstoditur. Qua cum dixisset, omnes, qui aderant, admiratione percussi, ei assenserunt. Dialectici vero simplici sermone veritatis audito, posthac auiore animo ronquievire. Et Sanct. Augustin. lib. 1. de actis contra Felicem Manicheum, qui gloriabatur Manichæam docuisse initium, medium, & finem, & quomodo, vel quare factus sit Mundus, de cursu Solis, & Lunæ, aliisque rebus Physicis, respondit: Non

D

legi-

legitur in Evangelio, Dominum dixisse, misto vobis Paraclitum, qui vos doceat de cursu Solis, & Luna. Christianos enim facere volebat, non Mathematicos. Sufficit autem, ut homines de his rebus, quantum in schola didicerunt noverint, propter humanos usus. Ad usum igitur Theologiæ dialectica, vel humana ratio nihil Catholico proderit.

XXV. Respondeo retorquendo argumentum: nulla hæresis fuit, quam Scholastici viri Scholastico gladio non debellarint, & in dies non debellent; ergo scholastica necessaria est. Abusus ergo Scholasticæ nimium Philosophicis, & Dialecticis adhaerendo, & vanis ratiunculis fidem metiendo hæreses inveniit; ergone propter hoc damnanda erit scholastica, quæ non ex ratione naturali fidem metiens, ac regulans, sed potius rationem naturalem fidei ancillari faciens, hæreses debellat? Damnandus est abusus, laudandus usus. Nulla hæresis fuit, quæ ex Sacre Scripturæ abusu non prodierit; & Diabolus ipse, ut Christum deciperet, ad Scripturas confugit. Scriptum est enim, quia Angelis suis mandavit de te. Ergone Scriptura Sacra odibilis est, noxia est? Fallitur, vel fallere vult ita arguens, fallaciâ non causâ pro causa.

XXVI. Ad confirmat. respondeo ex laudato Cano lib. 9. loc. Theol. cap. 9. Primum retorquendo Argumentum: Apostoli, nec fuerunt grammatici, nec eloquentes; Apostoli hæreticis, Philosophis, Tyrannisque evincendis nullo studio, sed repente, ex tempore sapientissimè loquebantur, implentes in seipsis Christi promissum, Matt. 10. v. 19. Nolite cogitare quomodo, aut quid loquamini, dabitur enim vobis in illa hora quid loquamini; ergo si exemplum Apostolorum placet, Theologus non oportebit, ut grammaticam calleat, ut eloquentiam profiteatur, nec Theologiæ studium amplectatur; nihil consulto, & cogitatio meditatum, & præparatum inferat, quia sic sece-

runt Apostoli. Quod si hoc non valet, & temerariè quis ita discurreret, cur temerè non loquuntur, qui dicunt, Apostoli Philosophiæ operam non dederunt; ergo neque illi dare operam debent Theologi Christiani. Apostoli ergo, speciali Spiritus Sancti suggerentis dono, Theologi facti sunt, non humano labore, & studio; nos autem per discursum, & studium, ac laborem Theologiam comparamus, & proinde, ut res divinas attingamus, ut eas doceamus, ut ab impugnatoribus liberemus, ut satisficiamus omni poscenti rationem, & rebus naturalibus ad divinas ratiocinari sæpe indigemus, non quidem dialecticâ arte veritates fidei probando, ut dialectici in Concilio Niceno tentarunt, sed ostendendo veritates fidei Dialecticæ, & Philosophiæ verè principis non adversari, solvendo rationes oppositas. Quia in re audiendus est Clemens Alexandrinus lib. 1. Stromat. pag. 319., ubi docet, quod Philosophia, & Dialectica sunt cooperatrices, & adiutrices veritati inquirendæ sicut: visus, & auditus, & vox confert ad veritatem, mens autem est, quæ appositè, & naturaliter cognoscit... Perspicuitas itaque opem fert ad tradendam veritatem: & Dialectica, ne prosternamur ab hæresibus, quæ faciunt incursiones. Et est quidem per se perfecta, & nullius indiga Servatoris doctrina, cum sit Dei virtus, & sapientia. Accedens autem græca Philosophia, non veritatem facit potentiorè, sed debilem adversus eam efficit sophisticam argumentationem, & propulsans dolosas adversus veritatem insidias, dicta est vinca apta sepes, & vallus. Et quæ est quidem ex fide veritas, tanquam panis necessaria est ad vivendum. Quæ autem præcedit disciplina, est obsoniosissima, & beluaria; desinente verè cenâ, suavis placentula, ut ait Pindarus Thebanus. Hanc regulam non servabant, nec dialecticis relati à Socrate, qui dialecticis quibusdam paradoxismis Filii divinitatem probare conabantur, quare

quare bene illos arguit laicus ille. Myſteria enim Verbo Dei revelanti credenda ſunt, non ratiunculis ſuadenda. Eadem ratione Felicem Manichæum reprehendit D. Auguſtinus, quid enim ad Fidem Chriſtianam pertinet ſcire medium, initium, & ſuam, curſum Solis, & Lune? neuter tamen negat, Doctorem Chriſtianum Philoſophicis, & Dialecticis inſtructum eſſe debere, ut oſtendat Philoſophiam non contrariari fidei, & ſophiſticas rationes in contrarium valeat diſſipare.

Porro, ut de mente S. Aug. omnis dubitatio tollatur, præſtat, ipſum audite lib. 1. contra Creſconium cap. 13. Hæreticus iſte Donatiſta carpebat S. Doctorem, quod Dialecticus eſſet. Hunc ergo ita redarguit. Quid eſt aliud Dialectica, quàm periticia diſputandi? quod idèò aperitendum putavi, quia etiam ipſam mihi obijcere voluiſti, quaſi Chriſtiana non congruat veritati, & idèò me Doctores veſtri velut hominem Dialecticum, meritiſſè fugiendum potiùs, & cavendum, quàm reſellendum, revincendumque conſueverint. Quod cum tibi non perſuaſerint, nam te adverſum nos, etiam ſcribendo, diſputare non piguit: tu tamen in me dialecticam criminatus es, quò falleres imperitos, illoſque laudares, qui diſputando mecum congregari noluerant. Sed tu videlicet non dialecticè uteris, cum contra nos ſcribis? Ut quid te ergo in tantum diſputandi periculum projecisti, cum diſputare non noveris? aut ſi noſti, cur dialecticam criminaris, ita vel temerarius, vel ingratus; ut aut imperitiis, quâ vinceris, non refranes, aut doctrinam, quâ juvaris accuſes? Inſpicio ſermonem tuum, iſtum ipſum, quem ad me ſcripſiſti, video, te quadam copioſè, ornatèque explicare, hoc eſt eloquentè, quadam verò ſubtiliter argutèque differere, hoc eſt dialecticè, & tamen eloquentiam, dialecticè inique reprehendis. Si noxia ſunt, quare hoc facis? ſi non ſunt, cur arguis? Ita Donatiſtam urgebat Auguſtinus. Ita quoque urgeri poteſt Lutheranus, aut Calviniſta, Theologiam

Scholasticam damnans, quâ ipſe utitur: Si noxia ſunt, quare hoc facis? ſi non ſunt, cur arguis?

Et c. 14. poſtquam oſtendit, Dialecticam græcè dici artem diſputatoriam, ſicut Grammaticam artem litteratoriam, & dialecticum latinè dici diſputatorem, ſicut Grammaticum latinè litteratum, ſic ad Creſconium convertitur: Puto jam quid Apoſtolum diſputatorem non neges, etiamſi Dialecticum neges. Improbare ergo in vocabulo græco, quod approbare cogeris in latino, quid eſt aliud, quam indoctis prætentare fallaciam, doctis facere injuriam? Aut ſi, & diſputatorem Apoſtolum negas, qui tam affundè, tam egregiè diſputabat, nec græcè noſti, nec latinè: vel quod eſt credibilius, & in verbo græco fallis eos, qui græcè neſciunt, & in latino, qui nec latinè ſciunt. Quid enim eſt, non dico imperitiis, neque enim tu iſta non noſti, ſed omnino fallacius, quàm, cum audias, & legas tam multos, multiplicesque ſermonis Apoſtoli afferentes veritatem, convincentes ſalutatem, negare, quod ſoleat diſputare, cum hoc fieri, niſi diſputando, non poſſis?

DUBIUM IV.

Quid ſit, quidque requiratur, ut aliquid ſit dogma Fidei.

§. I.

Reſolvitur dubium.

I. Viro Theologo neceſſarium maxime eſt noſſe diſtinguere inter ea, quæ fidei ſunt, & fide tenenda; ea, quæ fidei ſunt, non tamen fide tenenda; & ea, quæ nec fidei ſunt, nec fide tenenda. Noto itaque, non eſſe idem, aliquid eſſe de fide, & eſſe ut de fide tenendum. Eſto enim omnia, quæ de fide tenenda ſunt, de fide ſunt, non tamen omnia, quæ ſecundum ſe de fide ſunt, inferunt, ea eſſe de fide tenenda. Nam ut aliquid

in se de fide sit, seu ad fidem pertineat, sufficit, ut à Deo revelatum sit; ut verò de fide sit quoad nos, seu ut tanquam de fide, & à Deo revelatum credere teneamur, requiritur insuper, ut nobis certò constet, à Deo revelatum esse, & tanquam revelatum nobis proponatur, non enim omnis revelatio statim acceptanda est, nec omni spiritui credendum, monentur Joanne epist. 1. cap. 4. v. 1. *nolite omni spiritui credere, sed probate spiritus, si ex Deo sint, quoniam multi Pseudo-propheta exierunt in mundum*. Ut ergo Theologiae candidatus in promptu habeat tutam aliquam regulam pro discernendis verè à falsò revelatis.

II. Dico primò, illud omne, & solum est de Fide Divina in se, quod est revelatum in Dei Verbo. Hæc regula traditur à D. Paulo Roman. 10. v. 17. *fides est ex auditu, auditus autem per Verbum Christi, seu Dei*; ergo id omne, & solum est de fide in se, quod est revelatum, & contentum in Verbo Dei; sicut illud omne, & solum ad fidem humanam pertinere dicimus, quod verbo hominis revelatum est. Quia verò (ut suo loco dicitur) verbum aliud est scriptum, aliud non scriptum, sed traditum; idèd illud omne, & solum de Fide Divina est, quod est revelatum per Verbum Dei scriptum, vel traditum.

III. Dico secundò. Ut aliqua veritas tenenda à nobis sit tanquam de fide, & ut à Deo revelata, requiritur ulteriùs, ut ab Ecclesia Catholica sit omnibus propòsita tanquam à Deo revelata, & ut Fide Divinà credenda. Sicut enim ut lex, aut mandatum Regis obliget subditos ad ejus observantiam, non sufficit, ut sit à Rege latum, sed requiritur, ut sit omnibus propòsitum, & intimatum, publicà formà, ut sic voluntas Regis omnibus certò sit nota: Ita, ut præceptum de credendo aliquid, ut à Deo revelatum, obliget omnes, debet omnibus proponi, & intimari, illud esse à Deo dictum, ut nemo de hoc dubi-

tare queat: Atqui hanc certitudinem habere non possumus, nisi per Ecclesiam Catholicam nobis proponentem veritatem illam, ut à Deo revelatam, & ita esse affirmantem; Cùm enim Deus per se ipsum id non faciat, non enim loquitur immediatè nobis, sicut olim loquebatur Patriarchis, Prophetis, & Apostolis, nobis aliud testimonium irrefragabile non superest in re dubia, præter dictum Ecclesiæ Catholicæ, cujus judicium in discernendo Dei Verbo ab omnibus verè fidelibus ut irrefragabile habitum semper fuit; est enim, teste Paulo 1. Timoth. 3. v. 4. *Columna, & firmamentum veritatis*, & de qua sola dixit Christus Matth. 16. v. 18., & porta inferi non prevalebunt adversus eam. 2 & rursus cap. 18. v. 17. *qui Ecclesiam non audierit, sit tibi velut Ethnicus, & Publicanus*. Hinc celebris D. Augustini sententia lib. contra epistolam fundamenti cap. 5. *Ego verò Evangelio non crederem, nisi me Catholica Ecclesia commoveret auctoritas*, & lib. 4. de Baptismo contra Donatistas cap. 16. Statutis duobus hominibus, qui versentur in errore Photini, quorum unus sciat, errorem illum esse contra fidem, & ab Ecclesia damnatum; alter vero exsimet, dogma Photini esse Catholicam Fidem, ait: *Istum nondum hereticum dico, nisi manifestatà sibi doctrinà Catholicà Fidei resistere maluerit, & illud quod tenebat elegerit. . . . Itaque in hoc, sola falsa opinio, in illo autem, etiam divisio corrigenda est*.

IV. Confirmatur: cum, ut supra dixi, non omnia, quæ in Verbo Dei continentur, sint expressè, & clare revelata, sed aliqua implicite, & perobscure; ut teneamur ex credere, dari debet Doctor infallibilis, qui ea explicet, atque revelata à non revelatis secerat, ne, ut ait Apostolus ad Eph. 4. v. 14. *simples parvuli fluctuantes, & circumferamur omni vento doctrina in nequitia hominum, in astutia ad circumventionem erroris*; aliàs Deus defuisset Ecclesiæ in necessariis: hic autem

antem Doctor, cui infallibilitas in Verbo Dei explicando promissa sit, alius esse nequit, quàm Ecclesia; ergo &c. Maj. patet exemplo hæreticorum Ecclesiæ magisterium rejicientium, soloque spiritu privato (ut aiunt) regi volentium; hi enim quot in Sectis, & errores divisi sunt? Testis pro omnibus una sit Anglia, in qua serè tot Sectæ dominantur, quot familiæ, ne dicam, quot capita.

V. Sed instabis cont. prim. assertum. Qui veritatem aliquam in Scriptura revelatam negaret, eo ipso hæreticus esset; ergo eo ipso, quodd aliquid in Scriptura revelatum sit, absque ulla Ecclesiæ propositione est de fide tenendum.

Respondeo primò nego antec. cum D. August. nuper relato *lib. 4. de Baptismo cap. 16.*, qui non audet pronunciare hæreticum, qui sequeretur errorem Photini, nisi manifestat à sibi doctrinâ Catholicâ Veritatis resistere maluerit, & qui *lib. c. epist. fundam. c. 5.* dicit, se non crediturum Evangelio, nisi Ecclesiæ Catholicæ eum commoveret auctoritas. Quod adeo verum est, ut idèd Evangeliiis Matthæi, Marci, Lucæ, & Joannis credamus; & de contra non credamus Evangeliiis Petri, Andree, Bartholomæi, & Thomæ, quia ad hoc nos commovet Ecclesiæ Catholicæ auctoritas proponentis, ut Dei Verbum illa, ista verò reprobantis.

VI. Respondeo secundò dist. antec.: si haberet animum permanendi in suo errore, quamvis Catholica Ecclesia contrarium illi manifestaret, concedo antec. si absque tali animo illud negaret, nego antecedens. Responsio est D. Thom. 2. 2. *quæst. 17. artic. 1. ad 3.* citantis D. August. *epist. 16. si qui sententiam suam quamvis falsam, atque pervertitam, nullâ pertinaci animositate defendunt, quarunt autem totâ sollicitudine veritatem, corrigi parati, cum invenerint, nequâquam sunt inter hæreticos deputandi.* Hucusque Augustinus, quia scilicet [subjungit D. Tho.]

non habent electionem contradicentem Ecclesiæ Doctrinæ.

VII. Objicies cont. secundum assertum. Ecclesia non potest facere de fide, quod de fide non est; ergo esse aliquid fide tenendum non dependet ab Ecclesia, sed unicè à divina revelatione.

Respondeo disting. consequens: non dependet ab Ecclesia, ut à causa faciente, ut sit de fide; conc. consequ., ut à signo ostendente, illud esse de fide, & habendum ut tale; nego consequentiam. Sicut sigillum non facit, diploma esse Regiâ manu exaratum, vel Regio verbo dictatum, sed solum est signum ostendens, & testificans, illud esse à Rege scriptum, aut dictatum: ita Ecclesia suo iudicio non facit, aliquod esse dictatum, aut revelatum à Deo, sed est signum testificans, illud esse à Deo revelatum, quod antea ut tale non habebatur. Hinc ait D. Thom. 2. 2. *qu. 1. art. 7.* quod licet plura expressè credantur à nobis, quæ ab antiquis non credebantur. attamen articuli fidei non creverunt quantum ad substantiam: sed quantum ad explicationem crevit numerus articulorum, quia quædam explicitè cognita sunt à posterioribus, quæ à prioribus non cognoscebantur explicitè.

Propterea neque sequitur, fore hæreticum, non qui resistit Dei Verbo, sed qui resistit Ecclesiæ iudicio. Non inquam, nam qui resistit Ecclesiæ iudicio, idèd hæreticus est, quia resistens Ecclesiæ iudicio, resistit Dei Verbo, Ecclesiæ iudicium commendanti *Matth. 18. v. 17.* qui Ecclesiam non audierit, sit tibi sicut Ethnicus, & Publicanus.

VIII. Sed urgebis palmarem hæreticorum instantiam: Si credendum. Scripturæ propter Ecclesiam, & rursum Ecclesiæ propter Scripturam, voluitur circulo vitioso fides nostra.

Respondetur negando antecedens: Circulatio enim, quæ ut argumentationis vitium ponitur à Dialecticis, tunc contingit, quando unum probatur

tur per aliud, & vicissim, in eodem genere causæ; non verò quando contingit in diverso causæ genere, sicut in præsentī. Credimus enim Ecclesiæ propter Scripturam, ly propter dicente causam à priori, cur Ecclesiæ credamus: Credimus autem Scripturæ propter Ecclesiam, ly propter dicente signum à posteriori ostensivum, quia si Ecclesia dicit, hoc esse revelatum, signum est, hoc esse revelatum, ideoque ut tale credendum.

Addo: quod sicut nullum est vitium, quòd duo testes, vel duo Prophetæ sese mutuo ostendant, & commendent, sicut Christus ostendit, & commendat Joannem, & Joannes ostendit, & commendat Christum; ita vitium non est, quod credamus Ecclesiæ propter commendationem Scripturæ, & Scripturæ propter testimonium Ecclesiæ; verum enim utriusque testimonium est, & utrumque à Deo venit.

IX. Peto demum ab adversariis: Quare credunt Evangelium, quod præfert nomen S. Matthæi, esse revera S. Matthæi, aliosque Sac. Scripturæ liberos esse Divinam Scripturam? Respondebunt, quia Ecclesia Catholica illos semper judicavit tales. Peto rursus: quare credunt iudicium Ecclesiæ hæc in re esse certum? non aliter respondere poterunt, nisi, quia illud esse tale adtestatur Scriptura. Ecce ergo & ipsi credunt Scripturæ propter Ecclesiam, & rursum Ecclesiæ propter Scripturam. Fortius. Peto à Theologo Protestantē: quare credis, sensum, quem Sacræ Scripturæ assignis, esse verum, legitimum, & à Spiritu Sancto intentum? Respondebis: quia spiritus privatus, qui cuique fideli præstò est, ita dijudicat, & mihi dicat. Iterum peto. Quare credis, hunc spiritum tibi adesse, & certò dijudicare? Respondebis: quia Scriptura hoc mihi adtestatur. En ergo tu credis Scripturæ propter spiritum privatum, & rursus spiritui privato propter Scripturam.

§. II.

Quibus notis dogma fidei discernatur.

X. **R**espondetur. Aliquid dogma fidei dici potest, vel immediate, quia nimirum in Verbo Dei scripto, vel tradito continetur; vel mediate, quia ex Verbo Dei huiusmodi necessario inferitur, & colligitur; tale enim genus conclusionum, quæ cum rebus fidei necessariò colligantur, saltem mediatè ad fidem pertinere dicendum est: Cum hæc sit natura connexorum, ut si superius concesseris, concedas, & inferius necesse sit; in bona enim consequentia non potest dari antecedens verum, & consequens falsum; etsi negaveris inferius illatum, superius etiam, ex quo inferitur, negare cogeris.

XI. Ex iis, quæ in Verbo Dei continentur, aliqua continentur adeo clarè, ut de iis nemo sanus dubitare queat, neque de sensu Sac. Scripturæ ambigere. Alia verò, cùm in Scriptura sint, ea tamen non ita apertè, quin de sensu Scripturæ dubitari possit. Insuper ex iis, quæ ex principiis fidei nascuntur, alia sunt, quæ ex solis principiis fidei inferuntur. Alia, ad quæ inferenda non fides sola sine externarum disciplinarum adiutorio, concurrat, sed ascitis, aut uno principio, aut pluribus lumine naturæ cognitis; & hæc, licet non eodem gradu, ad fidem tamen spectare dicenda sunt, quasi fidei appendices; nec ita adhærent fidei, ut sine illis fides omnino stare non possit; quare si quis in illis errat, exorare facit fidem, non perire. His stantibus, quæ notat Mag. Cano *loc. Theol. l. 12. c. 6.*

XII. Quantum ad ea, quæ in Verbo Dei scripto, vel tradito adeo clarè, & perspicuè continentur, ut à nullo, nisi negante Sacræ Scripturæ auctoritatem, negari possint, aut de vero Scripturæ sensu dubitari, ut sunt Christi Nativitas, Passio, Mors, Resur-

surrectio, Ascensus in Cælum, cæte-
raque in Symbolo Apostolorum con-
tenta, nulla regula præscribenda est,
cum per se pateat, immediatè ad fide-
m, imò ad fidei fundamenta perti-
nere. Quantum verò ad alia

XIII. Dico primò. Cùm Scripturæ
Divinæ sensus fuerit obscurus, ille
sensus, quem ei Catholica Ecclesia de-
derit, & præfixerit, habendus erit ut
germanus, ac legitimus sensus Scrip-
turæ, & ex isto conclusiones suas po-
terit Theologus certò deducere. Con-
stat ex dictis §. præcedenti. Si enim
Ecclesia Catholica habet certissimum
jus discernendi Verbum Dei à verbis
hominum, separando libros divinos à
non divinis, habebit quoque idem ius,
ut in Verbo Dei, separet, & discer-
nat sensum Dei à sensu hominum; ne
dicamus Ecclesiæ concessam fuisse Scrip-
turam, ut olim Ptolomeo Regi Ægyp-
ti, vel ut nunc Hebræis, qui habent
verba, non sensum; unde *Scriniarii*
Sacrorum Codicum lepidè vocantur ab
Augustino *lib. 12. contra Faustum cap.*
23. Caparii, in psal. 40. n. 14., & li-
brarii, unde in psal. 56. n. 9 Codicem,
inquit, portat Judæus, unde credat Chri-
stianus. Librarii nostri facti sunt, quo-
modo solent servi post dominos codices
ferre, ut illi portando deficiant, illi le-
gendo proficiant. Vel ut hæretici, qui
verba Scripturæ habent, eaque jactant,
sed non sensum, dicente D. Hieron.
in cap. 1. ad Galat. nec putemus, in-
verbis Scripturarum esse Evangelium,
sed in sensu: non in superficie, sed in
medulla, non in sermonum foliis, sed
in radice rationis. Ambas igitur res
Christi Ecclesia custodit, semperque
custodiet, & verbum, & spiritum ver-
bi, spiritum, inquam, veritatis pro-
missum à Christo, Joan. 14. v. 16. &
17., qui suggerat illi omnia, quido-
ceat illam omnem veritatem, & cum
illa maneat in æternum, quo aperiatur
illi sensus, ut intelligat Scripturas.
Neque enim præfata verba ad Aposto-
los solos dixit Christus, sed in Apo-
stolis toti Ecclesiæ, ut scilicet spiri-

tus ex Apostolis transfret ad Ecclesiam,
quam propagabant. Quòd si spiritus
iute certus intelligendi Scripturas da-
tus Apostolis ad Ecclesiam non tran-
sivit, si nullus modò est certus Judex
de vero sensu Scripturarum, quemam
forma Reipublicæ stultior esset? Nul-
lus enim dissidium finis, nulla es-
set ineunda concordia via, nullus fi-
delium consensus, nulla fidei unitas.
Rursus si Apostoli, non sensum Evan-
gelicæ doctrinæ, sed verba tantum
tradidissent, quomodo docuissent om-
nes gentes servare quæcumque fuerant
illis à Christo Domino commendata?
Qualis enim Evangelii prædicatio,
qualisve Doctrina absque intelligentia
quædam certe puerorum, aut
pistacorum est. qui sine mente dant,
accipiuntque sonum. Ergo Apostoli
verum Evangelii sensum tradiderunt.
At Apostolicæ traditionis testis, &
custos nemo fidelior est, quàm Eccle-
sia: ergo &c.

XIV. Dico secundò. Ecclesiæ Ca-
tholicæ nomine, non modò fidelium
omnium cætus; verum etiam, & præ-
cipuè, veniunt Ecclesiæ Pastores, &
Doctores in Concilio congregati. As-
sertio hæc suo loco probabitur, dum
ostendetur Concilium OEcumenicum
in definitionibus circa fidem errare,
non posse. = Pro tyronum verò noti-
tia in præfens sic ostendo. D. Paulus
ad Ephes. 4. docet, quod Ecclesiæ
Christus ipse dedit quosdam quidem.
Apostolos, quosdam autem Prophetas,
alios verò Evangelistas, alios autem
Pastores, & Doctores ad consumma-
tionem Sanctorum in opus ministerii,
in adificationem Corporis Christi, do-
nec occurramus omnes in unitatem spi-
ritus, & agnitionis filii Dei in virum
perfectum, in mensuram ætatis pleni-
tudinis Christi, ut jam non simus par-
vuli fluctuantes, & circumferamur
omni vento doctrinæ, in nequitiæ ho-
minum, in malitia ad circumventio-
nem erroris: super quæ verba dicit
S. Hieronym. (in cap. 4. ad Ephes.)
nec verò putandum, quod sicut in su-
perio-

„perioribus tribus, alios dixit esse Apo-
 „stolos, alios Prophetas, alios Evan-
 „gelistas; ita & in Pastoribus, & Ma-
 „gistris, officia diversa posuerit. Non
 „enim ait, alios autem Pastores, &
 „alios Magistros, sed alios Pastores, &
 „Magistros, ut qui Pastor est, esse de-
 „beat, & Magister. Nec in Ecclesiis,
 „quamvis Sanctus sit, Pastoris sibi no-
 „men assumere, nisi possit docere, quos
 „pascit. Vel certe aliter; ut unus,
 „atque idem præsens Ecclesiæ sit Pastor,
 „& Doctor, Pastor ovium, Magister
 „hominum. Posuit ergo Christus in
 „Ecclesiâ Pastores, qui simul essent
 „Doctores, ut pasceret gregem do-
 „ctrina in edificationem Ecclesiæ, ne
 „simus fluctuantes parvuli, & cir-
 „cumferamur omni vento doctrinæ,
 „ne circumveniamur errore. Si au-
 „tem omnes simul isti à Dei verbo
 „recederent, vel recedere possent,
 „quales posuisset Doctores? quomodo
 „essent in edificationem? Nonne post
 „eorum iudicium, si falli, & fallere
 „posset, essemus merito adhuc flu-
 „tuantes? = Dico sic: si nullum Ec-
 „clesiæ suæ Pastorem, ac Doctorem
 „daret Christus, sine dubio ovile suum
 „Pastor bonus defereret: atqui multo
 „melius Ecclesiæ est, nullos habere,
 „quàm habere errantes; ergo si Pasto-
 „res, & Doctores ad unum omnes in-
 „errorem caderent, oves suas Christus
 „vel maximè destituisset.

XV. Confirmo hoc: vel populus fi-
 „delis tenetur acceptare sensum, quem
 „Concilium OEcumenicum præfigit Sa-
 „cræ Scripturæ, vel potest etiam reji-
 „cere. Si tenetur acceptare, jam er-
 „rante Concilio errabit & populus.
 „Si verò rejicere potest, cur in illo
 „reiciendo errare populus non potest?
 „quod si non. Quis erit spiritus in-
 „fallibilis assistens populo, & non as-
 „sistens Pastoribus? Hoc esset, Pasto-
 „res regi, ac instrui à populo, non
 „populum à pastoribus. Si verò & po-
 „pulus errare potest, quamam stultior
 „Reipublicæ forma, in qua omnes cæ-
 „ci? nonne de Ecclesiâ repeti posset,

quod Christus de Phariseis *Matth. 23.*
24. Cæci sunt, & duces caecorum, ca-
 „ecus autem, si caeco ducatum præstet,
 „ambo in foveam cadunt? Esset equi-
 „dem Scriptura. Verùm scriptura nec
 „sequitur, neque intelligit, nec de se ip-
 „sa iudicium ferre potest. Quid ergo,
 „si nullus ejus intelligentiam, & sen-
 „sum certò absque timore erroris asse-
 „qui posset?

XVI. Observandum tamen est, ex
 „iis, quæ in universalibus Conciliis
 „proponuntur, id solum tenendum esse
 „de fide, quod est definitionis obje-
 „ctum, non verò definitionis motivum,
 „neque alia, quæ à Patribus in Con-
 „ciliis, vel dicta, vel laudata; neque ra-
 „tiones, quæ adducuntur, neque ea,
 „quæ ad explicandum afferuntur; imò
 „nec verba singula, quibus definitio ex-
 „primitur, nisi de verbo ipso decretum
 „fiat. Et ratio est, quia in decretis
 „Conciliiorum, id solum tenendum de
 „fide est, quod à Concilio proponitur,
 „ut à Deo revelatum in Scriptura.
 „Quare dum in Concilio Florentino de-
 „finitum fuit, Spiritum Sanctum etiam
 „à Filio procedere, non per hoc cen-
 „seri debet, definitum, & de fide, mo-
 „tivum inter alia ibi adductum, nemp-
 „pe, quod ex sola processione unius ab
 „alia habeatur realis distinctio inter
 „Divinas Personas; Et propterea sen-
 „tentia Scoti asserentis, quod etsi Spi-
 „ritus Sanctus à Filio non procederet,
 „adhuc ab illo realiter distingueretur,
 „contraria fidei non est. Similiter, dum
 „in II. Nicæno Concilio definitum est,
 „Angelos posse pingi, non proinde
 „censeri debet, definitum fuisse moti-
 „vum à Jo: Thessalonicensi ibi *ad. 5.*
 „allegatum ex Basilio, Athanasio, &
 „Methodio, quia nimirum Angeli non
 „sint omnino incorporales, quin imò op-
 „positum tenuit Concilium *ad. 4.* in
 „sua confessione, ubi vocat Angelos,
 „Sanctos, & incorporales; quique hodie
 „Angelos assereret, non omnino incor-
 „porales esse, temerariè saltem loque-
 „retur. Neque timendum, definitio-
 „nem Ecclesiæ falsam esse, licet moti-
 „vum

vum ab aliquo pro definitione adductum falsum sit. Nam Ecclesia, dum aliquid definit tanquam de fide, non innitur rationi humanæ, vel scientifico discursui, sed unicè divinæ revelationi, in qua dignoscenda certò à Spiritu Sancto regitur.

XVII. Hinc ad particularia descendendo resolvipoteſt primò: Hominem formaliter justificari iustitiâ sibi inhereente, non autem eâ iustitiâ, quâ Deus iustus est, tenendum esse de fide, quia hoc expressè definivit Ecclesia Catholica in Tridentino *sess. 6. can. 11.* Quòd verò hæc iustitia inherens sit habitus in specie qualitatis, esto sit sententia omnium ferè Theologorum, & hoc nomine à Concilio Viennensi commendetur, quod ipsam ut probabiliorẽ elegit, si aliquis contrarium opinaretur, temerariè quidem, non autem hæreticè loqueretur; cum hoc nec à Tridentino, nec ab ullo generali Concilio fuerit unquam definitum.

XVIII. Secundò, Christi Corpus esse verè, realiter, & substantialiter præsens in Eucharistia sub speciebus panis, & Sanguinem sub speciebus vini, Fides Catholica est, quia id expressè definitum est ab universali Ecclesia in Tridentino *sess. 13. can. 1.* Quòd autem species illæ vera, & physica accidentia sint, licet sit sententia omnium ferè Theologorum, approbata in Concilio Colonensi, & etiam in Constantiensi laudata, de Fide Catholica non est, quia in nullo generali Concilio definita; Verum quidem est, sine notâ, ac censurâ negari non posse. Similiter, quòd Christus in Eucharistia sit sedens, vel stans, longus, latus, sicut erat in Cruce, nedum de fide non est, sed omninò falsum, quia Christus ibi est sacramentaliter, non secundum modum naturalem: esse autem sedentem, vel stantem sunt affectiones, quæ solum conveniunt corpori, habenti modum existendi naturalem.

XIX. Tertiò, dari, seu existere Purgatorium, Tom. I.

gatorium, animasque ibi detentas fidelium precibus juvari, fidei dogma est, sancitum in Tridentino *sess. 15.* Quòd autem in Purgatorio ignis sit, quòd sit unius, ejusdemque speciei cum nostro, in quo loco sit determinatè, & quanto tempore duraturus, fidei dogma non est, quia nullibi definitum fuit; imò in Concilio Florentino Græci expressè negabant ignem in Purgatorio: & tamen Concilium *sess. ultimâ* definit, Purgatorium esse, nullâ facili mentione ignis. Porro, quia sententia asserens ignem in Purgatorio, est omnium Theologorum, imò D. Gregorii *lib. 4. Dialogorum cap. 19.*, & D. Augustini *l. 11. de Civit. Dei c. 16.*, & Scriptura sæpè nomine ignis exprimit Purgatorium, idèò opinio negans temeritatis censurâ non caret.

XX. Quartò, bonum, & utile esse, Sanctos cum Christo in Cælo regnantes invocare, de fide est definitum, videlicet in Tridentino *sess. 15.* quòd autem Sancti audiant preces orantium in terris, licet videatur necessariò sequi ex aliquo de fide, nimirum ex eo, quod bonum sit, Sanctos invocare, attamen formaliter, & expressè de fide non est, quia Tridentinum licet non ignoraverit, id etiam à Protestantibus negari, adhuc tamen hoc expressè non definivit.

Hæc, & alia similia facile inferre poterit Theologiæ candidatus, habens semper præ oculis, nihil esse potius immediatè de fide, quod non fuerit ab Ecclesia universali expressè propositum, ut revelatum in Verbo Dei.

XXI. Dico tertiò: si Sedes Apostolica alicuius Scripturæ sensum præfinieat, ille idem Veritas Catholica, verusque Scripturæ sensus censendus est. Fundatur hæc assertio in celebri illa conclusione: Sedem Apostolicam in fidei iudicio labi non posse, quam suo loco statuimus, contra quosdam, etiam Catholicos, perperam contra multantes. Quid enim claves habet Petrus, nisi ut librum clausum aperiat? E quid

quid quodd adversus hanc Petram ne porteq quidem Inferi prævalere quæant? quid quodd pro Petro oravit Christus, ne deficeret fides ipsius, quo fratrum vacillantem, nuntantemque fidem confirmaret? Porro ad Sedem Apostolicam, Romanam dico, omnium Ecclesiarum Episcopi quovis seculo in fidei causis provocarunt, ab illius ore fideles, fidei semper oracula petiere, illius iudicium Catholici omnes in religionis controversiis expectarunt.

Si ergo clarior legis interpret nulus est, quàm perpetuus Ecclesiæ usus, Ecclesia verò pro habendo vero, ac legitimo Scripturæ sensu, non ad Antiochenum, Alexandrinum, Constantinopolitanum, aut alium quemcumque Orbis Episcopum, sed ad Romanum Episcopum semper recurrit; quis dubitet, hunc esse, quem fidum Verbi Dei interpretem, & in quætionibus fidei Judicem, ac Magistrum, post Petrum, Christus reliquit? Certè aut hic est, aut nullus est: idèdque, qui Romanum Pontificem in fidei controversiis iudicem negant, nulum alium ponunt.

XXII. Neque timendum est, ne Judex iste, dum Judicem universalem se gerit, proponendo universali Ecclesiæ sensum Scripturæ, & aliquid, ut à Deo revelatum, omnes partes agat, quas agere debet, ut certum iudicium proferat. Quidquid enim sit de ipso, dum suam privatam opinionem proferat, vel quasi præteriens loquitur, dum tamen constanti iudicio, fixoque decreto, ut Judex, Pastor, & Doctor aliquid toti Ecclesiæ tenendum, tanquam revelatum proponit, anathemate feriens, qui contradixerit, adèd certum est, ipsum nec falli, nec fallere, ut oppositum timere, idem sit, ac de divino Christi promisso formidare. Quemadmodum enim si Christus Petro dixisset: *ego rogaui pro te, ne deficiat caritas tua*; certò certius intelligeretur, diligentiam, curam, vigilias, preces, cæteraque auxilia opportuna Petro impetrasse, quæ

sunt ad caritatis conservationem necessaria: ita cum dixit: *ego rogaui pro te, ne deficiat fides tua*; procul dubio intelligimus, id se à Patre suo consecutum, ut, quæ ad rectum iudicium de fidei quæstione oportere, ea omnia adessent Petro, sive à Deo immediatè, sive per homines habenda essent. Si enim Deus promississet anno sequenti frugum abundantiam, promississet etiam, agricolas semina terræ mandatueros, ut oportet; ergo dum Petro, ejusque Successoribus promissit spiritum veritatis, fidem indefectibilem ad confirmandos fratres, promissit etiam illis, nihil defuturum eorum, quæ ad talem fidem tutò consequendum necessaria sunt. Etenim, si semel hæreticis hanc licentiam permittimus, ut in quæstione vocent, num Ecclesiæ Judices eam diligentiam, & curam adhibuerint, quæ opus erat, ut quæstio ad normam Verbi Dei finiretur, quis non videt, omnia hæcque definita, sive à Summis Pontificibus, sive à Conciliis Oecumenicis (idem enim quoad hoc de iis sermo est) labefactari? sed de hoc latius suo loco.

Hoc unum adverto, me hætenus locutum fuisse de Sede Apostolica, seu de Pontifice, ut Doctor universalis est, & in causa fidei: non vero de Personâ, nec in quætionibus puri facti non connexi cum dogmate, nec concernentibus fidem, aut mores. Quare ea, quæ Summi Pontifices, ab aliquo consulti in casibus particularibus, per decretales corpori juris insertas, responderunt, non ob hoc præcisè, ut dogmata fidei habenda sunt, neque ex iis Theologus potest necessarium conficere argumentum. Sed de hoc alibi.

XXIII. Dico quartò. Consentiens, eademque omnium SS. PP., conspiransque sententia circa Scripturarum intelligentiam, ipsissima est Fidei Catholicæ Veritas; quia concors omnium Patrum intelligentia indivisa est ab intelligentia universalis Ecclesiæ, quam

quam (ut diximus) esse testem indu-
biam de vero sensu Scripturarum, ne-
mo ambigere potest. Id enim docet
Tridentinum *sess. 4.* in decreto de edi-
tione, & usu Sac. Lib. Et merito. In
his enim, quorum cognitio non per-
tinet ad populum, Ecclesiæ fides, fi-
des maiorum est. Cum igitur verum
Scripturæ scrutari sensum, reclamque
ex ipsa haurire intelligentiam, non
spectet ad plebem, nisi Lutheranorum
insaniam sequi velimus, Patrum cer-
tè nostrorum in libris sacris intelli-
gentia, Ecclesiæ ipsissima intelligentia
censeri debet. Si itaque omnes Patres
in Sacris Litteris intelligendis erra-
runt, Ecclesia proculdubio erravit:
Cumque Ecclesiæ iudicium, Christo
præcipiente, sequi debeat populus in
his maximè, de quibus iudicare ad
ipsum non spectat, erraret populus,
idque Christo præcipiente. Non er-
go. Sed sicut ab omnibus Patribus
communi, unaque mente sentientibus,
Dei Verbum recedere potuisse nefas
est credere, ut videlicet omnes ali-
quam Scripturam pro canonica habe-
rent, quæ canonica non esset; aut è
diverso aliquam communi consensu
exploderent, quæ canonica esset: Ita
nec veram intelligentiam Verbi Dei
potuisse simul ab omnibus recedere,
fas est cogitare. Utrumque enim Ec-
clesiæ promissum est, & spiritus, &
verbum; & si utrumlibet omnibus SS.
Doctoribus defecisset, Ecclesiæ pariter
defecisset. Quoddè verò, & verbum.,
& spiritus intelligentiæ verbi in Ec-
clesia conjuncta sint, testatur *Isaias*,
50. v. 21. his verbis: *spiritus meus,*
qui est in te, & verba mea, quæ pos-
ui in ore tuo, non recedent de ore tuo,
& de ore seminis tui amodo usque in-
sempiternum. Semen vero Christi Ec-
clesiam esse, fidelium negabit nemo:
ergo ab Ecclesia, & consequenter à
cunctis Sanctis colluctivè sumtis, abesse
non possunt verbum, & spiritus
intelligentiæ verbi.

XXIV. Si tamen non omnes Patres
concordes sint, sed aliqui unum in-

terpretentur, alii reclamant, licet hi
pauciores sint, auctoritas priorum non
præstat Theologo firmum argumen-
tum, sed solum probabile. nisi maiori
parti Patrum iudicium Ecclesiæ u-
niversalis accesserit. Sic auctoritas Pa-
trum asserentium, venientes ab hære-
ticis, & ab istis baptizatos, non esse
rebaptizandos, quæ olim argumen-
tum probabile consuebat, postquam
Ecclesia suo iudicio hoc statuit, &
oppositum reprobat, firmum exhibere
cepit argumentum.

Auctoritas item Patrum, etiam si
omnium, in eo genere quæstionum.,
quæ ad fidem minimè pertinent, fi-
dem quidem probabilem facit, sed
non certam. Quare Vincentius Liri-
nensis *comment. 1. num. 28.*, ait: *San-*
ctorum Patrum consensio, non in omni-
bus Divina Legis quæstionculis, sed so-
lum certè præcipuè in fidei regula, magno
nobis studio, & investiganda est, & se-
quenda. Sed de hoc fusius infra.

XXV. Dico quintò. Illud, ut do-
gma fidei ex Apostolica traditione de-
scendens habendum est, quando Eccle-
siæ usu, & Doctrinâ consecratum; vel
Conciliorum, aut Summorum Ponti-
ficum auctoritate; vel certè Sanctorum
omnium concordia, ac constanti asser-
tione, tale esse declaratur: supponit
hæc assertio, dogmata fidei non ex so-
la Scriptura, sed ex Apostolica tradi-
tione petenda, quod suo loco osten-
dam. Quæ verò Christi, & Aposto-
lorum traditiones sint, non ex alio
testimonio, quàm Ecclesiæ peti debet.
Hoc autem innotescere aliunde non
potest, quàm ex Concilio, vel Sedis
Apostolicæ decretis, ac Sanctorum
Doctorum consensu. Cum ergo neque
Ecclesia, neque Concilium generale,
neque Sedes Apostolica, neque Sancti
omnes possint in fidei iudicio falli;
certè quodcumque nobis fidei dogma
tradiderint, si in Sacris Litteris non
habetur, Christo, Apostolique tra-
dentibus in Ecclesiam venisse creden-
dum est, & eodem gradu habendū, n.
ac si Scriptura patenter illud trade-

ret; idèdque ex illo firmum argumentum sumere poteit Theologus.

XXVI. Dico sextò: si Scholastici Theologi aliquam conclusionem firmam, stabilemque statuerint, omnesque uno ore probarint, & perpetuò docuerint, ut certè ex principiis fidei deductam, estd illa ut fidei dogma immediatè habenda non sit, mediatè tamen, & quasi Catholica veritas reputabitur. Explico me. Fides Divina, estd non immediatè, mediatè tamen versatur circa eas conclusiones, quæ per evidentem, & necessariam consequentiam ex articulis fidei colliguntur; quare necesse est, ut infidelitas mediatè quoque circa conclusiones illis contrarias versetur. Cum enim fieri non possit, ut universi Scholæ Theologi in certis quibusdam præfinitionibus Theologicis errent, sicut ne in fide quidem, quodd eorum error, error esset Ecclesiæ, utpote, quæ ad huiusmodi res discernendas, non alios, quàm Theologorum oculos habeat, qui si fallerentur, totum Ecclesiæ corpus in suum traherent errorem: inde fit, ut eorum in rebus fidem consequentibus concors sententiâ, sententia etiam sit Ecclesiæ, & qui illis refragaretur, repugnaret Ecclesiæ, & si ex ignorantia loqueretur, quia vel illationis vim non perciperet, etsi perspicuam, vel aliquam præmissam naturalem negaret, estd non de infidelitate suspectus, de stultitiâ tamen accusandus esset. Qui verò pertinaciam adderet errori, ut in fide plurimum claudicans, & ut proximè, & quasi infidelis reputaretur, ut infra. Ecclesia enim, tametsi intelligit, ejusmodi conclusiones non à fide tantum, sed ex principiis quoque naturæ pendere: quia tamen non putat, hominem rationalem, et, quæ rationi perspicua sunt, & manifesta negare; eum, qui illas negaret, præsumit non in ratione naturali, sed in fide claudicare. Hæc quoad præsens compendio sufficiat prælibasse, fusiùs enim pro rei dignitate tractabimus de locis Theologicis agentes.

6. III.

Quid sit Doctrina purè Theologica.

XXVII. Hoc desideratur ad completam hucusque dictorum notitiam, explicare nimirum, quid sit Conclusio verè Theologica. Dico ergo: Doctrina, seu Conclusio verè Theologica, est veritas ex revelatis à Deo, seu ex duabus, vel saltem ex una promissa de fide per legitimam consequentiam, & discursum deducta; ut patet in hisce ratiociniis; *Omnis homo habet liberum arbitrium; sed Christus est homo; Ergo Christus habet liberum arbitrium; & in isto 2 omnis homo est risivus, sed Christus est homo; ergo Christus est risivus.* In quorum utroque conclusio illata est veritas Theologica, & in primo inferitur ex duabus præmissis, quæ sunt ambæ de fide in secundo autem ex uno principio de fide, & altero naturali, & certo. Dico certo, quia veritas, quæ ex uno principio revelata, & altero naturali solum probabili deducitur, non est propriè, & in rigore Theologica; ut in hoc exemplo: *Omnis hostia ritè consecrata continet verè, & realiter Sacrum Christi Corpus; sed hæc hostia per illum Sacerdotem ostensa, & elevata est ritè consecrata; ergo hæc hostia verè, & realiter continet Christi Corpus:* ubi conclusio estd procedat ex principio de fide, nempe majori propositione, quia tamen minor propositio est solum probabilis; enm probabile tantum sit, illum Sacerdotem talem hostiam ritè consecrasse, cum non sit certum, nullum defuisse ex requisitis ad validè consecrandum. Cumque aliàs ex regulis dialecticæ conclusio sequi debeat debiliorem partem, idèd illa conclusio non est Theologica, neque scientifica, quia non omnimodè certa, sed potiùs prudentialis, quia certa solum moraliter; sufficiens tamen, ut illam teneamur absolute adorare.

XXVIII.

XXVIII. Ex hoc inferitur primò, Conclusionem Theologicam deductam ex duabus præmissis, unâ de fide, & alterâ naturali, esse minoris certitudinis, quàm sit illa, quæ ex duabus de fide deducitur; majoris tamen, quam sit quæcumque alia Conclusio non-Theologica. Ratio prioris partis est, quia eò conclusio certior est, quò certiora sunt principia, ex quibus fluit, cum ab iis suam certitudinem sumat; sed duo principia, quorum utrumque de fide est, certiora sunt, quam duo, quorum unum de fide sit, & alterum naturale; ergo &c. Ratio verò secundæ partis est, quia Conclusio Theologica procedens saltem ex una præmissa, quæ sit de fide, est saltem virtualiter, seu in sua causa, revelata, Conclusio verò non Theologica nullo modo est revelata: sed conclusio virtualiter revelata certior est eâ, quæ nullo modo revelata est; quia principia revelata, quibus nititur illa, certiora sunt principiis naturalibus, quibus nititur ista, utpote sumentia suam certitudinem à Divina Veritate, & veracitate, quæ summa est, & à qua omnis veritas naturalis derivatur; ergo &c.

XXIX. Inferitur secundò, Conclusio-nem Theologicam non esse tantæ certitudinis, quantæ est propositio de fide. Tum quia propositio de fide est principium, unde Conclusio Theologica sumit suam certitudinem, principium autem (ajunt logici) certius est, quàm conclusio, secundum axiomam: *propter quod unumquodque tale, & illud magis*. Tum, & maximè, quia motivum, seu ratio certitudinis in propositione de fide est dictum, seu locutio divina, quæ omni certitudine certior est, cum nil certius sit, quàm esse verum id, quod Deus dixit, qui est prima, & summa veritas, & veracitas, quæ nec falli, nec fallere potest. Certitudo autem Conclusionis Theologicæ fundatur in dependentia, & connexionione cum principiis de fide, ex quibus per legitimam consequen-

tiam deducitur, quæ longè minus certa est, quàm sit certa divina locutio.

XXX. Dices tamen: hæc propositio *Christus habet duas voluntates* est conclusio Theologica deducta per hunc discursum: *suppositum habens duas naturas, habet duas voluntates; Christus est suppositum habens duas naturas, divinam, & humanam; ergo Christus habet duas voluntates*: & tamen hæc conclusio est tantæ certitudinis, quantæ propositio de fide, cum sit fide tenenda; ergo conclusio Theologica est tantæ certitudinis &c.

Si dicatur, dictam propositionem habere certitudinem fidei, non quatenus est conclusio Theologica deducta per discursum ex præmissis de fide. sed quia aliundè, & ipsa est propositio de fide definita in VI. Synodo OEcumenica contra Monothelitas, tanquam revelata in Verbo Dei.

XXXI. Contra. Saltem ista propositio *Christus est risurus* est conclusio merè Theologica, & nullibi definita ut de fide, & tamen certitudine fidei certa est, ut, qui illam negaret, esset hæreticus.

Respondetur, qui dictam propositionem negaret, non fore hæreticum, quia illam immediatè, & præcisè negaret, sed quia negando hanc propositionem *Christus est risurus*, præsumeretur negare istam alteram: *Christus est homo*, quæ de fide est, & ex qua naturaliter sequitur illa.

XXXII. Adhuc tamen urgebis. Ista propositio: *Christus mortuus est pro me*, est conclusio Theologica illata ex ista de fide: *Christus mortuus est pro omnibus*: & tamen est certa certitudine fidei, dicens Paulo ad Galat. 2. v. 20. *In fide vivo Filii Dei, qui dilexit me, & tradidit semetipsum pro me*: ergo &c.

Resp. negando majorem. Hæc enim propositio *Christus mortuus est pro me* non est conclusio merè Theologica, sed articulus Fidei; licet enim videatur inferri ex ista *Christus mortuus est pro omnibus*, iste tamen discursus non est.

est verè illativus, sed solum explicativus; sicut enim iste discursus: *Omnis homo est rationalis; ego sum homo; ergo ego sum rationalis* non est discursus verè illativus, sed solum explicativus, quia significatum huius propositionis: *Ego sum rationalis* continetur in ista *omnis homo est rationalis*; ita in præfato discursu. Hæc enim propositio *Christus mortuus est pro me*, continetur quoad suum significatum in ista *Christus mortuus est pro omnibus hominibus*. Quare, qui ei assentitur, non assentitur ratione connexionis cum ista revelata; sed quia putat, Deum revelando Christum mortuum esse pro omnibus: revelasse etiam esse mortuum pro singulis hominibus, & consequenter etiam pro se.

XXXIII. Ex dictis liquidò apparet, quid sit quæstio, & conclusio verè Theologica (pro eodem enim accipio quæstionem, & conclusionem. Dum per interrogationem electa in controversia ponitur, quæstio est, dum per argumentationem colligitur, & resolvitur, conclusio) non omnes enim quæstiones, quæ à Theologis hodie agitantur in scholis, Theologicæ sunt. Inutiles illæ, & ab humano, ac luxurianti ingenio excogitatæ, quæque à Theologicis principiis alienæ sunt, neque ullam cum illis connexionem habent, etsi plerumque impleant Theologorum scripta, & in disputationibus principem locum obtineant, ad Theologiam minimè spectant; quæ cum Dei Doctrina sit, & ex dictatis à Deo procedat, solidas, aptas, utiles quæstiones, ut suas admittit; ineptas, vanasque, & inutiles rejicit ut extraneas. *Ego sum Deus tuus* (inquit Isaias c. 48. v. 17.) *docens te utilia*. Theologia ergo inutilia non colligit: quin super fidei fundamentum, quod ab Apostolis positum est, aurum, argentum, lapides preciosos superedificat 1. Cor. 3. v. 12. Unde qui ligna, fenum, & stipulam coecervant, in non ex Theologia, sed ex luxuriante ingenio faciunt.

XXXIV. Neque tamen solas eas quæstiones ad Theologiam spectare putato, quæ ex principiis revelatis immediate resolvuntur. Aliæ enim sunt quasi Theologiæ appendices, quæ explicandi gratiâ illas, quæ verè, & propriè Theologicæ sunt, appositæ, & graviter adjunguntur, quæ jure quodam, vel similitudinis, vel propinquitatis, vel etiam ordinis, Theologiæ non absurdè vocari possunt; sive quia inventæ sunt ad explicanda, & quodammodo suadenda Theologiæ principia contra ea negantes, vel revocantes indubium; sive, quia aptæ sunt ad clariùs intelligendas Theologicas veritates. Quæ res D. Thomam, ceterosque Theologos adduxit, ut in quæstionibus Theologicis quærant de existentia Dei, aliisque, quæ potius deberent supponi; & ne unumquidem principium in Theologia adsit, quod in quæstionem Theologi non vertitur, ut si à quopiam fuerit negatum, qui sortè alia principia concesserit, parati sint ex his, quæ concesserit hominem evincere. Hoc enim scientiæ supremæ privilegium est, sua principia, nedum supponere, sed, si oportuerit, probare, explicare, tueri. Quod idem circa conclusiones inde deductas multò magis præstare illi conceditur, si utile, ac expediens judicaverit: de quo monitum velim Theologiæ candidatum, ut utilia ab inutilibus possit seernere.

XXXV. Quæstionum ergo Theologicarum, ex Cano lib. 12. cap. 5. *de locorum usu*, duo sunt genera; alterum cognitionis, serviens nimirum contemplationi; alterum actionis concernens ea, quæ agenda sunt. Primi generis sunt illæ, quarum finis est cognitio, & scientia, ut si quæramur: an Pater, & Filius sint unum principium Spiritus Sancti, vel duo. Num Divinæ Personæ distinguantur absolutis, an relativis. Secundi generis sunt, quarum finis est actio, & salus hominis: ut; an Pœnitentia sit ad salutem necessaria ut medium, an ut præceptum.

ptum. An Sacramenta novę Legis gratiam conferant, & virtutes. Quęstiones, ad cognitionem spectantes, sunt quadruplicis generis, ut cū de Deo, vel Angelo, aut anima rationali quęritur, an sit, quid sit, qualis sit, aut cur sit. Quęstionum verd actiones concernentium duo sunt genera; unum ad salutem necessarium, alterum utile tantū. Prioris generis sunt; an si honor Christi periclitetur, aut salus etiam spiritualis proximi, homo Christianus teneatur viam prodigere; an detur pręceptum de Baptismo subeundo. Posterioris verd generis, cum quęritur: an aqua lustralis diluat peccata venialia, tollatque penas temporales vi suā, vel (ut ajunt) ex opere operato; an solum ex opere operantis, ejusque merito. Num Ecclesię Sacramentum ex attrito faciat contritum; & an recedente fictione, suum effectum conferat, sicut Baptismus, & Penitentia. Quarum quęstionum plena est D. Thomę summa. Theologus enim non semper de necessariis disserit, sed quandoque etiam de his, sine quibus salus, religioque constat.

XXXVI. Quęstiones insuper Theologicę, sive ad cognitionem, sive ad actionem spectantes, alię naturales sunt, quarum cur ita sint, naturalis ratio reddi potest. Alię supernaturales, quę ex supernaturalibus tantum principiis definiuntur. Alię medię, quę partim ex supernaturali, partim ex naturali principio pendent. Primi generis est quęstio: num *Deus sit ubique*: num *immutabilis*: num *animus hominis immortalis sit*: quorum probationes ex Sacris Litteris esto petere liceat, quā ratione ad fidem utique pertinent, sunt tamen etiam lumine naturę clarę, & evidentes; ideoque fidei quęstiones per se non sunt, sed fidei quasi appendices. Secundi generis est hæc: *an omnes mortui simus*: quam Paulus hac argumentatione definit: *Si pro omnibus Christus mortuus est, omnes mortui sumus; at pro omnibus*

mortuus est Christus; ergo *omnes mortui sumus*. Item ista: *an omnes resurgemus*. Quam Apostolus terminat sic: *Christus resurrexit*: ergo & *nos resurgemus*. Terti generis ista est: *Num Christus sit visus*: num habeat duas voluntates, duos intellectus, quę ex principio naturali, & supernaturali finiuntur, ut supra dictum est.

XXXVII. Alia etiam Theologicę quęstionis cujuscumque generis divisio addi potest. Aliquę enim sunt, pro quarum veritate Theologus etiam cum capitis discrimine stare debet, quia sunt veritates ad fidem spectantes, sicut istę: *An Christi anima simul, atque verbo conjuncta fuit*, *Deum clarę viderit*; & *an in aliquo ex locis inferis Purgatorium sit*, ubi *fideliū animę peccatorum penas luant*. Alię verd, quę in utramque partem, & ignorari, & negari sine fidei jacturā possunt; Quarum plura exempla profert S. August. lib. 2. de peccato origin. contr. Pelag. cap. 23. & alibi sæpē, ut: *Cum quęritur qualis, vel ubi sit Paradisus*: ubi constituit Deus hominem quem formavit ex pulvere, cum tamen illum esse Paradisum fides Christiana non dubitet. *Vel cum quęritur, ubi sit nunc Elias, vel Henoch*, an ibi, an alicubi alibi, vel cum quęritur, utrum in corpore an extra corpus in tertium Cęlum sit raptus Apostolus, an viderit clarę Deum, & similia, quę in utramque partem salvā fide resolvi possunt.

XXXVIII. Officium itaque Theologi erit sæpē dispicere, quam quęstionem sit versaturus, & identidem se interrogare, cujus generis illa sit, & maxime, an pręter fidem illa sit, an potius ad fidem, religionemque pertineat, ut quę ad fidem minimō necessaria est, sobrię, ac sine animi contentione pertractet, totusque incumbat illi stabiliendę, quā Fides, & Religio juvari possit. Hoc faciet, si nomen Theologię secum ipse reputet, titulumque suum, hoc est Theologi, frequenter legat, sciatque, nullam sibi quęstionem addiscendam, nisi quę

ad

ad veram, quæ supra naturam est, Christi, Apostolorum, & Prophetarum, Philosophiam referatur. Hujus considerationis immemores quidam, innumeris in questionibus, præsertim Dialecticis, Physicis, Metaphysicis explicandis, importunissimi, longissimi sunt; in quaestionibus verò Theologiæ propriis aded frigidi, & parci, ut vix eas attingant; Hoc dico, non quia quæstiones istas omnino à Theologis externandas putem. Est enim animorum, ingeniorumque exercitatio non modò acuminis plena, sed etiam ad Theologiam scholæ valdè utilis, sed ne in istis Theologus aded immoretur, ut in eis tractandis, quasi sibi finem constituat. Sic S. Augustinus *lib. 2. de Genesi ad litteram cap. 9. & 10.* varias quæstiones, in quibus Manichæi immorabantur, quasi præteriens, solvit, quia illis ineundis, atque tractandis, neque Episcopo temporis satis erat, neque illis, quos ad salutem, & Sanctæ Ecclesiæ necessariam utilitatem, cupiebat informari; hoc facto reprehendens illos, qui in iis excitandis, atque solvendis, longa, & rebus salubribus impendenda, temporum spatia occupant. Hoc ego exemplo munitus, in iis quæstionibus, quæ vel Theologiæ verè sunt, vel ad eas explicandas conferunt, totus ero, alias in scholis tractari solitas, strictè, & quasi præteriens tangam. Nec enim iis consentio, qui scholæ perpetuam invidiam constantes, spargunt, controversias circa Aristotelem exortas, esse disquisitione Theologi prorsus indignas, cum, si quæ in Cicerone erant ambigua, ea non sit dedignatus explicare S. August. *lib. 2. de ordine cap. 15.*



DUBIUM V.

De variis errorum gradibus.

§. I.

Quædam præmittuntur.

I. **P**ost completum scrutinium do-
veritatibus fidei, vel quæ si-
dem quomodolibet tangunt,
ad eandemque reducuntur, instru-
endus est Theologiæ candidatus, de er-
roribus illis oppositis. Sed quoniam
errores eorum, qui de fidei veritati-
bus prævè senserunt, non in eodem
gradu esse accepimus à Concilio Con-
stantiensi *sess. 8.* hos omnes errorum
gradus paucis exponere dignum erit.
Et sanè sicut læsiones corporum, aliæ
sunt mortales, quæ immediatè aufer-
unt vitam, aliæ verò, quæ licet non
auferant vitam, homo tamen per eas
male se habet, & disponitur ad cor-
ruptionem, vel in toto, vel in parte;
sic errores, & propositiones lædentes
fidem, aliæ sunt, quæ immediatè il-
lam destruunt, & sunt illæ, quæ ma-
nifestam continent hæresim, aut infi-
deitatem, aliæ verò, quæ licet illam
immediatè non destruunt, ad fidei cor-
ruptionem tamen disponunt.

II. In dignoscendis autem erroribus, & propositionibus fidei quomodocumque nocivis, & earum gradibus, censuræ Ecclesiæ standum est. Non minus enim infallibilis debet esse Ecclesia in rejicienda doctrina non sana, & Fidei Catholicæ quomodocumque nocivæ, quàm in admittenda doctrina sana, & fidei consona; sed propter primum ad dignoscendum, an aliquid sit à Deo revelatum, vel Divinæ Fidei consonum, recurrendum est ad Judicium Ecclesiæ, ut dubio præcedente statuimus; ergo ob secundum ad rejiciendum aliquid, ut contrarium revelatis à Deo, & Fidei Catholicæ nocivum, expectandum est judicium, & censura Ecclesiæ. Sic ut, quem-

quemadmodum non est tenendum, aliquid esse revelatum, & de fide, donec Ecclesia, ut tale illud proposuerit, ita neque tenendum erit, aliquid esse contrarium fidei, donec Ecclesia sua censurâ illud non notaverit. Censura enim est nota, quâ Ecclesia præhabito riguroso examine, inurit aliquas propositiones non continentes doctrinam sanam circa materiam fidei, seu fidem Catholicam aliquomodo legentes.

III. Quod si dixeris, doctrinam aliquam esse nocivam fidei ex hoc solo, quod sit contraria Verbo Dei: ergo ex hoc præcisè absque ullo respectu ad Ecclesiæ judicium, aut criterium, nociva fidei censenda erit.

Nego consequentiam: esto enim ex sola oppositione cum Verbo Dei doctrina aliqua evadat fidei nociva, ut tamen à nobis tanquam talis habeatur certò, ad Ecclesiam respicere debemus. Vel enim contrariatur veritati clarè revelatæ, ut sunt veritates ad salutem prorsus necessariæ, & sic doctrinam illis contrariam tuò dignoscimus per Ecclesiæ constantem, ac perpetuam consensionem. Vel non ad eò clarè constat, eam esse à Deo revelatam, nec de traditione satis compertum est: idèd ad hoc certò dignoscendum, ad Ecclesiæ judicium, & criterium Catholicis confugere debet, & ex hoc doctrinam contrariam dijudicare. Hinc Sanctus Augustinus lib. 2. *contr. Criseonium* cap. 32. apertè profitemur, se non recipere doctrinam Cypriani de baptizandis Hæreticis, & Schismaticis, quia hoc non recipitur ab Ecclesia. *Non accipio* (inquit) *quod de baptizandis Hæreticis, & Schismaticis B. Cyprianus sensit, quia hoc Ecclesia non accipit, pro qua B. Cyprianus sanguinem suum fudit*. Et eadem ratione ab erroris labe Cyprianum excusat, quia ejus doctrina ab Ecclesia nondum fuerat judicata lib. 2. *de baptismo contr. donat. c. 4.*

Huic judicio omnes viri Catholici se, suasque doctrinas subjiciunt, pa-

Tom. I.

rati semper, in omnibus corrigi ad limam Catholicæ Ecclesiæ, quibus faciem præfert exemplo suo D. Hieron. *epistol. 14. alias 57. ad Damasum*, qui cum ab Episcopo Arianorum, & aliis multum ageretur, nec sciret, an Catholicè admittere posset tres hypostases in Deo, ad Cathedram Apostolicam confugit. *Ideo*, inquit, *mihi Cathedram Petri, & fidem Apostolice ore laudatam censui consulendam*. Inde laudatâ fide Romanâ, dicit: *Ego nulum primum, nisi Christum sequens, Beatitudini tue, idest Cathedra Petri communionem conficior*. Deinde rogat Damasum, ut decernat, an debeat sateri tres hypostases: *Decernite, obsecro, si placet, non timebo, tres Hypostases dicere*. Hinc etiam fit, ut licet aliqui SS. PP., vel etiam Doctores aliqua scripserint, quæ hisce temporibus contraria fidei judicantur, non censebantur tunc, vel censendi modò sunt hæretici, quia eo tempore nondum ab Ecclesia declaratum erat, eorum doctrinam esse Verbo Dei oppositam, habebantque insuper animum paratum retrahendi eam, si fortè Ecclesiæ judicio non foret comprobata, quare Cyprianum excusat D. Aug. sup. laudatus.

IV. Septem ergo gradus propositionum, seu doctrinarum censurabilium recensentur in Conc. Constantinensi *sess. 8.*, ubi examinatis articulis V Viclessi, sancitur, plures ex illis esse *notoriè hæreticos*, & à pluribus SS. PP. reprobatos, alios *non Catholicos*, sed *erroreos*, alios *scandalosos*, & *blasphemos*, quosdam *piarum aurium offensivos*, nonnullos autem *temerarios*, & *seditiosos*. Octava censuræ species colligitur ex Bulla S. Pii V. *contrâ Bajum*, in qua præfatis additur *propositio suspecta*: & in cap. *accusatus* in 6. adjungitur *nonna*, nempe *spiciens hæresim*. Relatis censuris nonnulli addunt subsequentes, nempe *proximas hæresi*, *suspectas de hæresi*, *malè sonantes*, *simplicium seductivas*, *schismaticas*, *injurias*, *judaicas*, *paganas*, & *atheas*. Hæc ergo omnes pro viribus excutiemus.

P

§. II.

§. II.

*De propositione, seu doctrina
hæretica.*

V. Ico. Propositio, seu doctrina hæretica illa est, quæ immediatè adversatur, aut expressè Dei Verbo, aut expressæ definitioni Ecclesiæ. Dicitur adversari Dei Verbo, quia Dei Verbum, sive scriptum, sive traditum sunt duo fontes, ex quibus hauriuntur omnes articuli fidei. Dicitur etiam adversari verbo Dei immediatè ad differentiam propositionis erroneæ, quæ (ut dicemus) adversatur Dei Verbo solum mediatè, quia adversatur propositioni deductæ ex Dei Verbo. Dicitur adversari Verbo Dei expressè, hoc est veritati, quæ in Verbo Dei expressè continetur, ut sunt Christi mors, sepultura, resurrectio &c. Hinc patet, hanc propositionem, quæ inter quinque Janenianas damnata legitur num. 2. ab Innocentio X. *Intriori gratia in statu natura lapsa nunquam resistitur*, meritò tanquam hæreticam fuisse proscriptam, quia contradictoriè immediatè opponitur huic expressio Dei Verbo *Act. 7. v. 53. Vos semper Spiritui Sancto resistitis*. Sicut & hanc aliam ab Alexandro VIII. damnatam: *homo non tenetur amare Deum neque in principio, neque in decursu vite sue mortalis*. Contradictoriè etenim adversatur huic expressio Dei, & Christi mandato *Deuter. 6. 5., & Matth. 22. v. 37. Diliges Dominum Deum tuum ex toto corde tuo*.

V I. Dicitur insuper, *aut expressa definitioni Ecclesiæ*: siquidem propositio, quæ implicitè tantum continetur in Dei Verbo, postquam Ecclesiæ declaravit, eam revera in illo contineri, Fide Divinæ expressæ credi debet ab iis, quibus sufficienter innouit latum ab Ecclesiæ iudicium. Propter hanc rationem doctrina de rebaptizandis baptizatis ab hæreticis cum debita forma, & intentione, sicut & doctrina

de celebrando Paschate quartadecimâ lunâ Martii, quicumque die incidere; esto olim non foret doctrina hæretica, quia nondum expressè Ecclesiæ iudicio constabat; oppositam doctrinam implicitè contineri in Verbo Dei, sive scripto, sive tradito, postquam Ecclesiæ hac de re in plenariis Conciliis suam tulit sententiam, utraque doctrina habenda est, ut hæretica.

VII. Sic ergo explicata conclusio, hoc discursu probatur, Ea propositio, aut doctrina rectè dicitur hæretica, quæ immediatè contradictoriè opponitur doctrinæ, & propositioni Catholicæ: ideo enim hæc propositio, *Christus non est Deus*, hæretica est, quia directè contradicit huic alteri, quæ est Catholica, *Christus est Deus*, seu *Filius naturalis Dei consubstantialis Patri*: sed propositio, quæ adversatur, aut expressè Dei Verbo, aut expressè definitioni Ecclesiæ, est contradictoria propositioni Catholicæ; hæc enim definitur, quòd sit ea, quæ expressè in Dei Verbo continetur, aut si tantum implicitè, ab Ecclesiæ declarata fuit reverà in Verbo Dei contineri; ergo &c.

Ut autem aliqua propositio possit hæreticè censurâ notari, debet esse, vel in materia juris ad fidem, sive mores pertinens, vel in materia, quæ in Dei Verbo, aut scripto, aut tradito contineatur, aut in materia facti connexi cum iure. Aliæ enim questiones puri facti, quæ in Dei Verbo nec explicitè, nec implicitè continentur, etiam accesserit Ecclesiæ iudicium, materiam fidei non constituunt; ideoque doctrina contraria non esset habenda, ut hæretica, quia non contradiceret Ecclesiæ iudicio infallibili regulato à Dei Verbo, sed humani informatione. Sic qui diceret, sextam Synodum malè damnaſſe, & inter hæreticos Monothelitas rejecisse Honorium Papam, non esset hæreticus, quia licet iudicio Ecclesiæ sese opponeret, non tamen in eo, in quo regitur à Verbo Dei, sed tantum ex humanâ

manâ fallibili informatione. Ita Cardinales Turrecremata lib. 2. de Ecclesia cap. 93., & Bellarminus lib. 4. de Rom. Pont. c. 11.

VIII. Observat tamen Mag. Cano lib. 12. de locis Theol. cap. 7. non semper doctrinam, vel propositionem hereticam certò indicare, in eo, qui eam profert, vel scribit, hèresim esse. Sicut enim (inquit ille) urina est improprie sana, quia signum est sanitatis, etiamsi fallax aliquando sit, sic propositio, vel in voce, vel in scripto vocatur heretica, quòd signum hèresis esse soleat, quamvis interdum is, qui dixerit, ab hèresi excusetur, quia ignorans fuit. Potest ergo propositio aliqua heretica esse solum ex genere, & ex obiecto, non autem ex subiecto, sicut concubitus primus Jacob cum Lia, quæ non erat sua, dici potest fornicarius ex specie, & ex obiecto, qui tamen ex subiecto, idest ex parte Jacob, qui concubuit cum Lia, credens invincibiliter esse suam, fornicarius non fuit. Sic doctrina aliqua ex obiecto, & materialiter dici potest heretica, quin formaliter, & ex subiecto hèresis sit, si eam proferens erret, putans esse Doctrinam Catholicam. Neque enim ex eo, quòd contradicat fidei statim hèresis est, sicut nec omnis color, qui contrariatur albo, statim niger est. Sic igitur fieri potest, ut in Christiano, error aliquis sit fidei aliquo modo adversus, quin adhuc formaliter hèresis sit, ut patet in allato exemplo de colore albo, cui rubeus, glaucus, viridis contrarii sunt, imperfecte tamen. Et eadem proportionali ratione quidam etiam sunt Christianorum errores, qui cum inchoati sint, & informes, hèreseos speciem nondum attingunt, licet ad eam ipsam proximè accedant. Ut ergo doctrina aliqua formaliter, & subiectivè hèresis sit, debet errori circa fidem habere adjunctum pertinacem electionem, & adhesionem errori contra ipsam, ita ut qui illam tenet sciens, & volens eam teneat, quam-

vis se à Catholico Grege noverit separari. Quòd si ignorans, adhuc culpabiliter, in eo errore versetur, peccabit quidem, sed non peccato hèresis.

§. III.

De propositione erronea, & errori proxima.

VIII. QUantum ad propositionem erroneam. Noto, propositionem erroneam in sui latissima significatione idem esse, ac propositionem falsam, quia error dicitur ex eo, quod à scopo veritatis aberret. Propositio verò erronea Theologicè dicitur omnis propositio à fidei veritate devians; quo sensu etiam propositio heretica erronea dici potest. At strictius loquendo error Theologicè est quid inferius ad hèresim, hèresi tamen proximum. Quare propositio erronea in stricta acceptione illa est, quæ equidem fidem immediatè non destruit, ad ejus tamen destructionem proximè disponit.

IX. Hoc supposito. Omisâ opinionum varietate, Dico, Propositionem erroneam in fide esse illam, quæ opponitur veritati, seu doctrinæ, quam unanimis SS. Patrum, ac Doctorum consensus judicat esse revelatam, sed nondum per Ecclesiam definita est: vel illam, quæ opponitur doctrinæ, non quidem per Ecclesiam definitæ, aut formaliter, & expressè revelatæ, communiter tamen à Doctoibus per discursum necessariò illatæ ex revelatis. Quare conclusio Theologica communiter dicitur virtualiter revelata, quia ita proximè accedit ad fidem, ut nihil ei desit, quòd de fide sit, nisi expressa Ecclesiæ definitio. Unde fit, quòd propositio erronea, & hèresi proxima coincident. Sit exemplum: usque modò Ecclesiæ non definit, quòd in hac propositione *Christus est homo* includatur ista *Christus est risurus*. Ex communi tamén,

Theologorum sensu habetur, quoddam ista *Christus est risivus* contineatur in ista *Christus est homo*, quia scriptura innuit, Christum esse hominem perfectum habentem hominis proprietates, saltem quarto modo proprias hominis, sicut est risivitas. Qui ergo negaret, Christum esse risivum, non esset quidem hæreticus, quia non negaret veritatem expressè contentam in scriptura, vel definitam ab Ecclesia; esset tamen erroneus, & hæresis proximus. Sic opinio Cypriani de invaliditate Baptismi collati ab hæreticis; opinio Sergii de una tantum in Christo operatione, potuit dici erronea, antequam Ecclesia definiret, oppositum contineri in Verbo Dei, nunc autem postquam Ecclesia definivit, non amplius erronea tantum, sed hæretica censenda est.

X. Conclusio sic explicata probatur. Nam per hoc propositio erronea differt ab hæretica, quia ista negat veritatem, aut expressè revelatam, aut implicite solum, sed addit Ecclesiæ Catholicæ definitionem. Differt quoque à cæteris propositionibus censurabilibus, ut infra dicitur.

Porrò immeritò ab Juenin. *Instit. Theolog. Prolegomen. differt. 5. de prop. censur. qu. 2.* reprehenditur Melchior Canus, quod propositionem erroneam unicè dixerit esse eam, quæ adversatur quidem alicui veritati Catholicæ, seu quam universa tenet Ecclesia, sed tamen quâ fides non evertitur, licet aliqua ei labes inferatur. Nam laudatus Canus in tres gradus distinguit propositiones erroneas. In primo ponit illam (de qua Juenin.) quæ scilicet fides quatitur, sed non evertitur. Distinguit enim veritates Catholicas, seu quas universa tenet Ecclesia in eas, quibus sublati fides tollitur, & eas, quibus sublatis fides læditur, sed non perit, ut sunt istæ: *speciales orationes applicatae uni personæ per Prælator, seu Religiosos, magis prosunt, quam generales. Religiosi non sentiunt laborem manuum visum*

quarere, sed licet eis esse mendicos; quibus si quis contradicat, erroneus quidem erit, hæresisque proximus, sed nondum hæreticus. In secundo autem gradu ponit illam, quæ contradicit quidem veritati, quæ sapientum quidem opinione constanti, fidei veritas est, sed nondum ut talis ab Ecclesia definita, nec certo argumento demonstrata. In tertio verò gradu eam ponit, quæ certæ veritati Catholicæ adversatur, non manifestè quidem, sed sapientum omnium longè probabili, ac fermè necessaria sententia; concluditque: Quicumque ergo vel doctrinam fidei appendicem liquidò evertit: vel fidem ipsam in discrimen adducit vehementer, ille sanè in Christiana disciplina errat, atque adeò ejus dicta jure appellantur erronea. Canus ergo nostræ resolutioni non refragatur, sed eam extendit.

XI. Propositio errori proxima est illa, quæ opponitur ei, quam plures, sed non omnes Theologi censent esse Conclusionem Theologicam. Sic propositio negans, facta consecratione manere vera accidentia panis, & vini, videtur errori proxima, quia opponitur huic: In Sacramento Altaris facta consecratione manent vera accidentia, quam plures, imò Theologorum sanior pars, censet, esse conclusionem. Theologicam illatam ex definitionibus de fide Conciliorum, Constantiensis, & Tridentini.

§. IV.

Alia species propositionum censurabilium.

XII. **P**ropositio sapiens hæresim (quæ non in alio videtur differre à propositione hæresis suspecta, nisi quoddam illi cum maiori, ista cum non adeo magna, multà tamen probabilitate indicatur hæretica) illa est, quæ saporem, & suspicionem hæresis ingerit; Vel quia in se ad hæresim videtur accedere, vel hæresim

se-

redolere. Vel quia licet in aliquo sensu tolerari posset, tamen ex circumstantia personæ, loci, & temporis adjunctionem habet gravem, vel gravissimam suspensionem, aut saporem hæreticis. Sit exemplum in hac propositione, *Christus est creatura*, quæ in se ad hæresim Nestorianam accedere videtur: nam cum *ly Christus* supponat pro Persona, videtur asserere, Personam Christi esse creaturam; & licet prolata à Catholico tolerari posset, quia videtur intelligi, quod sit creatura quantum ad humanam naturam; prolata tamen ab hæretico Arijano, vel Nestoriano, maximam iuspicionem, & saporem hæreseos facit, nimirum, ne intelligatur, quod Christus etiam quantum ad suppositum sit creatura. Sic etiam ista *fides justificat*, quæ in ore D. Pauli Catholica est, in ore autem Lutheri, qui vult, solam fidem justificare, hæreticis suspensionem facit. Quo in sensu damnatæ sunt plures propositiones à Janseñistis prolatae, quæ licet in Sacra Scriptura iisdem ferè terminis legantur, & in D. Augustino, in ore tamen Janseñistarum sensum hæreticum præferunt.

XIII. Propositio sapiens errorem, seu de errore suspecta, ea similiter est, quæ ex circumstantia Personæ, loci, & temporis gravem suspensionem, apparentiam, & saporem erroris ingerit; vel ut alii explicant, ea est, quæ cum erroneâ similitudinem habet aliquam: sicut, si quis propositionem aliquam assereret, quâ assertâ videretur asserere istam: *Christus non est visus*; sive negaret aliquam, quâ negatâ, videretur negare istam conclusionem Theologicam: *Christus est visus*.

XIV. Propositio temeraria dicitur illa, quæ sine fundamento in scriptura, Patribus, Doctoribus, & traditione, imò contra sensum istorum, in materia fidei, aut morum aliquid enunciat. Pro cujus explicatione advertit ex D. Thoma 2. 2. *quæst. 53. art. 3. ad 2.* aliquid fieri temerè, *dupli-*

citer posse contingere; uno modo ex impetu voluntatis, vel passionis, & sic potius dicitur præcipitatio. Alio modo ex contemptu regulæ dirigentis; Et hoc propriè importat temeritas, unde videtur ex ea radice superbia provenire, quæ refugit subesse regulæ aliena. Cum ergo aliquis absque gravi fundamento resilit ab eo, quod in Theologia communiter docent Theologi, hoc non potest oriri ex alio principio, nisi quia nimis amans judicium proprium, non vult acquiescere majorum sententiis, & idè temeritatis notam incurrit; Sicut si quis negaret, B. V. fuisse assumptam in Cælum, etiam quoad corpus; vel negaret historiam pias ab Ecclesia receptas, & propositas. Quo morbo recentiores non pauci, criticæ intemperantiores studiosi, laborare videntur. Similes sunt etiam Theologi morales, qui absque ullo fundamento in Scriptura, Patribus, ac traditione solis levissimis ratiunculis moti, varias propositiones, tum circa cultum Deo debitum, tum circa caritatem erga proximum, circa homicidium, & furtum, aliaque ediderunt, quis Alexander VII., & Innocentius XI. meritò confixerunt.

XV. Quæres, an omnis propositio temeraria sit hæretica, aut erronea, & an omnis hæretica, & erronea sit temeraria?

Respondeo ad primum, negativè. Quia multæ propositiones temerariæ sunt respicientes facta, quæ post Apostolorum tempora contigerunt; vel si eorum temporibus evenire, non continentur in Verbo Dei, nec immediatè, nec mediatè, nec de illis ulla est Ecclesiæ Catholicæ definitio, & per consequens non sunt hæreticæ, neque erroneæ; quia hæreticæ, tales dicuntur, quia immediatè opponuntur Verbo Dei, erroneæ verò, mediatè.

XVI. Ad secundum verò respondeo, omnem quidem propositionem hæreticam esse temerariam. Quæ enim major temeritas, quàm expresse Verbo Dei, aut Ecclesiæ judicio nolle se subi-

subjicere? Non tamen omnem propositionem erroneam esse temerariam: multæ namque propositiones erroneæ defensæ fuerunt à Viris doctissimis, qui eis adhærebant, gravi, ut eis videbatur, nisi fundamento; ideoque temeritatis notâ inuri non debebant, maxime, quia ea in re, Ecclesia nihil adhuc fuerat locuta. Sic temeritatis notam effugit Cyprianus, etsi propositionem erroneam de rebaptizandis hæreticis sustineret. Neque hac notâ confingendus erat *Joannes 11.*, si (ut aliqui volunt) erroneè defensavit, animas Iustorum antè universalem resurrectionem Deum clarè non visuras; ipsi enim non deærant (saltem apparenter) gravia fundamenta.

XVII. Propositio scandalosa ea est, quæ per se occasionem præbet ruine spiritualis proximo, vel inclinando eum ad peccata, vel avertendo ab exercitio virtutum. Scandalum enim (apud grammaticos) est offendiculum, quod positum ante pedes alicujus causa est, ut cadat. Ut autem propositio sit scandalosa, satis est, ut per se nata sit parere ruina spirituali proximi, licet per accidens, nempe ex parte subiecti, eam non pariat. Insuper propositio scandalosa, ut distinguitur ab aliis, debet esse talis, ut in ea nec hæresis, neque falsum dogma notari possit; aliàs confunderetur cum propositione hæretica, vel erronea. Ut si quis diceret, multa sequi incommoda ex jejuniis Ecclesiasticis, ex votis, ex peregrinationibus, ex confessione auriculari, quibus homines arceri possunt ab exercitio talium operum: vel si diceret: Sanctos myriscos exclusisse à statu animarum unitarum exercitia virtutum, ut impiè asserbat Michael de Molinos.

XVIII. Propositio piarum aurium offensiva dicitur ea, quæ aliquid absonum, & subiecto, de quo loquitur, indignum, enunciat, quo audientes offenduntur. Dicitur offensiva aurium, non propter sensum, quem continet,

sed propter modum, quo sensum exprimit. Dicitur offensiva aurium, non quarumcumque, sed piarum, quod enim offendantur, sicut olim Pharisæi offendebantur de Christi doctrina, & modo loquendi, non est curandum. Insuper, an propositio aliqua sit piarum aurium offensiva, non est pensandum ab hominibus, piis quidem, sed indoctis, qui sæpè ex imperitia, vel stolta pietate offenduntur ex propositione suapte natura non offensivâ. Neque enim in serendo iudicio de aliqua propositione, consuli debet promiscuum vulgus, ut bene notat Mag. Canus lib. 11. *laudato cap. 11.* sed ii, qui pietati doctrinam conjunxerunt. Si enim turba nobis lex esset, Evangelii verba fuissent piarum aurium offensiva; Turbæ enim aliquando Christi verbis turbatæ sunt, imò etiam discipulis durus erat illius sermo. Multaque alia (prosequitur Canus) offensiva dici deberent, quæ non sunt, si plebis iudicium audiendum esset. Debet insuper propositio offensiva piarum aurium continere aliquid absonum, & indecorum subiecto, de quo est, qualis esset ea, quæ indecorè de Deo, aut Sanctis (licet non falsò) enunciaret. Sicut si de partu Virginis loquens, aliqua indecora misceret, vel actiones humanas Christi, aut partes, & membra corporis ejus turpibus explicaret vocibus.

XIX. Malè sonans propositio, licet à Mag. Cano loco citato conjungatur cum offensiva piarum aurium, ab aliis tamen ab ea fecernitur, & dicitur illa, quæ incongruè, & inordinatè Theologicè loquitur; itaut licet verum sensum habeat, Theologicè tamen malè sonet. Quare si quis diceret, in Deo sunt tres essentiaæ relativæ, sensus Catholicus esset, sed Theologicè loqueretur incongruè, & inordinatè, quia uteretur nomine *essentia* ad significandum relativum, quo Divinæ Personæ distinguuntur, contra bonam Theologiam, eo utentem solum ad significandum absolutum,

tum, & naturam, in qua sunt unum.

Propositio male sonans ab Juenin, & aliis sic explicatur, quod sit illa, quæ duos habet sensus, unum congruum fidei, alterum incongruum; itaut ab audientibus sæpè in malam partem, seu in sensum fidei incongruum trahatur. Sic hæc propositio, *Christus est minor Patre* absolute prolata, licet Catholicè sensum faciat, esse minorem Patre quantum ad humanitatem, juxta dictum Christi: *Pater major me est*; quia tamen alium sensum facit, quod Christus absolute, & quantum ad suppositum sit minor Patre, idè absolute prolata male sonans dici potest.

XX. Simplicium seductiva illa est, quæ sub specie pietatis, vel pretextu boni errorem regens, apta est simplicium ruentes seducere; hujus generis fuerunt plures, quibus Michael de Molinos, ejusque assellæ, simplices seducebant. Quo etiam pacto Ariani Catholicos simplices in Concilio Ariminensi decipere tentarunt. Ut enim eos inducerent ad subscribendum sub spe futuræ pacis, formulæ, quam ipsi subdole ediderant, dixerunt, Filium Dei esse *homiusion* Patri. Quare Catholici simplices, putantes, vocem *homiusion* eandem esse, ac istam *homousion*, hoc est *ejusdem substantiæ*, seu *consubstantialiæ*, & non Creaturam, plures subscripsere. Sed se deceptos agnoverunt, dum noverunt, hæc voce *homiusion* Filium non *ejusdem*, sed *similis* tantum *substantiæ* cum Patre, & verè creaturam, Arianos intellexisse, & consequenter non Catholicum, sed Hæreticum sensum fallaciter obtruxisse.

XXI. Schismatica ea est, quæ aperit viam divisioni, & scissioni corporis mystici Ecclesiæ, seu quæ fideles ab unitate Ecclesiæ retrahit, vel ab obedientia superiorum. Sicut si quis diceret, Benedictum XIII. non esse legitime electum, nec verum Papam, eiue non esse obediendum. Sicut Henricus VIII. Angliæ Rex, dum suo

Edicto declaravit, se in suo Regno esse Supremum, tum in Temporalibus, tum in Spiritualibus Caput, & Governatorem, præcipiens, ne ullum extra Angliam, superiorem Angli agnoscerent.

XXII. Injuriosa propositio est, quæ facit injuriam alicui personæ, vel statui. Dico alicui personæ, vel statui, quia si esset in Deum, vel Sanctos esset impia, & blasphema. Sic si quis diceret, huic, vel illum statum Monasticum esse dissolutionibus plenum, nec esse viam ad salutem, sed ad perditionem, injuriosè loqueretur.

XXIII. Impia porrò, seu blasphema propositio est, quæ Deo, Deiparæ, aut Sanctis est injuriosa, vel quia negat perfectiones eis debitas, vel tribuit eis defectus, & imperfectiones indebitas: Ut si quis videns, in hoc mundo bonos sæpè affligi, malos autem in deliciis vivere, Deum vocaret injustum; Si quis Deiparæ virginitati perpetuæ aliquomodo detraheret; si quis de Apostolis infanda evomeret, quod fuerint homines nequam. & similia. Blasphema etiam habenda est, nedum hæretica, ex damnatis §. propositionibus Jansenianis prima, nimirum *aliqua Dei præcepta hominibus justis, volentibus, & conantibus, secundum præsentem, quas habent, vires, sunt impossibilia: deest quoque illis gratia, qua possibilia fiant.* Facit enim Deum injustum legislatorem, qui præcipit ea, quæ impossibilia sunt, etiam volentibus, nec dat vires, unde possint. Quia tamen blasphemia sæpè conjungitur cum hæresi, vel cum errore, vel cum suspensione hæresis, dividi potest in hæreticalem, erroneam, & de hæresi suspectam; quare aliquibus hæc censura non videtur specialis, cum possit cuicumque ferè alteri censuræ conjungi.

XXIV. Judaica propositio est, quæcunque de Christo sentit cum Judæis, qualis esset illa, quæ Messium nondum venisse, vel adhuc venturum enuntiaret.

XXV.

XXV. Pagana est, quæ cum Pagani plures Deos admittit, qualis est ista, *dii te perdant.*

XXVI. Athea è contra est, quæ cum Athei Deum esse negat, qualis est illa *Psalmi 13. v. 1. Dixit insipiens in corde suo, non est Deus.* Qualis & quælibet alia, quæ omnem prorsus religionem, & cultum tolleret; sublata enim quacumque religione, tollitur etiam Deus, cum nulla fuerit unquam religio, quæ cultum Deo, sive vero, sive falso non exhibuerit; quare, qui religionem habet nullam, nullum Deum pariter habere censendus est. Hinc Atheus fuit miser ille Carthaginiæ Seditæ Philosophus, vir natione Judæus, *Espinosa* nomine, qui calcata Judaicâ religione, *Tractatum Theologicum - Politicum* scripsit unum, ad hoc unice tendens, ut omnem aboleret religionem, liberum cuique vivendi modum permittens, & purum atheismum insinuaret.

XXVII. Quæres primò. Quid sit propositio improbabilis?

Dico, eam esse, quæ nullo, aut Scripturæ, aut traditionis, aut rationis Theologicæ pondere firmatur: probabilitas enim in rebus fidem, vel mores spectantibus, uni ex dictis tribus inniti debet.

XXVIII. Quæres secundò. An propositio improbabilis fundet speciem censuræ à temeraria distinctam?

Respondeo, quod si propositio improbabilis sit, quia non solum destituitur auctoritatis, & rationis pondere, sed etiam profertur animo sese opponendi communi Theologorum placito, ad censuram temeritatis spectat. Si vero improbabilis sit, quia præcisè asseritur absque ullo fundamento, non autem animo contradicendi communi Theologorum voto, censurâ temeritatis inurenda non est, quia locutio temeraria, non solum est locutio imprudens, qualis est illa, quæ sine fundamento auctoritatis, & pondere rationis profertur, sed etiam debet esse ex contentu regulæ dirigentis, ut

supra dictum est, seu, quia sic loquens, dictis sapientum non vult acquiescere: quod tunc dignoscitur, quando non solum suam opinionem profert, sed & contrariam, & communem refutare conatur.

XXIX. Quæres tertio. An qui privato spiritu propositionem aliquam (aliàs probabilem) notat censurâ gravi, censuram incurrat?

Respondeo cum distinctione. Vel enim propositio illa unanimi sensu Theologorum, ut probabilis admittitur. Et sic, qui illam censurare auderet, incurreret notam gravis temeritatis: quia absque gravi rationis fundamento sese opponere unanimi sensui Theologorum, nota temeritatis est. Vel propositio illa apud aliquos probabilis est, apud alios verò improbabilis, & sic nullam censuram incurrit. Constat ex praxi S. Sedis, ad quam quotiescunque delatae sunt huiusmodi querelæ de censuris hinc inde latis super propositionibus inter Theologos controversis, ut in materia de efficacia gratiæ, de probabilitate, de dispositione ad Sacramentum Pœnitentiæ, vel aliis similibus, nil aliud facere consuevit, quàm utrique parti silentium indicere, donec S. Sedes super his iudicium suum protulerit.

Vetat tamen Innocentius XI. in suo decreto, quo 65. propositiones proseripsit, ne quisquam privata auctoritate audeat propositionem aliquam censurâ notare, cùm huiusmodi iudicium soli S. Sedi reservetur. Verba Decreti sunt: *Tandem, ut ab iniuriis contentiōibus Doctores, seu Scholastici, aut alii quicumque imponerem se abstinuant, & ut pari, & caritati consulatur; idem Sanctissimus in virtute Sanctæ Obedientiæ præcipit, ut tam in libris imprimendis, ac manuscriptis, quàm in thesibus, disputationibus, ac predicationibus, caveant ab omni censura, & nota, necnon à quibuscvis convitiis contra eas propositiones, quæ adhuc inter Catholicos hinc inde controversantur, donec à S. Sede recognita, super*
sijdem

isidem propositionibus iudicium proferatur. Quibus verbis præceptum continetur, sed nullâ censurâ contrascentes notantur. Verùm, ut plenius de hac materia juvenis candidatus instrui possit, ponitur.

DUBIUM VI.

An omne dogma Catholicum sit Fidei dogma, & an omne Fidei dogma sit articulus Fidei.

§. I.

Resolvitur prima Pars.

I. Dubium istud excitat Annatus lib. 1. *Apparat. artic. 7.*, quia (inquit) Catholici dogmatis nomine decipi communiter solent Tyrones non pauci, arbitantes nimirum, nihil omnino dogma Catholicum dici posse, nisi sit fidei dogma. Propterea statuit, dogma Catholicum genericè, & latè sumtum, nihil aliud esse, quàm doctrinam Ecclesiæ Catholicæ, seu doctrinam, quæ licitè, & citra censuram in Catholica tenetur Ecclesia. Hoc supposito.

II. Dicit, Dogma Catholicum hoc modo acceptum triplex esse, aut dici posse, videlicet imperatum, liberum, & toleratum. Dogma imperatum est doctrina, quam Catholica Ecclesia sic proficitur, ut cunctis eam fidelibus proponat cum obligatione, eam tenendi, & credendi. Liberum verò est doctrina, quam liberum est cuique tenere, vel non tenere, qualis est doctrina, quæ nec de fide est, nec fidei nociva, aut moribus, ideoque vocatur doctrina libera. Toleratum verò dogma illud est, quod in Ecclesia Catholica toleratur, nimirum permittitur cuique, illud tenere, vel non tenere; quia nondum satis notoriè fidei nocivum, vel erroneum, aut hæreticumprehenditur; & talis est quæcumque doctrina, quæ à multis licet impugnata, & rejecta, non-

dum tamen est Ecclesiæ iudicio damnata; & hæc dicitur tolerata.

III. Ex his solum Dogma Catholicum imperatum, est verè, & propriè dogma Catholicum, & dogma Fidei; reliqua verò duo, liberum nimirum, & toleratum solum genericè, & latè Catholici dogmatis nomine appellantur, nec fidei dogmatis nomenclaturâ donari possunt. Et probatur. Illud enim solum propriè dogma Catholicum, & Fidei est, quod ita Ecclesia docet, ut imperet omnibus fidelibus credi, & teneri, & si quis tenere, aut credere refragetur, illum à se ejiciat, tanquam alienum, & hæreticum: Sed Ecclesia id solum præcipit de dogmate imperato; alia enim, vel libera relinquit, vel in utramque partem tolerat, & sustinet: ergo solum dogma imperatum dogma fidei est, & strictè dogma Catholicum. Quid enim aliud vox *Catholicum* sonat, nisi *universale*: unde Vincentius Lirinensis in suo Commonitorio 1. c. 3. id (inquit) *propriè Catholicum est, quod ubique, quod semper, quod ab omnibus creditum est.*

IV. Dogmatis Catholici imperati, & propositi omnibus cum obligatione illud credendi tanquam fidei dogma, sequentia exempla produci possunt.

1. *Quid Deus sit unus in essentia, solus, & non multiplex*: contra Polytheos.

2. *Quid sit trinus in Personis realiter distinctis, Pater, Filius, & Spiritus Sanctus*: contra Sabellianos.

3. *Quid Christus Dominus sit Dei Patris Æterni Filius: eique consubstantialis*: contra Arianos.

4. *Quid Spiritus Sanctus sit pariter Deus cum Patre, & Filio coadorandus*: contra Macedonianos.

5. *Quid dua in Christo sint nature (contra Eutichianos. dua voluntates contra Monothelitas) una tamen Persona, & hac Divinâ*: contra Nestorianos.

6. *Quid in Sacramento Eucharistia*

realiter sit Christi Corpus; & Sanguis; quod Missa sit verum Sacrificium; i quod Purgatorium existat post hanc vitam istam, qui non penitus purgati decesserunt; i quod pium, bonum, & utile sit Sanctos invocare, & alia similia fidei dogmata, quae omnibus fidelibus credenda proponit, & praecipit Catholica Ecclesia, contra recentiores haereticos Lutheranos, & Calvinistas.

V. Dogmatis verò liberi exempla sunt.

1. De impossibilitate, vel possibilitate mundi ab aeterno.

2. De futuro, vel non futuro Christi adventu, si Adam non peccasset.

3. De aeterna hominum praedestinatione ante, vel post praevia merita.

4. De efficacia gratiae, sive ab intrinseco, sive tantum ab extrinseco, & ex praevisione consensus futuri, ideoque de non admittenda, vel admittenda in Deo scientia media.

5. De admittenda, vel non admittenda inter divina attributa distinctione formali scitica, vel Thomistica virtuali.

Istae, alięque similes doctrinae, quae in Scholis Catholicis circumferuntur, quas tenendi, vel repudiandi libera cuique in Ecclesia facultas, dogmata Catholica, idest libera vocari possunt.

VI. Dogmatis verò tolerati exempla fuerunt olim. Primò

Doctrina de millenario Christi inter terris regno, post resurrectionem, & iudicium extremum futuro, quam tenuisse dicuntur (ex Papia primo inventore) S. Iustinus martyr, & Irenaeus, quaeque in Ecclesia tolerata fuit, usque ad Damasi Papae tempora.

Secundò, doctrina de non valido haereticorum Baptismo, quae tolerata fuit usque ad tempora Concilii Niceni I., vel, ut alii volunt, Arelaten- sis.

Tertiò, Doctrina de dilata justorum visione beatifica ad extremum usque iudicii diem, quae tolerata fuit in Ecclesia usque ad tempora Benedicti XII.,

& Concilii Florentini, à quo, sicut & à Tridentino damnata fuit, ut haeretica.

Istae, alięque doctrinae, quae olim toleratae fuerunt in Ecclesia Catholica, alię etiam, quae fortè hodie tolerantur, antequam Ecclesia de iis iudicium proferat, dici possunt Dogma Catholicum toleratum.

VII. Hæc ex Annato delibata sunt, quæ non improbabili- ter discurre- rit. Ceterum nisi abusivè loqui velimus, & dogmatis Catholici nomen à sua vera distrahere significatione, solum dogma, quod Ecclesia Catholica universim proficitur, & docet, quodque omnibus fidelibus credendum, ac tenendum proponit, ac praecipit, itaut qui illud tenere, ac credere recusa- verit, Catholicus non sit, sed Hæreticus, verè dogma Catholicum esse, ac dici debere censeo; ideoque idem esse dogma Catholicum, ac dogma Fidei, & pro eodem reputandum concludo. Movet me, quia dogmata propriè dicuntur ea, quæ in unaquaque Secta, aut Religione, Decreta, & Statuta sunt: sicque artes, & scientiæ propria dogmata sibi vindicant, quæ à profes- soribus illius artis, vel scientiæ, ut certa, & inconcussa tenentur. Dogma enim idem est, ac Regula, seu Canon. Quare D. Augustinus lib. 1. qu. Evangelior. q. 11 Dogmata autem, inquit, sunt placita Sectarum, idest, quod placuit singulis Sectis. Ex quo fit, quòd dogma Catholicum apud Theologos propriè illud solum dicen- dum sit, quod est placitum universæ Ecclesiæ, & tenetur ab omnibus tan- quam regula certa, sive fidei, sive morum. Unde Theologia Dogmatica dicitur illa, quæ dogmata orthodoxa exponit, eaque tuetur contra hæreti- cos, aut aliorum dogmatum sedato- res: & dogma esse illud, quod spectat ad fidem, dicit Glossa in Canon. Omnes diss. 3., & rursus 25. qu. 2. c. Si quis dogmata, anathema pronuntiatur, qui dogmata Sedis Apostolicæ contemserit. Quapropter Theophylus Alexan-

Alexandrinus Lib. Paschali 1. apud D. Hieron. t. 4. edit. Maurina p. 692. Neque, inquit, Cælestium possunt recipere Sacramenta Verborum, qui Divinis Ecclesie dogmatibus contradicunt. Quod si Annatus nomine dogmatis sumat doctrinam vagè, non dissentiat: sed hoc est sumere dogma minus propriè.

§. II.

Resolvitur secunda Pars.

UT quæsitum hoc resolvatur, in quo queritur, an omne id, quod est de fide, seu dogma fidei, sit articulus fidei, seu an constituat specialem fidei articulum, examinandum priùs est, quid sit articulus fidei, & quid requiratur ad constituendum specialem articulum fidei.

VIII. Et quidem si admittatur definitio Richardi Victorini desinentis articulum fidei, quoddam sit indivisibilis veritas de Deo arctans nos ad credendum, concludi debet, quoddam cum omnis veritas de fide, seu revelata arctet nos, & obliget ad credendum, omnis veritas, seu dogma fidei, esset articulus fidei.

IX. Verùm quia, ut ait S. Thomas 2. 2. q. 1. art. 6. ad 3., illa definitio datur de articulo magis secundum quandam etymologiam nominis, prout habet derivationem latinam, quam secundum ejus veram significationem, prout à græco derivatur, unde non est magni ponderis: Ideo articulus fidei aliter definitur ab aliis post S. Thomam, quod articulus fidei est: *Principalis fidei veritas omnibus ad explicitè credendum proposita, & distinctam continens difficultatem*. Ratio hujus est, quia, ut docet S. Thom. laudato ar. 6. in corp. cum de ratione objecti fidei sit, ut sit quid obscurum, & invidens, & proinde ad videndum difficile, sequitur, quoddam ubi sunt fidei objecta, quæ diversas ad videndum difficultates, seu dubitandi rationes afferunt, illa diversos constituunt fi-

dei articulos; & e contra, ubi sunt diversa fidei objecta, quæ non plures, sed unam, & eandem difficultatem offerunt, non plures constituunt, sed ad eundem revocari debent fidei articulum. Sic v. gr. ista tria, *Passio, Mors, & Sepultura Christi*, quia non tres difficultates offerunt, sed unam tantum, cum, Christi Passione jam cognita, & credita, facile cognoscantur, & credantur ejusdem mors, ac sepultura: ideo hæc tria fidei nostræ objecta non tres constituunt, sed ad unum revocantur fidei articulum. Et quia è contra *Resurrectio Christi* specialem, ac distinctam difficultatem offert, ideo specialem, ac distinctum constituit fidei articulum. Verba S. Thomæ art. 6. laudato in Corp. sunt hæc: *Est autem objectum fidei aliquid non visum circa divina, ut supra dictum est: & ideo, ubi occurrit aliquid speciali ratione non visum, ibi est specialis articulus: ubi autem multa secundum eandem rationem sunt cognita, vel non cognita, ibi non sunt articuli distinguendi; sicut aliam difficultatem habet ad credendum, quoddam Deus sit passus, & aliam quoddam mortuus resurrexerit; & ideo distinguitur articulus Resurrectionis ab articulo Passionis. Sed quoddam sit passus, mortuus, & sepultus, unam, & eandem difficultatem habent, ita quoddam, uno suscepto, non est difficile alia suscipere; & propter hoc omnia hæc pertinent ad unum articulum.*

X. Insuper ex eodem D. Th. citato a. 6. ad 1. Veritates revelatæ; alix spectant ad fidem secundum se, & principaliter, tanquam fundamentales Fidei Christianæ, ideoque ab omnibus, & singulis explicitè credendæ; tanquam ad salutem necessariæ, quia ea sunt, quæ principaliter speramus videre in Patria, ut sunt, Deus trinus, & unus, Filius Dei incarnatus &c. Aliæ sunt, quæ spectant ad Fidem tanquam appendices, & consequentes ad præfatas veritates principales, ad quas reducuntur. Articuli ergo Fidei

distingui debent, non secundum has, sed secundum illas. *Aliqua sunt credibilia* (ait D. Thom.) *de quibus est fides secundum se... & secundum ista distinguuntur articuli Fidei.... Aliqua vero sunt credibilia, de quibus non est fides secundum se, sed solum in ordine ad alia..... & secundum talia non oportet articulos distinguere.* Quenam autem sint credibilia, de quibus est fides secundum se, exponit D. Thom. ibid. *Fides est principaliter expressè de his, quæ videnda speramus in patria, juxta illud Pauli Hebr. c. 11. v. 1. dicentis: Est autem fides sperandarum substantiarum rerum, & cæ, quæ videnda speramus in patria, sunt tres Persona Omnipotentis Dei, Mystervium Incarnationis Christi, & alia hujusmodi.*

XI. Dico ergo, non omnia fidei dogmata constituunt specialem articulum Fidei, sed solum ea, quæ principaliter pertinent ad Fidem, utpotè, quæ speramus videnda in Patria; vel quæ, ut credantur, specialem afferunt difficultatem. Itaque articulos Fidei possumus partiiri quasi in duas Classes generales. Primam constituit Deus, ut est in se; & in ista continentur omnes Articuli spectantes ad Unitatem, & Trinitatem Dei. Secundam constituit Deus provisor, Deus remunerator; & in ista continentur omnes Articuli spectantes ad Incarnationem, Mortem, & Resurrectionem Filii Dei, ad vitam æternam, & media conducentia ad illam. Has duas classes intinnavit Paulus ad Hebr. 11. v. 6. ubi postquam dixit, siue fide impossibile esse placere Deo, addidit: *Credere enim oportet accedentem ad Deum, quia est, & inquirentibus se remunerator sit.* Et Christus ipse, Joan. 17. v. 3. *Hæc est vita æterna, ut cognoscat te solum Deum verum, & quem misisti Jesum Christum.*

Affertio sic explicata pro prima parte patet ex dictis. Nam illæ solæ veritates fidei constituunt capita, & classes articulorum, seu credendo-

rum, de quibus secundum se, atque primariò fides est, quia sunt fundamenta rerum sperandarum; hæ autem sunt veritates concernentes, vel Deum in se, vel Deum Incarnatum, ac Remuneratorem; quare istæ omnibus scitu necessariæ sunt, & omnibus ad credendum explicite proponuntur. In istis autem duabus classibus illæ solæ veritates articulos fidei distinguunt, quæ novam rationem non vili, seu novam difficultatem ad credendum offerunt, ut ex D. Thom. dictum est.

XII. Secunda verò pars suadetur ex dictis: quia veritates, quæ nec sunt directè, & per se fidei basis, & fundamentum, neque novam ingerunt difficultatem, reducuntur ad aliquam aliam, ex quâ dependentiam, aut connexionem habent; ergo non est, cur constituant novum articulum, sed reducuntur ad articulum, in quo continentur, vel ad quem spectant. Sicut in corpore naturali non omnia, quæ in illo sunt, propriè sunt corporis artus, & membra; sed membra, & artus dicuntur solum partes principales, quæ corporis substantiam constituunt, quæque exercent peculiare, ac distinctum officium; alia verò, quæ in corpore sunt, in aliquo ex membris continentur, illiqueerviunt. Addo: multas veritates fidei esse, quas explicite scire, & credere, non omnibus, & singulis necessarium est ad salutem, siue necessitate medii, siue præcepti, sed satis est, ut sciantur à Doctõribus, & Pastoribus; sed articulos fidei propriè tales, ab omnibus explicite sciri, & credi necesse est; ergo non omnes scè.

XIII. Neque juvat, si dicas, nulla est fidei veritas, quam quique fidelis non teneatur credere sub pænâ hæresis; ergo nulla est fidei veritas, quæ non sit articulus fidei propriè dictus.

Nam respondens ex dictis negando conseq.: ut enim veritas fidei sit articulus fidei propriè talis, satis non est,

ut

ut fidelis quisque teneatur illam credere sub pena hæresis, sed requiritur ulterius, ut sit veritas fidei principalis, explicitè credenda, & specialè addens difficultatem in credendo, nec possit reduci ad fidei articulum aliquem: quod non convenit omnibus, & singulis veritatibus, ut dictum est; quare claritatis gratia distinguo consequens: sit articulus fidei, vel reducat ad aliquem fidei articulum; cor consequentiam: constituendo specialem fidei articulum; Nego consequentiam. Itè enim veritates, quod Christus pannis fuerit involutus, quod fuerit in Præsepio positus, quod octavo die fuerit circumcissus, quod fuerit adoratus à Magis, quod Magi apertis Thesauris, aurum, thus, & mirram ei obtulerint, omniaque in Evangelio contenta, concernentia Nativitatem, prout ibi relata, sunt veritates fidei; sed nunquid hæc constituunt speciales articulos? nequaquam. Omnes quippe reducuntur ad articulum de Christi Nativitate. Idem de singulis dicito, quæ in Scripturis narrata, & prout ibi dicta fidei divi- nâ credenda, nec tamen articuli fidei dicenda sunt. Imò in Sacra Scriptura multa continentur, quæ nec pertinent ad Religionem, nec ad Doctrinam Christi. *Genesis* enim 6. v. 15. dicitur de Arca, trecentorum cubitorum erit longitudo Arca, quinquaginta cubitorum latitudo, & triginta cubitorum altitudo illius. *Isa.* cap. 2. v. 6., quod Hydræ lapideæ, positæ in Nuptiis Canæ, fuerint capientes singula metretas binas, vel ternas. 4. *Reg.* c. 6. v. 25.: quod in obsidione Samariæ tanta fuerit olim ciborum penuria, ut quarta pars cibi stercoreis columbarum quinque argenteis vendicaretur, aliaque similia, ut de Cane Tobie caudâ plaudente, *Tobia* c. 11. v. 9.: de Penula D. Pauli relicta Troade, quam ut ad se afferret scripsit *Timotheo* 1. ad *Timoth.* c. 4. v. 13. Quare cum D. Th. 1. p. quæst. 32. art. 4. in Corp. dicendum est, ad fidem pertinere posse ali-

quid dupliciter, videlicet directè, & indirectè. Ea ad fidem directè pertinere dicuntur, quæ nobis sunt principaliter divinitus tradita, ut Deum esse trinum, & unum, Filium Dei esse incarnatum, & hujusmodi.... indirectè verò ad fidem pertinent ea, ex quibus negatis consequitur aliquod contrarium fidei; sicut si quis diceret, Samuelem non fuisse filium Helcana, ex hoc enim sequitur, Scripturam Divinam esse falsam.

XIV. Concludit ergo idem S. Doctor 1. 2. qu. 1. art. 8. in corp. quod, sicut dictum est, illa per se pertinent ad fidem, quorum visione in vita æternâ perfruemur, & per quæ duemur ad vitam æternam. Duo autem nobis videnda proponuntur scilicet occultum divinitatis, cujus visio nos beatos facit; & mysterium humanitatis Christi, per quod in gloriam Filiorum Dei accessum habemus, ut dicitur *Rom.* 5. Unde dicitur *Isa.* 17. hæc est vita æterna, ut cognoscant te Deum verum, & quem misit Jesum Christum. Et idè primâ distinctio credibile est, quod quadam pertinent ad Majestatem Divinitatis; quadam verò pertinent ad Mysterium Humanitatis Christi, quod est pietatis Sacramentum, ut dicitur 1. ad *Timoth.* 4. Articuli ergo fidei primò dividuntur in articulos pertinentes ad divinitatem, & articulos pertinentes ad Incarnationem, seu Christi humanitatem.

XV. Prosequitur deinde S. Doctor. Circa majestatem autem divinitatis tria nobis credenda proponuntur: Primò quidem unitas divinitatis: & ad hoc pertinet primus articulus. Secundò, Trinitas Personarum: & de hoc sunt tres articuli secundum tres Personas. Tertiò verò proponuntur nobis opera divinitatis propria, quorum primum pertinet ad esse natura: & sic proponitur nobis sub uno articulo omnia pertinentia ad sanctificationem humanam. Tertium verò pertinet ad esse gloria: & sic pro-

proponitur nobis alius articulus de Resurrectione Caruis, & de Vita Æterna; & ita sunt septem articuli ad Divinitatem pertinentes.

XVI. Similiter etiam circa humanitatem Christi ponuntur septem articuli. Quorum primus est de Incarnatione, sive de Conceptione Christi. Secundus de Nativitate ejus ex Virgine. Tertius de Passione ejus, & Morte, & Sepultura. Quartus est de descensu ad Inferos. Quintus est de Resurrectione. Sextus de Ascensione. Septimus de adventu ad Judicium. Et sic in universum sunt quatuordecim.

Addit tamen, quod quidam distinguunt duodecim Articulos Fidei, sex pertinentes ad Divinitatem, & sex pertinentes ad Humanitatem. Tres enim articulos trium Personarum comprehendunt sub uno: quia eadem est cognitio trium Personarum. Articulum verò de opere glorificationis distinguunt in duos, scilicet, resurrectionem carnis, & gloriam animæ. Similiter articulum Conceptionis, & Nativitatis conjungunt in unum.

XVII. Quia verò dubitari poterat, Sacramentum Eucharistiæ, quia habet specialem difficultatem præ multis articulis, specialem articulum constituere, respondet ad 6. Quod in Sacramento Eucharistiæ duo possunt considerari. Unum scilicet quod Sacramentum est: & hoc habet eandem rationem cum aliis effectibus gratiæ sanctificantis. Aliud est, quod miraculosè ibi Corpus Christi continetur, et sic concluditur sub omnipotentia, sicut & omnia alia miracula, quæ omnipotentia attribuuntur.



QUÆSTIO II.

De natura Theolog.

DE existentia, utilitate, necessitate Theologiæ, & aliis, quæ visa sunt opportuna, pro primo ad eam ingressu, in præcedenti quæstione actum est. Nunc de ejus natura, & proprietatibus instituendus erit sermo, nimirum: an sit scientia, & qualis; an subalternata Scientiæ Dei, & Beatorum: an entitativè naturalis, vel supernaturalis; an practica; quodnam sit ejus objectum; aliæque ad perfectam naturæ, & proprietatum Theologiæ intelligentiam necessaria.

DUBIUM I.

An Theologia sit verè Scientia.

§. I.

Quadam prænotantur.

I. **D**ubium præsens non excitatur de Theologia, quasi secundum se, & objectivè sumpta. Hic enim certò certius judico, eam esse scientiam, cum habeat principia certò, & evidenter cognoscibilia, nimirum divinas veritates, ex quibus sunt deducibiles per necessariam illationem necessariæ, & evidentes conclusiones; Qui modus objectivus procedendi est proprius modus scientiæ. Insuper Theologia est unus ex habitibus, imò & virtutibus intellectualibus; virtutes autem intellectuales ex Arist. 6. Ethic. cap. 4., & D. Thom. 1. 2. qu. 57. quinque tantum sunt, videlicet intelligentia, sapientia, scientia, prudentia, & ars. Intelligentia versatur circa prima principia, & quidem absque discursu. Hinc ista duo, quodlibet est, vel non est, bonum est amandum, malum est fugiendum, sunt objectum intelligentiæ.

tia. Sapientia agit de rebus, non per proximas earum causas; sed per altiores, & universales: sic sapiens dicitur Legislator, qui in ferendis legibus procedit respiciens ad causas altiores, & universales, nempe bonum, & tranquillitatem Reipublicæ, potius quàm ad privatum bonum, & commodum huius, vel illius persone. Scientia vero (ut à Philosophis definitur) est habitus certus, & evidens per demonstrationem acquisitus, seu procedens ex causis proximis. Prudentia verò agit circa ea disponenda, quæ hîc, & nunc, seu in particularibus circumstantiis agenda sunt; an scilicet in præsentî rerum statu bellum in hostes movendum sit, an paci studendum. Ars tandem versatur circa factibilia, seu circa opera, quæ per potentias externas, manus, pedes, fieri solent. Atqui Theologia secundum se spectata non est intelligentia: non enim versatur circa prima principia immediatè. Non est prudentia, cum non tractet de ordinandis iis, quæ in particularibus circumstantiis agenda sunt. Multò minus est ars, quia non versatur circa factibilia per externas potentias; ergo erit, vel scientia, vel sapientia.

Nec refert, quòd agat de singularibus. Nam per se agit de Deo, qui singularis quidem est, sed summè necessarius. Intantum autem habitus, qui per se versatur circa singularia, scientificus esse non potest, quia hæc cum in continuo fluxu, & contingentia sint, certam sui cognitionem fundare non possunt, ut ad scientiam requiritur. Licet autem agat etiam de singularibus præter Deum, de iis agit, inquit D. Thom. hac *qu. 1. art. 2. ad 2. non quia de eis principaliter tractatur, sed introducuntur, tum in exemplum vita, sicut in scientiis moralibus; tum etiam ad declarandum auctoritatem virorum, per quos ad nos revelatio divina processit, super quam fundatur Sacra Scriptura, seu Doctrina*,

II. Dubium ergo procedit de Theo-

logia ex parte subiecti, seu prout est in tali, vel tali subiecto, an verè possideat conditionem, & naturam scientiæ. Potest autem Theologia reperiri in duplici subiecto; vel in Beato, sive Angelo, sive Homine, vel in Viatore. Et quidem Theologiam prout in Beato esse scientiam, extra controversiam esse debet, quia beatus ex principiis clarè, & certò visis in verbo, (quæ nos viatores credimus) alia necessariò concludit; quare beato tum conclusiones, tum earum principia sunt certò, ac evidenter cognita. Quæstio tota reducitur ad Theologiam, prout in nobis viatoribus est: Cum illi desit actualis evidentia, seu cognitio evidens principiorum, quæ, cum sint articuli fidei, à nobis non videntur, sed fide divinà creduntur. Fides autem, cum sit argumentum non apparentium, est de non visis.

III. Scotus, quem refert, & sequitur Frassen *disput. 1. progm. art. 2. qu. 2.* negat, Theologiam Viatorum esse verè, & propriè scientiam, eo quòd desit illi actualis evidentia, tum principiorum, tum conclusionum, quam dicit esse conditionem necessariam ad substantiam scientiæ. Thomistæ verò cum D. Thoma hac *quest. 1. art. 2.*, & in *1. sent. ad Annihaled.* censent, Theologium Viatorum esse propriè quòd substantiam scientiam, esto non habeat omnem perfectionem accidentalem, quam petit habere. Supponunt enim quòd, sicut homo, dum est adhuc puer, est quidem verè, ac substantialiter homo, sed nondum pervenit ad statum perfectum, in quo erit, dum fiet adultus: ita Theologia, dum est in Viatore, qui nondum videt, sed solum credit, existat verè, & substantialiter scientia, nondum tamen habeat statum perfectum scientiæ, quem habebit, dum erit in Beato. His adheret Henno, etsi Scotista *disput. progm. q. 2. conclus. 2.*

§. II.

Conclusio.

IV. **D**ico. Theologia in Viatore est verè, & substantialiter scientia, licet non habeat statum perfectum, quem habet in Beato. Prima pars probatur primò ex D. Augustin. lib. 14. de Trinit. 3. 1., ubi postquam dixit, Theologià fidem saluberrimam, quæ ad veram beatitudinem ducit, gigni, nutrirì, defendi, roborari, subdit: *quâ scientiâ non pollent fideles plurimi, quamvis polleant ipsi fide plurimùm.* Hinc Jeremia 3. v. 15. appellatur scientia his verbis: *Dabo vobis Pastores juxta cor meum, & pascet vos scientiâ, & doctrinâ.* Sapient. 10. v. 10. *Dedit illi scientiam Sanctorum.* Et 2. Petri 1. v. 5. *Ministrate in fide vestra virtutem, in virtute autem scientiam.*

V. Accedunt, & rationes. Prima, nam Theologia, ut in Viatore, est verè, & propriè virtus intellectualis, quia facit cum firmiter adhærere vero: cum ergo, ut vidimus, nec sit intelligentia, neque prudentia, neque ars, si non est scientia, aut sapientia, quid erit? Dicere enim, esse habirum quemdam innominatum, medium inter scientiam, & fidem, ut (teste Gonet) dicunt Valentia, & Vasquez, quo fundamento asseritur?

VI. Secunda. Cum scientia sit cognitio rei per causam, & quoniam illius est causa; ut aliquis sit verè sciens, debet certò cognoscere causam, certò cognoscere effectum, & certò cognoscere, illam esse causam, talis effectus, seu effectum illum procedere à tali causa; sed Viator Theologus habet summam certitudinem de causis, nempe veritatibus revelatis, quas credit fide divinâ, habet summam certitudinem de conclusionibus, quas ex illis deducit: scit etiam certò, imò evidenter, illas conclusiones ex illis principiis deduci certò, &

evidenter; unde esto non habeat evidentiam consequentis, neque antecedentis, habet tamen evidentiam consequentiæ; ergo Theologus Viator certò cognoscit rem per causam: ergo est verè sciens.

Totum hoc confirmo hoc ratiocinio: Ad scientiam propriè dictam tria requiruntur. 1. Ut per illam homo habeat certitudinem de veritate principiorum. 2. De veritate conclusionum. 3. Quòd habeat evidentiam consequentiæ, seu connexionis, quam conclusiones habent cum suis principiis; Atqui hæc tria præstat Theologia Viatoribus; ergo in eis est vera scientia.

Si dices, requiri ad veram scientiam etiam evidentiam principiorum.

VII. Contra est: 1. Esto scientia subalternans debeat procedere ex principiis à se evidenter notis, scientia tamen subalternata procedit ex principiis evidenter manifestatis in scientia superiori, à qua ea accipit, & cui credit; sed Theologia est scientia aliquomodo subalternata scientiæ Dei, & Beatorum; ergo non requiritur, ut habeat evidentiam suorum principiorum, sed sufficit, ut illa credat, & supponat evidenter cognita à scientia Dei, & Beatorum. Hac ratione utitur S. Thom. hac 1. p. q. 1. art. 2.

VIII. Contra 2. In scientiis merè humanis ideo requiritur evidentia principiorum, quia oportet scientem esse certum, ac prorsus immutabilem, quemadmodum dicitur lib. 1. *Post. exp.* 2. in ejusmodi autem scientiis talis certitudo immobilis haberi non potest, nisi principia evidenter cognoscantur; neque hoc suppleri potest per testimonium asserens, ea esse evidenter cognita in scientia superiori, quia hoc testimonium, urpote humanum, fallibile est: sed Theologus abique evidentia habere potest certitudinem immobilem suorum principiorum per testimonium divinum, quod ipsa evidentia certius est, cum, nec fallere possit, nec falli; ergo Theologia etiam in eo, in quo deest evidentia princi-

cipiorum, habet quiddid requiritur ad characterem, & substantiam scientiæ.

Confirmo hoc ex Philosopho supra citato, ubi significat, sufficere ad scientiam, quodd principia ejus teneamus scientiâ, vel meliore habitu: atqui Theologus viator esto non teneat principia Theologiæ per scientiam, quia non habet de illis evidentiam, ea tamen tenet meliore habitu, quia ea tenet per fidem divinam, quæ est melior, ac certior habitus, quam intellectus principiorum, & per illam sumus magis immobiles in cognitione, quam per istum, & per quamcumque evidentiam naturalem, ut patet 1. 2. qu. 4. art. 8.; ergo potest ex illis sic cognitis deducere conclusionem scientificam: sicut enim certitudinem in aliis scientiis generat evidentia, ita in hac eandem, imò & majorem, causat auctoritas divina. Evidentiæ igitur defectum, qui in Theologia nostra reperitur, Deus nobis compensat majori certitudine, quæ est in principiis, & conclusionibus Theologiæ propriis. Secunda vero pars nostri asserti constat. Nemo enim est, qui ambigat, quin Theologia perfectiorem statum habeat in eo subiecto, in quo cum certitudine conjunctam habet evidentiam suorum principiorum, & conclusionum, quam in eo, in quo habet certitudinem sine evidentia atqui in Viatore habet certitudinem sine evidentia, in Beato autem certitudinem habet, & evidentiam; ergo in Viatore est Theologia in statu minus perfecto, quam in Beato. Videri potest de hac quæst. Gonet *disp. prog. art. 1* Juenin. *Instit. Theol. Prolegomen. diff. 3. qu. 1. cap. 1* Bancel. *q. 2. art. 3. Contenson. differt. 1. cap. 1. speculatione 2.* Sylvius *ad quæst. 1. D. Thom. art. 2.*



IX. **O**bjiciunt 1. D. Thom. in 3. *dist. 33. q. 1. art. 2. quæstiunc. 4.* dicentem, *si autem esset aliqua scientia, qua non posset reduci ad principia naturaliter cognita, non esset ejusdem speciei cum aliis scientiis, neque univocè scientia diceretur.* Sed Theologia non resolvit suas conclusiones in principia naturaliter cognita, ut dictum est; ergo non est propriè, & univocè scientia.

Respondetur, explicando ultima verba Divi Thomæ, neque univocè scientia diceretur per excessum super alias scientias, eo: per defectum à vera ratione scientiæ, nego majorem. Et concessa minori nego consequent. Eodem enim modo loquitur D. Thomas ibi de scientia supernaturali comparatè ad scientias naturales, sicut de virtutibus infusis, de quibus ibi agit, comparatè ad virtutes acquisitas; sicut ergo virtutes infusæ verè virtutes sunt, licet non conveniant univocè, idest in eadem ratione cum virtutibus acquisitis, quia excellentiores istis sunt: ita scientia supernaturalis erit vera scientia, licet non conveniat in eadem ratione, sed altiore modo procedat, quam scientiæ merè naturales. Quodd autem hæc sit mens S. Doctoris indicant verba ejus sequentia, addit enim: *Unde cum fines virtutum infusarum non præexistant in seminariis naturalibus virtutum, sed naturam humanam excedant; oportet, quodd virtutes infusæ, à virtutibus acquisitis, quæ ab illis seminariis procedunt, differant specie.* Hinc ergo sequitur solum, Theologiam esse altiore, & digniorem aliis scientiis naturalibus, quod ostendit S. D. hac 1. p. *quæst. 1. art. 5.* tum propter certitudinem, quia alia scientia certitudinem habent ex naturali lumine rationis humana, quæ potest errare, hæc autem certitudinem ha-

*bet ex lumina divina scientia, quæ de-
cipi non potest. Tum propter dignita-
tem materiam, quia est principaliter de
his, quæ suâ altitudine rationem tran-
scendunt.*

X. Obijcies 2. habitus, qui de suo
subiecto non potest facere veras de-
monstrationes à priori, non est verè
scientificus; sed Theologia de suo
subiecto, quod est Deus, non potest
facere veras demonstrationes à prio-
ri, ut enim docet D. Thom. 1. *contrag-
eap. 25. sicut Deus definiri non potest,
quia omnis definitio est ex genere, &
differentiis, ita non potest demonstratio
de ipso fieri, nisi per effectum, quia
principium demonstrationis est definitio
ejusdem, de quo fit demonstratio. Quod
repetit hac 1. p. qu. 3. ar. 5. in corp.*

Respondeo, distinguendo min. de
suo objecto, quod est Deus, adæqua-
tè sumto, conc. min. inadæquatè sum-
to, subdistinguo: demonstrationem
per verum, & reale medium, conc.
minorem; per medium virtuale nego
min. De Deo igitur adæquatè sumto
non potest fieri demonstratio à priori,
sed solum per effectus, quia, ut ait
D. Thom. 1. p. q. 3. ar. 5. in argumento,
sed contra, *nihil est prius Deo, nec se-
cundum rem, nec secundum intellectum.*
Cognito tamen Deo per effectus, ni-
hil prohibet, quin concipientes ipsum
inadæquatè, concipiamus in ipso na-
turam, & essentiam, ut priorem vir-
tualiter attributis, unum attributum,
ut virtualiter prius alio, & sic pos-
simus assumere naturam Dei, non ut
verum medium, sed ut rationem à
priori ad demonstranda de Deo attri-
buta, & unum attributum de alio,
& tales sunt demonstrationes Theolo-
gicæ. Addo; hoc argumentum proba-
re, neque Theologiam Beatorum fore
scientiam; imò nec Deum habere
scientiam de se ipso.

XI. Obijciunt 3. Frassen, aliique.
Perfecta demonstratio debet fieri ne-
dum ex certa, sed evidenti cognitio-
ne principiorum; sed Theologus caret
evidentiâ principiorum, ex quibus

suas conclusiones deducat; ergo non
facit perfectas demonstrationes; er-
go non est perfectè sciens.

Urgent 1. Nullus, nisi stolidus, aut
protervus dissentire potest propositioni
perfectè demonstratæ: sed conclu-
sionibus Theologicis plures dissen-
tiunt, ut constat de hæreticis, & in-
fidelibus, qui rident omnes rationes
Theologicas, quibus Myſteria Fidei
suadere nitimur; Ergo signum est,
eas non esse perfectè demonstratas.

XII. Urgent 2. Nulla adhæſio vo-
luntaria est scientifica, scientia enim
necesseſtat intellectum ad assentiendum,
ut Logici docent, sed Theologus vo-
luntariè suspendit assensum suum,
tam circa principia credita, seu ar-
ticulos fidei (*credere enim est in pote-
ſtate nostræ, inquit Augustin. lib. de
ſpiritu, & littera cap. 31.*) quàm cir-
ca conclusionem ipsam; ergo talis as-
ſensus non est scientificus.

XIII. Urgent 3. Ille non est per-
fectè sciens, qui assentitur conclusio-
ni magis propter auctoritatem, & ve-
racitatem revelantis, quàm propter
legitimam illationem conclusionis ex
præmissis; sed Theologus expeditur,
se magis assentiri conclusioni ob in-
fallibilem auctoritatem Dei dicentis,
quàm ob legitimam illationem ex præ-
missis; ergo &c. Minor probatur.
Theologus firmius, & tenaciùs adhe-
ret conclusioni Theologicæ, quàm
cuiſlibet conclusioni Philosophicæ;
sed hoc non est ob perfectiorem illa-
tionem ſyllogiſticam, quæ in utra-
que est equalis; ergo est, quia firmius
innititur auctoritati Dei revelantis
præmissas conclusionis Theologicæ,
quàm lumini naturali manifestanti
principia conclusionis Philosophicæ;
ergo magis assentitur ob auctorita-
tem, quàm ob illationem.

XIV. Urgent 4. Notitia Theologi-
ca caret perfectò, & præcipuo charac-
tere ſcientiæ, nimirum evidentiâ;
definitur enim, quòd ſit cognitio cer-
ta, & evidens; quia ſicut per certi-
tudinem diſtinguitur ab opinione, ſic
per

per evidentiam essentialiter discrepat à Fide, tum divinà, tum humanà. Imò certitudo nascitur ex evidentia; ideo enim intellectus conclusioni firmiter assensum præbet, quia conspicit, eam evidenter deduci ex principiis evidentibus, cum evidentia conclusionis oriatur ex evidentia principiorum, sicut effectus à sua causa; ergo notitia Theologica caret &c.

XV. Respondetur ad hæc omnia, quæ sunt præcipuum Frassenii, & aliorum fundamentum, dist. maj.: perfecta demonstratio, perfectione, tum essentiali, tum accidentali, debet fieri &c., conc. majorem: Perfecta &c. perfectione purè essentiali: item distinguo: Si sit demonstratio purè Philosophica, transeat maj.: si sit demonstratio Theologica, neg. mai. Dato ergo, quoddam essentiam demonstrationis purè Philosophicæ requiratur evidentia principiorum, quia sine evidentia eorum non potest intellectus firmiter certificari de illis, ut dictum est: In demonstratione tamen Theologica, evidentia requiritur quidem ad ejus accidentalem perfectionem, qualem habebit in beatis, non tamen ad ejus essentiam, quia auctoritas Dei revelantis illa principia facit, ut intellectus illis firmiter, imò firmius assentiatur, quàm si illa videret: quia, ut supra dicebam cum D. Thom. 1. p. q. 1. art. 5. in corp., lumen rationis humanæ potest errare, lumen verò Divinæ Scientiæ decipi non potest. Quod repetit articuli. 8. ad 2.

XVI. Ad id, quod primò urgent, distinguo maj. nullus, qui assentiatur præmissis, & cognoscat connexionem earum cum conclusione, dissentire potest &c. conc. maj. nullus, qui, vel non assentiatur præmissis, vel non penetret connexionem earum cum conclusione, potest; nego maj., & similiter ad min. Quoddam enim infidelis, aut hæreticus rideat rationes Theologicas, hoc ideo est, vel quia non vult assentiri præmissæ, ut à Deo

revelatæ, vel quia non cognoscit connexionem ejus cum conclusione. Ceterum qui assensum præstat præmissæ, & connexionem illius cum conclusione penetrat, conclusioni dissentire nequit. Nihil autem prohibet (ait D. Th. ar. 5. ad primum) id, quod est certius secundum naturam, esse quoddam nos minus certum debilitate intellectus nostri Unde dubitatio, quæ accidit in aliquibus circa Articulus Fidei, non est propter incertitudinem rei, sed propter debilitatem intellectus humani.

XVII. Ad id, quod urgent secundò, nego min. quoddam secundum partem. Licet enim assensus præmissis sit voluntarius, supposito tamen, quoddam Theologus dederit assensum præmissis, & evidenter cognoscat, conclusionem ex illis præmissis necessariò inferri, non potest suspendere assensum circa conclusionem; quoddam suspendit, signum est, cum non penetrare connexionem præmissarum cum conclusione, ut docent Logici.

XVIII. Ad id, quod tertio urgent. Dico primò, hanc instantiam, quæ est Frassenii, destruere ejus secundam conclusionem, quæ ait: Theologiam nostram posse dici scientiam, quatenus scientia dicitur cognitio certa de objecto necessario, & infallibili, & per legitimum discursum genita, non verò prout etiam objecti evidentiam desiderat. Si enim Theologus magis, idest potius, & immediate assentitur conclusioni ob auctoritatem Dei revelantis, ita ut motivum assentiendi formale, & proximum sit Dei auctoritas, & non illatio, nullo modo erit sciens (neque etiam ut scientia est cognitio certa absque evidentia) sed unice credens. Deinde modus iste arguendi destruit omnem scientiam. Si enim qui non videt principia, sed ea credit, assentitur conclusioni ob auctoritatem dicentis magis, quàm ob legitimam illationem, & ideo non est sciens, pariter qui videt principia, assentitur conclusioni ob evidentiam principiorum magis, quàm ob legitimam illa-

tionem : & sicut quod firmitus est auctoritas dicentis , eod firmitus adhæret conclusioni ; ita quod major erit evidentia principiorum , eod tenaciùs adhærebit conclusioni , non propter perfectiorem illationem , quæ in omnibus demonstrationibus est æqualis , sed quia firmitiori evidentia assentitur principiis : ergo si propter primum , discursus Theologicus non est scientificus , propter secundum nullus discursus etiam evidens erit scientificus .

XIX. Respondeo ergo distinguendo maj. Propter auctoritatem , quæ sit causa immediata , & formale motivum assensus , conc. maj. propter auctoritatem , quæ sit causa solum mediata assensus , nego maj. : & eodem modo distinguo min. . Auctoritas Dei revelantis est quidem causa immediata , & formale motivum , cur Theologus assentiatur præmissæ de fide , sed causa immediata , & formale motivum , cur assentiatur conclusioni ex illa illata , est necessaria connexio , quam habet conclusio cum illa præmissa . Sicut evidentia , quam habet aliquis , & quæ assentitur præmissæ evidenti , non est ratio immediata , & formalis , cur assentiatur conclusioni ex illa illata , quia præmissæ assentitur per lumen primorum principiorum ; conclusioni verò per lumen scientiæ . Ex quo autem Theologus firmitus adhæreat conclusioni Theologicæ , quamcunque conclusioni Philosophicæ , solum sequitur , quod auctoritas Dei dicentis mediata , & virtualiter concurrens ad assensum conclusionis , influat in eam majorem certitudinem , quia (ut docent Logici) certitudo præmissarum influat certitudinem in conclusionem , & quod assensus præmissarum est certior , eod certior sit assensus conclusionis ex tali assensu deductæ .

XX. Ad id , quod quartò urgent , nego maj. si loquatur de charactere essentiali , & specifico scientiæ : concedendo autem illam , si loquatur de charactere accidentali , & proprio

scientiæ habentis in subiecto summatum perfectum . Ideo autem Philosophus definiit scientiam , quodd sit cognitio certa , & evidens , quia loquebatur de scientia deducta ex principiis naturalibus , quam solum ipse noverat , quæ non potest habere certitudinem immobilem de suis principiis , nisi per evidentiam ; Quod non valet de scientia procedente ex revelatis à Deo ; hæc enim majorem certitudinem habere potest de suis principiis , etsi ea non videat , propter auctoritatem Dei revelantis . Quare scientia non eodem modo petit evidentiam , ac certitudinem : certitudinem enim petit propter se , evidentiam autem propter certitudinem ; & ideo si aliunde possit habere certitudinem , quam ex evidentia , stat scientia sine evidentia . Scientia autem sine evidentia adhuc essentialiter discrepabit à fide . Tum quia fides essentialiter excludit evidentiam : hanc autem scientia essentialiter non excludit , quamvis possit sine eâ esse , sic Theologia licet in Viatore stet sine evidentia , in Beato tamen stabit cum evidentia , in quo tamen non stabit fides . Quare fides est essentialiter obscura , Theologia autem est obscura solum permissivè , & ratione subiecti , & status . Neque valet : Fides est obscura , Theologia est obscura ; ergo Theologia , & fides non discrepant . Sicut non valet : homo est animal ; equus est animal ; ergo homo non discrepat ab equo ; quia alio modo est obscura fides , alio modo Theologia ; unde medium in neutra præmissa distribuitur . Tum etiam , quia Theologia est discursiva , fides autem non . Distingui etiam potest aliter maj. , quod character scientiæ sit evidentia consequentiæ , conc. evidentia antecedentis , vel consequentis nego maj. . Theologia autem , cito non habeat evidentiam de antecedente , vel de consequente in se , habet evidentiam , & clarè videt , illud consequens connecti , sequi , & inferri ex illo antecedente ; & sic licet careat evidentia ante-

antecedentis, & consequentis materialiter, ut in se sunt; habet tamen evidentiam de consequente, ut illato, & de antecedente, ut illativo.

Ex dictis infero 1., quod esto in multorum opinione scientia subalternata naturalis, in eo, qui caret scientiâ subalternante, non sit vera quoad substantiam scientiæ; Hoc ideo non est, quia præcisè in eo subiecto careat evidentia principiorum, sed quia, cum careat evidentia, & debeat niti testimonio humano attestanti, illa principia esse probata in scientia superiori, quod testimonium est fallibile, consequenter caret etiam certitudine necessaria ad scientiam. At Theologia Viatoris, esto careat evidentia principiorum, non caret tamen, imò majori gaudet certitudine ob testimonium Dei infallibile illa revelans.

Infero 2., quod licet fides, & scientia non possit de eadem veritate recipi in eodem subiecto, quando scientia clara, & evidens est, non tamen, quando scientia, in subiecto, in quo est, evidentiam, & claritatem de re demonstrata non afferat: cumque talis sit Theologia in Viatore, ideo Viatore eandem veritatem potest, & credere, & Theologicè scire, ac demonstrare.

DUBIUM II.

An nostra Theologia subalternetur scientiæ Dei, & Beatorum, & an maneant in Patria.

§. I.

Resolvitur primum Dubium.

Occasionem huic dubio dat D. Thomas in hoc articulo 1. cum enim doceat, Theologiam nostram procedere ex principiis notis lumine superioris scientiæ, sicut musica procedit ex principiis per Arithmetica manifestatis; ideo jure du-

bitatur, an, sicut musica subalternatur Arithmeticæ, sic nostra Theologia subalternetur scientiæ Dei, & Beatorum, in qua clarè manifestantur principia, quæ Theologia nostra credit.

I. Dico. Si loquamur de subalternatione scientiarum, quemadmodum loquuntur Philosophi, Theologia nostra non propriè subalternatur scientiæ Dei, & Beatorum. Est probabilior etiam apud Scotistas, & probatur. Nam ad scientiam propriè subalternatam duo saltem necessaria sunt. Prius, quod sint diversa principia scientiæ subalternatæ, & subalternantis: ita scilicet, ut quæ in subalternata principia sunt, sint conclusiones in scientia subalternante, ratione cuius illa dicitur incipere, ubi ista desinit. Posterius, ut objectum scientiæ subalternatæ addat supra objectum subalternantis aliquam differentiam accidentalem, ratione cuius fundet speciales proprietates demonstrabiles, quomodo musica, quæ considerat numerum sonorum, addit supra objectum Arithmeticæ, quod est numerus, differentiam accidentalem sonoritatis, ex qua oriuntur speciales proprietates per musicam demonstrabiles.

Atqui neutrum horum verificatur inter Theologiam nostram, & Theologiam Beatorum, utriusque enim eadem sunt principia, & idem prorsus obiectum, eademque conclusiones, cum hoc se o discrimine, quod ea, quæ à nobis cognoscuntur obscurè, à Beatis tam principia, quàm conclusiones, quàm obiectum ipsum cognoscuntur clarè, sive quia ea omnia vident in verbo, vel per revelationem claram. Ergo Theologia nostra propriè non subalternatur scientiæ Dei, & Beatorum. Neque obiectum Theologiæ nostræ ullam accidentalem differentiam addit supra obiectum Theologiæ, & scientiæ Dei, & Beatorum.

II. Si verò loquamur de subalternatione non secundum rigorem philosophicum, sed impropriè, & secundum

dum quandam similitudinem, non incongruè dici poterit, Theologiam nostram esse subalternatam scientiæ Dei, & Beatorum, quia est inferior illa, quia procedit per principia clarè in illa manifestata, & quia ordinatur ad consequendum eum finem, quem beati sunt jam consecuti; & D. Thomas dum Theologiam nostram assimilât musicæ, solum intendit, quod sicut musica est inferior, & procedit ex principiiis manifestatis in Arithmetica, ita & Theologia nostra inferior sit, & procedat ex principiiis notis lumine superioris scientiæ, qua scilicet est scientia Dei, & Beatorum, & quod sicut musica credit principia tradita sibi ab Arithmetico, ita Doctrina Sacra credit principia revelata sibi à Deo. Hoc tamen ad rigorosam, & philosophicam subalternationem non sufficere, jam dictum est.

§. II.

Resolvitur secunda Pars.

III. **D**ico. Theologia hic acquisita manebit in Patria. Est hæc assertio menti D. Thom. conformior, ut benè notat Sylvius *quæst. 1. ad art. 2. quæstio 2.* nam S. Thomas 1. *part. quæst. 89. artic. 3.* resolvens, habitum scientiæ manere in anima separata; & *art. 4.* docens, in eadem anima manere actus scientiæ hic acquisitæ, comprehendit etiam scientiam rerum divinarum; unde ad primum argumentum ex Apostolo 1. *Corinth. 13. v. 8. scientia destruetur* respondet, Apostolum non loqui de scientia quantum ad habitum, sed quantum ad actum, seu modum actus, quia scilicet neque phantasmata remanent destructo corpore, neque est usus scientiæ per conversionem ad phantasmata. Et *qu. 20. de veritate art. 3. ad 1.* generaliter docet, quod scientia hic acquisita remaneat, quoad essentiam habitus, sed tollatur modus, quo hic scientia utimur; quod repetit in *c. 13. prioris ad Cor.*

IV. Probatur verò sic. Theologia nostra comparatur ad scientiam Beatorum, sicut musica ad arithmetica, quia sicut musica procedit ex principiiis ab arithmetica manifestatis: ita nostra Theologia procedit ex principiiis in scientia Beatorum manifestatis: & sicut musica in eo, qui non habet arithmetica, obscurè tantum cognoscit sua principia, ita Theologia in Viatore cognoscit sua principia per lumen obscurum fidei: sed musicus, si fiat arithmeticus non amittit musicam, quam prius habebat, sed eam perficit; ergo Viator, dum evadit Beatus, non amittit Theologiam, quam prius habebat, sed illam perficit per visionem claram eorum, quæ prius obscurè solum cognoscebat. Quia sicut obscuritas conveniebat musicæ non per se, sed per accidens, & ratione subjecti, ita obscuritas non convenit Theologiæ per se, sed tantum per accidens, & ratione subjecti; quia scilicet erat in Viatore, ut patebit clariùs, dum contraria momenta solvemus.

Confirmo. S. Hieronymus *epist. ad Paulinum*, adhortans eum ad studium Sacræ Scripturæ: *discamus* (inquit) *in terris, quorum nobis scientia perseveret in Cælis.* Et Sanctus Chrysostom. *in eap. 13. 1. ad Cor. non abolebitur* (ait) *scientia, sed desinet esse non perfecta.* Ergo in Sancto Viatore, dum fiet Beatus, non abolebitur, sed perseverabit, & solum desinet esse non perfecta scientia, quam hic in terris comparavit, quia per eadem principia easdem veritates, quas hic cognoscit lumine per accidens obscuro, ibi lumine claro cognosceat.

§. III.

Argumenta contraria.

V. **O**bjicit 1. Fransenius cum aliis. Paulus 1. *ad Cor. cap. 13. v. 8.* cum dixisset *charitas nusquam excidit*, subjungit, *sive prophetia evanescunt, sive*

sive lingua cessabunt, sive scientia destruetur. Ex quibus sic arguit. Scientia, quam in Patria destruendam indicat Apostolus, est Theologia hic acquisita, eam enim scientiam dicit esse destruendam, de qua prius v. 2. locutus dixerat: *Si habueris prophetiam, & noveris mysteria omnia, & omnem scientiam.* Scientia autem, quæ versatur circa mysteria, & ex eis eruit conclusiones, scientia Theologica est; ergo hæc in patria destruetur.

Si dixeris, Apostolum velle scientiam fore destruendam, non quidem quantum ad substantiam, & quoad habitum, sed solum quantum ad statum, nimirum obscuritatis, & invidentiæ, & quantum ad actum, qui non amplius erit per conversionem adphantasiata.

VI. Contra urget. Hujusmodi expositio menti Apostoli contraria est; 1. Quia Apostolus absolute dicit, quod scientia destruetur: destructio autem non est sola rei despectio, sed totalis rei cessatio. 2. Dicit, quod scientia destruetur, sicut destruetur prophetia; sed prophetia omnino deficiet: ergo & scientia. 3. Quia hujus definitionis rationem reddens Paulus v. 9. & 10. dicit, ex parte enim cognoscimus, & ex parte prophetamus: cum autem venerit, quod perfectum est, evacuabitur, quod ex parte est. Hoc est, quod modo partim per prophetiam, partim per scientiam Theologicam novimus ex parte, prorsus tollitur, cum venerit evidens cognitio beatiûca.

VII. Respondetur tamen, datam expositionem esse conformem menti Apostoli, cujus testem habemus D. Jo: Chrysostomum nuper relatam, & D. Thomam in expositione præfati textus. Neque obstant instantiæ allatæ. Non quidem prima; non enim semper in Scriptura destructio significat definitionem totalem rei, & subrogationem alterius specie substantiali diversæ. Nam in morte destruitur corpus animale, sicut dum seminatur, destruitur, & moritur granum, teste Apo-

stolo 1. Cor. 15. v. 35. & 37., & resurget corpus spirituale; & tamen corpus animale, quod moritur, distinguitur a corpore spirituali solum quoad perfectionem, & statum, non quoad substantiam. Ergo in casu nostro de scientia, vult Apostolus, scientiam destruendam esse in patria, quoad statum imperfectum obscuritatis, quam habebat in via, sicut corpus destruitur quoad statum corruptibilitatis; & colligitur exemplo, quod statim subjicit Paulus de scientia parvuli, & scientia adulti, dicens v. 11. *cum essem parvulus, loquebar ut parvulus, sapiebam ut parvulus, cogitabam ut parvulus.* Quando autem factus sum vir, evacuavi quæ erant parvuli. Quis autem dicat, scientiam parvuli evacuari in viro per hoc, quod alia sit scientia in viro, quam in parvulo, & non potius, quod sit eadem quidem in utroque quoad habitum, sed quoad actus, & modum cognoscendi perfectior sit in viro, quam in parvulo? Adde: Quod si per hoc, quod dicat Paulus, in patria evacuabitur, & destruetur scientia, inferenda est destructio cujuslibet scientiæ naturalis, quia Apostolus absolute loquitur de scientia, imò dicit expresse, & omnem scientiam. Quod certe (ut puto) nec Fraisen, nec ullus Scotista dicit.

VIII. Neque officit secunda instantia. Nego enim absolute min. Prophetia enim non excludit visionem claram, ideoque fuit in Christo, qui Beatus erat, in quo tamen non fuisset, si essentialiter esset lumen obscurum, sicut hac ratione in Christo non fuit fides. Sicut ergo dona Spiritus Sancti, licet in nobis Viatoribus regulentur per fidem, remanent tamen in patria, teste D. Thom. 1. 2. q. 48. artic. 5., quia hoc illis contingit per accidens, & ratione subjecti, in quo sunt, ita Theologia, & Prophetia, quæ in Viatore regulantur per fidem, in patria poterunt regulari per visionem,

nem, aut revelationem claram.

IX. Neque officit, quod tertio urget. Ex laudatis enim Apostoli verbis colligimus oppositum cum D. Thoma. Ex parte enim cognoscimus, idest imperfecte, inquit S. Doctor: pars enim est imperfecta respectu totius, quod est perfectum. Cum igitur venerit, quod perfectum est, idest Theologia patriæ, quæ tota est perfecta, evacuabitur Theologia viæ, non ex toto, sed ex parte, idest non secundum substantiam, & quantum ad habitum, sed quantum ad actum, seu modum cognoscendi per conversionem ad phantasmata, secundum quem est imperfecta.

X. Sed dices: stante hac expositione, jam non subsistet discrimen, quod statuit Apostolus inter caritatem, & scientiam, quod caritas nunquam excidit: scientia vero destruetur. Quod sic ostendo. Nam etiam caritas pro statu viæ est imperfecta, cum reguletur per fidem, quæ est obicura, non minus, ac per fidem reguletur scientia: quam imperfectionem evacuabit in patria, ubi regulabitur per lumen gloriæ, quod est clarum, & perfectum; ergo vel etiam caritas excidet, vel non excidet, & destruetur scientia; ergo non subsistet discrimen &c.

XI. Respondetur, discrimen inter caritatem, & Theologiam adhuc subsistere. Nam imperfectio, quam habet caritas, ut est in viâ, prorsus accidentalis est tamen habitui, quam actui caritatis; unde non solum eodem habitu caritatis, quo diligimus Deum in viâ, diligemus in patriâ, sed eodem actu; at imperfectio, quam habet scientia hic in viâ, licet sit accidentalis habitui, non est tamen accidentalis actui, sed illi essentialis, cum actus cognitionis viæ essentialiter respiciat, & conve.atur ad phantasmata; & ideo manebit quidem in Beato eadem scientia Theologica, quam habuit in viâ, quoad habitum, non tamen quoad actum; ibi enim elicit alium actum specie materiæ diver-

sum, non per conversionem ad phantasmata, sed ad solas species intelligibiles, ad modum cognitionis Angelorum, quibus tunc homo erit similis, regulatum insuper non lumine fidei, sed lumine claro. Sicque verificatur, quod caritas nusquam excidet, quia, nec excidit quoad habitum, nec quoad actum; scientia verò destruetur, quantum ad actum, & modum cognitionis, non tamen quoad habitum. Totum hoc colligo ex D. Thom., qui exponens verba Apostoli, ait lect. 3.: sic ergo remanet scientia in anima post corporis mortem quantum ad species intelligibiles, (nempe quoad habitum) non autem quantum ad inspectionem phantasmatum, idest quantum ad actum, seu modum cognitionis.... & secundum hoc Apostolus hic dicit, quod scientia destruetur. Scilicet secundum conversionem ad phantasmata. Et paulo post assignans discrimen inter caritatem, & scientiam, ait: Imperfectio est ergo de ratione scientia prout hic de Deo habetur, in quantum scilicet cognoscitur ex sensibilibus: non est autem de ratione caritatis, ad quam cognitum bonum diligere pertinet: & ideo superveniente perfectione gloria cessat prophetia, & scientia, idest quoad actum. Caritas autem non cessat. idest nec quoad habitum, nec quoad actum, sed magis perficitur, quia, quanto perfectius cognoscitur Deus, tanto etiam perfidius amabitur.

XII. Obijciunt 2. Fides, quæ est habitus principiorum Theologiæ non manet in patriâ; ergo nec Theologia, quam habemus in viâ: non enim potest manere scientia, non manente habitu. à quo accipit sua principia.

XIII. Confirmatur. Theologia nostra secundum se est inevens: talis enim est secundum se, qualis secundum se est habitus principiorum ipsius. Neque potest fieri, quod habitus idem modò sit inevens, & postea evidens, sicut neque assensus inevens potest idem numero fieri evidens.

XIV. Respondetur conc. anteced. nego

nego consequentiam, ad cuius probationem nego suppositum, quod scilicet lumen principiorum, cui essentialiter nittitur Theologia, sit lumen fidei. Nam lumen, quo regitur Theologia secundum se, est lumen divinum revelans, ejusque principia sunt veritates immediate revelatae, abstrahendo ab hoc, quod revelentur clarè, vel obscurè. Quare quod sic revelentur, ut revelentur solum per fidem, & obscurè, non est de ratione Theologiae secundum se, sed illi convenit ratione subiecti, quia scilicet est in Viatore: & propterea, si lumini obscuro succedat lumen, & revelatio clara, non solum non destruitur, sed perficitur Theologia, imò hoc secundum se petit Theologia, ut sit perfecta: lumen autem, & revelationem obscuram solum admittit tanquam supplementum. Hinc

XV. Ad cons. nego antecedens. Quod enim Theologia nostra sit inevidens, non convenit ei secundum se, inquantum est Theologia: cum enim sit de objecto evidenter cognoscibili, sic petit potius lumen clarum pariens evidentiam; sed convenit illi solum per accidens, & ratione status. Quare habitus Theologiae, qui modò est inevidens, potest fieri evidens, dum erit in patria. Neque est simile de assensu conclusionis Theologiae elicitò hinc in via: hic enim est actus reduplicans statum, quem Theologia habet in via: cumque reduplicatio statu viae Theologia sit essentialiter inevidens, ideo actus ab ea pro hoc statu elicitus, essentialiter est inevidens, nec potest idem manens transire in evidentem. Uno verbo. Habitus Theologiae de se est indifferens ad eliciendas conclusiones, & actus, sive juxta regulam fidei, sive juxta regulam luminis clari; assensus autem elicitus juxta regulam luminis obscuri, cum ab hac specificetur, non est indifferens, ut eliciatur juxta regulam alterius luminis.

XVI. Obijciunt 3. Theologia Bea-

Tom. I.

torum est habitus per se infusus, nostra autem est habitus per se acquisitus, ideoque differunt specie; ergo vel in patria habebimus duplicem habitum Theologiae, si manet habitus, quem habemus in via, vel is, qui fuit hic acquisitus, ibi non manebit.

Respond. nego antec. Nam præter scientiam beatam, quæ vident res in Verbo, non infunditur Beatis alia scientia Theologica; sed ille habitus scientiæ, quem de rebus Theologicis habent extra visionem Dei, in quibusdam sequitur ex visione beatifica, in aliis est acquisitus per præcedentes actus in hac vita; quique majorem perfectionem accipit ex conjunctione ad visionem beatificam.

XVII. Ex his colligo, in Beatis esse triplicem scientiam. Prima est intrinsecè supernaturalis, nempe visio beata, quæ eminenter dici potest scientia, & quæ Deum videntes, eodem unico simplicissimo intuitu omnia divina vident, sive principia, sive conclusiones: ideoque formaliter discursiva non est, sed eminenter solum, & dicitur scientia beata. Secunda est, quæ ex visis per scientiam beatam discurrunt ad alia extra verbum & hæc est Theologia Beatorum, quæ in iis, qui, dum erant Viatores, fuc. uni Theologi, est idemmet habitus specie, & numero, quem habebant in via, esto cum majori perfectione. In iis vero, qui non fuerunt Theologi, sequitur ex ipsa beatifica visione, & hæc scientia est formaliter discursiva, & entitativè naturalis, sicut dicemus statim de nostra Theologia. Tertia est scientia purè naturalis, quam Beati habent de rebus naturalibus per principia lumine naturali nota, eandemque, quam habuerunt in via, quæque remanet etiam in demonibus. Quare Theologia, atque scientiæ hic comparatæ remanebunt non solum ad ornatum in Patria, sed ad exercitium, licet alio, & perfectiori cognitionis modo; quia non amplius per conversionem ad phantasmata, sed per con-

I

VERO

versionem ad species intelligibiles immediate se exercent, ut dictum est.

DUBIUM III.

An nostra Theologia sit entitativè supernaturalis.

§. I.

Quadam notantur.

I. Supernaturale est illud, quod est supra naturam creatam, & creabilem, illiusque vires excedit, quod dupliciter contingere potest. Vel solum quoad modum, qualiter supernaturalis dicitur resuscitatio mortui, aut visus restitutus cæco: vita enim restituta mortuo, aut visus restitutus cæco in se, & entitativè res naturalis est, utpotè ejusdem speciei cum vitâ, & visu aliorum hominum; quia tamen modus talis restitutionis excedit vires totius naturæ, & à solo agente supra totam naturam haberi potest, dicitur supernaturalis quoad modum. Vel potest esse supernaturale etiam intrinsecè, & quoad entitatem, ut sunt Myſteria Trinitatis, Incarnationis, visio beata &c., quæ quoad entitatem, & speciem suam excedunt totam naturam, ejusque vires, imò & exigentiam, cum sint prorsus in ordine superiori. Et ideo quærimus, an habitus, & actus Theologiæ nostræ sit hoc modo supernaturalis, & quidem formaliter, & intrinsecè.

Quòd enim Theologia nostra sit supernaturalis radicaliter, & remotè, seu originativè, quia nimirum radicatur in fide supernaturali, & divina, & ex ipsa originem ducit, tanquam scientia conclusionum ex habitu principiorum: quòd etiam sit supernaturalis extrinsecè, & objectivè, quia respicit objectum supernaturale, nempe Deum, in controversiam non vocamus.

Hæc in re non una est Theologorum, etiam Thomistarum, sententia:

licet enim major pars istorum sentiat, Theologiam esse habitum entitativè naturalem, cui adherent Scotistæ; aliqui tamen, inter quos Contenton. *disert. 1. cap. 2. specul. 3.*, & alii, sentiunt, esse entitativè supernaturalem. Majori ego parti subscribo.

§. II.

Conclusio.

II. **D**ico. Theologia nostra summa, sive quoad habitum, sive quoad actum, est entitativè naturalis. Et probò 1. Judicium de naturalitate, aut supernaturalitate alicujus rei formari debet, non ex causa radicali, & remotâ, sed ex causa immediatâ, & proximâ: sed licet causa radicalis, & remota habitus, & assensus Theologici sit supernaturalis, nempe Inmen fidei revelans, & principia revelata; causa tamen immediatâ, & proximâ, & ratio formalis, sub qua Theologia procedit, est naturalis: ergo Theologiæ habitus, & assensus Theologicus est entitativè naturalis. Major probatur. Quia effectus speciem sumit à causa proxima immediatè influente, non autem à causa remota: quare licet actus fidei, & caritatis procedant remotè ab intellectu, & voluntate, quæ potentie naturales sunt, quia tamen habitus fidei, & caritatis, à quibus proximè, & immediatè procedunt, sunt supernaturales, hinc actus fidei, & caritatis sunt supernaturales. Et licet causæ universales, puta sol, æqualiter in omnes effectus influant, quia tamen causæ proximæ, & immediatæ, diversæ sunt, ideo effectus diversi sunt; & iste effectus est in specie hominis, quia causa proxima est homo; ille in specie equi, quia causa immediata est equus, licet in utrumque eadem causa universalis remotè concurrat. Et ratio est, quia causa proxima, & immediatâ determinat, & modificat, & trahit ad hanc potius speciem,

ciem, quàm ad aliam concurrum-
causæ remotæ.

Minor autem probatur. Eſto causa remota, & radicalis assensus Theologicæ conclusioni sint veritates immediate revelatæ, quæ (ex dictis) sunt principia nostræ Theologiæ, causa tamen proxima, & immediata, imò & specificativa talis assensus, ut distinguitur ab assensu fidei est, ex parte objecti, connexio necessaria principiorum cum conclusione, & ex parte intellectus, ratiocinium, quo, stante tali connexione discurrit à principiis ad conclusionem, eamque infert ex principiis: scientia enim, ut distincta a lumine principiorum, definitur, quòd ut habitus per demonstrationem acquisitus: sed supposita fide connexio illa præmissarum cum conclusione naturali lumine cognoscibilis est, ratiocinium etiam illud naturale est: ergo causa immediata, & proxima assensus Theologici naturalis entitativa est. Minor explicatur, & simul probatur. Si alicui Gentili Philosopho fiat hæc demonstratio Theologica: *omne suppositum habens duas naturas habet duas voluntates; sed Christus est suppositum habens duas naturas; ergo Christus habet duas voluntates*; Ille Philosophus statim dicet. Ego non existimo præmissas hujus argumenti esse veras, quia fidei non adhibeo religioni vestis: sed tamen supposita semel præmissarum veritate, ego per meam Philosophiam optimè cognosco, quòd ex talibus præmissis sequitur evidenter præfata conclusio. Quodnamque so clarius signum dari potest, quòd connexio præmissarum, & conclusionum Theologiæ, quamvis supernaturarium, sit naturalis, & naturali lumine cognoscibilis? Insuper. Si ratiocinium, quo Theologus discurrit, esset supernaturale, & à fide immediata, ille melius theologizaret, qui fortio- rem haberet habitum fidei, non- verò qui habet perpicaciorē vim naturalem intellectivam; quia habitus supernaturales sunt tota ratio agendi

(ut docent nostri in tractatu de visione) & actus supernaturales unice correspondent intentioni luminis supernaturalis, non verò naturalis virtutis, & perspicacitatis; sed oppositum contingit: non enim ille est melior Theologus, qui magis credit, cum sæpe viri, & mulieres idiotæ firmitus credant, qui tamen theologizare nesciunt; ergo principium, & causa immediata assensus conclusioni Theologicæ non est fides, aut aliquid supernaturale principium, sed ratio, & perspicacitas naturalis.

III. Hac ratione ita expensâ præcluditur communis adversariorum responsio, nimirum, discursum, & ratiocinium naturale concurrere ad assensum Theologicum, non per modum causæ proximæ, sed tantum per modum conditionis, sicut applicatio ignis concurrat ad comburendum.

Præcluditur inquam. Nam si assensus Theologicus commensuratur, non lumini fidei, sed unice ratiocinio, & perspicacitati intellectus, hæc non erit præ conditio, sed causa immediata illius, alias dicere possemus, habitus supernaturales esse prout conditiones, non rationes formales totales agendi.

Quod magis urget primò. Inter conditionem, & rationem formalem, hoc adest discrimen, quòd sine ratione formali res nec esse potest, nec concipi; sine conditione tamen res non potest quidem esse saltem naturaliter, sine ea tamen concipi potest, quod in exemplo allato patet. Quia enim ratio formalis calefaciendi est calor, nec esse, nec concipi potest ignis calefaciens, quin concipiatur calidus. Quia verò approximatio ignis ad lignum est solum conditio sine qua non, cito naturaliter non possit ignis calefacere, nisi sit approximatus ligno, possum tamen concipere ignem calefacientem, nihil cogitans de approximatione. Atqui scientia Theologica nullatenus concipi potest, non concepto ratiocinio, & discurfu à principiis

piis ad conclusiones; quia ablato discursu, vel formali, vel virtuali scientia amplius non est; ergo discursus non est pura conditio &c.

Urgeo secundò. Eadem est ratio formalis constitutiva, ac essentialiter distinctiva; sed esse discursivum est ratio essentialiter distinctiva scientiæ ab habitu, qui non est scientia; quare definitur, quòd sit per demonstrationem acquisita; ergo ratio discursivi est ratio constitutiva scientiæ &c.; & per rationem discursivi scientia distinguitur ab opinione, quòd scientia sit discursiva ex necessariis, opinio verò ex probabilibus.

IV. Probatur secundò hae ratione. Ille habitus non est intrinsecè supernaturalis, qui nostris actibus, & studiis acquiritur; sed habitus Theologiæ nostris actibus, & studiis acquiritur; ergo non est &c. Maj. probatur: tum quia actus, & studia nostra sunt exercitia ordinis purè naturalis, effectus autem non potest excedere (praesertim ordine) causam suam proximam. Tum etiam, ideo enim virtutes Theologicae, aliaque dona nostris actibus, & studiis comparari non possunt, quia supernaturales intrinsecè sunt. Minor probatur, tum ex D. Th. in prolog. 1. sent. quest. unica art. 3. quaestione. 2., ubi sic ait: *sicut habitus primorum principiorum non acquiritur per alias scientias, sed habetur à natura; sed habitus conclusionum ex primis principiis deductarum: ita etiam in hac doctrina non acquiritur habitus fidei; qui est quasi habitus principiorum, sed acquiritur habitus eorum, quæ ex eis deducuntur.* Tum experientia, quæ constat, modum comparandæ Theologiæ, non esse devotionem, & orationem, quæ homines solent se præparare ad assequendos habitus supernaturales, sed opus esse summo studio, & assiduâ exercitatione, & scientiarum etiam naturalium, maxime Philosophiæ, subsidio, ut quis evadat peritus Theologus; eos autem, qui orationi tantum indulgent,

& huiusmodi studia, & exercitia continent, etiam rebus Theologicis vacuos, & inanes, saltem viâ ordinariâ, experimur.

V. Huic discursui variè dicunt contrarii. Dicit primò Contentson, Theologiam, estî nostris actibus partam, esse tamen in se supernaturalem, quia partam assensibus supernaturalibus articulorum fidei; cum enim non assentiamur conclusioni, nisi propter præmissas, quando assensus præmissarum est supernaturalis, assensus conclusionis supernaturalis esse debet. Inter Theologiam autem, & virtutes per se infusas duplicem statuit differentiam: prima est, quia virtutes per se infusæ effluunt à gratia sanctificante, ut proprietates ejus: unde sicut gratia nequit produci nostris actibus, ita nec ejus proprietates, quæ petunt fieri eadem actione, quæ sit essentia, cujus sunt passionēs. Secunda differentia est, quòd virtutes per se infusæ dant simpliciter posse in ordine supernaturali, sicut potentia in ordine naturali; unde sicut potentia nostris actibus non acquiritur, sed effluunt ab anima; ita virtutes effluunt à gratia. Theologia autem cum supponat fidem dantem simpliciter posse, non dat nisi promtè, & faciliter operari; ideòque nostris actibus poterit acquiri.

VI. Sed contra. Theologia, sicut & quælibet scientia, non paritur per assensum præmissarum secundum se, sed per assensum præmissarum, ut inferentium, seu potius, per assensum conclusioni, ut illatae ex præmissis, cum scientia sit discursiva: sed licet assensus præmissarum Theologiæ absolute sit supernaturalis, assensus tamen conclusioni, ut deductæ, cum fiat humano ratiocinio, intrinsecè supernaturalis non est; ergo firmum fiat argumentum allatum, nimirum, quòd per actus merè naturales acquiri nequit habitus supernaturalis.

VII. Contra id, quod dicit de duplici differentia inter Theologiam, & virtutes per se infusas, in isto primo

mò sic. Dato quòd responsio hæc valeat de virtutibus Theologicis, quando producantur simul cum gratia, ut in fidei, qui iustificatur, non tamen, quando producantur separatim à gratia, ut in fidei nondum iustificato. Quare sic arguo, sicut Theologia, ita & fides, & spes possunt produci separatim à gratia, & tamen dum ita producantur, non possunt acquiri nostris actibus, non alià de causà, nisi quia sunt supernaturales; ergo si Theologia similiter supernaturalis esset, non posset acquiri nostris actibus. Neque subsistit secunda differentia. Nam contra eam sic infurgo. Virtutes per se infuse dant simpliciter posse, quia, cum sint supernaturales entitativè, nullum posse supponunt in natura; ergo si Theologia erit entitativè supernaturalis, nullum posse supponet in natura, & sic dabit simpliciter posse. Neque valet quòd Theologia supponat fidem. Etenim fides dat quidem posse credere revelata à Deo, non tamen posse ex revelatis discurre ad conclusiones; ad hoc enim ponitur Theologia, ut habitus distinctus. Ergo si hoc etiam est supernaturale, ad hoc Theologia dabit simpliciter posse, sicut virtutes morales per se infuse, licet supponant caritatem, quia tamen entitativè supernaturales sunt, dant simpliciter posse, nec possunt nostris actibus acquiri.

VIII. Dicunt secundò alii, habitum Theologiæ non esse acquisitum studio, & labore, sed reverà infundi, quia entitativè supernaturalem; requirere tamen studium, & discursum naturalem, non tanquam causam sui productivam, sed tanquam conditionem, sine qua non infunderetur Theologia, & tanquam dispositionem preparantem subiectum ad infusionem, & receptionem illius: sicut à simili voluntas preparatur per varios actus ad infusionem, & susceptionem gratiæ sanctificantis, quæ preparatio non impedit, quin sit entitativè supernaturalis.

IX. Sed contra. Nam primò dicere

Theologiam esse habitum non acquisitum, sed per se infusum, est manifestè contradicere Divo Thoma; qui loco supra relato expressè dicit, quòd licet habitus fidei non acquiratur, acquiritur tamen doctrina, quæ ex principiis fidei infertur. Secundò, quia discursus naturalem non esse puram conditionem, sed causam immediatam Theologiæ, & assensus Theologici, jam supra probatum est. Tertiò, si actus nostri requirerentur, ut dispositiones, & præparationes ad infusionem Theologiæ, vel requirerentur, ut dispositiones positivæ, & inovescentes Deum ad illam infundendam, vel ut dispositiones negativæ renovescentes à subiecto ea, quæ huic infusioni forent contraria. Sed neutrum dici potest. Non quidem primum, tum quia dispositiones debent esse ejusdem ordinis cum forma, ad quam disponunt. Unde Theologi contra Semipelagianos docent, neminem posse per vires naturæ se disponere proximè ad receptionem primæ gratiæ vocationis ad fidem; ergo per studium, & exercitia naturalia non posset homo se disponere ad infusionem Theologiæ, si ista habitus supernaturalis esset: quare dispositiones, quibus voluntas preparatur ad gratiam intrinsecè supernaturales sunt, utpotè à Spiritu Sancto movente cor, licet nondum inhabitante: ut ait Tridentinum *sess. 14. cap. 4.* Tum etiam, quia certum est, Deum ad hanc infusionem magis moveri, & efficacius per orationes, jejunia, & eleemosynas &c., quam per studium, & laborem, illa enim pietatis opera sunt illi acceptiora, quam quodlibet studium; & tamen qui his pietatis operibus magis incumbunt, non propterea sunt perfectiores Theologi. Tum denique: si tales exercitationes Deum moverent ad infusionem habitus Theologici, id esset maxime ob aliquod pactum, & promissionem, sicut in Sacramentis: sed nullum simile pactum legitur in Scriptura, imò quoties proponitur scientia com-

pa-

paranda, toties indicitur labor subeundus: etenim qui addit scientiam, addit, & laborem, inquit Ecclesiastes c. 1. v. 18. Non etiam secundum, quia si nullæ dispositiones naturales requiruntur ad infusionem exterorum habituum supernaturalium, cur requiruntur ad infusionem habitus Theologici, cum de hoc nullum sit pactum, nulla lex, nulla promissio?

§. III.

Argumenta contraria solvuntur.

X. Objicitur primò, promissionem haberi tum ex *epist. Jacobi c. 1. v. 5. Si quis indiget sapientiâ, posculet à Deo, qui dat omnibus affluenter, & non improperat, & dabitur ei.* Et Ecclesiastici 1. v. 10. Deus sapientiam, effundit super omnia opera sua, & super omnem carnem secundum datum suum, & præbuit illam diligentibus se: ergo Theologia, quæ est vera Sapientia, à Deo infunditur, & donatur.

Respondeo primò, si sapientia datur petentibus, & diligentibus, ut colligitur ex præfatis textibus; ergo infunditur intuitu orationis, & amoris, non studii, & laboris, ut adversarii volunt. Respondeo secundò, illis textibus non indicari sapientiam, quæ traditur, & studio discitur, quæque ex revelatis conclusionibus deducit; sed sapientiam mentis, & cordis, quæ Spiritus Sancti donum est, quæ res cælestes nobis sapiunt per mysticam earum speculationem, & contemplationem: unde non sunt ad intentum.

XI. Objicitur secundò. Theologia vocatur à D. Thoma hic *art. 1. Scientia revelata, & divinitus inspirata; & art. 3. ad 1. dicitur esse velut quædam impressio Divina Scientia, quæ certè supernaturalis est.* Ergo secundum D. Thom. Theologia est, & infusa, & supernaturalis.

Respondeo, D. Thom. solum velle,

Theologiam esse radicaliter, seu virtualiter revelatam, quia fidei nititur, quæ divinitus revelata, & inspirata nobis tradit. Dicitur etiam velut quædam impressio Divinæ Scientiæ, virtualis quidem, non formalis: cum enim contineatur in fide tanquam in semine, & habitu ministrante ei prima principia, & in ea suas conclusiones resolvat, quæ principia sunt locutiones divinæ, rectè dici potest velut, idest virtualis Divinæ Scientiæ participatio.

XII. Objicies tertio cum Contenson. Objectum Theologiæ est supernaturalis; ratio etiam formalis sub qua illud contempletur, est supernaturalis; ergo Theologia est habitus intrinsecè supernaturalis. Anteced. probatur. Objectum Theologiæ est Deus, ut a fide cognoscitur, & consequ. ut supernaturalis. Ratio item formalis Theologiæ in hoc à lumine metaphysicæ distinguitur, quòd ista agit quidem de Deo, sed lumine à rebus naturalibus accepto: Theologia de Deo tractat sub lumine divinæ revelationis; neque aliis principiis, mediis, ac motivis per se utitur, quàm articulis supernaturalibus fidei.

Respondeo, nego antec. in ellectum de objecto formali, & de ratione sub qua immediatè, & proximè. Ad probat. dico, objectum quidem Theologiæ esse Deum, at non Deum, ut revelantem nobis mysteria, sed Deum, ut de ipso ex revelatis ratiocinio humano fieri possunt demonstrationes, quo pacto specificativè est supernaturalis, non reduplicativè. Item ratio formalis Theologiæ, seu lumen sub quo immediatè procedit, non est ipsa formalis revelatio, aliàs non secerneatur à fide; sed est revelatio solum virtualis, idest lumen, quo ex revelatis discurrit ad alia, quod est quidem radicaliter, & originativè supernaturalis, non tamen formaliter, cum formaliter procedat humano ratiocinio. In quo distinguitur Theologia à Metaphysica: quia Metaphysica agit

de

de Deo sub lumine, quod est naturale, & formaliter, & originativè, idest agit de Deo, necdum humano, & naturali ratiocinio, sed etiam deducto ex principiis merè naturalibus. At Theologia agit de Deo sub lumine, quod equidem in se est naturale, attamen radicaliter, & originativè est supernaturale, idest agit quidem humano ratiocinio, sed fundato, & radicato in mediis, & principiis fidei, quæ supernaturalia intrinsecè sunt.

XIII. Instabis. Quod habet causam sui entitativè supernaturalem est entitativè supernaturale, nam effectus sequitur naturam suæ causæ; sed Theologia habet causam sui supernaturalem, nempe fidem, & veritates revelatas, quæ sunt principia Theologiæ, & supernaturalia sunt; ergo Theologia &c.

Respondeo dist. maj. Quod habet causam sui proximam supernaturalem est &c. conc. maj., causam sui remotam nego maj., & dist. pariter min.; Causam remotam conc. min., causam proximam nego min. Causa enim proxima, & specificativa Theologiæ non est veritas revelata, sed connexio, quam res revelata habet cum aliâ veritate, & iudicium de tali connexione, quæ connexio, ac iudicium, esto radicaliter supernaturalia sint, formaliter tamen sunt quid naturale. Nam illa connexio naturali studio, & acumine est cognoscibilis, & consequenter iudicium de tali connexione lumine naturali formaliter perficitur.

XIV. Pro huius clariore intelligentiâ sciendum, quod sicut in quâcumque scientia naturali principia talis scientiæ possunt considerari dupliciter, vel entitativè in seipsis: & sic non spectant ad scientiam nisi radicaliter, formaliter autem ad habitum principiorum pertinent. Vel ut illativa alterius veritatis, quam necessariò inferunt, & sic formaliter specificant scientiam, & sunt lumen, sub quo scientia procedit. Sic in Theologia res revelatæ, quæ sunt ejus prin-

cipia, possunt dupliciter inspicì. Vel ut revelatæ, & dictæ à Deo, & sic formaliter pertinent ad Fidem, ad Theologiam verò solum remotè, & radicaliter. Vel ut tales veritates revelatæ sunt connexæ, & illativæ alterius veritatis, & sic formaliter ad Theologiam pertinent, sunt ejus medium, ac motivum, ejus namque actio est ex revelatis ad alia discurrere. Quare circa principia duplicem possumus præstare assensum, unum circa ipsa in se, & secundum se spectata, quatenus sunt veritates immediatè cognoscibiles, & principia naturalia; & hic assensus pertinet ad lumen principiorum; & sic veritates immediatè revelatæ sunt principia Theologiæ; & hic assensus pertinet ad fidem. Alio modo possumus assentiri principiis, sive naturali lumine notis, sive revelatis, ut connexis, & illativis aliarum veritatum, & hoc propriè pertinet ad scientiam. Loquendo ergo de principiis Theologiæ, prior assensus pertinet ad fidem est entitativè supernaturalis, posterior verò pertinet ad Theologiam, entitativè naturalis est, quamvis radicaliter supernaturalis. Quæ doctrina hac in re præ oculis habenda est, quam tantùm abest ut nullus Philosophus docuerit (quomodo putat Contenton) quin potius nullus sit Philosophus, qui eam non docuerit.

Quod si non datur duplex assensus circa conclusionem, unus circa eam secundum se, alius circa eam ut illatam, hoc ideo est, quia conclusio sive consideretur secundum se, sive ut illata, semper pertinet ad eundem habitum, nempe scientiam; præmissæ verò in se, & entitativè sumptæ pertinent ad diversum habitum; nam entitativè consideratæ in scientiis naturalibus pertinent ad lumen principiorum, in Theologiam verò pertinent ad lumen fidei: at ut illativæ, formaliter pertinent ad scientiam. Esto autem conclusiones tam entitativè, quàm ut illatæ pertineant ad eundem assensum scientiæ; non proinde infere-

inferas, quodd, cum conclusio Theologica sit in se supernaturalis, supernaturalis etiam debeat esse assensus Theologicus. Nam licet idem assensus feratur in conclusionem entitativè, & ut illatam, ita tamen fertur, ut entitas sit ratio, quæ attingitur, & illatio passiva sit ratio sub qua; & cum hæc naturalis sit, inde est, quodd attingit quidem conclusionem supernaturalem, sed sub ratione naturaliter cognoscibili.

XV. Obijcies quartò. Ideo Theologia non esset supernaturalis, quia procedit circa principia quidem supernaturalia, sed medio discursu naturali: sed hoc non evincit. Ergo &c. minor probatur primò, quia ille discursus est pura applicatio luminis principiorum ad illuminandas conclusiones, sicut applicatio caloris ignis ad comburendum: sicut ergo combustio non commensuratur applicationi, sed calori; ita assensus non correspondet discursui, sed lumini, quod cum supernaturalis sit, assensus erit supernaturalis. Secundò, scientia non specificatur à discursu, sed à medio: atqui medium, quod assumitur in discursu Theologico, est supernaturale; ergo &c. maj. probatur licet tam opinio, quàm scientia procedant per discursum, quia tamen medium, quod in scientia assumitur, est diversum ab eo, quod assumitur in opinione, nempe, illud demonstrativum, istud tantum probabile; ideo provenit diversus specie habitus, opinativus scilicet, & scientificus. Tertiò probatur, & confirmatur ratio præcedens. Ab eo scientia sumit suam speciem, à quo sumit suam differentiam essentialiam, nempe certitudinem, quâ scientia distinguitur essentialiter ab opinione, & errore; sed certitudinem non accipit à discursu, sed à medio, seu principio, quod in Theologia est supernaturale; quare Theologia dicitur certior omni scientia merè naturali: ergo &c.

XVI. Respondetur neg. min., ad

primam probationem nego assumtum. Nam sicut discursus, seu ratiocinium, sive formale, sive virtuale, distinguit scientiam à lumine principiorum, ita discursus talis, vel talis, cum tali, vel tali illatione distinguit scientiam ab opinione, & errore.

XVII. Ad secundam probat. min. dist. maj. Sed à medio entitativè sumto, nego maj. à medio, ut connexo cum extremis, concedo maj. licet autem medium in Theologia sit entitativè supernaturale, ut tamen connexum cum extremis ad inferendam conclusionem, quo pacto specificat Theologiam, formaliter naturale est: quia hæc connexio humano ratiocinio cognoscitur, & formatur. Neque hinc inferas, quodd, cum discursus pertineat ad Logicum, solum sequitur, Logicam esse scientiam naturalem, non verò Theologiam, quæ discursu utitur; eo vel maxime, quodd licet procedat, & assentiatur per discursum, non tamen assentitur propter discursum, sed propter medium. Non inquam, nam in discursu duo consideranda sunt, nimirum forma discursus, & obiectum discursus, seu materia. Forma quidem discursus pertinet ad logicam; sed obiectum, seu materia discursus, nimirum objectiva connexio, quæ est inter principium, & conclusionem ad Theologiam pertinet. Concedo etiam, quodd Theologia assentiatur propter medium ut connexum, sed medium ut connexum quid est aliud, nisi obiectum formale discursus? hinc scientia distinguitur ab opinione, quia illa assumit medium necessarîo connexum, ista tantum probabiliter.

XVIII. Ad tertiam dico, certitudinem Theologiæ esse quidem supernaturalem radicaliter, & resolutivè, non autem formaliter, & immedatè; & sumi quidem à principio supernaturali, non quatenus respicit auctorem supernaturalem, nempe Deum revelantem, sed quatenus comparatur ad intellectum, ex eo ad alia discurren-

tem,

tem, & in ipsum alia resolventem. Ex quo fit, quoddam certitudo Theologiæ esto radicaliter sit supernaturalis, quia resolvitur in principium in se naturale, non tamen sit formaliter supernaturalis; quia supernaturalitas certitudinis non sumitur à principio remoto, & radicali; sed à principio immediato, & proximo: major tamen omni certitudine cuiusvis alterius scientiæ, sicut minor certitudine fidei; quia certitudo fidei immediatè fundatur in auctoritate Dei dicentis: at certitudo Theologiæ solum mediatè, & remotè; Ubi aliarum scientiarum certitudo unicè fundatur, & resolvitur in principia solo lumine naturali certa.

XIX. Obijciunt quintò. Theologiæ conveniunt dotes, quæ soli scientiæ supernaturali possunt convenire. Primò enim subalternatur fidei, & beatificæ visioni, quæ sunt supernaturales: nihil autem naturale potest subalternari, & dicere ordinem ad aliquid supernaturale; quare actus nostri naturales non possunt dicere ordinem positivum ad gratiam primam, quia hæc supernaturalis est; Cùm supernaturale definiatur, quoddam sit supra naturam, & supra totum ordinem, & exigentiam naturæ. Secundò, Theologia respicit Deum, ut auctorem gratiæ, tanquam suum objectum, qui supernaturalis maximè est.

XX. Respond. nego antec. ad primam probat. dico, quoddam esto nihil naturale, & entitativè, & radicaliter possit subalternari, & dicere ordinem ad aliquid supernaturale, ut probat exemplum allatum; id tamen, quod in se quidem naturale est, supponit tamen necessariò, & radicatur in aliquo supernaturali, potest ad illud ordinem positivum dicere; talem autem esse Theologiam diximus: ideoque qui per habitum supernaturalem fidei assensus est præmissis, potest per habitum Theologiæ, etsi entitativè naturalem, ex illis deducere conclusiones, easque ad principia, etsi re-

Tom. I.

velata, & supernaturalia resolvere, & sic cognitio naturalis, supposità fide, potest percipere connexionem principii, etsi supernaturalis, cum alia veritate, hancque ex illo, lumine rationis deducere, & in illud resolvere; quia sicut veritas purè naturalis continetur in suo principio, ita supernaturalis in suo. Totus ergo labor est in cognoscendo principio supernaturali, quod fit per fidem: hoc autem positò, Theologia lumine rationis, ex illo discurrere potest.

XXI. Ad secundam dico, Theologiam respicere Deum auctorem gratiæ, non ut in se supernaturalis est, sed ut de ipso possunt certæ, & necessariae illationes aliarum veritatum fieri, & ex ipso ad alia discurrere: quare respicit objectum supernaturale mediatè, & specificativè, non immediatè, & reduplicativè, ut hæcenus dictum est. Oportuit in hac questione diutius immorari: quia etiam inter Thomistas controversa est, & quia multis aliis questionibus solvendis aperit viam.

DUBIUM IV.

An Theologia nostra sit speculativa, an practica, an utrumque.

§. I.

Quadam præmittuntur.

I. **T**heologiam esse simpliciter practicam sentiunt cum Scoto ejus discipuli, inter quos Frassen. *disp. præm. artic. 3. quæst. 1.* Henno *disp. præm. quæst. 3.* D. Thomas verò hæc *quæst. 1. artic. 4.* vult, eam sub se comprehendere utrumque, speculativum, & practicum, magis tamen speculativum esse, quam practicum; cui adherent omnes, qui ejus doctrinam profitentur.

Priusquam statuatur conclusio, observandum est, illum habitum dici speculativum, qui per se ordinatur

Σ

ad

ad veritatis considerationem, non referendo ipsam ad opus extra intellectum; Illum verò practicum, qui ordinatur per se ad praxim, ità nimium, ut operis faciendi extra intellectum det regulas, & ad opus faciendum dirigat. Quare ut habitus quispiam sit practicus, non sufficit, quòd ex parte scientis sequatur aliqua praxis, velut amor, delectatio, aut simile, sed requiritur, quòd ipse per se ordinetur ad praxim, & versetur circa suum objectum, cum ordine ad opus, præscribens regulas ad illud agendum. Hinc Philosophus *lib. 2. metaph. c. 1.* ait, speculativæ scientiæ finem esse veritatem, practicæ verò opus.

Observandum insuper, quòd licet subinde soleat distingui praxis, seu actio ab effectione, quòd actio maneat in agente, effectio autem in exteriori materia transeat, ut patet ex *1. 2. quaest. 57. art. 4.*, & *2. 2. qu. 47. art. 5.* Hæc distinctio hic locum non habet; sed praxis generaliter sumitur pro opere, sive illud sit actio immanens, sive actio transiens; unde practicum hic non distinguitur à factivo, sed à speculativo.

§. II.

Conclusio.

Dico. Theologia nostra utrumque complectitur, & speculativum, & practicum, magis tamen speculativa est, quàm practica. Prima pars probat. ratione D. Thomæ. Theologia una existens se extendit ad ea, quæ pertinent ad diversas scientias philosophicas, prout sunt divino lumine manifestabilia; sed scientiæ philosophicæ, aliæ versantur circa speculabilia, aliæ circa operabilia; ergo licet in scientiis philosophicis, alia sit scientia speculativa, alia practica, Theologia tamen comprehendit sub se utrumque: & sicut Deus eadem scientiâ cognoscit se, & ea,

quæ facit, ideoque scientia Dei practica simul est, & speculativa, ut D. Thom. *1. p. qu. 14. art. 16.*, ità Theologia, quæ Scientiæ Divinæ proximior est participatio, & vestigium, erit practica simul, & speculativa.

III. Confirmatur: in scientiis naturalibus Metaphysica est speculativa, quia primam veritatem contempletur; Moralis est practica, quia de ultimo fine, mediisque ad ipsum ducentibus disserit; ergo Theologia, quæ utrumque præstat (agit enim de Deo, ut est prima veritas, & etiam ut est ultimus finis, & ad eum dirigit) comprehendit utrumque, & speculativum, & practicum.

Urgetur magis hæc ratio. Objectum Theologiæ, nempe Deus, est prima Veritas, & ultimus finis, supremum intelligibile, & summum bonum; ergo est simul objectum speculationis, & regula indefectibilis humanorum actuum, qui à fine diriguntur: Atqui rationes, quæ sunt in objecto formali resplendent in habitu, qui circa ipsum versatur; ergo Theologia adunat utramque rationem, & speculationis, & praxis.

IV. Hinc Theologia secundum aliquam sui partem, perficit intellectum in ordine ad cognitionem veritatis, sine ullo ordine ad actionem: Cum enim considerat, quòd Pater non sit Filius, quòd Filius non sit Spiritus Sanctus, quòd Spiritus Sanctus à Patre, Filioque procedat, quòd Deus non ab æterno, sed initio temporis creaverit Angelos, quòdque hi sint immateriales, & alia huiusmodi, manifestum est, quòd considerat veritates, quæ unice intellectum per se perficiunt ad contemplationem. Secundum verò aliam sui partem perficit intellectum, non purè ad cognitionem veritatis, sed ut ex cognitione veritatis dirigatur ad opus, ad quod regulas præscribit: Ut cum explicat naturam, efficaciam, virtutum, bonorum operum, legum divinarum, & humanarum; quando tradit quomodo

modo Sacramenta sint administranda, & fuscipienda, quomodo peccata fugienda; quibus, aliisque patet nos instruere non solum, ut ea cognoscamus, sed ut per ea dirigamur ad nostrum ultimum finem. Facit ergo Theologia, & ea, quæ sunt scientiæ speculativæ, & ea, quæ sunt scientiæ practicæ.

V. Secunda verò Conclusionis pars probatur ratione D. Thom. *Theologia principaliter agit de rebus divinis, quam de actibus humanis, de quibus agit secundum, quod per eos ordinatur homo ad perfectam Dei cognitionem, in qua æterna beatitudo consistit*. Atqui ex eodem D. Thom. in *prolog. lib. 1. sent. quest. 3.* Scientia omnis principaliter pensanda est ex fine, finis autem ultimus istius doctrinæ est contemplatio primæ veritatis in patria; ergo principaliter speculativa est.

§. III.

Objectiones solvuntur.

VI. **Q**bjiciunt primò Scotistæ contra primam partem. Impossibile est, duas differentias oppositas divisivas alicujus generis, vel eorum proprietates, simul uniri in eodem contentò sub illo genere; & hæc ratione non possunt in eodem uniri corporeum, & incorporeum, rationale, & irrationale, hinnibile, & risibile; sed speculativum, & practicum sunt differentię essentialiter dividentes genus scientiæ, aut saltem proprietates earum; ergo nequeunt &c.

VII. Huic argumento (in quo exultat Frassen) communis nostratum responsio est, quòd practicum, & speculativum licet videantur esse differentię essentialiter, & licet fortassis ita sit, in scientiis inferioribus; non sunt tamen tales in scientia superiori, quia ibi conveniunt in eadem ratione formali. Quòd pertinet id, quod dicit S. Doctor hic *art. 3. ad 2.*, & iterum hoc *art. 4.* nimirum, ea, quæ

in diversis scientiis Philosophicis tractantur, posse considerari à Theologia sub una ratione. Sicut ergo visibile, & audibile sunt differentię dividentes objectum sensibile, diversificantes sensus particulares, adunantur tamen in sensu communi; ita speculabile, & operabile, esto sint differentię essentialiter respectu scientiarum inferiorum, non erunt tamen tales respectu scientię superioris, qualis est Theologia; sicut nec sunt respectu intellectus, nec respectu fidei. Quare in forma dist. min. sunt differentię essentialiter dividentes genus scientię inferioris, conc. min. scientię ut sic, nego min. neque est idem de corporeo, & incorporeo, rationali, & irrationali, quæ sunt differentię substantiales ex suis rationibus formaliter oppositæ, non autem purè ratione limitationis subiecti, & objecti, sicut sunt practicum, & speculativum, ideoque in nullo adunari possunt.

Quare absolutè negari potest minor. Illæ enim propriè sunt differentię essentialiter, quæ suis rationibus formalibus ita opponuntur, ut una essentialiter præsupponat in subiecto privationem alterius, ut sunt visio, & fides. Non verò illæ, quæ solum sunt oppositæ relatè ad subiectum, quod ratione suæ limitationis eas non potest in se unire. Cum ergo practicum, & speculativum, non sint suis rationibus formalibus absolutè impossibilia, cum uniantur tum in intellectu, tum in fide, sed solum ratione limitationis subiecti, nempe scientię particularis, quæ determinata est ad objectum purè contemplabile, hinc est, quòd si detur scientia, quæ respiciat objectum, nedùm ut contemplabile, sed etiam ut acquisibile, nedùm ut verum, sed & ut bonum, qualis est Theologia, possit utrumque amplecti, sub diversâ tamen ratione; non quòd adæquatè, & tota sit speculativa, & tota practica, sed inadæquatè, idest sub una ra-

tione sit speculativa, sub aliâ practica: sicut ejus objectum sub una ratione est speculabile, & sub alia finis actionis.

VIII. Dices tamen primò. Etiam metaphysica considerat Deum, qui, sicut est summum verum, ita summum bonum, ideoque objectum speculationis simul, & praxis; & tamen metaphysica non est simul speculativa, & practica.

IX. Dices secundò. Si Theologia esset simul speculativa, & practica, quilibet ejus actus esset speculativus, & practicus; sed hoc est falsum, nam Theologia elicit plures actus, qui per se merè speculationes sunt, ut cum probat, in divinis quatuor esse relationes; ergo &c.

X. Respond. ad primum instantiam distinguo antec. : considerat Deum sub ratione Deitatis, & non solum ut primam veritatem, sed etiam ut summum bonum, nego antecedens. Sub ratione entis, & ut primam veritatem tantum conc. ant. Metaphysica namque respicit Deum, ut summum ens, contentum sub ratione entis, in ejusque contemplatione tota per se consistit. Deum enim considerare, ut ultimum finem actuum humanorum ad scientiam moralem pertinet. At Theologia considerat Deum sub ratione deitatis, & sub lumine fidei, quæ illi utrumque proponit, & Deum, ut summè verum, & summè bonum tandem assequendum; ideoque utrumque complectitur.

XI. Ad secundam instantiam quidam neg. min. volentes, in quolibet actu theologico relucere rationem speculationis, & praxis, quibus tamen non assentior. Licet enim Theologus verè pius, debeat omnem suum considerationem de Deo ordinare ad Deum amandum, id est ex parte operantis; ceterum Theologia dum inclinât hominem ad Deum considerandum, per se non inclinât ad Deum amandum. Quare nego maj. non enim necesse est, ut adæquata ratio

formalis objecti, & habitus in quolibet actu resplendeat, sicut nec quilibet actus animæ rationalis est simul vegetatio, sensatio, & intellectio, quamvis anima comprehendat simul vegetativum, sensitivum, & intellectivum, adæquate sunta.

XII. Objicies secundò contra secundam partem. Illa scientia, & notitia est practica, quæ determinat intellectum ad volitionem rectam; sed notitia Theologica determinat intellectum ad volitionem rectam, nimirum ad Deum amandum, colendum &c.; ergo &c.

Confirmatur. Principia Theologiæ sunt practica, sumuntur enim à Deo, qui est ultimus finis: Unde Joan. 10. 31. dicitur: *hæc autem scripta sunt, ut credatis, quia Jesus est Christus filius Dei, & ut credentes vitam habeatis in nomine eius.* Non ait, Divina Myſteria ideo sunt exarata, ut Deum, ejusque perfectiones acutiùs investigetis. Et ideo D. August. *lib. 1. de Doctr. Christianæ circa finem*, ait, Theologiam ordinari ad dirigendos quatuor actus, videlicet credere, sperare, diligere, & virtuosè vivere.

XIII. Respondeo dist. maj. illa &c. est practica, quæ unicè, & in omni sui parte, & quidem principaliter determinat intellectum &c., conc. maj., quæ non unicè, & solum in aliqua sui parte, & minùs principaliter &c., nego maj. & distincta mihi nego conseq. Non nego, Theologicam notitiam in aliqua Theologiæ parte determinare intellectum ad volitionem rectam, ad Deum amandum, & colendum &c., & ideo non nego, Theologiam esse practicam; sed quod id unicè præstet, principalius, & in omni sui parte: hoc nego.

Ad confirm. nego ant. in sensu arguentis. Nam principia Theologiæ sumuntur à Deo, qui est quidem ultimus finis, sed etiam est prima veritas: unde medium illuminant ad Dei amorem, sed principalius, & proximius ad Dei contemplationem; quia

(ut

DUBIUM V.

An Theologia sit certior, dignior
aliis scientiis; & an sit etiam
Sapientia.

§. I.

Quadam notatu digna pro prima parte.

(ut ait D. Thom. hīc) Theologia principaliter agit de rebus divinis, quā de actibus humanis, per quos homo ordinatur ad ultimum finem. Imò ex hoc etiam, quod Theologia legem veterem, & novam ordinet ad beatitudinem, quæ est Divinæ Veritatis contemplatio, sequitur, magis eam esse speculativam, quā practicam; & per hoc respondetur ei, quod adducitur tum ex Joanne, tum ex Augustino: quia et si ea, quæ scripta sunt, & ipsa Theologia ordinentur ad perducendum hominem per fidem, spem, caritatem, & virtuosam vitam ad beatitudinem, quæ aliud non est, quā Veritatis Divinæ contemplatio, sequitur, eam ultimā, & principaliter ordinari ad contemplationem.

XIV. Dici etiam potest, alium esse finem scientiæ ab ea per se intentum, & propter quem ipsa principaliter instituta est; alium esse finem scientis, quem sciens debet sibi præfigere. Etto autem finis scientis, seu finis Theologi, verè pii, & Christiani sit, omnes etiam suis speculationes ordinare ad Deum amandum, colendum, & tandem in patria possidendum; & nedum speculationes Theologicas, sed etiam omnes alias naturales: Finis tamen intrinsecus, & proprius Theologiæ est, principaliter hominem perducere ad cognitionem, & contemplationem divinorum. Quā distinctione præhabita evacuatur

alia multa, quæ contrarii accumulanti ad probandum, Theologiam esse, vel solū, vel principaliter practicam.

(*)

I. **C**ertitudo à Philosophis triplex distingui solet, nimirum objecti, subjecti, & motivi. Certitudo objecti est immobilitas, & invariabilitas rei in se, vel quoad existentiam, & hæc solius Dei propria est; vel quoad essentiam, nimirum connexionem prædicatorum essentialium: & hæc, vel est metaphysica, quā prædicatum itā cum subjecto connectitur, ut sine illo stare nequeat, nec divinitus, ut homo est animal rationale; vel physica, quā prædicatum saltem naturaliter connectitur cum subjecto, ut hæc propositio: ignis omnis applicatus combustibili urit.

II. Certitudo subjecti, sive subjectiva est firma adhesio intellectus alicui objecto cognito, quod vel est, vel putatur esse verum, licet tale non sit: quā sit, ut tenaciùs quis adhæreat propositioni tantum probabilis, aut etiam falsæ, quam putat esse demonstratam, vel veram: inde tenaciùs heretici adherent suis erroribus, quā interdum Catholicis, Catholicis veritatibus. Hinc Arist. 7. Ethic. cap. 3. sunt, inquit, qui non minus opinioni suæ, quā illi suæ scientiæ credunt. Hæc autem pertinacia potius dicenda est, quā certitudo.

Certitudo motivi est connexio infallibilis mediis cogniti cum re, quæ cognoscitur: quæ connexio apparet, vel per experientiam, qualem habemus, quod omnis ignis sit calidus. Vel ex evidentia luminis naturalis, qualis est certitudo circa prima principia. Vel per illationem ex principiis
cvi-

evidenter cognitis, qualis est certitudo conclusionis naturalis debite illatæ ex præmissis evidentibus. Vel denique per revelationem alicujus veracis, qualis est certitudo fidei; aut per illationem ex veritatibus revelatis, non evidentem, sed certè cognitis, qualis est certitudo conclusionis Theologicæ.

III. In Theologiâ verò processus à principiis ad conclusionem fieri potest tripliciter; aliquando enim proceditur ad conclusionem aliundè scitam: ut cùm concluditur, Deum esse unum, infinitum, immensum, quæ per metaphysicam scita supponuntur. Aliquando verò proceditur ad conclusionem, de qua nondum determinatum est, quid sit tenendum, ut sunt omnes conclusiones de efficacia gratiæ, de contritione necessariâ ad Baptismum, & Pœnitentiam. Aliquando verò ad conclusionem jam determinatam per Ecclesiam; ut quòd in Christo dux sint voluntates; quòd baptizati ab hæreticis non sint rebaptizandi; cujus veritas licet olim controversa, modò tamen ab Ecclesia determinata est.

IV. Supponendum etiam ex dictis est, Conclusionem Theologicam inferri posse, vel ex duabus propositionibus Fidei Divinæ creditis, ut si dicatur: *Christus est beatus; sed Beatus videt Deum facie ad faciem*; ergo *Christus videt Deum facie ad faciem*; vel ex una credita, & alia naturali necessaria, ut si dicas: *omnis homo est risibilis; Christus est homo; ergo Christus est risibilis*. Vel ex una propositione credita, & alia naturali solum probabili, ut si dicas: *Christus habet verum corpus; sed verum corpus est tale per formam corporeitatis ab anima rationali distinctum*; ergo *Christi corpus &c.* minor enim propositio probabilis est Scotistis, Thomistis verò negantibus. Vel tandem ex duabus probabilibus, ut si dicas: *Sacramenta novæ legis fortius causant gratiam, quàm sacramenta veteris legis; sed sacramenta veteris legis causabant*

gratiam moraliter; ergo *Sacramenta novæ Legis causant gratiam plusquàm moraliter*.

Certum est ergo, quod ex duabus probabilibus, vel ex una credita, & altera probabili, non habetur conclusio certa, sed solum probabilis, quia conclusio sequitur fortem præmissarum, & si una est probabilis, licet altera sit fide certa, non sequitur conclusio, nisi probabilis, juxta philosophicum effatum: Conclusio sequitur debiliorem partem. Dum ergo quærimus, an Conclusio Theologica sit certior, loquimur de ea, quæ, vel ex duabus Fidei Divinæ creditis, vel ex una credita, & altera naturali necessaria procedit.

§. II.

Prima Partis resolutio.

V. **D**ico. Conclusio Theologica, quæ inferitur, vel ex duplici præmissa revelata, vel ex una naturali necessaria, & altera revelata, certior est secundum se, seu certitudine objecti, & motivi, quæcumque scientiâ naturali: & etiam per se loquendo certitudine subjectivâ; quamvis per accidens videantur scientiæ naturales majorem aliquando imprimere certitudinem.

Prima pars traditur à D. Th. hinc *art. 5.* illa enim notitia certior est secundum se, & certitudine objecti, & motivi, quæ fertur in objectum magis necessarium, & immutabile, & per motivum firmitus, ac certius: hujusmodi est Theologia, quæ versatur circa Deum, magis habentem immobilitatem, & necessitatem essendi, quàm objecta Scientiarum naturalium. Fertur etiam in eum per medium, & motivum firmitus, quàm sint motiva scientiarum naturalium: nititur enim principiis revelatis, & Fidei Divinæ creditis, quæ certè majorem habent certitudinem longè, quàm principia lumine naturali cognita, quibus scientiæ

tię naturales fulciuntur. Primò, quia, ait Christus Luc. 21. v. 33. *Celum, & Terra transibunt, verba autem mea non transibunt.* Secundò, quia habet certitudinem obiectivam supernaturalem, & divinam, quę infinitè major est quavis certitudine naturali, & creatà. Tertiò, quia innititur primę veritati, & essentiali, quę certior est eo, quod nititur veritati participatę. Ergo Theologia nostra ex parte motivi, & obiecti certior est &c.

VI. Secunda vero pars, quòd Theologia per se loquendo sit certior etiam subjectivè, probat. ex D. Th. 2. 2. q. 4. art. 8. ad 2. dicente: *multò magis homo certior est de eo, quod audit à Deo, què falli non potest, quàm de eo, quod videt proprià ratione, qua falli potest.* Unde D. August. lib. 7. *confess. cap. 10. faciliusque dubitarem vivere me, quàm non esse veritatem, qua per ea, qua facta sunt, intellecta, conspicitur;* & patet ratione adductà pro prima parte. Quòd verò per accidens aliquando minorem imprimat certitudinem, docet idem S. Doctor hic art. 3. ad 1. dicens: *nihil prohibet, id quod est certius secundum naturam, esse quoad nos minus certum, propter debilitatem intellectus nostri;* & 2. 2. *quæst. 4. artic. 8., ubi quærit, an fides certior sit habitu primorum principiorum, sapientiæ, & scientiæ, resolvit, fidem esse quidem certioiorem secundum se habitibus scientiæ, quia certioiorem habet causam, nempe Veritatem Divinam, cum scientia habeat pro causâ rationem humanam.* Ex parte tamen subjecti dicitur esse certius, quod plenius consequitur intellectus hominis: *& per hunc modum, quia ea, qua sunt fidei, sunt supra intellectum hominis, non autem ea, qua subsunt tribus prædictis (habitu principiorum, sapientiæ, & scientiæ) ideo ex hac parte fides est minus certa.* Sed quia unumquodque judicatur, simpliciter quidem secundum causam suam; secundum autem dispositionem, qua ex parte subjecti est, judicatur secundum

quid; inde est, quod fides est simpliciter certior; sed alia sunt certiora secundum quid, scilicet quoad nos.

Ex quibus potest concipi ratio. Illud ex parte subjecti certius, & firmitus est, quod magis intellectum movet, plenius ab eo possidetur, & connaturalius ad illud fertur; sed scientiæ naturales firmitus movent, quia movent ratione certitudinis, & evidentie simul; plenius etiam ab intellectu possidentur, quia earum veritates in se ipsis videt; & connaturalius ad illas fertur, quia sibi magis proportionatas, & ad quas non eget alio lumine, quàm naturali: è contra verò, ut assentiatur veritati revelatę, debet intellectus surgere supra se, & supra proprium naturale iudicium, rebus etiam, quę aliquando rationi naturali repugnare videntur, illudque fidei magisterio subicere; juxta illud Pauli 2. Cor. 10. v. 5. *in captivitatem redigentes omnem intellectum in obsequium Christi.* Ergo &c.

VII. Dices tamen primò contra primam partem. Illud est certius, quod habet plures causas suę certitudinis; sed alię scientiæ habent plures causas suę certitudinis, scilicet ex parte medii, & ex parte evidentie: & sunt certiores ex omni parte, nempe nedum ex parte obiecti, & medii, sed etiam ex parte subjecti. Ergo &c.

Respondeo, majorem esse veram, si cetera sint paria, quod non contingit in casu. Nam auctoritas divina, quę est causa certitudinis in Theologia, majoris est certitudinis, imò maiorem certitudinem potest parere, quàm rationes humanę cum certitudine, & evidentia. Quòd si non semper eam parit, hoc ex defectu subjecti accidit, quod eam non plenè assequitur. Undè D. Thom. 2. 2. *qu. 4. art. 8. ad 1. loquens de dubitatione, quę aliquando insurgit in intellectu circa ea, quę sunt fidei. Illa dubitatio (inquit) non est ex parte causæ fidei, sed quoad nos, inquantum non plenè assequimur per intellectum*

ea, quæ sunt fidei, sicut si noſtua in meridiana luce parum videat, aut nihil, non tribuitur defectui luminis, ſed videtis: Nihil enim prohibet (inquit D. Thom. 1. p. quæſt. 1. art. 5. ad 1.) id, quod eſt certius ſecundum naturam, eſſe quoad nos minus certum, propter debilitatem intellectus noſtri, qui ſe habet ad maniſeſtiſſima naturæ, ſicut oculus noſtua ad lumen Solis. Hoc autem ſolum probat, Theologiam eſſe minus certam quoad nos, & ſecundum quid, non autem ſimpliciter.

VIII. Hinc licet cognitio principiorum naturalium habeatur ſine diſcurſu, cognitio verò Theologica per diſcurſum, & cognitio habita ſine diſcurſu ſit certior, utpote habens certitudinem ex ſe, & connexione immediatâ terminorum, non verò ab alia participatam; non ſequitur adhuc, cognitionem principiorum fore ſecundum ſe certioſorem cognitione Theologicâ. Nam ratio hæc valeret quidem, ſi utraq; cognitio eſſet ejuſdem ordinis, ſcilicet naturalis, in quo non eſt dubium, quin cognitio, quæ certitudinem habet ex ſe, certior ſit eâ, quæ certitudinem habet ab alio; ſed cum in caſu cognitio, quæ eſt certa ex ſe, ſit in ordine naturali, quæ verò certa eſt ex alio, ſit in ordine ſupernaturali, & conſequenter eam habeat à principio incomparabiliter certiori, ratio non valet, quia inter ea, quæ ſunt diverſi ordinis, comparatio non datur.

Similiter licet intellectus, dum aſſentitur veritati naturali, neceſſariò prorsùs procedat, quia evidentia convictus; dum verò aſſentitur Fidei, vel Theologicæ veritati, liberè ſaltem radicaliter procedat, cum ex piâ motione liberè moveatur ad credendum, non ſequitur firmiùs adherere veritati naturali, quàm veritati Theologicæ. Quia illa pia motio cum à Spiritu Sancto ſit, quamvis liberè moveat, firmiùs tamen, & magis inſallibiliter movet, quàm moveat natura ipſa ne-

ceſſitans ad aſſentiendum per evidentiam: ſicut Deus agens liberè firmiùs agit quolibet agente naturali neceſſario. Intantum autem in ſcientiis naturalibus aſſenſus liber non eſt eque certus, ac neceſſarius, quia ſemper oritur ex medio fallibili, & non certo, quod proinde non inſallibiliter obtinet aſſenſum.

IX. Dices ſecundò contra eandem. Quod eſt cauſa certitudinis concluſionis Theologicæ eſt certius ipſâ concluſione; ſed principia naturalia ſæpè ſunt cauſa certitudinis in concluſione Theologica; ergo hæc iſtâ ſunt certiora. Maj. patet ex duplici Philoſophico axiomate, nimirum: *propter quod unumquodque tale, & illud magis*, & iſtud: *Concluſio ſemper ſequitur debiliorem partem.*

X. Hoc argumento concluditur quidem, Concluſionem Theologicam deductam ex una præmiſſa de fide, & altera naturali fore minus certam concluſione deductâ ex duabus præmiſſis de fide, ut multi exiſtiant, non tamen fore minus certam etiam concluſione deductâ ex duabus præmiſſis ſolum naturaliter notis, cujus oppoſitum hic ſuſtinemus.

Ceterum reſpondeo diſt. maj., quod eſt cauſa adæquata, & ratione ſui certitudinis &c. eſt certius &c. conc. maj., quod eſt cauſa ſolum in adæquata, nec influens niſi ratione alterius; nego maj., & ſimiliter diſtinctâ min. nego conſequentiam. Quia, ergo propoſitio naturalis aſſumta in demonſtratione Theologica non concurrit ad concluſionem, ut cauſa adæquata, neque ratione ſui, ſed ut elevata, & inſerviens alteri præmiſſe de fide, explicando veritatem, quam ipſa enunciat; ideo certitudo concluſionis ex ipſâ non deſumitur, nec cum eâ communſatur, ſed unicè cum præmiſſâ de fide. Sicut eſto ad actum ſupernaturalem viſionis Dei concurrat intellectus, & lumen gloriæ; quia tamen intellectus non concurrit, niſi per lumen, & ut elevatus à lumine, viſio-

visionis claritas unice correspondet hu-
mini, non intellectui. Hinc ad illa
duo axiomata; respondeo, quòd cum
sola præmissa revelata sit illa, quæ
ratione sui immediatè influit, & pro-
pter quam Conclusio Theologica est
certa, solùm sequitur, quòd præmis-
sa revelata sit certior Conclusionem
Theologica. Ad secundum axioma di-
co, illud verificari, quando pars,
scu præmissa debilior influit in con-
clusionem, quatenus est debilior, non
verò quando, vel non influit, vel in-
fluit ratione partis fortioris. Obser-
vat tamen Sylvius in 1. p. qu. 1. art.
5., quòd hoc axioma non sic verita-
tem habet, ut oporteat omninò, de-
fectum, qui est in præmissa debiliori,
esse in conclusionem, nam ex Philoso-
phia constat, ex falso posse concludi
verum, & ex contingenti necessarium;
sed sic, ut defectus, qui fortè repe-
ritur in conclusionem, semper deputan-
dus sit causæ debiliori. Aut alioquin
intelligendum est, quando causa for-
tior non elevat debiliorem.

XI. Replicabis. Si ità est, quòd
præmissa naturalis necessaria, ut ele-
vata per præmissam de fide, possit ad
conclusionem certam Theologicè con-
currere, eadem ratione dici poterit,
quòd etiam præmissa naturalis proba-
bilis, ut conjuncta cum præmissa
de fide, possit concurrere ad Conclu-
sionem Theologicam certam. Quod ta-
men est falsum.

Nego paritatem. Nam propositio
naturalis necessaria est intrinsecè cer-
ta, & ex conjunctione cum præmissa
de fide elevatur ad majorem certitudi-
nem: at præmissa tantum probabi-
lis, cum sit ex se intrinsecè fallibi-
lis, & dubia, omnique experta cer-
titudinis, & per hoc, quòd assumat-
ur in syllogismo Theologico, non
judicetur, & approbetur à fide, vel
Theologia ut certa, sed tantum ut
probabilis, remanet semper probabi-
lis. In hoc tamen potest fieri pari-
tas. Quòd sicut propositio certa na-
turaliter, dum assumitur à Theologia,

induit majorem certitudinem, sic pro-
positio probabilis induat majorem pro-
babilitatem, quam ex se haberet,
quod non negabimus.

XII. Dices tertio contra eandem
primam partem. Propositio hæc dis-
junctiva: *Deus est trinus, vel non tri-
nus*: quæ reducitur ad hoc princi-
pium naturale: *quodlibet est, vel non
est*: certior est quilibet categoricà ip-
sam componente; ergo certior est hæc
categoricà: *Deus est trinus*: quæ est
propositio de fide; & sic datur ali-
quod principium naturale certius pro-
positione de fide.

Respondet Gonet, quòd in hac pro-
positione: *Deus est trinus*: duplex
certitudo considerari potest; una,
quam habet ex vi contradictionis cum
illa: *Deus non est trinus*; ex illo pri-
mo principio: *quodlibet est, vel non
est*; alia, quam habet ex lumine Fidei,
& Divinæ Revelationis. Licet autem
si attendatur prima certitudo, pro-
positio disjunctiva: *Deus est trinus, vel
non trinus*: aliquomodo dici possit cer-
tior istà categoricà: *Deus est trinus*;
non tamen si in ista attendatur certi-
tudo, quam habet ex eo, quòd est
revelata. Sed quia hæc responsio con-
cedit, veritatem revelatam in aliquo
sensu esse minùs certam propositione a-
liquà naturali. Ideo aliter responderi
potest, negando absolutè antec. cum
Frasen. *dissert. 1. art. 3. qu. 3. concl.*
1.; nam eodem actu, quo quis assen-
titur huic veritati: *Deus est trinus*,
eodem dissentitur propositioni opposi-
tæ: *Deus non est trinus*. Sicque eo ip-
so, quòd proponitur, Deum esse tri-
num, proponitur, non esse ejus oppo-
situm. Quare hæc propositio: *quodli-
bet est, vel non est*: continetur in pro-
positione revelata, & est revelata vir-
tualiter in articulo, quo esse trinum
proponitur. Unde certitudo rei reve-
latæ non fundatur in illo principio, sed
potius certitudo illius principii fun-
datur in certitudine rei revelatæ.

6. III.

Resolutio secunda Partis.

XIII. **D**ico. Theologia nostra dignior est scientiis naturalibus. Ità D. Thom. hoc art. 5. cujus ratione probatur sic. Theologia comprehendit in se speculativum, & practicum; atqui nulla alia scientia naturalis comprehendit in se speculativum, & practicum; ergo ex hac parte illas transcendit dignitate. Insuper superat dignitate omnes scientias, tum speculativas, tum practicas. Speculativas quidem; Nam speculativarum scientiarum una est alterâ dignior, vel quia certior, vel quia circa digniorem materiam versatur; atqui Theologia superat alias scientias certitudine, ut §. præcedenti ostensum est; superat etiam dignitate materiæ, nam Theologia est de his principaliter, quæ suâ altitudine rationem transcendunt; aliæ verò scientiæ confidunt ea tantum, quæ rationi subduntur: ergo Theologia superat dignitate omnes alias scientias speculativas. Superat etiam practicas; Nam scientiarum practicarum illa dignior est, quæ ad altiorem finem ordinatur, sicut civilis dignior est militari, quia bonum exercitus ad bonum civitatis, quod altius est, ordinatur; sed finis Theologiæ, quatenus est practica, est beatitudo æterna, ad quam sicut ad ultimum finem ordinantur fines omnium aliarum scientiarum practicarum; ergo est dignior omnibus aliis scientiis, tum speculativis, tum practicis.

XIV. Dices primò. Theologia accipit aliquid ab aliis scientiis; sed accipere inferioris est, non dignioris; ergo Theologia est inferior, non dignior aliis scientiis.

Respond. D. Thomas hic ad 2., quòd Theologia accipere potest aliquid à Philosophicis disciplinis, non quòd ex necessitate eis indigeat, sed ad ma-

jorem manifestationem eorum, quæ in hac scientia traduntur. Non enim accipit sua principia ab aliis scientiis, sed immediatè à Deo per revelationem. Et ideo non accipit ab aliis scientiis tanquam à superioribus, sed utitur eis tanquam inferioribus, & ancillis, sicut architectonica utuntur subministrantibus, ut civilis militari. Et hoc ipsum, quòd sic utitur eis, non est propter defectum, vel insufficientiam ejus, sed propter defectum intellectus nostri, qui ex his, quæ per naturalem rationem (ex qua procedunt alia scientia) cognoscuntur, faciliùs manuducitur in ea, quæ sunt supra rationem, quæ in hac scientia traduntur. Hæc D. Th.

XV. Dices secundò. Scientia, quæ habet certitudinem sine evidentiâ non est dignior scientiis, quæ habent certitudinem cum evidentiâ; sed Theologia habet certitudinem sine evidentiâ, aliæ verò scientiæ habent certitudinem cum evidentiâ; ergo &c.

Respondeo dist. ma. si certitudo sine evidentiâ sit minor certitudine, cum evidentiâ, co. maj. si non sit minor, iund major, nego maj. cum enim evidentiâ quæretur à scientia propter certitudinem, si absque evidentiâ haberi possit major certitudo, perfectior erit scientia sine evidentiâ, quàm scientia cum evidentiâ; cum. autem Theologia sine evidentiâ habeat firmiorem certitudinem, nixam primæ, & infallibili veritati; aliæ verò scientiæ cum evidentiâ habeant infirmiore certitudinem, quia nixam rationi humanæ; idèò simpliciter dignior est Theologia &c.

XVI. Dices teritiò. Scientia dignior est, quæ perfectius objectum suum attingit; sed aliæ scientiæ ità se habent; nam objecti sui naturam, omnesque illius partes detegunt, & aperiunt; Theologia autem vix quidquam de objecti sui natura, & proprietatibus percipit; ergo &c.

Respond. dist. maj. si objectum, quòd attingit, sit præstantius, vel æquè dignum, conc. maj. si objectum sit

fit minus perfectum, nego maj. Nobilior est (ait Aristot. 2. de animalibus) autem parum attingere de nobilioribus subjectis, quam multum de aliis. Et Divus Thomas 1. part. quæst. 1. articul. 3. ad 1., ait: *minimum, quod potest haberi de cognitione rerum altissimarum, desiderabilior est, quam certissima cognitio, qua habetur de minimis rebus.* Cum ergo objectum Theologiæ sit præstantissimum, & altissimum, & ex illius excessu procedat, quod parum de illo assequatur, hoc non tollit, quin cæteris scientiis præstantior sit, quæ de rebus inferioribus tractant, quamvis majori claritate illas detegant.

Respondetur secundò. Hinc ad summum sequi, alias scientias naturales fore perfectiores relativè, & penes attingentiam sui objecti, cum quo magis proportionantur; non autem absolute, & simpliciter. Ità idem S. Doctor loco laudato. Sicut visio Solis ab Aquila secundum se, & ex objecto perfectior est visione candelæ ab oculo meo; quia illa à præstantiori, & acutiori potentia visiva est, & circa objectum præstantius. Secundum attingentiam verò hæc dicitur perfectior; quia oculus meus magis proportionatur objecto candelæ, meliusque eam comprehendit visu, quam oculus Aquilæ proportionetur, & comprehendat Solem.

XVII. Dices quartò. Ea scientia est ratione materiæ præstantissima, quæ est de objecto amplissimo, continente sub se objecta aliarum scientiarum; talis autem potius est Metaphysica, quæ, cum habeat pro objecto ens, quatenus ens, sub quo continentur etiam Deus, quod est objectum Theologiæ, sola habet objectum amplissimum, & subinde præstantissimum.

Respond. maj. esse veram, si cætera sint paria, idest si utraque scientia sit ejusdem ordinis, & sub eodem lumine suum objectum contempletur, quod in casu non contingit.

Nam Metaphysica considerat quidem ens, ut ens, sed prout naturali lumine cognosci potest. At Theologia considerat Deum, prout tamen supernaturali tantum lumine potest cognosci; & propterea objectum formale Theologiæ nullo modo continetur sub objecto metaphysicæ, cum ex his, quæ sunt diversæ ordinis, unum non contineatur in alio. Et licet etiam objectum metaphysicæ contineret objectum Theologiæ, contineret illud continentiam prædicationis; objectum autem Theologiæ continet omnia entia, continentiam causalitatis, qui continentia modus præstantissimus est.

§. IV.

Resolutio tertiæ Partis.

XVIII. Dico. Theologia nostra maxime, & simpliciter inter omnes scientias humanas sapientia est. Ità S. Doct. hinc art. 6. Non loquitur hic D. Thom. de sapientia infusa, quæ Spiritus Sancti donum est, & importat quandam resistentem Judicii circa divina conspicienda, & consulenda, procedentem ex caritate, quæ nos unit Deo. Sed de sapientia acquisita, quæ est una ex quinque virtutibus intellectualibus, enumeratis ab Arist. 6. Ethic. cap. 4., quæ habet judicare de rebus per altissimas causas; ut docet idem Angelicus 1. 2. qu. 66. art. 3.

XIX. Proh. ratione D. Thom. sic. Illa est maxime, & simpliciter sapientia, quæ de inferioribus disponit, & judicat per causas altissimas; sed Theologia nostra est talis respectu ad scientias naturales; ergo est maxime sapientia. Ma. explicatur. Cum sapientia sit ordinare, & judicare, judicium autem per altiorum causam de inferioribus habeatur, ille sapiens dicitur in unoquoque genere, qui considerat causam altissimam illius generis. Hinc in genere ædificii artifex, qui disponit formam domus, dicitur

sapiens, & architector respectu inferiorum artificum, qui dolant ligna, vel parant lapides: unde dicitur 1. Cor. 3. 10., *ut sapiens architectus fundamentum posuit*. Et rursus in genere totius humanæ vitæ prudens dicitur Sapiens, inquantum ordinat humanos actus ad debitum finem. Unde Proverb. 10. v. 13. *sapientia autem est viro prudentia*. Ille igitur, qui considerat simpliciter altissimam causam totius universi, quæ Deus est, maxime Sapiens dicitur; unde & sapientia dicitur esse divinarum cognitio, ut August. lib. 11. de Trinit. cap. 14. Minor etiam probatur. Theologia agit de Deo, secundum quoddam altissima causa, non enim solum agit de illo, quantum ad illud, quod est per creaturas cognoscibile (quod Philosophi cognoverunt, Rom. 1. v. 19. *Quod notum est Dei, manifestum est in illis*) sed etiam quantum ad id, quod est notum sibi soli de se ipso, & aliis per revelationem communicatum: ergo Theologia &c. hinc vocatur Sapientia. Deuteronom. 4. v. 6. *Hæc est enim vestra sapientia*. Ecclesiastici 30. v. 1. *Sapientiam omnium antiquorum exquiret Sapiens, & in Prophetis vacabit*. 1. Cor. 2. v. 6. & 7. *Sapientiam autem loquimur inter perfectos; Sapientiam verbis non huius seculi, neque Principum huius seculi, qui destruntur: sed loquimur Dei sapientiam in mysterio, quæ abscondita est, quam nimirum Christus spononderat*. Luca 21. v. 15. *Dabo vobis os, & sapientiam, cui non poterunt resistere, & contradicere omnes adversarii vestri*.

XX. Confirm. Theologiæ aptantur omnes conditiones, quas in vera Sapientia requirit Philosophus 1. *Metaphys. cap. 2*. Cognoscit enim quodimmodo omnia: considerat enim Deum, qui est omnium causa, ejusque effectus; agitque propterea de ipso, ut supremo efficiente, & ultimo omnium rerum fine; ideoque de rerum omnium ab ipso emanatione, conservatione, gubernatione, atque in suos

fines directione. Quare dici potest scientia omnium, non quidem in universalis secundum prædicationem, & cognitionem, quasi traderet principia, quibus res singulæ cognoscerentur: sed quia fontem, & principium omnium rerum, earumque ultimum finem aperit, & quidem divino, ac supernaturali lumine fidei innixa; quod certe multò nobilius est, quam si traderet generales, & communes omnium rerum conceptus, earumque principia complexa, ut facit metaphysica. Secundo versatur circa difficilia: quid enim intellectu, & cognitio difficilius, quam sciutari ea, quæ omnem vim humanæ rationis excedunt? Tertio: est certissima, cum ejus principia, & media certitudinem habeant ex Divino Testimonio, quo nihil certius. Qua rō: non ordinatur ad aliam scientiam, sed ipsa est finis omnium; Unde & omnes ipsi subserviunt. Quarto tandem: habet judicare de veritatibus aliarum scientiarum, juxta illud 2. Cor. 10. v. 4. & 5. *consilia destruente, & omnem altitudinem extollientem se adversus scientiam Dei*. Unde videmus, Theologiā multos errores fuisse detectos, sive naturali Philosophiæ, sive Jurisprudentiæ repugnantes, malique Philosophici asserta, quæ videbantur Doctrinæ Theologicæ repugnantia, fuisse conciliata.

XXI. Dices primò. Theologia est scientia, ut dictum est; ergo non est sapientia, nam scientia condividitur sapientiæ.

Respondetur nego consequentiam: ut enim ait D. Thom. *opos. 70*. Sapientia non dividitur contra scientiam, sicut oppositum contra oppositum, sed quia se habet ex additione ad scientiam. Nam, ut ait 1. 2. quæst. 57. art. 2. *Sapientia est quedam scientia, inquantum habet id, quod est commune omnibus scientiis, ut scilicet ex principiis conclusiones demonstrat, sed quia habet aliquid proprium supra alias scientias, inquantum scilicet de omnibus judicat: idque non*

to-

solum quantum ad conclusiones, sed etiam quantum ad principia. Quare sicut anima rationalis eminenter continet vegetativam, & sensitivam, ita sapientia eminenter continet scientiam, & intellectum; non quidem sicut genus continet suas species, neque sicut totum integrale continet suas partes integrantes, sed sicut totum potentiale continet suas potencias, quarum una est, quod in se habeat quiddam perfectionis est in scientia, & intellectu: quâ similitudine utitur S. Doctor d. artic. 2. ad 2. Propterea in 1. dist. 35. qu. 2. art. 1. ad 5. (inquit) *Sapientia scientia est: sed non convertitur: quia illa scientia sola sapientia est, quæ causas altissimas considerat.*

XXII. Dices secundò. Scientia, quæ supponit sua principia aliunde, non est sapientia, quia sapientis est ordinare 1. Met. cap. 2.; sed Theologia supponit sua principia aliunde, ut dictum est; ergo &c.

Resp. D. Thom. hoc art. 6. ad 2. maiorem esse verum de scientia, quæ supponit sua principia ab alia scientia humana, non verò de scientia, quæ supponit sua principia ab alia scientia divina, à qua oritur omnis scientia, & omnis sapientia.

XXIII. Dices tertio. Ad sapientiam pertinet probare principia aliarum scientiarum, unde dicitur Caput scientiarum 6. Esch. c. 6.; sed Theologia non probat principia aliarum scientiarum; ergo &c.

Resp. uero maj. ad sapientiam enim maxime supremam non pertinet probare principia aliarum scientiarum; quia vel sunt per se nota, & sic probari non possunt; vel non sunt per se nota, & tunc per rationem naturalem probari possunt, cui non nititur Suprema Sapientia, sed Divinæ Revelationi. Ad sapientiam ergo pertinet iudicare de veritate principiorum aliarum scientiarum (unde quiddam invenitur in aliis scientiis veritati huius scientiæ repugnans, totum condemnatur ut falsum) & illa contra-

impugnantes defendere. Videatur D. Thom. hoc art. 6. ad 2.

XXIV. Dices quartò. Ideò sapientia est nobilior scientia, quia explicat, & tuetur eius principia; sed Theologia explicat, & tuetur principia, seu articulos fidei, & tamen non est nobilior fide; ergo &c.

Respondeo, ideò sapientiam esse pręstantiorem scientiā, quia explicat, & tuetur eius principia per principia altiora: quod non facit Theologia erga articulos fidei; eos enim tuetur, vel ipsā fide, vel per principia naturalia, ostendendo, principia fidei non repugnare Philosophiæ, quæ non sunt principia altiora; ideòque sicut aliæ scientiæ serviunt Theologiæ, ita Theologia famulatur fidei, non dominatur.

DUBIUM VI.

An Deus sit objectum Theologiæ.

§. I.

Resolutio dubii.

I. **O**bjectum, ut docent Logici, duplex est. Materiale, & formale. Materiale est res ipsa, circa quam potentia, aut habitus versatur. Formale verò est forma, seu formalitas, quam potentia, & habitus attingunt in objecto materiali, id est in re, circa quam versantur. V. gr. paries est objectum materiale visionis; simile est color, quem visus attingit in pariete. Hinc patet, quod objectum materiale per se, & ratione sui non attingitur, sed solum ratione objecti formalis.

Insuper quilibet habitus, vel potentia præter objectum materiale, & formale, habet etiam motivum, seu medium, per quod attingit objectum sibi proprium. Sic auctoritas Dei revelantis est motivum, propter quod fides assensum præbet revelatis. Sic lux est medium, per quod visus at-

tin-

tingit coloratum. Hoc motivum, seu medium vocari solet obiectum formale quo, seu ratio formalis sub qua.

II. Veritas aliqua potest dici revelata dupliciter. Primò in se, & immediate. Sic revelatum est, quòd Deus sit trinus in Personis, quòd Christus sit verè homo. Secundò mediâtè tantùm, & in alio, nimirùm, quia ex alia in se, & immediate revelatâ deducitur. Sicut ex ista propositione: Christus est homo: quæ est immediate revelata, deducitur ista: Christus est risivus: quæ ideò dicitur virtualiter revelata. His stantibus.

III. Dico primò. Obiectum materiale Theologiæ sunt Deus ipse, & res, quæ ad Deum referuntur. Probatur ex observatis: Obiectum materiale alicujus disciplinæ est res illa, de qua agit; sed Theologia agit de Deo, ut fert ipsa nominis etymologia, agit quoque de iis, quæ ad Deum referuntur; vel ut effectus ad causam, ut Angelus, Homo, aliæque Creaturæ; vel ut medium ad finem, ut sunt actus humani; aut tanquam instrumentum, animatum quidem, & excellentiæ, sicut Christi humanitas, ad hominis lapsi reparationem: vel inanimatum, ut sunt Sacramenta, per quæ gratia sanctificans homini conferitur; ergo hæc sunt obiectum ejus materiale.

IV. Dico secundò. Obiectum formale Theologiæ est Deitas, seu Deus sub ratione Deitatis. Ità S. Th. hinc art. 7., & communiter Theologi omnes, etiam Scotistæ. Ratione ergo probatur sic. Obiectum formale est ratio, seu forma, quam habitus primò, & per se quærit, & attingit in obiecto materiali: sic debita in actibus humanis restitudo, ideò est obiectum formale disciplinæ moralis, quòd primò, & per se à doctrina morali quærat; Atqui Deitas sic se habet respectu Theologiæ, quæ nempe divinitatem quærit, tùm in Deo considerato in se, prout est Unus, & Tri-

nus: tùm considerato extrâ se, idest pro ut est, aut Creator, aut ultimus finis, aut Reparator, aut Premiator Creaturæ rationalis; Ideò de creaturis agit, quòd sint quædam participatio divinitatis; ideò de Sacramentis tractat, quòd quidpiam divinum, participatum tamen, idest gratiam contineant: ideò tandem disserit de multis rebus, quæ non sunt Deus ipse, quòd ad divinitatis cognitionem, quam ex suo primario fine quærit, nonnihil conferunt; ergo &c. Ità loquitur S. Doct. art. 7. laudato. *Propriè enim illud assignatur obiectum alicujus potentia, vel habitus, sub cujus ratione omnia referuntur ad potentiam, vel habitum, sicut homo, & lapis referuntur ad visum, inquantum sunt colorata: unde coloratum est proprium obiectum visus. Omnia autem pertractantur in Sacra Doctrina sub ratione Dei, vel quia sunt ipse Deus, vel quia habent ordinem ad Deum, ut ad principium, & finem; unde sequitur, quòd Deus sit verè subiectum huius scientiæ.*

Confirm. contra quosdam, qui pro obiecto formali ponebant alia, nimirùm opera reparationis, & totum Christum, attendentes (inquit) S. Th.) ad ea, quæ in ista scientia tractantur, & non ad rationem, secundam quam considerantur. Sublato obiecto formali tollitur habitus scientiæ; sed quavis nullum esset opus meritòrium, quamvis nulla forent Sacramenta, & Verbum Divinum carnem non assumisset, adhuc subsisteret Theologia; posset enim inferre plures conclusiones de Deo, ejusque attributis, & probare, Deum esse æternum, quia immutabilis est; infinitum, quia ens per essentiam; & cetera, quæ de Deo per rationem à priori demonstrantur; ergo nec opera reparationis, nec Christus &c. sunt obiectum formale Theologiæ.

V. Dico tertio. Obiectum formale quo, seu ratio formalis sub qua nostra Theologia considerat deitatem, est revelatio virtualis, & mediata.

Hoc

Hoc innuit D. Thom. tum hic *artic. 3. in corp.*, & *ad 2.*, dum ait: *ea, quæ in diversis scientiis tractantur, potest Sacra Doctrina una existens considerare sub una ratione, inquantum scilicet sunt divinitus revelabilis*; & *in prologo 1. sent. art. 4.*, ubi ens divinum cognoscibile per inspirationem mavult ponere pro objecto Theologiæ, quam Deum. Quapropter cum hoc *artic. 7.* ponat pro objecto Theologiæ absolutè Deum, nullà factà mentione revelationis, dici debet, hic loqui de objecto formali quod, ibi verò de objecto formali quo.

Probatur verò sic. Illud est objectum formale quo, seu motivum, lumen, ac medium alicujus scientiæ, vel habitus, sub quo, & per quod attingit, tum objectum materiale, tum formale, circa quod versatur; in quolibet enim scientiæ, vel habitus objecto tria considerari debent, nimirum res, circa quas procedit, & hoc est objectum materiale; id, quod in tali re scientia per se considerat, & querit, & hoc est objectum formale quo; & ratio sub qua, seu medium, quo procedit in talis rei, & formalitatis consideratione, & hoc est objectum formale quo: Atqui Theologia attingit suum objectum, tum materiale, tum formale per virtutem, & mediatam revelationem: Siquidem attingit utrumque, quatenus habet connexionem cum iis, quæ immediatè revelata sunt, seu quatenus ex immediatè revelatis per legitimam ratiocinationem deducitur, per quod à fide, & metaphysica discrepat; sed connectio illa, & deducibilitas nihil aliud sunt, quam virtualis, & mediatæ revelatio: nam quod ex immediatè revelatis deducitur, in iis virtualiter, seu ut in causa continetur; ergo &c.

Confirm. cum Theologia sit habitus essentialiter diversus à fide, & à metaphysica, debet habere medium, sub quo procedit, diversum à medio utriusque; sed per hoc, quod habeat pro medio, & objecto quo virtualum

revelationem, optimè distinguitur; quia medium quo fidei est formalis, & immediata revelatio; medium quo metaphysicæ, & cujusvis scientiæ naturalis est naturalis evidentia; ergo &c. Sic etiam salvatur, quomodo fides sit lumen principiorum Theologiæ, quia ea, quæ in lumine principiorum sunt immediatè nota, & per se, in scientia, quæ illò regulatur, sunt nota tantum mediatè, & per aliud: ità ea, quæ immediatè revelata sunt in fide, in scientia Theologica mediatè, & per aliud revelata esse debent. Salvatur etiam subalternatio Theologiæ nostræ scientiæ Dei, & Beatorum: sicut enim istius objectum est Deus, ut clarè visus; ità illius debet esse Deus, non ut visus, sed ut obsecrè cognitus in suis principiiis.

§. II.

Solvuntur contraria.

VI. **O**bjicies primò contra secundam conclusionem. Illud non est objectum alicujus disciplinæ, cujus existentia illi non præsupponitur; atqui existentia Dei non præsupponitur Theologiæ: illud enim non præsupponitur, quod demonstratur existentia autem Dei demonstratur à Theologia; ergo &c.

Respondetur negando minorem. Theologia enim supponit de Deo auctore gratiæ, quo pacto est ejus objectum, quòd sit, & quid sit: hoc enim dicitur à fide; juxta illud Pauli ad *Heb. 11. v. 5. Credere enim oportet accedentem ad Deum, quia est.* Neque hoc potest saltè à priori demonstrare, sed solum à posteriori, dum per effectus ostendit, Deum esse, quod tamen non ex propriis, sed ex principiiis extraneis facit: & hoc idè, quia ipsius tanquam sapientiæ officium est, principia sua contra negantes defendere, & contra impugnantes tueri, & explicare.

VII.

VII. Obijcies secundò. Obiectum formale adequatum alicuius scientiæ prædicari debet de omnibus obiectis specialibus, quæ ab illa scientia considerantur; sed Deitas non prædicatur de Angelis, de Sacramentis, de Gratia, de Virtutibus, quæ tamen in Theologia considerantur; ergo &c.

Respond. dist. maj. de omnibus &c., quæ considerantur per se, & primariò, conc. maj., quæ considerantur secundariò, & ratione alterius, subdit. debet prædicari in obliquo, co. maj. in recto, neg. maj. Obiectum ergo debet prædicari quidem in recto de omnibus particularibus per se, & primariò ab illa scientia inspectis; & sic Deitas prædicatur de omnibus divinis: de iis verò, quæ scientia considerat secundariò, & ratione alterius, sufficit, ut obiectum prædicetur in obliquo, & sic deitas prædicatur de singulis enumeratis: licet enim non sint Deus, sunt tamen, ut à Theologia inspicuntur, vel effectus Dei, vel media conducentia ad Deum, ut finem supernaturalem.

VIII. Obijcies tertio. Obiectum formale debet esse causa, & ratio formalis omnium proprietatum, quæ de obiecto demonstrantur; at deitas non est causa, & ratio formalis innascibilitatis, quæ est in Patre, aliòquin cum Filius, & Spiritus Sanctus habeant Deitatem, essent formaliter innascibiles; ergo &c.

Respond. dist. maj. determinatè tamen, & relatè ad subiectum, in quo est, & de quo prædicatur, co. maj. aliter, nego maj. Sicut ergo naturalitas, seu mobilitas, quæ est obiectum formale Physicæ, est ratio, atque causa formalis omnium proprietatum, quæ de corpore mobili demonstrantur, non tamen in omni corpore mobili eandem radicat proprietates, sed proprietates quidem generales radicantur in omnibus, at verò speciales, solum eas radicant determinatè ad subiectum, in quo est; unde eas, quas radicant in homine, non radicant

in bruto: Ità deitas proprietates communes omnibus divinis radicant quidem in omnibus, sicut esse æternum, infinitum &c., quæ verò sunt particulares, has radicant solum determinatè ad illam personam, cuius sunt proprietates; & sic est innascibilitas, quæ solius Patris propria est, ut distincti à Filio, & Spiritu Sancto.

IX. Obijcies quartò. Illud omne, pertinere debet in recto, & per se ad obiectum Theologiæ, cui immediatè convenit ratio formalis sub qua illius; at non soli Deo sub ratione deitatis, sed etiam omni enti supernaturali immediatè convenit ratio formalis sub qua Theologiæ; Nullum enim ens supernaturale est, quod non possit immediatè, & per se revelari: ergo &c., & consequenter obiectum adequatum Theologiæ erit omne ens revelabile, sive divinum, sive non, Deus autem erit solum obiectum principale; quod innuit D. Thom. hic art. 3., ubi in corpore dicit, Theologiam considerare: omnia quæcumque sunt divinitus revelabilia. Quod repetit ad secundum, & ad primum dicit, Theologiam agere de Deo principaliter.

Si resp. dist. ma. cui immediatè &c., ultimatè, conc. ma. tantum proximè, neg. maj., & distincti eodem modo min. neg. consequentiam. Licet enim ratio revelabilis proximè competere possit omni enti supernaturali, cum tamen principaliter, & ultimò refundatur in ipsam deitatem, propter quam omnia revelantur, ipsa nemini est obiectum principale inter objecta revelabilia, sed etiam ipsa sola est per se revelabilis, & cætera ratione illius, & in hoc sensu loquitur D. Thom. citatus; unde ad primum explicans, quomodo Theologia principaliter agat de Deo, ait; *Sacra Doctrina non determinat de Deo, & de Creaturis ex aquo: sed de Deo principaliter, & de Creaturis secundum quod referuntur ad Deum, ut ad principium, vel finem.*

X. Contra. Si per impossibile nulla daretur revelatio de Deo auctore supernaturali, & solum supponeatur cognitio de Deo auctore naturali, & alia entia supernaturalia revelarentur per fidem, adhuc Theologia subsisteret; ergo cetera revelabilia quæ considerantur à Theologia.

Respond. dist. ant. Theologia alterius speciei subsisteret, transeat: Theologia, quæ modò est, nego ant. Sicut enim in facta hypothesi non subsisteret fides, quæ modò est, quæ, utpote virtus Theologica, debet habere essentialiter pro objecto Deum; ita nec subsisteret hæc nostra Theologia, quæ modò est, sed alia esset Theologia diversæ speciei.

XI. Obijcies quintò. Patres docent, Theologiam circa solum Deum versari, non verò circa alia, etto, ut referuntur ad Deum. Opponunt enim disciplinam, quæ tractat de Incarnatione, Theologiæ, quæ tractat de Deo. Sic Basiliius *epist. 141. ne in Theologiam, id est in ea, quæ divinitatis propria sunt, intenti, assumptionis mysterium contemnamus*. Et Cyrillus Alexandr. in hanc sententiam. Joa. 1. *In propria venit, ait: Valdè appositè ad sermonem de Incarnatione progreditur (Evangelista) ac subindè transit à mers Theologia ad explicandam dispensationem Incarnationis, quam propter nos gessit Filius*. Hinc Patres solum Joannem, inter Evangelistas, appellarunt Theologum, quia solus Filius divinitatem apertè expressit.

Respond. Juenin. *differt. 2. de objecto Theologiæ* dist. antec. Patres opponunt Theologiæ, sumtæ ex vi nominis, vel secundum ejus partem præcipuam, conc. Theologiæ, sumtæ secundum naturam, vel adæquatè, nego antec. Patres ergo, cum opponunt Theologiam Incarnationi, eam sumunt secundum etymologiam, secundum quam est *sermo de Deo*, vel secundum partem præcipuam: præcipuè enim agit de Deo, & de aliis solum, ut referuntur ad Deum; non eam acci-

piunt secundum suam naturam, & adæquatè, prout dicit omnia objecta, etiam materialia, de quibus (licet semper per ordinem ad Deum) sermonem facit.

XII. Obijcies sextò contra tertiam conclusionem. Ratio formalis motiva objecti debet esse illi intrinseca; sed revelatio virtualis, cum fundetur in extrinseco Dei testimonio, non est intrinseca objecto Theologiæ; ergo &c.

Respond. majorem esse veram in scientiis naturalibus, quæ procedunt ex principiis evidentibus, & in objectum feruntur propter illius evidentiam, quæ illi intrinseca est. Non verò in Theologia, quæ suis conclusiones deducit ex articulis fidei, quorum veritas, & certitudo habetur ex divino testimonio, quod rei attestatæ extrinsecum est.

XIII. Obijcies septimò contra eandem. Veracitas Divinæ Revelationis ultimò resolvitur in deitatem, idè enim testimonium illud verax est, & infallibile, quia divinum est; ergo deitas est ratio formalis, & objectum quo Theologiæ.

Resp. dist. antec. ultimò resolvitur in deitatem, tanquam in motivum extrinsecum, & remotum, conc. antec. tanquam in motivum immediatum, & intrinsecum, nego antec. Motivum enim immediatum, & intrinsecum, cur Theologia assentiatur suis principiis est, quia Deus verax in dicendo, ea revelavit, & hic sistit ejus motivum; quodd autem Deus sit verax in dicendo, quia utpote summè sapiens non potest falli, & ut summè bonus non potest fallere, & hæc omnia habeat, quia Deus est, est motivum valdè remotum, nec specificativum Theologiæ, quæ à solo motivo proximo speciem sumit.

XIV. Obijcies ultimò contra idem. Objectum formale quo debet esse ita specificum, & proprium, ut nullatenus alteri ab eo conveniat; sed mediata, & virtualis revelatio non est specifica, & propria Theologiæ, cum con-

veniat fidei; ergo &c. min. probatur; idèd fides adhæret istis articulis: Verbum Divinum est consubstantialia Patri: Christus habet humanam, & divinam voluntatem; quia sunt mediata, & virtualiter revelati, idest continentur in aliis articulis immediate revelatis.

Respond. neg. min., ad prob. neg. antec. Fides enim, dum adhæret illis articulis, præscindit ab hoc, quod sint, vel immediate, vel mediata revelati: ut enim fides præbeat assensum, satis est, ut certa sit, Deum aliquem articulum revelasse. At Theologia non præscindit, sed determinatè fertur in suas conclusiones, ut mediata solum revelatas. Cum enim assensus ejus sit per discursum, respicit conclusiones suas, uti deductas, & consequenter, ut contentas in principiis immediate revelatis; & sic, ut revelatas solum mediata, & virtualiter. Hinc sequitur, articulos de consubstantialitate Verbi cum Patre, & de duabus voluntatibus in Christo, esse in Catholico Theologo articulos fidei, quatenus tanquam Catholicus illos credit, ut revelatos: & simul conclusiones Theologicas, quia eos tanquam Theologus ex revelatis deducit; in simplici verò Catholico, qui Theologus non est, nec perpendit, illos esse contentos in aliis articulis, esse puros fidei articulos.

DUBIUM I.

An Theologia sit argumentativa.

§. I.

Resolutio dubii.

DE hoc dubio plura dicta sunt quaestione præcedente, maxime Dubio secundo, & tertio; quare ne eadem inutiliter repetamus, strictim hic loquemur, tyronem ad ibi dicta pro pleniori notitia remittentes.

I. Dico primò. Theologia nostra est argumentativa. Ità D. Thom. hic artic. 8., quod probat in argumento *Sed contra* ex dicto Apostoli ad Tit. c. 1. oportere Episcopum esse potentem, *exhortari in doctrina sana, & eos, qui contradicunt, arguere*. Christus ipse Theologorum Princeps Supremus, ad convincendos contradictores argumentative processit. Unde *Matth. 12.* Phariseos redarguens, & ostendens, Apostolis licuisse vellere spicas die Sabbathi, argumentatus fuit exemplo Davidis, & ab eo, quod Sacerdotes faciunt in Templo etiam die Sabbathi. Alia ejus argumenta videri possunt *Matth. 19. 21. 22., Luca 6. 11., & alibi*, quorum multa fuisse expendimus *quæst. præced. dub. 2. §. 2.* sicut etiam ex Paulo, quæ huc sunt revocanda.

II. Probat D. Thomas hanc assertionem sic. Omnes aliæ scientiæ sunt argumentativæ, & argumentantur, dum ex principiis deducunt conclusiones; sed Theologia est scientia (ut probatum est) ergo est argumentativa.

§. II.

Quomodo sit argumentativa circa sua principia.

III. **D**ico secundò. Theologia non argumentatur ad sua principia probanda; ità D. Thom. hic: & probat. Omnis scientia supponit sua principia, vel per se nota, vel in alia superiori scientia manifestata; sed Theologia est scientia; ergo supponit articulos fidei, qui sunt ejus principia jam nota; ergo ea non probat.

IV. Dices. Generalis mortuorum resurrectio est articulus fidei, & proinde principium Theologiæ; sed Apostolus 1. Cor. 15. probat futuram generalem resurrectionem, quia Christus resurrexit; ergo &c.

Respondeo, Apostolum ibi argumentari contra eos, qui negabant resurrectionem mortuorum, atque idèd non agnoscebant illam pro principio

cipio Theologiæ, quamvis non negarent Christum Dominum resurrexisse; & propterea ex Resurrectione Christi rectè colligit resurrectionem generalem omnium, argumento quidem non rigorosè demonstrativo, sed, vel ab actu ad potentiam, quasi diceret: Christus de facto resurrexit; ergo possibile est resurrectio. Vel à causa exemplari, & effectiva, ut docet S. Thomas in *cap. 15. 1. ad Cor. lect. 2. § 3. p. quasi. 55.* Vel per locum à consequente, perinde, ac si diceret: Si resurrectio mortuorum non est, neque Christus resurrexit; atqui falsum est consequens; Christus enim resurrexit, ut vos non negatis; ergo falsum est anteed., nam sublato consequente tollitur anteedens; non enim dari potest consequens falsum, & anteedens verum in bona consequentia. Secundò probat ex inconvenientibus, quæ sequuntur, si Christus non resurrexit. Videatur August. *lib. 2. de Doctr. Christiana cap. 31. & 32.*

V. Ut ergo intelligatur, quomodo Theologus non possit probare sua principia, & quomodo possit. Sciendum primò, ea non posse probare à priori, neque à posteriori. Est enim ceteræ scientiæ naturales probare possint sua principia (saltem à posteriori) id contingit, quia talia principia, utpotè naturalia, habent in natura effectus sibi proportionatos, cum quibus connectuntur, & qui assumi possunt ut medium ad ea probanda; atqui principia Theologiæ, utpotè supernaturalia, nempe mysteria gratiæ, utpotè excedentia humanæ mentis, & rationis capacitatem, nullum in ratione naturali habent medium sibi connexum, quo ostendi possint, sive à priori, sive à posteriori; ergo &c. Imò nedum probari nequit eorum existentia, sed nec possibilitas: omne enim medium ostendens rei possibilitatem, debet esse rei intrinsecum, vel cum intrinsecis rei connexum; nihil autem intrinsecè naturale potest esse intrinsecum, aut con-

nexum cum intrinsecis rei in se supernaturalis.

VI. Sciendum tamen secundò, quòd licet Theologus argumentari non possit, ut probet sua principia esse positivè possibilis, potest tamen primò ea explicare, seu ab aliquo simili manifestare; vel ab inconvenienti ostendere, quod fecit Paulus laudato loco. Potest secundò contrà impugnantes tueri: & quidem sic, ut si aliqua admittant esse vera, ex concessis probet reliqua: sicut Paulus ex Christi resurrectione, quam concedebant, probat generalem omnium resurrectionem. Sic ex veteri testamento, quod Judæi concedunt, probat Incarnationem, & adventum Messiæ, quem ipsi negant; Et veritatem veteris Testamenti, quam negant Manichæi, probat ex novo, quod concedunt, in quo vetus approbatur; & Catholicus probat realem Corporis Christi præsentiam in Eucharistia, quam negat Calvinista, ex novo Testamento, quod admittit. Si verò nullum omnino principium admittat, ut Gentilis, potest ostendere, mysteria fidei non esse impossibilia, solvendo omnia argumenta, quæ in contrarium assert. Pro quo

VII. Sciendum tertio, duplicem esse probationem, vel positivam, vel negativam. Probatio positiva fit per assumptum aliquod medium, quo ostenditur necessaria connexio prædicati cum subiecto; & hoc modo jam dictum est, principia Theologica probari non posse. Probatio negativa est, quæ evincitur, nullam esse repugnantiam in eo, quod affirmatur; & hic modus probandi, seu procedendi, est ostendere, non quidem positivè, mysteria fidei esse possibilis, sed solum negativè, idest ea non esse impossibilia.

VIII. An autem Theologus hæc viâ procedens dici possit evidenter ostendere, argumenta contra fidem nullius esse momenti, & consequenter ostendere evidenter, saltem evidentiè negativè, mysteria fidei non esse impossi-

possibilia: noto, argumentum Gentilis, vel Hæretici contra fidem posse esse vitiosum, vel ex parte formæ, vel ex parte materiæ. Si sit vitiosum ex parte formæ, certum est, quoddam potest evidenter illud solvi; bonus enim Theologus, qui leges rectè discurrendi novit, evidenter ostendere potest, in quo peccetur contra formam rectæ argumentationis.

Difficultas est, an evidenter etiam solvi possint argumenta, quæ sunt vitiosa ratione materiæ, idest quando antecedens falsum est, vel aliqua ejus pars. Videtur enim quoddam non. Non enim potest evidenter ostendi falsitas ejus, quod assumitur, nisi ostendatur evidenter veritas opposita, quod hic fieri non potest, quia talis veritas ad fidem pertinet.

IX. Hoc tamen non obstante, responsio affirmativa omninò tenenda est, cum D. Thom. in fine corporis hujus artic. 8., ubi, postquam docuit modum procedendi contra eum, qui nihil credit eorum, quæ revelata sunt, nimirum solvendo rationes, si quas inducit contra fidem, subdit. *Cum enim fides infallibili veritati nitatur, impossibile autem sit de vero demonstrari contrarium; manifestum est, probationes, quæ inducuntur contra fidem, non esse demonstrationes, sed solubilia argumenta.*

Quod confirmatur. Argumentum, peccans ex parte materiæ, non solum tunc solvitur evidenter, quando is, qui respondet, ostendit, ex ipsa rei natura falsam esse aliquam propositionem, quæ assumitur, ut vera; sed etiam quando aliunde sufficientem reddit rationem, cur prudenter sibi persuadere possit, & sibi de facto persuadeat, eam esse falsam. Quapropter ad solvendum argumentum, quod contra veritatem fidei objicitur assumendo quidpiam falsum, non est necesse, quoddam evidenter ostendatur falsitas propositionis assumptæ, sicut & veritas propositionis oppositæ; sed satis est, bonam reddere rationem,

cur non videatur illa propositio esse recipienda tanquam vera; quibus respondetur argumento in contrarium adducto. Ita Sylvius ad hunc artic. quæstio 2.; quæ conferenda sunt cum iis, quæ tradunt Bannes ad 1. p. qu. 32. art. 1. dub. 2. conclus. 1., & Cabrera 3. p. qu. 1. art. 1.

X. Potest ultimò Theologus evidenter probare, principia fidei esse credibilia, non solum ostendendo, ea non involvere contradictionem, solvendo omnia argumenta, omnesque contradictiones, quæ contra ea objici possunt, ut dictum est, & Patres, Sacrique Doctores præstiterunt; Sed etiam positive, adducendo motiva, quibus evidenter appareant credibilia: cujusmodi sunt miracula in confirmationem fidei facta; modus, quo Ecclesia, & fides propagata est; Universalis consensus doctrinæ, & morum; sanctitas, & alia, de quibus in tractatu de fide, si Deus annuerit, fusè loquemur.

XI. Neque hinc inferas: si mysteria fidei positive probari possunt, & evidenter, esse credibilia: ergo & possibilia; nihil enim est credibile, nisi verum, nihil autem est verum, nisi, vel existat, vel sit possibile, quia impossibile, neque est ens, neque proinde verum.

Nego enim consequentiam; licet enim quod est credibile sit etiam possibile, non tamen hinc sequitur, si aliquid probatur evidenter credibile, probari etiam positive, esse evidenter possibile. Nam ad probandam positive, & evidenter credibilitatem, sufficiunt media extrinseca rei creditæ, puta auctoritas dicentis, miracula, modus mirabilis propagationis fidei, numerus sine numero eorum, qui pro ea vitam dederunt &c. & quæ omnia practo sunt. At ad probandam rei possibilitatem positive, & evidenter, requiritur medium rei intrinsecum, quo probetur, prædicatum posse convenire subiecto; hoc autem medium non adeit in natura.

XII. Neque dicas. Saltem probari potest, myſteria fidei non eſſe impoſſibilia; ergo probari poteſt, eſſe poſſibilia; quia inter eſſe impoſſibile, & poſſibile non datur medium.

Nego enim ſimiliter conſequentiam, & ejus probationem: quia, ut monet Philoſophus *lib. de interpretat. cap. 3.*, poſſibile, & impoſſibile non ſunt contradictoria, quia utrumque eſt affirmativum; ſed impoſſibile, & non impoſſibile: unde ex quo probetur myſteria fidei, non eſſe impoſſibilia, ſolum concludi poteſt, ea eſſe non impoſſibilia. Adde, quodd eſto inter poſſibile, & impoſſibile nihil mediet in re, tamen inter rem poſſe demonſtrari poſſitive poſſibilem, & poſſe demonſtrari poſſitive impoſſibilem, datur medium, ſcilicet, nec poſſe demonſtrari poſſitive poſſibilem, nec poſſe demonſtrari poſſitive impoſſibilem, dum non apparent rationes urgentes, quibus poſſibilitas rei, vel impoſſibilitas evincatur, ſed tantum non impoſſibilitas.

QUÆSTIO III.

De Locis Theologicis.

DUBIUM I.

Quid, & quotuplex ſit Locus Theologicus.

§. I.

Reſolutio dubii.

I. **P**rimus, qui hac de re effuſo ſtilo traſaverit, omnium conſenſu, fuit celeberrimus vir, ac omnigenâ eruditione præditus Melchior Canus Ordinis Prædicatorum Epiſcopus Canarienſis in ſuo verè aureo Opere, quod inſcripſit *De Locis Theologicis*, atque in duodecim libros diſtribuit. Si preſſius hanc materiam proſequi in animo eſſet, diutius ſanè in ea nobis immorari oportet.

Verùm, quia ad alia plurima tranſeundum nobis eſt, ut Theologicum curſum perſiciamus, inter quæ multa ad hanc materiam ſpectantia tractanda erunt; Idèd hic ea ſolum, quæ ad inſtrucendum tyronem de locorum Theologorum notitia neceſſaria judicabimus, ſtriſto calamo expendemus.

Quemadmodum ergo (inquit laudatus Canus *lib. 1. cap. ultim.*) *Ariſtoteles in Topicis propoſuit communes locos, quaſi argumentorum ſedes, & notat, ex quibus omnis argumentatio ad omnem diſputationem inveniretur; ſic & nos peculiare quoddam Theologia locos proponimus, tanquam domicilia omnium argumentorum Theologorum, ex quibus Theologi omnes ſuas argumentationes, ſive ad confirmandum, ſive ad refellendum inveniant.* Hæc Canus. Ex quibus habes Loci Theologi definitionem, nempe quodd ſit: Domicilium, & ſedes, ex qua Theologus omnes ſuas argumentationes, ſive ad confirmandas Theologicas veritates, ſive ad refellenda contraria depromere poteſt.

II. Circa locorum Theologorum numerum: alii plures, alii pauciores recent. Canus uſque ad decem loco citato enumerat.

1. Eſt auctoritas Sacræ Scripturæ, quæ Libris Canonicis continetur.

2. Auctoritas traditionum Chriſti, Apoſtolorum, quæ quoniam ſcriptæ non ſunt, ſed de aure in aurem ad nos pervenerunt, vivæ vocis oracula rectiſſimè dixeris.

3. Auctoritas Eccleſiæ Catholicæ.

4. Auctoritas Conciliorum, præſertim generalium, in quibus Eccleſiæ Catholicæ auctoritas reſidet.

5. Auctoritas Eccleſiæ Romanæ, quæ divino privilegio, & eſt, & vocatur Apoſtolica.

6. Auctoritas Sanctorum veterum.

7. Auctoritas Theologorum Scholaſticorum, quibus adjungi poſſunt Juris Pontificii periti: nam Juris hujus doctrina, quaſi ex altera parte, Schol-

Scholasticæ Theologiæ respondet.

8. Ratio naturalis, quæ per omnes scientias naturali lumine inventas latissimè patet.

9. Auctoritas Philosophorum, qui naturam ducem sequuntur, in quibus sunt etiam Cæsarei Juris Consulti, qui veram & ipsi Philosophiam proficuntur.

10. Et postremus est humanæ auctoritas historiæ, sive per auctores fide dignos scriptæ, sive de gente ingentem traditæ, non superstitiosè, atque aniliter, sed gravi, constantique ratione. Ità Canus.

III. Sylvius tamen in hunc articulum 8. quæsto 3. enumerat solos octo. Sacram Scripturam, traditionem, auctoritatem Ecclesiæ, decreta Pontificum, & Conciliorum, auctoritatem Patrum, & Scholasticorum, & rationem naturalem; omittens auctoritatem Philosophorum, & humanæ historiæ. S. Thomas hic ad secundum, enumerat solos tres, nimirum; auctoritatem Scripturæ, Doctorum, & Philosophorum. Verùm, ut bene notat Sylvius loco laudato, vel non fuit S. Thomæ propositum, recensere omnes locos, ex quibus Theologus potest argumenta desumere; sed solum ostendere, Theologiam esse argumentativam, eò quodd aliquos habeat locos. Vel sub illis tribus, quos exprimit, alios implicite comprehendit, ut sub auctoritate Scripturæ auctoritatem traditionum, Conciliorum, Ecclesiæ, & Pontificum: dum enim in causa fidei decernunt, semper loquuntur ex Scriptura, seu ex Verbo Dei. Sub auctoritate Doctorum, auctoritatem Patrum, Scholasticorum, & Juris Pontificii interpretum. Sub auctoritate Philosophorum, auctoritatem humanæ historiæ scriptæ, vel traditæ, & naturalis rationis. Cum ergo in his, licet paucioribus, alii contineantur, à Cano expressius distincti, ejusdem enumerationis, utpote magis distincta, sustinenda est. Per omnes enim præfatos locos velut apes volitat, & spa-

tiatur Theologus, ut inde mel veritatis per discursum efformet, aliter tamen, & aliter.

§. II.

An ex omnibus præfatis locis equaliter argumentari possit Theologus.

IV. **O**bservo, quodd ubi in aliis scientiis naturalibus principem locum obtinet ratio, locus verò ab auctoritate est infirmissimus, in hac ex opposito primum locum obtinet auctoritas, postremum ratio naturalis. Licet enim locus ab auctoritate, quæ fundatur super rationem humanam, sit infirmissimus, locus tamen ab auctoritate, quæ fundatur super revelationem divinam, est efficacissimus. Cum ergo Theologia, quæ, ut dictum est, nitiatur principiis revelatis Fide Divinâ, procedit ex Auctoritate Divina, procedit ex loco sibi proprio ad directè probandas suas conclusiones; cum verò procedit ex ratione naturali, procedit ex loco sibi extraneo; nec ratione utitur ad directè suas conclusiones probandas, sed ad manifestanda alia, quæ in hac doctrina traduntur; vel ad ostendendum ea, quæ ipsa tradit, rationi naturali non repugnare. Ut autem hac, quæ indicat D. Th. hoc art. 8. ad 2., præfatus explicentur.

V. Observandum est, quodd licet Theologus ex omnibus, & singulis præfatis locis possit sumere argumenta, non tamen ex omnibus æquè efficaciter argumentatur. Nam ex aliquibus argumenta sumit ad concludendum efficaciter, & necessariè; ex aliis verò solum probabiliter; & propterea primi vocantur loci intrinseci, & proprii Theologiæ, alii verò extrinseci, seu extranei, & quasi in famulatum ejus ab externo advenientes.

VI. Locus ergo Theologiæ proprius, septem priores esse, censet Canus, nempe auctoritatem Scripturæ, Traditionis.

tionis, Ecclesiae Catholicae, Concilio-
rum Generalium, Pontificum Roma-
norum, omnium Sanctorum Patrum,
& omnium Scholasticorum in una-
liqua re fidem spectante concorditer,
ac perpetuo consentientium. Alii so-
los tres assignant, ut proprios, &
domesticos, nempe Scripturam Sacram
Veteri, & Novo Testamento exara-
tam, Traditionem Christi, & Aposto-
lorum, ad quam revocant communem
Patrum, & Doctorum sensum in lo-
quendo, & doceando, & fidelium in
credendo, & auctoritatem Ecclesiae,
quae Conciliorum, & Summorum Pon-
tificum decreta complectitur.

VII. Loci verò Theologici, quasi
extranei, & solum probabiliter con-
cludentes, sunt auctoritas unius, vel
plurium Patrum, aut Scholasticorum,
non tamen omnium, nec perpetuam,
nec ex verbo Dei, sed ex humano
sensu doctrinam loquentium, auctori-
tas Philosophorum, historiarum humanarum,
& ratio naturalis.

DUBIUM II.

De Sacrae Scripturae usu in argumen-
tis Theologicis.

§. I.

*Quid sit Sacra Scriptura, &
quotuplex.*

Non agam hic omnes quaestio-
nes, de Sacra Scriptura agita-
ri solitas; has enim Lectori-
bus Sacrae Scripturae tractandas relin-
quam; sed eas solas, quae Theolo-
go inservire possunt, ut ex Scriptura
Divina firmum trahere possit argu-
mentum.

I. Scriptura Sacra nil aliud est,
quam Verbum Dei scriptum, seu epi-
stola Dei ad homines. Sic D. Chry-
sostomus *hom. 2. in Genes.* postquam
ait, Deum ab initio per se ipsum ho-
minibus locutum fuisse: *sic enim ad
Adam venit, sic Cain increpavit, sic*

*cum Noë locutus; sic apud Abraham
hospitatus est.* Posterioribus tamen
temporibus, quia homines malitia sua
Dei familiaritate sese indignos reddi-
derant, nec se totum volens à gene-
re humano avertere, imò suam ami-
citiā renovare, quasi longè absenti-
bus litteras mittit, conciliaturus sibi
universam hominum naturam. Et S.
Augustinus *Conc. 2. in Psalm. 90. De
illa* (inquit) *Civitate, unde peregrina-
mur, littera nobis venerunt. Ipsa
sunt Scriptura, quae nos hortantur, ut
bene vivamus.* Denique S. Gregorius
Magnus *lib. 4. ep. 31. al. 40. ad Theo-
dorum Medicum. Imperator, inquit,
Caeli Dominus, Hominum, & Angelorum,
pro vita tua tibi suas epistolas trans-
misit, & tu gloriose fili eiusdem epi-
stolas ardentem legere negligis? Quid est
autem Sacra Scriptura, nisi quadam
epistola Omnipotentis Dei ad Creaturam
suam?*

II. Triplici autem viâ scribere ho-
mini Deus continevit. Primò viâ na-
turae, hoc est per universas creaturas
scripsit naturalem illam epistolam,
& scripturam, seu potius patentissi-
mum illud, & ubique diffusum li-
brum naturae, in quo, Apostolo te-
ste *Roman. c. 1. v. 20. Invisibilia ip-
sius à creatura mundi, per ea, quae fa-
cta sunt, intelligentia conspiciuntur.* In
quo *psalm. 93. v. 1. Cantat Domino om-
nis terra.* In quo *psalm. 18. v. 1. Ce-
li entrant gloriam Dei.* Et *psalm. 148:*
*laudent eum Sol, & Luna, laudent
eum Stella, & Lumen, laudent eum
Caeli Caelorum, & aquae omnes &c.* Hic
est ille liber, de quo S. Antonius A-
nachoretarum parens, rogatus à Gen-
tilli Philosopho, quomodo in Eremito
sine libris ageret, sapienter respondit
apud Socratem *lib. 4. bist. c. 13. Meus
liber, à Philosopho, est natura rerum,
à Deo conditarum, in qua, quotiescum-
que sic animo meo visum, legere pos-
sum, quia Deus dicit.*

Secundò viâ Prophetiae, quomodo
scripsit per Prophetas in veteri Testa-
mento, & per Apostolos, aliosque

Sa-

Sacros Scriptores in novo. Et hoc dupliciter. Primò quasi per seipsum scribens digito suo, quo pacto scripsit in duabus tabulis Legem Decalogi in veteri Testamento, juxta illud Exod. c. 31. v. 18. *Deditque Dominus Moysi, completis hujusmodi sermonibus in Monte Sinai, duas tabulas testimonii lapideas, scriptas digito Dei.* In Novo autem Testamento scripsit per seipsum Christus Dominus legem suam, non in tabulis lapideis, sed in corde Ecclesiæ, non atramento, & materiali calamo, sed digito, idest spiritu Dei, juxta illud Pauli ad Hebræos c. 8. v. 10. *Dabo leges meas in mentem eorum, & in corde eorum superscribam eas.* Quod promisit Christus Joann. 14. v. 16. *Ego rogabo Patrem, & alium paraclitum dabit vobis, spiritum veritatis.* Et v. 26. *ille vos docebit omnia, & suggeret vobis omnia quorumque dixerō vobis.* Hæc autem Scriptura Divina in corde Ecclesiæ Spiritu Dei scripta, nil aliud est, quam communis, ac perpetuus Ecclesiæ consensus, & concors omnium fidelium doctrina per continuas successiones ad nos uque recepta, juxta illud Pauli 1. Cor. 3. v. 3. *Epistola estis Christi ministrata à nobis, & scripta non atramento, sed Spiritu Dei vivi, non in tabulis lapideis, sed in tabulis cordis carnalibus.*

III. Secundo autem modo scribit Deus, suis Amanuensibus sacris dictando, vel verba, vel saltem sensum. Hoc modo scripsit totam Scripturam veterem Legis, & Prophetarum, juxta illud Psalm. 44. v. 2. *Lingua mea calamus scribæ velociter scribentis.* Et 2. Reg. cap. 23. v. 2. *Spiritus Domini locutus est per me, & sermo ejus per linguam meam;* Et illud S. Petri ep. 2. cap. 1. v. 21. *Spiritu Sancto inspirati, locuti sunt Sancti Dei homines.* Ità in novo Testamento per Evangelistas scripsit Evangelia, per Apostolos canonicas epistolas.

IV. Asserit solet tertius modus, ni-

mirum, quo Deus, nec scribit per se ipsum, nec alteri dicat, sed alteri committit scribere, & dicere, ei assistendo, & confirmando quod scribit. Ità se gessit in veteri Testamento, dum Summos Pontifices in Cathedra Mosaica sedentes, delegavit ad decreta, & sententias ferendas, eas suo quasi sigillo approbens, & confirmandas, ut Deuterom. 19. v. 12. Ità etiam in nova Lege se gerit erga suos in Terris Vicarios Romanos Pontifices, erga OEcumenica Concilia, erga Ecclesiam Catholicam, cui commisit canones edere, & decreta suo quasi sigillo approbens, & muniens, ait, Luca 10. 16. *Qui vos audit, me audit: & qui vos spernit, me spernit; qui autem me spernit, spernit eum, qui misit me:* Et Matth. 18. 17. *Si autem Ecclesiam non audierit, sit tibi sicut Ethnicus, & Publicanus.* Verum. quia hoc tertio modo reverà Deus, nec scribit per se, nec per alium, sed potius scripta ab homine regit, & approbat; ideo nomine Sacræ Scripturæ solum venit Scriptura primo, & secundo modo, hoc est à Deo, vel scribente, vel dictante profecta.

V. Hanc Sacram, & verè Divinam Scripturam dari. eamque esse nostram, Propheticam videlicet, & Apostolicam nobis ab Ecclesia propositam; talesque esse omnes ejus libros in Tridentino Canone recensitos sess. 4. Decreto de Scripturis Canonis, nimirum xlv. veteris, & xxvii. novi Testamenti, nec plures. nec pauciores, invictè sustinemus; & contra hæreticos, aliquos eorum expungere conantes, alibi defensamus; Hoc maxime ratiocinio nixi, quid determinare. quinam libri sint Canonici, & Divini, non ad quemcumque privatum pertinet, sed totius Ecclesiæ Catholicæ officium est, quam (ut dicebamus) Deus suo spiritu regit, cujusque decreta approbat tanquam sua; sed Ecclesia in Tridentino OEcumenicè congregata omnes præfatos tum ex veteri, tum ex novo Testamento Libros, ut Canonicos,

eos, Divinosque approbavit; ergo omnes habendi sunt, ut Canonici. Hoc ad præsens intentum sit satis. Alibi enim de hac refutatus, si Deus annuerit, dicemus, omnesque libros tum generaliter, tum sigillatim vindicabimus.

VI. Ex omnibus ergo præfatis libris poterit Theologus firmissima argumenta, pro suis veritatibus astruendis, deducere; hoc tamen prudentiali monito instructus, ut si res illi sit cum hæretico negante auctoritatem alicujus libri esse divinam, confugiat ad textum ex alio libro, quem ille ut divinum admittat, ne à questione, quam cum eo agit, cogatur divertere ad aliam, nimirum ad probandam auctoritatem illius libri. Quare si ad probandum, pium esse, & salutare offerre Sacrificium pro fidelibus defunctis, afferret factum Judæ Machabæi, quod narratur 2. Machab. cap. 12. v. 43., & ageret contra Lutheranium, vel Calvinistam, quamvis absolute efficaciter procederet, contra illum tamen parum, vel nihil eficeret, qui statim negaret, auctoritatem illius libri esse divinam, & sic aliam litem cum eo contraheret interminabilem, nimirum ut probaret, librum illum esse auctoritatis verè divinæ.

Pro uberiori tamen hujus notitiâ duo supersunt. Primum cum Sacra Scriptura plures sensus habeat, ut docet D. Thom. hic art. 9., & 10., videndum est, an ex quolibet Scripturæ sensu possit Theologus eruere firmum argumentum. Secundum cum ejusdem plures dentur editiones, & versiones, ex quanam debeat procedere, ut firmè procedat. Quod in duobus §. sequentibus præstare conabimur.



An ex quolibet Scriptura sensu Theologus possit argumentari.

I. Sciendum hic, per Divine Scripturæ sensum nihil aliud communiter intelligi, quàm id, quod Spiritus Sanctus Divinæ Scripturæ auctor intendit per Scripturam nobis significare: dixi per Scripturam, & non per Scripturæ verba, quia (ut dicemus) in Scriptura ex intento Spiritus Sancti non solum significant verba, sed aliquando etiam res.

II. Duplex ergo in sui prima divisione communiter assignatur Sacræ Scripturæ sensus, nimirum litteralis, & spiritualis, sive mysticus. Cujus rationem reddit S. Thomas hic qu. 1. art. 10. *Auctor enim Sacra Scripturæ est Deus, in cujus potestate est, ut non solum voces ad significandum accommodet (quod etiam homo facere potest) sed etiam res ipsas. Et idcirco, cum in omnibus scientiis voces significant, hoc habet proprium ista scientia, quod ipse res significat per voces, etiam significant aliquid. Illa ergo prima significatio, quæ voces significant res, pertinet ad primum sensum, qui est sensus historicus, vel litteralis. Illa verò significatio, quæ res significata per voces, iterum res alias significant, dicitur sensus spiritualis, quia super litteralem fundatur, & eum supponit. Hæc D. Thomas.*

III. Hic autem sensus spiritualis trifariam dividitur, nempe in Allegoricum, Tropologicum, seu morale; & Anagogicum. Allegoricum est, cum res gesta in veteri Testamento aliquid significat gerendum in novo, v. gr., exaltatio serpentis in deserto à Moysè, quæ designabat Christum exaltandum in Cruce. Tropologicus, seu moralis est, cum ea, quæ in Christo sunt facta, vel in iis, quæ Christum significant, sunt signa eorum, quæ nos agere debemus, & ad componen-

dos nostros mores diriguntur. Anagogicus, seu fursùm evchens est, cum res in Scriptura significat aliquid spectans ad Æternam Gloriam; ut v. gr. introitus Israelitici Populi in terram promissam, significat introitum Fidelis Populi ad Æternam Gloriam. Hi autem sensus hâc unicâ voce *Jerusalem* manifesti sunt; ex D. Hieron. in *cap. 16. Ezech.* Hæc enim vox ad litteram significat Civitatem Judæ. Civitas autem hæc significat allegoricè Ecclesiam; tropologicè Animam. Justi; anagogicè Cœlestem Patriam. Hujus triplicis sensus rationem dat D. Th. hic, quia ex Apostolo *Hebr. 7. lex vetus figura est novæ Legis*, & ipsa nova Lex, ut dicit Dionys. *Eccles. Hierarch. part. 1. cap. 5. Est figura futura gloria. In novâ etiam Lege, ea, quæ in Capite sunt gesta, sunt signa eorum, quæ nos agere debemus.*

IV. Item sensus litteralis est duplex; unus proprius, quem verba propriè accepta significant: Velut cùm dicitur: *dilige Dominum Deum tuum*, sensus litteralis est, Deum, ut verba sonant, esse diligendum. Alter verò metaphoricus, seu improprius, cùm verba à sua propria ad impropriam significationem transferuntur. Ut dùm dicitur *Joan. 10. v. 27. Oves meæ vocem meam audiunt*, sensus litteralis est de populo fideli, per voces metaphoricè acceptas significato.

V. Sed quomodo sensus metaphoricus continetur sub litterali? Nunquid, cùm nominatur in Scriptura brachium Dei, sensus litteralis erit, quòd in Deo sit brachium?

Dico cum D. Thom. hic *art. 10. ad 3.*, sensum metaphoricum contineri sub litterali, quia significatur non per res, ut sensus spiritualis, sed per voces: Per voces autem significatur aliquid propriè, & impropriè. In sensu tamen improprio (ait D. Thom.) *nec est litteralis sensus ipsa figura: sed id, quod est figuratum. Non enim cum scriptura nominat Dei brachium, est litteralis sensus, quòd in*

Deo sit membrum hujusmodi corporale: sed id, quod per hoc membrum significatur, scilicet virtus operativa.

VI. Porro, ut sensus allegoricus plenius intelligatur, observandum est cum D. Augustino *lib. 15. de Trinit. cap. 9.*; duplicem esse allegoriam, unam vocum, aliam rerum. Prior est continuata vocum translatio, cujusmodi est in illo *Isaia 11. v. 6. Habitabit lupus cum agno: & pardus cum bœdo accubabit: Vitulus, & leo, & ovis simul morabuntur* &c. Non enim ea animalia, quæ per dictas voces significantur, debent intelligi; sed per metaphoram significatur, quòd gentes barbaræ, ac crudeles depositâ feritate, habitabunt cum populo Christiano, simplici, & mansueti. Et hæc allegoria pertinet ad sensum litteralem, seu historicum metaphoricum. Posterior allegoria est, quando ea, quæ sunt gesta in veteri Testamento, & etiam in novo, figurant, & significant alia gerenda in novo, vel spectantia ad Christum, vel ad mores nostros, vel ad æternam gloriam. Quare non omnis allegoria indicat sensum allegoricum condistinctum à sensu spirituali, sed sola allegoria in vocibus.

Præfati quatuor Scripturæ sensus, litteralis, allegoricus, tropologicus, seu moralis, & anagogicus metricè vulgò sic designantur:

Littera, gesta docet: quid credas, allegoria.

Moralis, quid agas: quid speres, anagogia.

VII. Doctrina hæcenus tradita cuilibet tyroni captu facilis, & obvia est, sed in ea applicanda labor maximus, etiam provectis. Cum enim non in quolibet Scripturæ textu hi quatuor sensus inveniantur, difficile est, determinare, quinam fuerint sensus à Spiritu Sancto intenti, & maxime in illis textibus, de quibus Sanctus Spiritus nec ibi, nec alibi sese expressit.

In hac re supponendum videtur ceter-

certum, in omnibus Sacrae Scripturae sententiis aliquem sensum litteralem, sive proprium, sive metaphoricum reperiri, quia sensus litteralis est fundamentum cæterorum.

VIII. Porro regulæ ad cognoscendum sensum litteralem sunt. Prima, quando verba, in propria significatione accepta, sensum absurdum non faciunt, sunt ad litteram accipienda, & non ad metaphoram, aut tropos trahenda. Ità ex S. August. lib. 8. de Genes. ad lit. cap. 7.

Secunda, si alicujus sententiæ sensus, quem putamus litteralem, conveniat cum ipso contextu, nec repugnet dogmatibus fidei, & morum honestati, verè est litteralis. Ità ex eodem de Doctrin. Christ. lib. 3. c. 10. Sic cum Christus dicitur agnus, leo, vitis, patet non esse in sensu litterali proprio accipienda, ex D. August. tract. 80. in Joannem. Sic cum dicitur Matth. 18. vers. 8. Si manus tua, vel per tuus scandalizat te, abscinde eum, & projice abs te; & ibid. v. 9. Si oculus tuus scandalizat te, erue eum, & projice abs te. Hæc verba ad litteram propriè, & ut verba sonant, non sunt accipienda, cum morum honestati non congruant; Cum nefas sit, se ipsum mutilare, sibi que pedem, vel manum abscindere, aut oculum eruere; sed per metaphoram, idest si, qui te scandalizat, tibi sit carus, aut necessarius vitæ tuæ, sicut corpori tuo manus, pes, vel oculus, hunc à tuo contubernio, & conversatione statim abscindas, & abicias.

Tertia, est collatio Scripturæ cum loco, & tempore, & scopo personæ scribentis. Ità S. Hieron. lib. 2. in Jerem. c. 8. Quare si non capias, cur Jeremias prædicens, mala è Babylone super omnes habitatores terræ ventura, dicat cap. 1. v. 14. ab Aquilone panietur omne malum: cum Babylone versus Aquilonem non sit, sed versus Orientem, vel Austrum; id facile discas, si consideraveris, Jeremiam non in Italia, aut Galliis scribentem,

sed in Judæa prophetantem, & respectu Judææ Aquilonarem esse Babyloniem, non Australem, vel Orientalem.

Quarta, est collatio Scripturæ cum Scriptura, seu textus cum textu, antecedentium cum consequentibus Scripturæ locis: cum D. August. lib. 2. de Doctrin. Christ. cap. 6. dicat: Nihil enim serè de illis obscuritatibus eruitur, quod non planissimè dictum alibi reperitur. Sic duratio v. gr. regni Antichristi, quæ à Daniele cap. 7. v. 25. satis obscure exprimitur hisce verbis: per tempus, & tempora, & dimidium temporis, clariùs expressa invenitur à Joan. Apocal. 11. v. 2. dùm prædicit, quod Civitas Sancta mensibus quadraginta duobus, idest tribus annis cum dimidio calcabitur, & apertiùs adhuc versu tertio, dùm dicit, quod tunc regnabit homo ille peccati, cum duo testes Henoch videlicet, & Elias prophetabunt, diebus mille ducentis sexaginta. Et Christus, referente D. Basilio lib. 1. de Baptismo, quod obscure dixerat Matth. 6. v. 12. Thesaurizate vobis Thesaurum in Cælo, clariùs expressit Luca 12. v. 33. Vendite, quæ possidetis, & date eleemosynam; facite vobis sæculos, qui non veterascunt, Thesaurum non deficientem in Cælis.

Quinta, est collatio Scripturæ cum SS. PP. sententia. Hanc tradidit Tridentinum decret. de edit. & usu S. Libr. cum declaravit, non licere interpretari Sacram Scripturam, contra unanimem Patrum sententiam.

Sexta, est collatio Sacrae Scripturæ cum Ecclesiæ Judicio. Hæc est regula omnium tutissima, quam præscribit Tridentinum laudato loco, sess. 4. dùm statuit, nemini suæ innixæ prudentiæ licitum esse Scripturam interpretari, & ad suos sensus contorquere contra eum sensum, quem tenuit, & tenet Sancta Mater Ecclesiæ, ejus est judicare de vero sensu, & interpretatione Scripturarum Sanctorum. Ab hac regula quotquot recesserunt, in turpissimos errores, atque hæreses lapsi sunt.

Præter omnes præfatas regulas scitu dignas, advertat, qui lectionem Sacre Scripturæ, ejusque interpretationem suscipit, ut ad eam accedat cum fide. Scriptum est enim *Isai. 7. v. 9. juxta lxx. Interpretes: Nisi credideritis, non intelligetis*. Secundò cum humilitate, quia *Prov. 11. v. 2. Ubi humilitas, ibi sapientia*. Et Christus *Matth. 23. v. 25. Confiteor (inquit) tibi Pater Domine Cæli, & Terra, quia abscondisti hæc à sapientibus, & prudentibus, & revelasti ea parvulis*. Tertiò cum conscientia pura, quia *Sapientiæ 1. 4. in malevolam animam non introibit sapientia, nec habitabit in corpore subdito peccatis*. Quartò cum oratione, quia non tam à Libris, quam à Deo lumen intelligentiæ debet procedere, & ab eo petendum cum Davide *Pf. 118. v. 34. Da mihi intellectum, & scrutabor legem tuam*. Unde S. August. *lib. 2. de Doctr. Christ. cap. 37. non solum, inquit, admonendi sunt studiosi litterarum venerabilium, ut in Scripturis Sanctis genera locutionum fiant. . . . Verum quod est præcipuum, & maximè necessarium, orent, ut intelligant*. Quod fecisse D. Thom. legimus, qui nunquam se lectioni, aut scriptioni dedit, nisi post orationem. In difficultatibus locorum Sacra Scriptura, ad Orationem. Jejunium adhibebat. Quia etiam sodali suo fratri Reginaldo dicere solebat, quidquid scires, non tam studio, aut labore suo se peperisse, quam divinitus traditum accepisse. Quintò denique omnibus præfatis addere debet assiduam Divinæ Scripturæ lectionem; eam enim commendat Christus dicens, *Scrutamini Scripturas* *Joan. 5. 39. Commendat & Spiritus Sanctus Josue cap. 1. v. 8. Non recedet volumen legis hujus ab ore tuo; sed meditaberis in eo diebus, ac noctibus*; Commendat & D. Paulus suo *Timoth. epist. 1. cap. 4. v. 13. dicens, attende lectioni, exhortationi, & doctrinæ*.

IX. Quòd si quæras scire, quibus ducibus possis litteralem, vel quemcumque alium Scripturæ sensum asse-

qui; discas ex Sixto Senensi *lib. 3. sup. Bibliotheca Sancta*, sic metricè respondente

Historiam Hebræis, & Græcis fontibus haustum,

Hieronymo discas duce.

Allegorias, anagogemque recludent, Origenes, & Ambrosius.

Exponent sensus formandis moribus aptos,

Chrysostomus, & Gregorius.

In dubiis, altæque locis caliginem meris,

Aurelius lucem feret.

At brevis, & facilis non est spernenda tyroni.

Lirinenus expositio.

X. Præter præfatos quatuor sensus, alius excogitatur, vulgò dictus accommodatitius, seu per accommodationem; cùm verba Scripturæ rem unam significantia, usurpantur ad aliam significandam juxta beneplacitum, & existimationem usurpantis, propter aliquam convenientiam, quam inter utramque intercedere judicat. Quo pacto Sacri Oratores textus multos Scripturæ usurpant in concionibus, eos applicando viris sanctis, quorum texunt panegyrim: ut si hæc verba de Noe prolata *Ecclesiastici 44. v. 17. inventus est perfectus, justus, & in tempore iracundia factus est reconciliatio*: Vel ista de Abrahamo *ibidem* asserta *v. 20. non est inventus similis illi*: veldenique ista *v. 26. De Isaaco ibidem* dicta: *benedictionem omnium gentium dedit illi Dominus &c.* usurparet extendendo, & applicando ead. D. Benedicto, Dominico, Francisco, Ignatio. Sed iste non est sensus proprius Scripturæ, sed Interpretis, nec à Spiritu Sancto intentus, sed à Concionatore Scripturæ affixus.

XI. Quæres, an Sacra Scriptura, sub eadem littera contineat plures sensus litterales?

Respond. D. Thom. hoc *art. 10. in fine* corporis affirmativè, asserens Augustinum *lib. 12. confess. ex e. 18. 19. 20., & dicens: Quia Auctor Sacra Scriptura*

ptura Deus est, qui omnia simul suo intellectu comprehendit, non est inconveniens, si etiam secundum litteralem sensum in una littera Scripturæ plures sint sensus. Quod etiam indicat lib. 2. sent. dist. 12. artic. 2. in respons. ad 7., & quass. 4. de potentia art. 1. Quem sequitur Sylvius, alique quamplures ab eo citati in hunc artic. 10. quassito unico. Et prob. potuit Deus plura, ac diversa iisdem verbis significare, & decuit Sacræ Scripturæ majestatem, ac fecunditatem: sicut enim excellentior esset artifex, qui unico instrumento posset facere multa artefacta, quam ille, qui pro diversis artefactis diversis indigeret instrumentis. Et sicut perfectioris eloquentiæ est, paucioribus verbis plura complecti, quæ alius multis deberet dicere; Ità ad majorem Dei, & Scripturæ excellentiam pertinet, iisdem verbis plura significare.

Hinc illud *Genes. 1. In principio creavit Deus Cælum, & Terram*, litteraliter significat, & in initio temporis, & etiam ante omnia. Prior sensus evincit, Mundum non esse æternum, sed aliquando cepisse. Posterior ostendit, Angelos non fuisse creatos ante Mundum corporeum. Priorem sensum usurpavit S. Aug. lib. 12. *confes. c. 20.*, & 18. *Posteriorem l. 1. de Civ. Dei c. 4.* Utrumque verò idem S. Doct. lib. 1. *de Gen. ad lit. imperf. c. 1.*, & Innocentius III. cum Concilio Lateran. dùm *cap. Firmiter tit. de summa Trinit.* resolvit dicens, quòd Deus simul ab initio temporis utramque de nihilo condidit *creaturam, spiritualem, & corporalem, Angelicam videlicet, & mundanam.*

Hinc etiam, quod in *Psalm. 2. legitur: Ego hodie genui te*, Paulus *Act. 13. v. 33.* de Christi resurrectione interpretatur. *Ad Hebr. 1. v. 5.* de generatione æterna: quod etiam de temporali generatione rectè intelligi, tùm ex contextu patet, tùm ex D. Thom. super *cap. 1. ad Hebræos.*

Hinc illud *Isaia 53. v. 8. Generationem ejus quis enarrabit?* & de æterna

Christi ex Patre, & de temporali ejusdem ex Matre generatione intelligi nihil vetat. Unde ex Patribus alii de æterna, alii de temporali, alii (ut Aug. *homil. 36.* inter quinquaginta, nunc *ser. 44.*, & Cyril. *Alex. lib. 5. in Isaiam cum D. Hieronym.*) de utraque accipiunt.

XII. Neque inferas, si una littera multa significat, sequi ambiguitatem, & æquivocationem, & argumentationem ex littera habente plures sensus fore fallacem; quia, ut ait D. Thom. 3. p. *quass. 60. art. 3. ad 1. tunc est signum ambiguum, præbens occasionem fallendi, quando significat multa ad unum non ordinata.*

Nam benè respondet Sylvius laudato loco, tunc esse quidem signum ambiguum, præbens occasionem fallendi, & vitians argumentationem, quando aut is, qui illud assumit, non intendit, nec declarat, se ea multa significare, sed solum unum ex illis; aut intendat quidem ea multa significare, sed disjunctivè, & cum animo illum fallendi. Non tamen quando qui assumit illud signum, intendit, & declarat, se ea multa determinatè, & simul significare, ut in casu nostro. Hinc benè ait Loras, æquivocationem esse vitiosam, quando unicum tantum significatum intenditur, & exprimitur verbis æquivocis; sed quando quidquid verba significant, intenditur, non est (inquit) vitiosum, sed profundum uti verbis, quæ plura significant. Videri potest Sylvius laudato loco, alia de hac materia doctè, & eruditè afferens. Nobis sufficiet pro sufficiente novitii candidati instructione hæc delibasse. Ad rem ergo nostram veniendo.



§. III.

Resolutio quæstii.

XIII. **D**ico primò. Ex sensu litterali proprio Sacræ Scripturæ firmum semper eruitur argumentum Theologicum. Prob. Ex eo sensu Scripturæ firmum semper eruitur argumentum, qui est sensus Spiritus Sancti, & à Spiritu Sancto per verba Scripturæ intentus; sed talis est sensus litteralis; ergo &c. Unde D. Thom. hoc ar. 10. ad 1. dicit, quòd nulla confusio sequitur in Sacra Scriptura, cum omnes sensus fundentur super unum, ex quo solo potest trahi argumentum.

XIV. Prob. secundò. S. Paulus 1. ad Timoth. 3. v. 16. *Omnis Scriptura divinitus inspirata utilis est ad docendum, ad arguendum &c.*, sed hoc maxime præstat per sensum litteralem, qui faciliori negotio veritatem ostendit, & omnibus idioma nocentibus, & voces apertus est; & licet in aliquibus contextibus obscurus sit, vel illi contextus non deserviunt ad suadendas, & probandas Catholicas veritates; vel collati cum aliis Scripturæ textibus illustrantur, & (ut §. præcedenti diximus) non desunt Theologorum regulæ, & viæ ad illum invenientium; ergo &c.

XV. Dico secundò. Ex sensu mystico, & etiam metaphorico potest Theologus aliquando firmum deducere argumentum, ex accommodatio verò nunquam. Prima pars probatur. Ex eo potest Theologus firmum ducere argumentum, ex quo argumentati sunt Christus, & Apostoli; sed ex sensu mystico argumentati sunt Christus, & Apostoli; ergo &c. Mi. prob. Christus ex serpente æneo exaltato à Moyse Num. 21. arguit, se fore exaltandum in Cruce Joa. 3. v. 14. Ex eo, quòd Jonas tribus diebus, & tribus noctibus fuerit in ventre piscis Jona 2. v. 2. arguit, se fore similiter

in corde terræ. Matth. 12. v. 40. S. Paulus ex eo, quòd Abraham habuit duos filios, Ismael de Ancilla, & Isaac de libera Genes. cap. 16. v. 15., & 21. v. 2. allegoricè arguit ad Galat. 4. v. 22., Deum esse auctorem utriusque Testamenti, veteris, & novi, & patrem duorum populorum, Judæorum, & Gentilium. Ex eo, quòd de Agno Paschali dicitur Exodi 12. v. 46. *Os non comminuetis ex eo*, arguit mysticè S. Joannes in Evang. cap. 19. v. 36. Christo in Cruce non fuisse frangenda crura.

Probatur etiam hoc discursu: ex eo sensu potest firmum erui argumentum, qui est à Spiritu Sancto volutus, & super litteram fundatus; sed talis est sensus spiritualis, & mysticus, ut in exemplis allatis ostensum est: Deus enim Scripturæ auctor nedum voces ad significandum usurpat, sed etiam rebus imponit pro suo libito, ut alia significant. Hinc S. Paulus 1. Corinth. 10. v. 11. Cum præmisisset, Patres veteris Testamenti omnes sub nube fuisse, ait: *hec autem omnia in figura continebant illis: Scripta sunt autem ad correptionem nostram, in quos fines seculorum deveniunt*; & ad Hebr. 10. post longam, & accuratam per plura capita discussionem symbolorum veteris Testamenti respectu novi, intulit hanc causalem v. 1. *Umbram enim habens Lex futurorum bonorum &c.*, utique futurorum in Lege Evangelica, quam figurabat Lex, & in quo persuadendo totus est in illa epistola Paulus.

XVI. Dixi, sensum mysticum aliquando præbere Theologo firmum argumentum: non enim semper ex eo potest firmiter arguere, sed tunc solum, quando constat, eum fuisse taliter à Christo, aut Apostolis usurpatum, vel ex Scriptura colligitur. Cum enim res, in quibus sensus mysticus fundatur, variam habeant similitudinem, & convenientiam, varium etiam, & ancipitem possunt referre sensum mysticum, nisi aliunde constet certò, quem referant; quod certò

con-

constare nequit, nisi ex ipsa scriptura, & exemplo Christi, & Apostolorum. Sic Leo ob sui rapacitatem 1. Petri 5. v. 8. usurpatur ad significandum Diabolum, qui ibi dicitur *Leo rugiens*. Propter suam fortitudinem designat Christum, qui *Apor. 5. v. 5.* dicitur *Leo de Tribu Juda*. Propter suam feritatem adumbrat adversarium quemque, qui *Psal. 16. v. 13.* dicitur *Leo paratus ad iradam*. Et *Psal. 21. v. 22.* *Salva me de ore Leonis*. Ob firmitatem, & constantiam justum designat. *Prov. 28. v. 1.* *Iustus quasi Leo confidens absque terrore erit*. Ergo in sensu mystico, & metaphorico nulla inter probandum, & arguendum vis est faciendi, nisi vel ex contextu, vel exemplo Christi, & Apostolorum constet, quo sensu sit accipiendum.

XVII. At huic resolutioni videtur ob stare D. Thomas, qui hoc *art. 8. ad 1.* dicit, *sensum litteralem, ex quo solo potest trahi argumentum, non autem ex iis, quae secundum allegoriam dicuntur*. Et in corpore articuli dixerat, quodd sensus litteralis est, quem auctor intendit. Ergo ex sensu mystico non potest trahi argumentum.

Respondeo, D. Thomam confirmare potius nostrum assertum, quam destruere: vult enim, quodd ex solo sensu litterali possit trahi argumentum absolute, quia est primò intentus ab Auctore Sacrae Scripturae, nec sensum multiplicem reddere potest; non verò ex sensu spirituali, nisi in quo sensu fuerit ab Auctore Sacrae Scripturae usurpatus confiterit, vel Christi, vel Apostolorum exemplo; vel ex ipso Scripturae contextu. Quod verò ita senserit D. Thomas ostendo. Ex eo enim sensu trahi potest argumentum, quem constat fuisse inditum ab Auctore Sacrae Scripturae; sed D. Thomas ibi ostendit, non solum sensum litteralem, sed etiam spirituales fuisse inditum, & intentum ab Auctore S. Scripturae; dicit enim in *corp. articuli*, quodd *Auctor Sacrae Scripturae est Deus, in cuius potestate est, ut non solum vo-*

ces ad significandum accommodet, sed etiam res ipsas, & quidd significatio, quae res significata per voces iterum res alias significant, dicitur sensus spiritualis; ergo &c.; quia verò non semper certi sumus, quem sensum Sacrae Scripturae Auctor illis rebus accommodarit, ideò non semper, sicut ex litterali, ex eo firmum trahere possumus argumentum, neque ex hoc aliquid deperit Sacra Scriptura (addit S. Doctor ad primum) quia nihil sub spirituali sensu continetur fidei necessarium, quodd Scriptura per litteralem sensum alicubi manifestè non tradat.

XVIII. Secunda vero asserti pars probatur. Cùm enim sensus accommodatus non sit à Spiritu Sancto cum litterali nobis consignatus, nec eum respiciat Auctorem, sed à quolibet interprete pro ingenii sui dexterritate, & arbitrio Sacrae Scripturae accommodatus, & quasi assatus, certum est, nullam ei vim inesse divinam ad res fidei tuendas, & contra impugnantes propugnandas, sed solum humanam. Hinc S. Hieron. lib. 2. in *Matth.* explanans illud *cap. 13.* de fermento, quodd abscondit mulier in farinae satis tribus; postquam similitudinem hanc adorando Trinitatis mysterio adaptasset, subiunxit: *Pius quidem sensus, sed nunquam parabola, & dubia enigmatum intelligentia potest ad auctoritatem dogmatum perducere*; & D. Augustinus *epist. 48. modò 93.* arguens Donatistas, qui Ecclesiam in sola Africa eorum patriâ illèxam, & puram remansisse suadere volebant ex illo *Cant. 1.6.* *Ubi pascas, ubi euber in meridie*. Postquam hujus textus pravam usurpationem varie, & mirè impugnasset, concludit: *Quis autem non impudentissimè nitatur, aliquid in allegoria positum pro se interpretari, nisi habeat, & manifesta testimonia, quorum lumine illustrentur obscura?* Quae verba confirmant etiam observationem à nobis factam pro prima parte hujus asserti, quâ diximus, ex sensu mystico non posse duci argumentum firmum, nisi

nisi constet, illum reverè fuisse rei à Spiritu Sancto accommodatum. Nisi enim id constiterit, hærebimus semper, an ille sensus sit Spiritus Sancti, an noster, an verè spiritualis, an solum accommodatius. Quibus satis instructum hac de re tyronem meum existimo.

§. IV.

Quanam Scripturarum editio deservire possit Theologo ad certè probandas suas conclusiones.

DE variis Sacræ Scripturæ editionibus fusè alibi egimus. Nunc verò pro aliquali tyronis notitia, & regula, ne fortè in arguendo decipiamur.

XIX. Sciat, oportet, autographos, seu originales libros, & primævos veteris Testamenti hebraicè fuisse omnes conscriptos, exceptis Tobie, Judith, Esdræ, nec non Danielis libris chaldaicè primitus datis, & 2. Machab. (juxta S. Hieronymum) græcè primò conscripto.

Autographos, & originales novi Testamenti libros primò datos fuisse, græcè, si tamen excipias Evangelium Matthæi Hebraicà linguà, seu Syriacà, Hebræis tunc vulgari, primis scriptum, sicut & Epistolam Pauli ad Hebræos, licèt Origenes, & Clemens Alexandrinus eam græcè fuisse scriptam autumet. Excipiunt alii Evangelium Marci Romæ, & latinè primò scriptum opinantes: quibus tamen non adhxremus.

XX. Sciat secundò, nos hodie Scripturæ Sacræ autographa, seu originalia habere nulla, sed apographa sola, & exemplaria, variæque editionis diversà linguà, diversis temporibus ortas, quæ ad quatuor istas reducuntur, nimirum ad Hebraicam, Græcam, Latinam, & Vernaculam, seu Vulgarem. Ad Hebraicam reducuntur Chaldaica, Syriaca, & Samaritana. Sub Græca, & Latina conti-

nentur versiones variæ ex illis factæ. Ad Vernaculam verò referuntur Arabica, Æthiopica, Persica, Gallica, Germana, Hispana, Anglica, Italica.

XXI. Editio Hebraica Sacrorum Codicum dicitur illa, quæ à Moyse, & Prophetis litteris scripta fuit Hebraicis, quæque Captivitatis Babylo-nicæ tempore ex integro, (ut aliqui volunt) deperdita; aut (ut alii verius) dispersa, vitata, & corrupta, fuit per Esdræ, vel ex integro edita, vel suæ puritati restituta, sine tamen punctis vocalibus; cùm hæc post S. Hieronymi tempora fuerint addita à Rabbini Tiberiensibus, ut probabilius censent Eruditi. An hæc sit apud nos pura, an vitata; & an levibus, vel gravibus mendis scatens, non disputamus. Authentica tamen nobis dici non potest, quia de illius cum originali conformitate, nullo nobis Ecclesiæ judicio constat.

XXII. Editio Chaldaica, qualis apud nos est, nihil aliud est quàm Divinæ Scripturæ ex Hebraica in Chaldaicam linguam translatio, non de verbo ad verbum, sed de sensu ad sensum; unde paraphrasis Chaldaica vulgò dicitur potius, quàm Versio. Auctores ejus fuisse Rabbini censentur; quoniam evò, an ante, vel post Christum, sub lite est. *Targum* ab Hebræis (hoc est interpretatio) nuncupatur, Baby-lonicum unum, & Hierosolymitanum alterum. Quidquid tamen sit de auctore, de tempore, quo primò prodierit, certum est, eam scatere variis Judæorum fabulis, & Talmudistarum nugis. Utilis tamen esse potest Theologo ad Judæos de Sanctissimæ Trinitatis mysterio, & Venerandæ Incarnationis convincendos.

XXIII. Editio Syriaca, cujus incertus est auctor, tempus, & auctoritas, sic dicitur, quia Syriacis scripta characteribus. Syriaca lingua ex Hebræa prodiit & Chaldaica, tanquam utriusque corruptio: cùm enim Hebræi in Babylonica Captivitate constituti, ut

Chal-

Chaldaicam discerent, paulatim Hebraicam linguam didicerent, factum est, ut nec congruè, & perfectè Chaldaicè, nec Hebraicè amplius, sed linguam mixtam ex Chaldaica, & Hebraica loqui ceperint, quæ Syriacæ dicta est, ficta etiam post Captivitatem Judæis vernacula; quæque Christus fuisse usus, & Apostoli creduntur; & adhuc etiam utuntur Maronitæ in suis sacris ritibus, qui vicos, & pagos per Libanum dispersos hodie incolunt. Est autem hæc editio iudicio Ecclesiæ non fuerit comprobata, & proinde non authentica, utilis tamen esse potest. Primò, ad latinam nostram multis in locis firmandam. Secundò, ad multa ejus obscura, & difficilia penetranda. Et tertio, ad revincendos recentiores hæreticos, quod in titulis capitum mentionem faciat jejuniorum Quadragessimæ, venerationis S. Crucis, commemorationis Defunctorum, & aliorum, quæ tanquam humanas, ac superstitiosas traditiones expuunt Lutherani, & Calvinistæ.

XXIV. Editio Samaritana, quia primitus Hebraicâ linguâ, tunc Hebræis, & Samaritanis communi, etsi characteribus Samaritanis conscripta, ad Hebraicam meritò reducitur. Porro characteres Samaritanos esse Hebræicos antiquos, censet S. Hieronymus in Prologo Galeato; cum Esdræ auctorem habeant characteres novi, quæ hodie utuntur Hebræi. Incerti auctoris est hæc versio, & longè antiquior Christi temporibus, non tamen authentica; quia nondum per Ecclesiam judicata hebraico autographo conformis.

XXV. Versio Græca, licet multiplex sit (ut dicemus) omnium tamen prima censenda illa est, quam curante Ptolomeo Philadelpho Rege Ægypti lxx. Interpretes ediderunt. De qua fusè alibi dicimus: ducentis, & quinquaginta circiter annis ante Christum edita creditur. Eâ usâ est Ecclesia in suis initiis per sexcentos circiter an-

nos, & hodie utitur Ecclesia Græca; imo eâ usos fuisse Apostolos, & Evangelistas, censent Eruditi. Propterea esto non sit habenda, ut authentica, quia Ecclesiæ iudicium eam declarans autographo hebraico conformem non accessit, magna tamen in veneratione habenda est, utpote variis SS. Patrum commentariis illustrata, & ad vulgaræ nostræ plures locos elucidandos summopere utilis.

XXVI. Post hanc lxx. Interpretum versionem aliæ, quarum tamen nobis nonnisi fragmenta remanserunt, nimirum Aquilæ, Theodotionis, Symmachî, Anonimæ duæ, Origenis, & S. Luciani, & Hesichii, recensentur.

Primam edidit Aquila genere Ponticus, primò Christianus, sed quia astrologiæ judiciariæ nimium vacaret, ejectus ab Ecclesia, ex Christiano factus Judæus, & irruens in lxx. Interpretum versionem, aliam à sui cerebro Sacrorum Codicum depromere aggressus est, in qua vaticinia de Christo quoad posset, subverteret, quam reipsâ edidit circa annum Christi 130., de quo S. Epiph. *l. de ponderibus, & mensuris*, Euseb. *bist. lib. 5.*, & Baronius *ad ann. Christi 130.*, unde hæc versio repudianda est.

Secundam adornavit Theodotion Ephesinus, Tatiani hæretici primò discipulus, deinde Marcionis Sæctarius; tandem Judæus factus, eâ lege, ut vetus Testamentum, & novum græcè redderet; quod & præstitit circa annum Christi 184., multa addens, multa etiam minuens; quem inter Judæizantes hæreticos rejicit S. Hieronymus *prologo in Job*. Ex quibus vides quanti faciendâ sit ejus versio. Consultæ Bæron. *ad ann. Christi 184.*

Tertiam lucubravit Symmachus circa ann. Christi 200. Is genere Samaritanus, cum à sua gente nil honoris sibi deferri videret, transivit ad Judæos; deinde ex Judæis ad Christianos, demum Ebionis Sæctarius factus, suam versionem, non verbum ex verbo, sed sententias ex sententiis sreddens

dens (ut ait S. Hieron. in c. 36. *Jerem.*) adornavit. Confuli possunt Hieron., Baronius, Philastrius, & Myræus. Hæc versio suspecta haberi debet.

Quarta, auctoris anonymi, Hierichuntina dicitur, quia in quibusdam foliis apud Urbem Hiericho, anno Imperii Caracallæ 7. reperta, teste S. Epiphanio.

Quinta, ignoti pariter auctoris, Nicopolitana nuncupatur, quia in folio similiter infulsa apud Nicopolim reperta, Imperante Alexandro Mammææ filio.

Sexta, est Origeniana, auctorem habens Origenem, quæ potius quam versio, præcedentium versionum collectio dicenda est. Selegit namque Origenes quatuor præcipuas versiones, quæ suo tempore exstant, nimirum septuaginta Interpretum (quam ipse variis in locis nunc mutaverat, nunc corruperat, nunc emendaverat) Aquilæ, Symmachi, & Theodotionis, easque in unum volumen redegit quatuor distinctis columnis, ita ut omnes eodem aspectu videri possent, & versus versibus, periodi periodis responderent, quas vocavit ab illis quatuor columnis *Tetrapla*, ut totat S. Hieronym. *epist.* 89. Postmodum his quatuor editionibus, & columnis e regione præposuit Hebraicam, idque duabus columnis, quarum prima continebat textum hebraicum litteris hebraicis scriptum, altera verò eundem, sed litteris græcis exaratum; cumque hoc opus sex columnas exhiberet, vocavit *Hexapla*. Tandem his sex editionibus, & columnis adjecit alias duas græcas editiones, duabus columnis distinctas, nempe Hierichuntinam, & Nicopolitanam; cumque jam octo essent columnæ, vocavit *Octapla*. Hujusmodi tamen Octapla ab Hexaplis non distinguunt Eusebius, & Hieronymus: imò S. Epiphanius *lib. de pond.*, & *mens.* loquitur de Hexaplis, ut de opere ab Octaplis indistincto.

Sepimana, est versio S. Lucianum Martyrem auctorem referens, qui cum

videret Sacros Codices corrupti, & in pravum sensum detorqueri, eosdem ad fidem Hebraici textus emendatos reddidit; quam editionem S. Athanasius sub Constatino propriâ Luciani manu descriptam, Nicomedie repertam fuisse refert. Vide Baron. *ad an. Christi* 237.

Octava, Hefychium pareniem habuit Præbyterum, quæque in usu erat Alexandria, & in tota Ægypto recepta, atque probata. Hæc sunt præcipuæ versiones græcæ.

XXVII. Ad Latinas transeamus. Tot erant temporibus Sancti Augustini versiones latinæ, ut ipse dixerit, eos, qui Scripturas Sacras ex hebræo verterunt in græcum, numerari posse; eos verò, qui in latinum, non posse. Inter has tamen omnes, etsi numero multas, duæ magnam in Ecclesia venerationem sunt consecutæ. Una antiqua, incerti auctoris opus, quam *Italiam*, eò quod latinam, vocat Sanctus Augustinus. *Communum* S. Hieronymus. *Vetrem* Sanctus Gregorius. *Vulgatam* Orosius, & cum isto *Vulgatam* Universus Christianus Orbis, quia illius ubique frequentissimus in Ecclesia usus. Altera nova post hanc Italiam à S. Hieronymo data, qui iussu Damiani Romani Pontificis vetus Testamentum ex hebræo latinum fecit, & novum à mendis purgando, græcæ fidei reddidit: *Novum Testamentum græcæ fidei reddidit; Vetus juxta hebraicum translulit*, inquit ipse S. Doctor in fine sui de Scriptoribus Ecclesiasticis Libro. Evulgatâ D. Hieronymi versione, contentio orta fuit in Ecclesia, quænam esset præferenda. Augustinus pro Italâ, quia (ut agebat) verborum erat tenacior cum perspicuitate sermonis. Et Sanctus Isidorus pro nova S. Hieronymi dimicabat. Non longè post S. Gregorij tempora, constata est una, quæ nec ex toto antiqua, nec ex toto nova, sed vulgata communis diceretur; non quia mixta ex libris antiquæ, & novæ, sed quia libri nonnulli in ea leguntur eo modo, quo in antiqua, & alii eo modo, quo in nova.

va. Et hæc est hodierna vulgata nostra, quam multorum seculorum usu in Ecclesia receptam, tandem Concilium Tridentinum declaravit authenticam *Decreto de edit.*, & *usu Sacror. Libr.* sanciens, ut pro authentica habeatur, & ut eam nemo, quovis prætextu rejicere audeat, vel præsumat.

Vernacula tandem scripturæ versio, dicitur illa, quæ vernaculâ, seu vulgari populi, vel nationis linguâ conscripta est. Ex orientalibus præcipuæ sunt, Arabica, Ethiopica, Persica; & ex Occidentalibus variæ editæ, sive à Catholicis, sive ab Hæreticis, de quibus suo loco diximus, nulla tamen ex his habenda est, ut authentica; & si hæreticorum opus sint, rejiciendæ tanquam saltem suspectæ.

Circa versiones vulgares, duo sunt ab Ecclesia sancita. Primum ne in publico Ecclesiæ usu, præsertim in Missa, legantur. Id constat ex Tridentino sess. 22. cap. 8. de Sacrificio Missæ dicentis: *Esti Missa contineat magnam populi fidelis eruditionem, non tamen expedit ut visum est Patribus, ut vulgari passim linguâ celebraretur.* Alterum ne omnibus indiscriminatim legi permittantur, cum juxta quartam Indicis regulam à Pio IV., Sixto V., & Clemente VIII. Summis Pontificibus approbatam: *experimentum manifestum sit, plus inde detrimenti, quam utilitatis oriri, ob hominum temeritatem.* His itaque præmissis, ad rem præsentem.

XXIX. Dico. Ex sola vulgata latina versione potest Theologus tutum, ac firmum ducere argumentum. Constat ex dictis. Ex ea enim sola Sacræ Scripturæ versione potest Theologus firmum ducere argumentum, quam sibi constat, exprimere verba, & sensus ut à Deo dictatos, & continere reipsâ Verbum Dei; sed de sola vulgata latina id conitat, hæc enim longo seculorum usu probata sunt; de hac etiam Ecclesia, ad quam ut potè colum-nam, & firmamentum veritatis, cuiusque Spiritus sanctus promissus à Chri-

sto infallibiliter affuit, docens eam, omnem varietatem pertinet judicium ferre de Verbo Dei, separando verum Dei Verbum à falso, sententiam tulit; ergo &c. de aliis enim, sive versionibus, sive textibus originalibus nihil locuta est; ergo &c.

Argumenta hæreticorum contra vulgatæ latinæ puritatem à nobis alibi proposita, & soluta sunt; hic enim authenticitas vulgatæ nostræ supponenda est, non probanda.

XXX. Adverte tamen, Tridentinum statuens, vulgatam latinam esse authenticam, & pro tali eam omnibus proponens, noluisse infirmare auctoritatem textuum originalium, Hebraici & Græci, quia cum de istis mentionem ullam non fecerit, eos reliquit in sua auctoritate, quæcumque illa sit: sed solum vulgatam cæteris latinis versionibus prætulisse. Quia tamen nulla Scriptura habenda est, pro puro Dei Verbo, & ut authentica, nisi ab Ecclesia talis sit declarata, & Ecclesia de fontibus Hebraicis, & Græcis nihil statuerit: ideo à nobis ut authentici habendi non sunt, nec ex iis firmum argumentum trahendum, nisi in iis, in quibus cum vulgata concordant. Utiles etiam esse possunt versiones vernaculæ ad arguendum contra eos, qui illis utuntur: ut si ad convincendum Calvinistam, utaris versione Diodati, aut alterius, quem ille sequatur. Ad convincendum Lutheranum versione Lutheri. Anabaptistam versione Munsteri; & sic de aliis. Quibus satis expensus minet primus, ac præcipuus locus Theologicus.



DUBIUM III.

De Loco à Traditionibus.

§. I.

Quid, & quotuplex sit Traditio Sacra.

Traditiones, seu Verbum Dei non scriptum, sed orētens traditum Ecclesiæ per Apostolos, reverà admittendas esse hîc supponam; eas enim probare alterius loci erit, cùm hic de ipsis tantùm quærendum sit, quale argumentum possint Theologo suppeditare. Attamen ne prorsus jejunum dimittam meum Candidatum, aliqua (raptim tamen) indicabo.

I. Traditio ergo sumi potest latissimè, minùs latè, & strictè. Traditio latissimè est omnis doctrina tradita, idest communicata ab uno alteri, sive voce, sive scripto. Sic Lex antiqua, tradita Moyse à Deo, & à Moyse tradita Josuè, à Josuè Senioribus, licèt scripta, tradita dicitur, *Exodi 17. vs. 14. Scribe hoc ob monimentum. in libro, & trade auribus Josue.* Traditio minùs latè, ut scilicet abstrahit à Sacra, & Prophana, est quæcumque notitia, quæ sine scripto de aure in aurem per majores nostros ad nos pervenit, qualia sunt gesta majorum nostrorum, quove in sepulchro iaceant eorum ossa, quamvis nihil scriptum habeamus. Stricta denique traditio, & theologicè spectata, nimiràm sacra, de qua hic unicè agimus, nihil est aliud, quàm fidei, aut morum doctrina, non scripta, sed vivà voce, quasi de aure in aurem successivè usque ad nos perveniens, qualis est ea, quæ multa credimus, quamvis nullibi, saltem expressè, in Verbo Dei scripto legamus; ut Beatam Mariam etiam post partum virginem perpetuè fuisse; parvulos esse baptizandos; & talis est omnis illa, de qua Chryso-

stomus hom. 4. in 1. ad Thessalonicenses: *Est traditio, inquit, nihil quæras amplius, & quas Paulus Thessalonicensibus epist. 2. cap. 2. vs. 15. commendat dicens: tenete traditiones, quas didicistis, sive per sermonem, sive per epistolam nostram.*

II. Traditio ergo sic accepta considerari potest, vel ex parte auctoris, & sic dividitur in *Divinam, Apostolicam, & Ecclesiasticam.* Vel ex parte materiæ traditæ, & sic dividitur in traditionem *de fide, & traditionem de moribus.* Vel ex parte ejus, cui traditur, & sic dividitur in *universalem*, quia traditur Ecclesiæ universali, & in *particularem*, quia traditur tantum Ecclesiæ particulari. Vel ex parte durationis, pro qua traditur, & sic dividitur in *perpetuam*, quæ traditur pro semper, & in *temporaneam*, quæ solum traditur ad certum tempus. Vel denique ex parte modi, quo traditur, & sic dividitur in *necessariam*, quæ necessariò servanda est, cùm sit per modum præcepti instituta; & in *liberam*, quæ per modum consilii lata, ad libitum observari, & non observari permissa est.

III. Traditio ergo divina est Verbum Dei non scriptum, sed traditum, seu Doctrina Dei in Sacris Litteris non scripta, sed à Deo immediatè majoribus revelata, & à majoribus ad posteriores quasi de aure in aurem successivè tradita. Talis fuit, ante Legem à Moyse scriptam, seu in Lege naturæ, doctrina de mundo isto à Deo creato; de remedio adhibendo pro originali delendo peccato, de ritibus, quibus tunc colebatur Deus; cùm enim eo tempore Doctrina Dei non esset scripta, regebantur homines doctrinà à Deo traditâ, & de aure in aurem communicatâ.

Talis fuit, post Legem scriptam, & ante Christum, doctrina de divinitate librorum sacrorum; de remedio pro delendo originali peccato in feminis; de præfigurata Christi morte per cruentâ sacrificiâ; & alia, quæ scripta

pta non erant, & tamen ut à Deo dicta habebantur.

Talis est adhuc hodie in Lege Christi novà Doctrina de perpetua Deiparæ Virginitate; de parvulis ante usum rationis baptizandis; de non rebaptizandis hæreticis; de septenario Sacramentorum numero; de SS. invocatione; de Sacrarum Imaginum cultu; aliæque similes, vel Fidem, vel Sacramentorum materias, & formas spectantes, quæ in scripturis non exprimuntur, & tamen à Christo dictæ creduntur.

IV. Traditio Apostolica, alia est purè Apostolica, alia est Apostolico-Divina. Prima est, quæ ab Apostolis primò non scripto emanavit, sed vivà voce, & per manus ad nos usque perflua est. Hujus generis sunt Quadragesimæ institutio; observatio diei Dominicæ loco Sabbati; & similia, quæ continuè observata dicuntur, & ab Apostolis tanquam Ecclesiæ Pastoribus instituta creduntur, Spiritus Sancti institutu in bohum Ecclesiæ, & vivà voce fidelibus suis præscripta, & ad nos per seculorum successiones transfusa.

Altera, nimirum traditio Apostolico-Divina est illa, quæ ab Apostolis fuit quidem Ecclesiæ tradita, at non proprio nomine, sed nomine Christi, & tanquam Christi præconibus. Christus enim ante, vel post Resurrectionem, dum per 40. dies apparens eis loqueretur de Regno Dei, ut habetur *Act. 1. v. 3.*, multa creditur vivà voce tradidisse, quæ scripta non sunt, ut ea suo nomine Ecclesiis prædicarent. Et hujusmodi traditionum species est solum denominativè Apostolica, & reipsà divina; sicut verbum. Legati enunciantis, & tradentis verbum Regis, est denominativè solum verbum Legati, sed reverà verbum Regum.

Fundamentum distinguendi hanc duplicem traditionum Apostolicarum speciem habemus, ex ipso Paulo: dum enim *1. Cor. 11. v. 23.* dixit: *Ego ac-*

cepi à Domino, quod & tradidi vobis; indicavit, se loqui, & tradere, non proprio nomine, sed Christi, ut ejus præco, & legatus. Sicut cum *ibid. c. 7. v. 10.* ait: *præcipio, non ego, sed Dominus.* Dùm verò *ibi v. 11.* inquit: *Nam cæteris ego dico, non Dominus*; sicut cum *1. Thessalon. cap. 2. v. 14.* ait: *state, & tenete traditiones, quas didicistis, sive per sermonem (idest vivà voce) sive per epistolam nostram.* (idest scripto) innuit, se loqui nomine proprio.

V. Traditio Ecclesiastica propriè dicitur illa, quæ, nec à Christo, nec ab Apostolis, sed postea ab Ecclesiæ Prælati, vel Populis introducta, tandem per modum legis, seu potius consuetudinis, tacito sibi succedentium fidelium usu recepta, & ad nos usque delata est. Tales sunt observatio, & solemnitas quarundam festivitatum; abstinentia à carnibus, ovis, & lacticiis certis anni diebus; Pia, & laudabilis formandæ Crucis consuetudo; pius aquà lustrali aspergendi mos; Aliæque huiusmodi ad ritum, & ceremonias spectantia.

VI. Traditio fidei, seu ad fidem pertinens, est doctrina fidei, non scripta, sed vivà voce à Deo tradita. Hac viâ, ut fidei dogma, credimus, præter alia supra assignata ad traditionem divinam spectantia; Quòd Scriptura Sacra, quæ utitur Ecclesia Catholica, sit verè divina; Quòd quatuor sint Evangelia, nec plura, nec pauciora; Quòd baptizati ab hæreticis non sint rebaptizandi; & similia.

VII. Traditio morum, seu mores, ac ritus spectans, est doctrina quædam primitus, non scripto, sed voce tradita, & succèssivè pro dirigendis, & formandis moribus, & ritibus traducta; qualis est de jejuniorum observantia certis diebus; de majorum Festorum celebratione; de benedictione, & asperzione Aquæ; de formando in fronte Crucis Signo &c.

VIII. Traditio perpetua illa dicitur, quæ ab initio instituta fuit, ut sem-

recepta, potest Theologus tunc argu-
 „nuerari. Si enim (inquit Canus *lib.*
 „3. *loc. Theol. cap. 5.*) Apostolus Pau-
 „lus Ecclesiæ consuetudinem Corin-
 „thiis contentiosus opposuit 1. Cor. 11.
 „v. 16. : Cur nos itidem Ecclesiæ mo-
 „rem, ab Apostolis uique receptum,
 „totque secularum usu, ac gentium
 „consensione probatum, non oppone-
 „mus hæreticis (Lutheranis, & Cal-
 „vinistis) cum à nobis Scripturam
 „in cuiusque rei confirmationem ef-
 „flagitant? Certè Paulus, cum & per
 „scripturas, & per naturæ rationem
 „satis dixisse videretur, ad ejus rei
 „fidem faciendam, quam Corinthiis
 „persuasam esse cupiebat, conside-
 „rans tamen, inter Corinthios fore
 „quosdam, qui illiusmodi fortè, &
 „testimoniis, & rationibus repugna-
 „rent: non aliud potius argumentum
 „ad causam vincendam habuit, quam
 „si eos ad Ecclesiæ morem revocaret:
 „Si quis, ait, videtur contentiosus es-
 „se, nos talem consuetudinem non ha-
 „bemus, nec Ecclesiæ Dei. Quod di-
 „cit tale est. Si quis adèd est durus,
 „& pertinax, ut argumentis positis
 „non adducatur, sed adhuc conten-
 „dat, seminam aperto capite orare
 „oportere: hunc ego non aliter re-
 „fello, quàm quòd Ecclesiæ Dei con-
 „suetudinem non habent. Tanta vis
 „in traditione est, ut quos nec scri-
 „pturæ, nec naturæ ratio movisset,
 „eos Paulus existimavit, Ecclesiarum
 „more, & instituto movendos. Hæc
 „Canus. Quòd si (dicam ego) tanta
 „vis consuetudinis Ecclesiæ in rebus ad
 „merum ritum spectantibus, ut erat
 „seminam non debere aperto capite o-
 „rare, quantò major erit in rebus fi-
 „dem spectantibus? Prosequitur Canus.
 „In priore rursus ad Timotheum *epist.*
 „cap. 6. v. 3. Si quis, ait, aliter do-
 „cet, & non acquiescit sanis Sermo-
 „nibus. Non dicit Scripturis. Et ad
 „Galat. 1. v. 9. Si quis vobis evange-
 „lizaverit, præter id, quod acceperitis,
 „anathema sit. Quibus ex locis re-
 „fle Origenes in commentar. ad Ti-

„tum (his commentariis caremus,
 „sed refertur locus in *Apolog. Pam-*
 „„phili) definit hæreticum eum, qui
 „se Christo credere profitetur, & a-
 „liud de veritate Fidei Christianæ
 „credit, quàm habeat traditio Ec-
 „clesiastica. Et *lib. 1. Periarcon.* . . .
 „illa sola credenda est veritas, quæ
 „in nullo ab Ecclesiastica traditione
 „discordat. Prosequatur studiosus le-
 „ctor, quæ laudatus Canus ibi subjun-
 „get, ne videamus, diutius in hoc im-
 „morantes, ab instituto nostro desle-
 „dere, qui traditiones non statuere in-
 „tendimus, sed iis suppositis probare
 „solum, posse firmum ex iis trahi ar-
 „gumentum.

XXI. Hoc usque adèd verum est,
 „ut præcitatus Canus *lib. 3. laudato c.*
 „3. dixerit: Quòd ad confutandos
 „hæreticos major vis in traditione,
 „quàm in scriptura sit. Egesippus e-
 „nim apud *Eusebium lib. 3. Hist. Eccl.*
 „c. 32. refert, virginem, mundam,
 „& immaculatam Ecclesiam perman-
 „sisse, donec Discipuli Domini extin-
 „terunt . . . ut verò omnis illa ætas,
 „quæ à Domino susceperat vivæ vo-
 „cis auditum; de hac luce discessit,
 „tùm hæreticos, nudatò, ut ajunt,
 „capite, Apostolicam Veritatem op-
 „puisse. Et Ignatius apud eundem
 „cà maximè ratione docet, hæreti-
 „corum vitari contagia, si diligen-
 „tius, ac tenacius Apostolorum tra-
 „ditionibus inhæreant. Tertullianus
 „quoque adhuc apertius monet *lib. de*
 „„*prescript. heret.*, ut, adversum hæ-
 „reticos, magis traditionibus, quàm
 „scripturis differamus. Scripturæ e-
 „nim in varios sensus facillè trahun-
 „tur, traditiones non item. Nemo
 „hæreticorum est, ut Hilarius ad
 „Constantium Augustum tradit, qui
 „se non secundum Scripturas prædi-
 „care ea, quibus blasphematur, men-
 „tiatur. Omnes Scripturas sine sensu
 „loquantur. Et Irenæus *lib. 1. cap. 1.*
 „Hæretici, inquit, scripturis nitun-
 „tur, sua dogmata confirmare, ne
 „sine teste esse videantur, sed desor-
 „„mant

„mant eloquia Dei, atque ex figura ho-
 „minis, vulpis, aut ursi figuram red-
 „dunt. Hactenus ille. Faciunt porro
 „hæretici, quod Patrem suum fecisse
 „vident, ut Vincentius Lirinensis e-
 „legantè ait, & Auctoris sui calli-
 „da machinamenta festantur. Nam
 „quid ille non faciet misellis homini-
 „bus, qui ipsum Dominum Majesta-
 „tis Scripturarum testimoniis appeti-
 „vit? Si Filius, inquit, Dei es, mit-
 „te te deorsum, Scriptum est enim &c.
 „Ità quodcumque dogma hæreticus
 „proferat, statim ait, scriptum est
 „enim, & non unum, sed mille te-
 „stimonia, mille exempla parat de
 „Lege, de Psalmis, de Apostolis, de
 „Prophetis, quibus novo more inter-
 „pretatis, sententiam suam approba-
 „re conatur. Hæc Canus, qui ulte-
 „rius prosequitur ostendendo, etiam
 „omnem sermè cum hæreticis dispu-
 „tationem, ad traditiones à majo-
 „ribus acceptas, esse referendam.
 „Nam, cum utrique, & Catholici,
 „& Hæretici pro sua sententia quis-
 „que Sacras Litteras referant, in sen-
 „su, & interpretatione discrimen est.
 „Quis autem verus, & legitimus Scri-
 „pturæ sensus habendus sit, nisi Eccle-
 „siæ traditione cognosci certò non po-
 „test..... Atque hinc patet causa
 „gravissima, cur traditiones Aposto-
 „lorum fuerint necessariæ. Sensus
 „enim Scripturarum Apostolicarum
 „non erat ab Apostolis scripturis a-
 „liis explicandus, nisi in opera sua
 „ederent commentarios, quod à viris
 „gravissimis semper alienum fuit. In-
 „telligentiam ergo Scripturæ Sacræ
 „Discipulis suis vivà voce tradide-
 „runt &c. Ità Canus, quo melius ne-
 „mo.

XXII. In eruendis tamen ex tra-
 ditione argumentis, advertere debet
 Theologus, qualis sit traditio. Quòd
 nempe sit perpetua, non temporanea;
 universalis, non particularis; neces-
 saria, non libera. Unico verbo: quòd
 de illa verificetur esse id, quod ab omni-
 bus, quod ubique, quod semper tradi-

Toni. I.

tum est. Si enim velles probare, Pascha
 esse celebrandum lunà 14. Martii; quia
 olim existimata fuit traditio Aposto-
 lica, à S. Joanne Evangelista hausta;
 dandum esse Regnum millenarium.
 Christi post universalem resurrectio-
 nem; hæreticos fore rebaptizandos,
 quia olim traditio fuit; pessimè con-
 cluderet, quia assumeret traditiones
 ab universa Ecclesia, nedum non ac-
 ceptatas, sed expressè reprobatas. Si-
 militer si argueres, Baptismum conse-
 crandum esse per trinam immersionem;
 abstinendum esse à suffocato, & san-
 guine, quia sic Apostoli tradiderunt;
 non bene argueres, quia traditio hæc
 non fuit perpetua, & pro omni tem-
 pore, sed solum ad certum tempus.
 Sicut etiam si probare velles, Sabba-
 to esse jejunandum, quia sic, ex tra-
 ditione Sancti Petri, Ecclesia Roma-
 na jejunabat; non bene argueres;
 quia hæc erat traditio particularis;
 nec perpetua, cum hodie nec Roma-
 na Ecclesia Sabbato jejundet amplius.

DUBIUM IV.

De Loco ab Ecclesia.

§. I.

De Ecclesiæ definitione.

Ecclēsiā verā Catholicā Chri-
 sti Sponsā; hoc est Cētum, &
 Congregationem Fidelium, re-
 verà dari, alibi probabimus, hīc ta-
 men supponimus; ubi solum quæri-
 mus, quantæ firmitatis sit argumen-
 tum, ex ejus auctoritate petitum. Pro
 claritate tamen.

I. Sciendum primò Ecclesiā tri-
 pliciter sumi posse. Primò, pro loco
 materiali, in quo homines congrega-
 ri solent, de quo locutus est Chri-
 stus, dū ait *Matth. 11. v. 13. Domus*
mea domus Orationis vocabitur. Secun-
 dò, pro aliqua locali fideliū con-
 gregatione, de qua Paulus *1. Cor. 11.*
v. 18. Primum quidem convenientibus

P

200

vobis in Ecclesiam, audio scissuras esse inter vos, & ex parte credo: & v. 22. Aut Ecclesiam Dei contemnitis, & confunditis eos, qui non habent? Sumitur tertio, pro fidelium cœtu, ac societate, abstrahendo à locis, in quibus ejusmodi societas reperitur, & de ea in hoc sensu loquitur Apostolus ad Galatas scribens cap. 1. v. 13. super modum persequabar Ecclesiam Dei, & expugnabam illam. Quod repetit 1. Cor. 15. v. 9., ad Philipp. 3. v. 6., & de qua Christus ipse Matt. 18. v. 17., dicit (inquit) Ecclesia: si autem Ecclesiam non audierit, sit tibi sicut Ethnicus, & Publicanus. De Ecclesia ergo in hac tertia acceptione loquimur.

II. Sciendum secundò, Ecclesiam hoc modo acceptam, si nomen species, esse vocem græcam, quæ latine reddita significat Cœtum, Convocationem, venitque à verbo græco *eccaleo*, idest latine *evoco*, *convoco*. Quare, ut advertit Bellarm. lib. 3. de Ecclesia militante cap. 1. Ecclesia dicitur cœtus vocatorum, quia nemo ad hunc populum se adjungit per se, & suo proprio instinctu, sed omnes quotquot veniunt, à Dei vocatione præveniuntur. Quos vocavit (ait Apostolus Rom. 8. v. 30.) *hos*, & *justificavit*: Est enim vocatio primum beneficium, quod Sancti à Deo recipiunt. Hinc toties idem Apostolus Christianos appellat *Vocatos*, ut Rom. cap. 1. v. 6. & 7., 1. Cor. 1. v. 2. & 9., & alibi. Quare D. Augustinus perpendens Pauli verba, Rom. 1. v. 1. *Paulus servus Jesu Christi*, vocatus Apostolus, segregatus in Evangelium Dei (expositione inchoata in epist. ad Romanos) Ex illis colligit discrimen Ecclesiæ à Synagoga, dicens: breviter in duobus verbis Ecclesiæ dignitatem in Synagoga vetustate discernit: Ecclesia quippe ex vocatione appellata est, Synagoga verò ex congregatione. Convocari enim magis hominibus congruit, congregari autem magis pecoribus, unde greges propriè pecorum dici solent, quia in veteri Lege temporarium promissionum terreno cibo ho-

mines erant contenti, & brutorum more solo timore moverentur, & in officio continerentur.

III. Si verò Ecclesiæ naturam species, variè definitur nedum ab Hæreticis, sed etiam à Catholicis. Hæretici namque hodierni, qui solos justos, imò & solos prædestinatos intra Ecclesiam concludunt (ut suo loco dicetur) dicunt, Ecclesiam esse cœtum Sanctorum, Justorum, & Prædestinatorum. Ità olim Wicleffus, quem in substantia secuti sunt Lutherus, & Calvinus. Ex Catholicis verò juvenin differt. 4. de Locis Theolog. cap. 2. definit Ecclesiam, quòd sit: Cœtus Sanctorum sub uno Capite Christo Deo servientium. Verùm hæc definitio videtur describere solam Ecclesiam Triumphantem in Cœlis, vel Ecclesiam abstrahentem à triumphante, & militante; non verò Ecclesiam militantem, de qua hic sermo est. Melius ergo ab aliis definitur, quòd sit *Fidelium cœtus*, sub uno Capite Christo, fidei unionem, & Sacramentorum participationem coadunatus. Cui alii addunt, & gubernatus à legitimis Pastoribus, præcipue verò ab uno Christi in terris Vicario Romano Pontifice. Quæ definitio, ut ait Bellarminus citato loco cap. 2., tres continet partes. Nimirum veræ Fidei professionem sub Christo Capite, quæ excludunt omnes Infideles, qui nunquam fuerunt in Ecclesia, ac Judæi, Turcæ, Pagani; & qui fuerunt, & recesserunt, ut Hæretici, & Apostatæ. Rursus Sacramentorum participationem, quæ excluduntur ab Ecclesia Cathecumeni, qui nondum sunt admissi, & Excommunicati, qui ab Ecclesia sunt dimissi. Et denique subjectionem ad unum Christi Vicarium, quæ excluduntur Schismatici, qui habent Fidem, & Sacramenta, sed non subduntur legitimo Pastori Vice Christi, & idem foris proficiuntur Fidem, & Sacramenta percipiunt. Includuntur verò omnes alii, etiam si Peccatores, ac Reprobi, dummodò tamen veram Christi Fidem profiteantur,

tur, in Sacramentis communicent, & legitimum Pastorem loco Christi agnoscant; Sed de his suo loco.

IV. Solum in præfens observandum cenfeo, nomine Ecclesiæ non intelligi Catholicorum quorumcumque coadunationem præcisè, sed etiam, imò & præcipuè, Principes, & Pastores ipsos Ecclesiasticos, in quibus scilicet hujus Reipublicæ auctoritas residet, juxta illud præclarum Aristotelis effatum *Ethic. 9. cap. 9. Civitatem maximè esse, quod est in ea principale*. Inde enim, quæ Principes, ac Gubernatores Civitatis faciunt, & sentiunt, ea Civitas facere, sentireque dicitur. Hinc Moyses expositurus mandata Domini *Exod. 19. v. 7. Convocatis majoribus natu populi, exposuit omnes sermones, quos mandaverat Dominus*, deinde populus respondit. Similiter Salomon, ut deferret Arcam Domini in Templum à se extructum. *3. Regum 8. vers. 1., congregavit omnes majores natu Israel cum Principibus Tribunalium, & duces familiarum filiorum Israel, & inferiis v. 14. dicitur: Convertitque Rex faciem suam, & benedixit omni Ecclesiæ Israel; omnis enim Ecclesiæ Israel stabat*. Christus enim Ecclesiam non penes Populares principaliter esse voluit, sed penes Sacerdotes, ac Pastores, quidquid in contrarium obtreperant hæretici. Unde Sanctus Cyprianus *epist. 69. ad Florentium, est, inquit, contumax, ac superba obaudire volentium multitudo discedat; Ecclesiæ tamen à Christo non recedit; & illi sunt Ecclesiæ plebs Sacerdoti adunata, & Pastori suo Grex adharens*. Unde scire debes, Episcopum in Ecclesiâ esse, & Ecclesiam in Episcopo: et si qui cum Episcopo non sit, in Ecclesiâ non esse; & frustra sibi blandiri eos, qui pacem cum Sacerdotibus Dei non habentes obrepunt Græc., his præhabitis.

§. II.

Resolutio dubii.

V. Dico primò. Ab auctoritate Ecclesiæ Catholicæ potest Theologus firmum sumere argumentum. Prob. primò, nam Ecclesiæ fides deficere non potest: Est enim Sponsa Christi per fidem, sicut scriptum est *Osea 2. v. 10., & sponsabo te mihi in fide*: Quod si Ecclesiæ fides deficeret, jam sponsi, & sponsæ matrimonium dirimeretur, quorum indissolubilis est, & perpetua conjunctio: *sponsabo te (ait Oseas v. 19.) mihi in sempiternum*. Ideò sponsa *Cantic. 3. v. 4. tenui eum, nec dimittam*. Et Christus *Mattb. ult. postquam v. 19. dixit Apostolis, cunctes ergo docete omnes gentes*. Et *v. 20. docentes eos servare omnia quacumque mandavi vobis, promisi, se illis nunquam in talimunere defuturum: Ecce ego vobiscum sum omnibus diebus usque ad consummationem sæculi*.

VI. Hinc præcluditur vana quorundam explicatio dicentium, Christum futurum quidem semper Ecclesiæ præsentem, ne unquam vera illi fides, & charitas desit: posse tamen Ecclesiam rem aliquam ignorare, putà credere ut revelatum id, quod à Deo non est revelatum; in quo casu Ecclesiæ fidem non amitteret, sed solum erraret, error autem inculpabilis, & probabilis fidem Ecclesiæ non excluderet.

Præcluditur inquam: qui enim promisit, Apostolis docentibus servare omnia, quæ ipse mandavit, omnibus diebus se adfuturum, & usque ad consummationem sæculi Successoribus eorum, promisit eis, & eorum Successoribus talem firmitatem in docendo, ut nedum à fide vera recederent, non possent ex pertinacia, sed neque ex ignorantia, docendo ut à Christo mandatum, & revelatum id, quod ab ipso, nec mandatum est, nec revelatum. Rursus Ecclesiæ Corpus Christi est,

est, ut docet Apostolus Ephes. 4., & 5., Christus autem hujus Corporis caput est, ipsum gubernans, ac regens; ergo si Ecclesia erraret, error iste in Caput refunderetur. Quid si in casu, quo Ecclesia à fide deficeret, deficeret etiam Christi promissio, cur hæc pariter non deficeret, si Ecclesia per errorem deficeret à veritate? Nullo ergo pacto, nec fidem amittere, nec in fide errare potest Ecclesia. Nam spiritus veritatis est hujus corporis anima. *Unum* (inquit Paulus Ephes. 4. v. 4.) *corpus, & unus spiritus*. Spiritu veritatis Ecclesia agitur: ergo ad nullum errorem, ne inciens quidem, moveri potest.

VII. Scio, hæreticos hunc discursum duplici viâ eludere conari. Primum ejusmodi promissionem ad solos Apostolos referri, nec ad posteros in Ecclesia pertinere. Secundò, hanc promissionem factam fuisse, non omnibus Apostolis conjunctim sumtis, sed singulis seorsim Apostolis, Discipulis, & Fidelibus.

Sed omnino futiliter. Quid enim aliud indicant verba, quæ post promissum spiritum veritatis subjungit Christus Joann. 14. 16., *ut maneat vobiscum in æternum*. Quid ista jam relata, ex Matt. c. ult. *Ecce ego vobiscum sum omnibus diebus usque ad consummationem sæculi*? Nunquid Apostoli mansuri erant in æternum? Nunquid vitam protrahuri usque ad consummationem sæculi? Alloquebatur ergo Apostolos quidem, sed in Apostolis totam Ecclesiam, quæ erat, & quæ futura erat, huic promittens spiritum veritatis. Quod Christus ipse expressit, dum Joann. 17. v. 20. ait, *non pro eis autem rogo tantum, sed & pro eis, qui credituri sunt per verbum eorum in me*. Quorum potius, quàm Vates, Interpretes fuit Isaias, dum c. 50. v. 21. conversis occidentalibus ad fidem, eum venerit Sion Redemptor, promittit Spiritum Dei ipsis, & semini eorum usque in sempiternum: *Spiritus meus, qui est in te, & verba mea,*

qua posui in ore tuo, non recedent de ore tuo, & de ore seminis tui, dicit Dominus, amodo, & usque in sempiternum. Super quæ Sanctus Hieronymus ait: *Quod scilicet gratia Prophetarum, in Apostolis veniat, & per tot, qui de Israel per Apostolos credituri sunt. Quem igitur spiritum veritatis Christus Apostolis promissit, Ecclesie item post eos futuræ promissit, nisi velimus, Ecclesiam, defunctis Apostolis, fuisse à Domino destitutam*. Aliàs simili ratione dicere possemus, ad Ecclesiam nec consilia, nec præcepta Evangelii pertinere, si ea, quæ Dominus Apostolis loquebatur, ad illos solum, non ad futuros in Ecclesia post ipsos spectare dicamus. Quo quid stultius?

VIII. Non minus futiliter dicitur secundum. Nam etsi hoc daremus, quod spiritus veritatis fidelibus quibuscumque seorsim, ac singulatim sumtis adesset, docendo omnem veritatem, ut Calvinus, aliquæ ejusdem furfuris volunt: numquid proinde negabimus, quod sigillatim cuique membrorum convenit, id plenius toti corpori convenire? Numquid dum oculus videt, non magis videt homo? an non lucerna corporis est oculus? Quid verò absurdius, quàm membrum posse quicquam, quod corpus nequeat efficere, partem habere, quod non habeat totum? Nos ergo, quemadmodum scimus, animam esse actum, & perfectionem primò quidem totius corporis organici, secundò autem loco membrorum etiam singulorum, in quibus varias licet edat functiones, omnes tamen illæ, & corporis propriæ sunt, & propter corpus ipsum membris à natura tributæ: Ità spiritum veritatis ad corpus primò Ecclesie referimus, deinde propter Ecclesiam ad singulas ejus partes analogià quadam, & proportionem, scilicet secundum actum suum, omnia enim membra non eundem actum habent, ait Apostolus. Rom. 12. v. 4. Imò si veritas, omnium membrorum donum est, tunc illa profectò erit, & firmior, & certior, cum in-

eam

eam omnia simul membra concurrunt; Cùmque omnia simul membra Ecclesiæ sint, planè sequitur, Ecclesiam spiritum veritatis habere. Quis enim putet singulis spiritum veritatis adesse, & non adesse omnibus simul, cum Christus dicat : *Ubi fuerint duo, vel tres congregati in nomine meo, ibi sum in medio eorum?* Matth. 18. v. 20. Quomodo rursum stabit, Ecclesiam esse columnam, & firmamentum veritatis? 1. *Timoth.* 3. v. 13. Quomodo, qui Ecclesiam non audierit, habendus erit tanquam Ethnicus, & Publicanus, *Matth.* 18. v. 17., si Ecclesiæ, adhuc infcienter, à veritate in suo iudicio potest recedere? sed de his alibi.

IX. Dico secundò. Non solum ab auctoritate Ecclesiæ antiquæ, sed etiam Ecclesiæ, quæ nunc est; imò & Pastorum, & Ecclesiæ Principum potest Theologus firmiter ducere argumentum. Duas habet partes hoc asseritum; & prima quidem ex dictis præcedenti asserito constat. Nam pollicitationes Christi de præsentia sua usque ad consummationem sæculi, & de spiritu veritatis, mansuro in æternum, non ad Ecclesiam tantum, quæ fuit tempore Apostolorum, vel quæ fuit primis Ecclesiæ sæculis, sed ad Ecclesiam quoque, quæ nunc est, & futura est usque ad sæculi finem, pertinere necessarium est. Certè Ecclesiæ, quæ nunc est, Caput est Christus, qui insluit in membra sicut prius; Et qui Ecclesiæ modò spiritum veritatis abiperet, is eadem ratione poterit eidem abipere, & potestatem ligandi, atque solvendi, & Sacramenta, & Sacerdotium, & omnia Spiritus Sancti Charismata, dicens, omnia hæc fuisse concessa tantum Ecclesiæ pro tempore Apostolorum, sicque Ecclesiam præsentem ad purum nomen redigere.

X. Addo. Si errores, qui sanè Doctrinæ adversantur, Ecclesiæ, quæ nunc est, certò condemnare nequit, proscindò, iudicibus de medio sublati, huius sæculi hæretici impune gra-

fari poterunt. Ecclesiæ ergo præsens docere eos, qui Christi fidem susceperunt, suo jure potest, & à veritate aberrantes corripere, qui ejus iudicio stare debent, & credere ipsi proponenti, ut à majoribus acceptam, & à Verbo Dei hautam, doctrinam aliquam. Is enim ordo in Ecclesiæ definitionibus statui debet, qui in humanis disciplinis servatur. Sicut ergo in disciplinis duo principiorum genera cernimus, unum remotum, aliud proximum: unum postremum, aliud primum: & principia proxima, & immediata probamus per resolutionem ad principia remota, & prima; ità fides, quæ à nobis tenenda sit, referenda est ad fidem, quam tenuerunt, qui nos immediatè præcesserunt: Fides horum ad fidem præcedentium, & sic ascendendo, donec ad Apostolos, & tandem ad Christum perveniamus, in quo ut in primo fundamento Catholica Fides consistit. Et sicut etiam utraque disciplinarum principia, si firma sunt, utraque item conclusiones certò probant, licet altera mediata sint, altera immediata; ità & Ecclesiæ, quæ nunc est, certum argumentum Christiani Dogmatis exhibet, quamvis ipsius demum Fides ad Christi, & Apostolorum sit doctrinam referenda.

XI. Quia in re multi non modicè hallucinantur. Aliud enim est, querere, quid Ecclesiæ præsens definire possit, & quodvisque ejus protendatur auctoritas; aliud verò, investigare, quanam vià, & ratione ad rectam, & firmam harum rerum definitionem valeat pervenire. Nos enim in Ecclesiæ certam definiendi auctoritatem agnoscimus. At invenièntes fatemur, non fieri hoc per novas revelationes, sive Summo Pontifici, sive Conciliis, sive etiam toti Ecclesiæ factas: sed per inquirenda potiùs majorum documenta, ac sanctorum scripta, Apostolicas rursus traditiones, sacras item litteras consulendas, atque per hujusmodi conquistata media, quætionem de fide propo-

positam decernendam. Hoc fecerunt Apostoli, & Seniores in primo Hierosolymitano Concilio; magnâ enim factâ conquestione, tum ex rebus antea dictis, tum ex Scripturis Prophetarum, sententiam de re in questionem vocatâ tulerunt. Apostolorum exemplum secutos fuisse Nicænæ primæ Synodi Patres, scribit Eusebius Pamphili apud Socratem, *hist. Eccles. lib. 1. cap. 8.*; quod in subsequentibus Synodis usque ad nos facilitatem fuisse, quisque deprehendere poterit.

XII. Restat dubitandum, an, cum de auctoritate à testimonio, & iudicio Ecclesiæ loquimur, nomine Ecclesiæ veniant soli Pastores, & majores in Ecclesia, an verò etiam Laici fideles. Quam dubitationem solvit Canus *lib. 2. de Loc. Theol. cap. 7.* cum distinctione. Quæ enim ad fidem spectant, alia sunt, quæ omnes fideles explicitè credunt, ut Deum esse unum, & trinum; Filium Dei incarnatum fuisse. Altera sunt, quæ soli majores credere tenentur explicitè, populus verò solum implicitè; in fide scilicet majorem; ut Patrem, & Filium esse unum principium Spiritus Sancti; Hunc, vel illum librum esse Canonicum. In rebus ergo fidei, quæ sunt secundi generis, non est curandum in casu quæstionis testimonium populi rudis, idque maximè, si non sit consulenda tantum Ecclesia præsens, sed ad eam, quæ fuerat temporibus præcedentibus quæstio sit referenda. In rebus autem primi generis jure forsitan testimonium etiam populi postulaveris, quia earum fides æquè ad minores pertinet, ac ad majores. Ità Canus, dubitans tamen.

XIII. Secunda verò pars asserti probatur ex illo Apostoli ad *Ephe. 4. v. 11.*, ubi postquam dixit, *Deum dedisse quosdam Apostolos, quosdam Prophetas, alios Evangelistas, alios autem Pastores, & Doctores, in adificationem Corporis Christi, rationem assignat dicens v. 14. Ut jam non simus parvuli fluctuantes, & circumferamur omni ven-*

to doctrina, in nequitia hominum, in astutia ad circumventionem erroris. Si ergo Deus cætum Pastorum, & Doctorem in Ecclesia posuit, ne circumferamur omni vento doctrinæ, ne ab errore circumveniamur, dici debet, cætum istum errare non posse collectivè sumtum. Si enim Pastores omnes collectivè, & Doctores errare possent, nec firma esset eorum auctoritas, quomodo populus eorum dictis crederet? Si Doctorem cætus ab errore posset circumveniri, multò magis id posset populus; dum enim Pastor per abrupta graditur, necesse est, ut per præcipientium grex sequatur. Si enim Christus nullum Ecclesiæ suæ dedisset Pastorem, quid esset de grege? atqui melius esset, nullos habere, quàm errantes habere: si enim populus nullum pastorem haberet, aliqui fortè errarent, alii non. At si errantes haberet Pastores, his errantibus totus populus erraret. Faciamus itaque hunc casum, omnes simul Ecclesiæ Pastores in unam sententiam convenire, hancque populo rudi credendam proponere. Tunc rogo, an populus hanc sequi debeat, an non? si debet: cum errantibus ergo pastoribus plebs quoque errabit. Si non: quæ major in Ecclesia confusio? Circumferentur omnes omni vento doctrinæ, eruntque sicut parvuli fluctuantes. Si namque populus Sacerdotum doctrinam repudiaverit, cujus sententiam sequetur? Si salem abjecerit, in quo salietur? quos consulat pro veritate invenienda? interrogabit unumquemque seorsum, delirum senem, garrulam anum, suturem indoctum, bajulum cauponarium? quid magis ineptum? interrogabit hos omnes in cætum coactos de quæstione, at quid magis ridiculum? imò quomodo certus esset, in cætum plebis idiotæ nullum subesse errorem, cum certus non sit, errorem non subesse in cætum Sacerdotum, ac Pastorum? Quandonam ergo controversiæ finirentur? Quod ergo Christus dixit *Matth. 23. v. 3. de Scribis, & Phariseis; quia sed-*

sedebant in Cathedra Moÿsis, omnia quaecumque dixerint vobis servate, & facite, multò magis dixit de Ecclesiæ suæ Pastoribus, ac Doctoribus. Sed his alia addenius, dùm de Conciliis infra sermo erit.

§. III.

Solvuntur argumenta.

XIV. **O**bjicies primò contra primum assertum. Ecclesia aliquando tota defecit; ergo potest tota deficere: ergo non erimus de illius auctoritate certi. Anteced. prob. Aaron Summus Sacerdos, aliquæ, sive majores, sive minores vitulum aureum adoraverunt: ergo Ecclesia Christi poterit eodem modo sculptile, & Imagines adorare. Id si faciat, ut facit, errabit sine dubio in fide, ac religione. Rursus Isaïæ, & Jeremiæ temporibus tota Ecclesia à vero Dei cultu lapsa est. Quid igitur prohibet, idem accidere posse Ecclesiæ Christi? antecedens probat. Isaïas cap. 1. v. 3. Cognovit, inquit, Bos possessorem suum, & Asinus praesepe Domini sui: Israel autem me non cognovit, & Populus meus non intellexit; & v. 6. A planta pedis usque ad verticem non est in eo sanitas. Jeremias autem cap. 2. v. 25. Quomodo confunditur fur, quando deprehenditur, sic confusi sunt domus Israel, ipsi, & Reges eorum, Principes, & Sacerdotes, & Propheta eorum: dicentes ligno: Pater meus es tu: & lapidi: tu me genuisti &c. v. 29. Omnes dereliquisti me; & cap. 5. v. 1. Circumite vias Jerusalem, & aspice, & considerate, & quærite in plateis ejus, an inveniamus Virum facientem judicium, & quærentem fidem, & propitius ero ei. v. 4. Ego autem dixi, forsitan pauperes sunt, & stulti, & ignorantes viam Domini, judicium Dei sui. Ibo igitur ad optimates, & loquar eis: ipsi enim cognoverunt viam Domini, judicium Dei sui: & ecce magis hi simul confregerunt jugum, ruperunt vincula. Ergo

omnes eo tempore, & Populus, & Optimates, & Sacerdotes: uno verbo: tota Ecclesia Israel tunc à Deo, & à Fide defecerat.

Respond. neg. antecedens. Ad primam probationem multis modis respondetur. Primò certum est, nec Moÿsen, nec Josue, penes quos summa rerum tunc erat, in populi furorem, & insaniam incidisse. Secundò nec omnes, qui in castris remanserant, in flagitium consenserunt, præsertim illi, qui ad Moÿsi vocem surgentes, ultionem de flagitiosis sumserunt: à Domino enim fuisse certius est, nec in scelere confortes fuisse, quos Dominus justitiæ administratos in ultione esse voluit. Tertiò Aaron nondum fuerat Sacerdotio initiatus, nondum superhumeralis fuerat ei impositum, & rationale, in quo erat doctrina, & veritas, alligatum, & aptatum, ut legitur Levit. 8. v. 8. Quid ergo si Aaron, filique ejus, nec Pastores populi constituti, nec Sacerdotes consecrati, in fide, ac religione errarint? Quartò Aaronis error, ut similiter Petri, & Marcellini, ex metu, non ex infidelitate processit. Nihil ergo hoc argumento contra nos concluditur.

XV. Ad secundam probat., quæ erat unum ex argumentis Donatistarum, respondit jam Sanctus Augustinus lib. de unit. Ecclesiæ cap. 13., & lib. post collationem ad Donatistas cap. 20., quòd more suo Scriptura loquitur, quæ sic arguit malos, tanquam omnes in eo populo mali sint; & sic consolatur bonos, tanquam omnes ibi tales sint. Sicut ergo Paulus 1. Corinth. cap. 1. v. 2. scribens Corinthiis, eos primò appellat sanctos, divites in omni verbo, in omni scientia, & ità ut nihil illis desit in ulla gratia; & tamen cùm inter illos aliqui essent Schismatici, qui Christum dividebant, aliqui non adhuc credentes resurrectionem mortuorum, & proinde indignè accedentes ad Eucharistiam, eos sic arguit, & increpat, ac si omnes hoc horrendo vitio inquinati essent; ut observat S. Augustinus lau-

laudatus cap. 17. Ità Isaias, & Jeremias totum populum Israeliticum de relicto veri Dei cultu increpant: non quia nullus esset in toto populo, qui cultum veri Dei custodiret; sed cum multi, imò major pars, hoc crimine esset inquinata, adeò ut viri iusti comparati ad illos, utpote pauci, essent quasi nullus; idè sic impiis exprobrant, ac si omnes penitus impii essent. Quare dùm ajunt, omnes, Populum, Reges, Optimates, Sacerdotes Deo terga vertisse, *ly omnes non est* (ut ajunt Logici) accipiendum cum distributione completa, seu pro singulis generum, ac si ex omni statu omnes, & singuli Deo terga vertissent; sed cum distributione incompleta, seu pro generibus singulorum; quia ex omni statu Regum, Principum, Optimatum, Sacerdotum aliqui, & quidem multi, imò pars major, hoc flagitio laborabat: unde ex hoc non evincitur, ex tota Ecclesia Israel fidem defecisse. Quòd autem hoc verum sit, Scriptura ipsa ostendit. Ezechiel eodem, quo Jeremias, tempore vaticinatus est. Quid dicat ei Dominus, audiamus, *Ezech. 3. v. 7. Domus autem Israel nolunt audire te, quia nolunt audire me: omnis quippe domus Israel attrita fronte est, & duro corde. Quis credat in tota hac depravata domo aliquam partem superesse, cui generalis illa sententia non conveniat? Sed audiat quid iterùm dicat Dominus (Ezech. c. 9. v. 4.) Ezechieli. Transi per mediam Civitatem, in medio Jerusalem: & signa Thau super frontes virorum gementium, & dolentium super cunctis abominationibus, qua sunt in medio ejus. Ergo non omnes in populi flagitium consenserant, non omnes erant attrita fronte, & duro corde; sed erant qui flagitia populi detestarentur, qui propterea signati Thau in fronte fuere, ut in cæde generali præservarentur. Rursus. Saluum, inquit David psalm. 11. v. 2., me fac Domine, quoniam defecit sanctus, v. 3. Vana locuti sunt unus-*

quisque ad proximum suum. Ecce David quasi relictus solus totius humani generis culpas deplorat. Sed quid dicat illi Dominus, audiamus. Propter miseriam inopum, & gemitum pauperum nunc exurgam. Ergo aderant cum Davide socii gementes super cæterorum culpis, propter quos exurgere decreverat Dominus Deus, ad puniendos scilicet oppressores, & sublevandos oppressos. Elias item 3. Reg. cap. 19. v. 10. & 14. conquerens, aiebat, derelictus sum ego solus, ac si cæteri omnes dereliquissent Deum suum, & tamen ait D. Paulus Rom. 11. vers. 4. quid dicit illi divinum responsum? reliqui mihi septem millia virorum, qui non curvaverunt genua ante Baal. Quod legitur etiam 3. Reg. cap. 19. v. 18.

XVI. Obijcies secundò, ut simus certi de judicio, & auctoritate Ecclesiæ, debemus esse certi, quænam sit vera Christi Ecclesia; atqui certi non sumus, quænam sit Christi Ecclesia: ergo. Minor probatur primò. Ecclesia digito monstrari non potest; quomodo enim poterat monstrari Ecclesia Judæorum temporibus Eliæ, cum se solum relictum deploraret? Quomodo, cum Populus ille apud Babylonios, Persas, Egyptiosque dispersus sine Sacerdotio, sine Templo, sine Sceptro Gentibus, ac Diis alienis serviebat? An Christi etiam Ecclesia taliter obscurari non poterit, & occultari? Hilarii tempore Ariana hæresis omnia adeò miscuerat, ut credi quidem posset, sed non discerni. Quid quodd sub diversis Pontificibus, schismate diù perdurante, nulla Ecclesiæ tuta facies apparuit? Quòd si præteritis retrò seculis vera Ecclesia resplenduit, quis certus est, eam perdurasse, & perdurare adhuc? Quis scit, aliquando non fore, ut ob eorum delicta Pastores omnes, & oves stupore, ac cecitate Deus percutiat? & quis certus est, hoc jam factum non fuisse? Id, quod de Orientali Ecclesia dicimus accidisse, cur de Occiden-

dentali accidere non poterit, vel forte jam non accidit? Ubi erit, & qualis Ecclesia illo tempore, de quo Dominus ait, *Luce 18. v. 3. Verumtamen filius hominis veniens, putas, inveniet fidem in terra?* Quis certus est, hoc tempus nondum advenisse? His hæretici quasi re consecrâ gloriantur.

Secundò probatur minor. Ecclesia ex solo prædestinatorum numero constituitur; sed soli Domino electorum numerus notus est; ergo. Major suadetur. Tum quia Petrus *epist. 1. c. 3. v. 20.* dixit, Arcam Noe Ecclesiæ typum fuisse; atqui in Arca Noe ii soli fuerunt, qui salvandi erant; ergo in Ecclesia &c. Tum quia Christus non est alterius Ecclesiæ Caput, nisi ejus, cujus est Salvator, & quam sibi exhibet gloriosam, ut ad *Ephef. 5. v. 27.* Tum quia ovile Christi nonnisi ex Christi ovibus constituitur; at oves Christi illæ modò sunt, de quibus ipse ait *Joan. 10. v. 27. Oves mea vocem meam audiant, & ego vitam æternam do eis.*

Tum denique Ecclesiam constituunt filii Dei, eorum enim Ecclesia est mater, quorum Deus est pater; at filii Dei soli sunt, qui hæreditatem gloriæ sunt percepturi, dicente Apostolo *Rom. 8. v. 17. Si filii, & hæredes: hæredes quidem Dei, coheredes autem Christi;* ergo &c.

Tertiò probat. minor. Vera Christi Ecclesia debet esse perfecta, tota pulchra, & sine macula, *Cant. 4. v. 7. Cant. 6. v. 3. Ephef. 5. v. 27. Immundus per eam transire non poterit. Esai. 52. v. 1.*; atqui Ecclesia immaculata, vel fabulosa sit, vel nobis ignota, ut Apostolus *Hebr. 12. v. 18. & 22.* innuere videtur, cum Ecclesiam Christi à Synagoga discernens, non eam sensibilem, & tractatam, sed spiritualem, & intratam describit. *Non enim accessistis (ait) ad tractabilem montem, & accessibilem ignem... sed accessistis ad Sion Montem, & Civitatem Dei viventis, Hierusalem ætheralem &c.*

Tum etiam. Nam Ecclesiam, non quamlibet, sed sanctam, fideles te-

Tom. I.

nentur credere; At in sancta congregatione non nisi sancti intelliguntur. Quodd si mali Ecclesiæ membra sunt, non erit sancta; imò si mali membra Ecclesiæ sunt, membra etiam Christi erunt, cumque mali membra diaboli sint, iidem erunt membra Christi, & Diaboli, Cives Hierusalem, & Babylonis: quod quid absurdius?

XVII. Respondeo ad argumentum, neg: minorem. Ad primam ejus probationem, quæ erat argumentum Donatistarum, respondet Augustinus de *Unit. Eccles.* cap. 16.: *Non est autem ista aperta, quia non est sub modio, sed super candelabrum, ut luceat omnibus, qui in domo sunt. Et de illa dictum est: non potest Civitas abscondi super montem posita. Sed Donatistis aperta est, qui audiunt tam lucida, & manifesta testimonia, quæ illam toto Orbe demonstrant, & malunt clausis oculis offendere in montem, quam in eum ascendere.*

Eliæ etiam temporibus monstrari poterat; unde, ut dictum est supra, ostensa illi fuerunt septem millia virorum, qui non curvaverant genua ante Baal. Erat insuper in Hierusalem Templum Dei, erant Summi Sacerdotes, vera itidem erat de religione, ac lege doctrina, quamvis etiam pauci profiterentur. Populo etiam inter gentes disperso, aderant, qui eminerent pietate, ac religione Prophetæ, alique populum eam docentes: non erat sacrificium, quia templum eversum erat Hierosolymitanum, in quo solo sacrificium offerre licebat. Quodd si aded publicè, ut priùs, cultum Dei non profitebantur: hoc erat, quia inter gentes captivi erant; ut hodie Christiani, inter Idololatrias, & Turcas degentes, & Catholici in regionibus hæreticorum. Verùm, ut benè advertit Canus *lib. 4. cap. ult.*, non benè sequitur. Si populus ille ita vacillavit, ut pendè cecidisse videatur, Christi quoque Ecclesiam usque aded obscurari posse, ut ejus species non affulgeat. Vetus enim Ecclesia, utpo-

Q

te

te quæ casura esset, ruinam sepe inibat; & maximè dum suo casui appropinquabat, sicut candela jam moritura, emicabat modò, modò occultabatur. De illa dictum non erat, ut de Ecclesia Christi: *Porta inferi non prevalebunt. Vobiscum sumusque ad consummationem seculi.* Nec illi promissus fuerat Spiritus Sanctus, ut cum ea maneret in æternum.

XVIII. Quod opponitur de Hilario, oppositum fuit D. Augustino à Vincentio Rogatista, ut videre est *epist. olim 48. modò 93. c. 9.* Cui Augustinus respondebat: Ecclesia aliquando obscuratur quidem multitudine scandalorum... sed etiam tunc in suis firmissimis eminet.... Aliquando autem tribulationum fluctibus operitur, atque turbatur. Tale tunc erat tempus, de quo scripsit Hilarius: undò putasti insidiandum contra testimonia tot divina, tanquam perierit Ecclesia de orbe terrarum. *Potes hoc modo dicere, nec tot Ecclesias Galatia tunc fuisse, quando dicebat Apostolus: O stulti Galatae &c.* Sic enim calumniari docto viro, qui tardicordes, & timidos graviter increpabat &c. Quis enim illo (Hilarii) tempore obscuris verbis multos parvi sensus fuisse delusos, ut putarent, hoc credi ab Ariano, quod etiam ipsi crederent: alios autem timore cessasse, & simulatè consensisse?... Quamquam & ipsi, qui tunc firmissimi fuerunt, & verba hereticorum insidiosa intelligere potuerunt, pauci quidem in comparatione exterorum, sed tamen etiam ipsi quidam profide fortiter exulabant, quidam toto Orbe latitabant.... Hilarius ergo decem Provinciarum Asianarum, aut zizania, non triticum arguebat, aut ipsum etiam triticum, quod defectu quodam periclitabatur, tantò utilitè arguendum putabat. Habent enim etiam scriptura canonica hunc arguendi morem, ut tanquam omnibus dicatur, & ad quosdam verbum perveniat. Hucusque Augustinus.

Ecclesia ergo Catholica Hilarii tempore Arianorum fraudibus circum-

venta, adhuc, licèt in paucis, eminebat, ac digito monstrari poterat. Et licèt visa fuit mergi, & obscurari, clarius tamen emerit, & illuxit. Audiendus est Sanctus Hieronymus adversus Luciferianos. *Ingenuit (inquit) totus Orbis, & Arianum se esse miratus est.* Infra: *Periclitabatur navicula Apostolorum, urgebant venti, fluctibus latera tundeantur, nihil jam supererat spei: Dominus excitatur, imperat tempestati; bestia (Constantius) moritur, tranquillitas rediit. Manifestius dicam. Omnes Episcopi, qui de propriis sedibus fuerant exterminati, per indulgentiam novi Principis, ad Ecclesias redeunt. Tunc triumphantem suum Athanasium Egyptus excepit: tunc Hilarium de praelio revertentem; Galliarum Ecclesia complexa est: tunc ad reditum Eusebii lugubres vestes Italia mutavit &c.* Non fuit ergo in tempestatibus submersa Ecclesia; iactata quidem, ac penè fluctibus operata, sed quò magis in ea tuenda remigantes laborabant Catholici, eò magis adspicibilem, & claram reddiderunt. Quòd si de Ecclesia Romana loquar, ejus fides nunquam omninò latuit, sed toti semper Orbi fuit manifesta. Quod suo loco manifestius ostendetur.

Nec schismatum tempore periclitatur, aut occultatur Ecclesia, manifesta semper manet ejus fides, quamvis tunc Pastorum judicia, quia absque legitimo, vel certo capite, incerta sint.

XIX. Ad id, quod additur, quòd si Synagoga defecit, posset & Ecclesia deficere, nego assumtum. Synagoga, namque defecturam Propheta testati sunt; At non sic de Christi Ecclesia, quam potius in æternum mansuram, pollicitatione sua Christus firmavit. De Orientali Ecclesia: ejus à Latina pertinax defectio, abunde eam collapsam esse testatur: at Occidentalis adhuc magis resplendet, & quamvis Lutherus, & Calvinus eam obscurare conati sunt, eò fulgentiorem reddiderunt. Ad dictum illud Christi respon-

dent

dent Augustinus, & Hieronymus. Hieronymus quidem Dialogo adversus Luciferianos, Christum de ea fide loqui, de qua ipse agebat Matth. 9. v. 12. fides tua te salvam fecit: & alibi de Centurione Matth. 8. v. 10. non inveni tantam fidem in Israel. Et rursum ad Apostolos Luc. 7. v. 9. Quid timidi estis modicæ fidei? nec non in alio loco Luca 17. v. 6. Si habueritis fidem, sicut granum sinapis &c. Nec enim Centurio, aut illa muliercula, quæ per duodecim annos fluxu sanguinis tabescebat, in Trinitatis Sacramenta crediderant... sed simplicitas mentis, & devota Deo suo anima approbata est... hac est fides, quam raro inveniri Deus pronuntiavit: hæc est fides qua etiam apud eos, qui bene credunt, difficilè perfecta invenitur. Hæc Hieronymus, qui accipit fidem pro fiducia. Fiducia enim, ait D. Thom. 2.2. qu. 129. art. 6. in corp. dicitur à fide: ad fidem autem pertinet aliquid, & aliqui credere. Pertinet etiam ad spem, quia nomen fiducia hoc principaliter significare videtur, quod aliquis spem concipiat ex hoc, quod credit verbis aliquis auxilium promittentis... Vel cum aliquis considerans, alium amicum suum esse potentem, fiduciam habet adjuvari ab eo. Et hac fide, nimirum fiduciâ, Mulier illa, & Centurio accesserunt ad Jesum; & de hac Christus loquebatur, cum dixit, Luca 18. v. 8. putas, inveniet fidem in terra?

Eodem sermone modo respondet Sanctus Augustinus de Unit. Eccl. cap. 15., ubi post relata Christi verba: Quod (inquit) nos intelligimus dictum, vel propter ipsam fidei perfectionem, qua ita difficilis est in hominibus, ut in ipsis quoque admirabilibus sanctis, sicut in ipso Moyse, inveniantur aliquid, ubi trepidaverint, vel trepidare potuerint, vel propter illam iniquorum abundantiam, & paucitatem bonorum &c. Addit rursum propterea enim tanquam dubitans hoc Dominus dixit: Putas inveniet fidem in terra? Cui utique cuncta scienti, & præscienti de aliqua re dubitare non convenit: sed illius dubitatio no-

stram dubitationem figuravit: quia propter multa scandala circa finem seculi pullulantis, hoc erat quandoque infirmitas humana dictura.

XX. Ad secundam prob. nego majorem. Ad primam probationem dico, Arcam Noemicam adduci à D. Petro in typum Ecclesiæ, non quod omnes intra eam facti sint salvi, sicut omnes intra arcam salvi facti sunt à diluvio: sed quod sicut nullus extra Arcam, salvus factus est; ita nullus extra Ecclesiam salvatur. Quapropter (bene advertit Canus citato loco) ne quis in hunc errorem incideret, ut putaret omnes, qui per Baptismum in Arcam Ecclesiæ transeunt, esse salvos, idcirco Petrus cautè, & sapienter adiecit: non carnis depositio sordium, idest pura deterfio corporalium sordium, per aquam Baptismi non salvat, sed conscientia bona interrogatio, idest vita, quam conscientia non reprehendat. Quod sit, ut omnes quidem, qui per Baptismum Arcam Ecclesiæ ingressi sunt, salventur, sed si vitam ad normam Evangelii component. Imò, si ad similitudinem Arcæ attendamus, potius colligitur oppositum. Primò, quia dicit D. Petrus, quod per Arcam pauci, idest octo animæ, salvi facti sunt; ergo dum subjungit similitudinem in Baptismo, eam inducit ad ostendendum paucitatem salvandorum. Secundò, quia Sanctus Hieronymus dialogo adversus Luciferianos. Ut in illa (Arca), inquit, omnium animalium genera, ita & in hac (Ecclesia) universarum gentium, & morum homines sunt. Ut ibi pardus, & hedi; lupus, & agni: ita & hic iusti, & peccatores, idest vasa aurea, & argentea, cum ligneis, & stilibus commorantur. Hæc Hieronymus, qui in aliis pluribus Arcam cum Ecclesia ibi comparat; ergo Ecclesia non solum prædestinatos, & sanctos, sed fideles omnes, sive iustos, sive peccatores concludit, si Arcæ cum Ecclesia similitudo attendenda est.

Ad id, quod secundò subjicitur,

Q.

do

do antecedens, quod non est aded certum. Nam Christus Angelorum Caput est, quorum non est propriè Servator, & nego consequentiam. Non enim valet: Christus est Ecclesiæ Salvator; ergo omnes, qui sunt in Ecclesia, salvat re ipsa, & quoad efficaciam eventus. Sicut enim dux dici potest verè servator Civitatis, etsi aliquæ Civitatis partes, & Cives pereant, si maximè pereant, quia volunt; ita Christus est verè Salvator corporis sui, quod est Ecclesia, etsi reipsa aliquæ partes ejus non salventur, quia nolunt. D. Paulus verò dicit, Christum seipsum tradidisse, ut Ecclesiam exhiberet gloriosam, non tamen dicit, in omnibus suis partibus. Sicut autem mortuus ille est, ut omnes viveremus, nec tamen vivunt omnes: sic se tradidit pro Ecclesia, ut eam mundaret, & glorificaret, nec tamen omnes, qui in Ecclesia sunt, mundantur, & glorificentur, suo defectu, non Christi.

Ad id, quod tertio dicitur, Ecclesia Christi est ovile, fateor: at in ovili non solæ sunt oves, sunt & hædi ovibus mixti. Sunt etiam oves, quæ vocem Pastoris audiunt, & ipsum sequuntur; sunt etiam quæ ipsum non audiunt; sunt oves sanæ, sunt etiam infirmæ. Nomen ovis sæpe in Scriptura pro justis, & pro electis usurpatur, sed non semper. Quid enim illud Ps. 218. v. 174. *Erravi sicut ovis, quæ perierat?* Quid illud Isaia 53. v. 6. *Omnes nos quasi oves erravimus?* Quid illud Psalm. 73. v. 1. *Iratu est furor tuus super oves pascuæ tuæ?* Quid illud Psalm. 48. v. 13. *Sicut oves in Inferno positi sunt?* In Evangelio Matth. 18.; & Lucæ 15. habemus ovem errantem. Et Matt. 15. v. 24. oves, quæ perierunt domus Israel. Oves ergo, quæ veræ sunt Christi, quæ audiunt vocem ejus, sunt justæ, & electæ, & his dat vitam æternam; quod non tollit, quin in ovili sint alia, quæ fidem quidem habent, sed non audiunt Christi Pastoris vocem.

Ad id, quod quarto additur, dico, majorem veram esse, si per filios

Dei intelligas eos, qui per baptismum Christo, & Ecclesiæ geniti sunt: sed in his sunt improbi quidam, & stulti filii, quos Patris, Matrisque cura parturire iterum gessit, donec formetur in eis Christus. Si verò intelligas tantum filios Dei, juxta frequentiore scripturæ usum, eos tantum, qui probi, & sapientes sunt: certè non ex his solis constatur Ecclesia, sed ex illis etiam, qui paternæ probitatis effigiem deleverunt; Nam, & in hos nomen filii quandoque diffunditur. Nunquid (ajebat Moyses ad populum contumacem Deuter. 32. v. 6.) *nunquid non ipse est pater tuus?* & v. 20. *generatio enim perversa est, & infideles filii.* Isaia 1. v. 2. *filios enutrivit, & exaltavi, ipsi autem speroerunt me.* Jerem. 3. v. 14. *convertimini filii reverentes.* Hinc Cant. 2. v. 1. *sicut lilium inter spinas, sic amica mea inter filias.* Quod (ait Aug. de unit. Eccles. c. 14.) *de Sancta Ecclesia dictum, omnis Christianus agnoscat.* ... Unde appellat spinas, nisi propter malignitatem micram? & easdem, unde filias, nisi propter Communionem Sacramentorum. Hinc non colligitur: filius est; ergo percipiet hæreditatem: nisi adjungas hoc, scilicet, & jus, quod accipit, non amittit. Videmus enim filios aliquando verè, ac justè ob demerita exheredari. Sed de hoc satis.

XXI. Ad tertiam probat. minoris principalis respondet D. Augustin. lib. 2. retract. cap. 18. Ubicumque commemoravi Ecclesiam, non habentem maculam, aut rugam, non sic accipiendum est, quasi jam sit, sed quæ preparatur, ut sit, quando apparebit gloriosa. Nunc autem propter quasdam ignorantias, & infirmitates membrorum suorum habet, unde quotidie dicat, *dimitte nobis debita nostra.* Et lib. de perfectione justitiæ cap. 15. *Tunc plene* (inquit) *atque perfectè erit Ecclesia, non habens maculam, aut rugam, aut aliud hujusmodi, quia tunc etiam erit verè gloriosa.* Cum enim non tantum, (ait D. Paulus Ephes. 5. v. 27.) *ut exhiberet sibi Ec-*
cle-

eleſtam, non habentem maculam, aut rugam, ſed addidit glorioſam, ſatis ſignificavit, quando erit ſine macula, & ruga, aut aliquo hujusmodi: tunc utique, quando glorioſa. Non enim modò in tantis malis, in tantis ſcandalis, in tanta permixtione hominum peſſimum, in tantis opprobriis impiorum, dicendum eſt, eam eſſe glorioſam..... mundat ergo eam nunc lavacro aqua in verbo, ablucens peccata praterita, & pellens ab ea dominationem malorum Angeliorum. Deinde perſectiones ejus ſanitates: facit eam occurrere in illam glorioſam ſine macula, & ruga. Huc uſque Auguſtinus. In hanc ſententiam veniunt S. Thomas 3. p. quæſt. 8. art. 3. ad 2. Quin, & Hieronymus in ap. 31. *Jeremia circa finem*. Eodem modo exponit idem Auguſtinus allatum teſtimonium ex Iſaia lib. contrà donat. poſt collationem cap. 8. Quomodo ergo (inquit) teſtimonium prophetieum, quod in ſua reſponſione (Donatiſtæ) poſuerunt, quod Eccleſia dictum eſt, non adiecit ultra per te tranſire incircumciſus, & immundus, ad hoc tempus pertinere intelligitur, quando Eccleſia retibus corrupta eſt, quibus in mari adibus poſitis piſces malos bonis permixtos, vel occultos eſſe conſeſſi ſunt? Unde manifeſtum eſt, nonniſi in futuro ſeculo poſt judicium nullum incircumciſum, & immundum per Eccleſiam tranſitutum.

XXII. Alià tamen vià, & quidem probabiliter, ſuſtineri poeſt, in citatis Scripturæ textibus ſermonem fieri de Eccleſia, quæ nunc eſt. Hæc enim dici poeſt ſancta, & immaculata, ſine macula, ſine ruga tùm ſanctitate ſui conditoris Chriſti, & ſuarum legum; tùm etiam aliquomodo ſanctitate ſuorum membrorum. Sanè in parvulis, & in adultis nunc primum per baptiſmum lotis ſancta, & immaculata eſt. Eſt etiam immaculata in iis, qui legem obſervant, & ſi quandoque in venialia cadunt peccata, hæc purgare non negligunt; ut Auguſtinus ſpie tentatur lib. de perfect. iuſtitia c. 9. hinc Plam. 17. v. 44. *ero immaculatus*

cum eo. Et quomodo? & obſervabo me ab iniquitate mea. Item Pſal. 118. v. 1. *Beati immaculati in via, qui ambulant in Lege Domini*. Eſt ergo Eccleſia præſens immaculata prorsus quidem in aliquibus ſuis membris, ut in infantibus, & adultis nunc baptizatis; in aliquibus etſi non prorsus eſt ſine macula, eſt munda à crimine, & culpa gravi, imò culpas etſi leves continuò ablucere conatur, & tendit, ut aliquando prorsus ſine ulla macula ſit. Hanc ſolutionem ſequuntur D. Hieron. in epiſt. ad Epheſ. cap. 5., Gelafius Papa in Decreto de Apocryphis, Concil. Tolet. VI. c. 1., & D. Thom. in ep. ad Epheſ. c. 5. lect. 8. utramque amplectitur. Juxta hanc ſolutionem verba Iſaia non tranſibit per eam incircumciſus, & immundus debent ſic intelligi, ut incircumciſus, & barbarus populus non ſit Eccleſiam oppreſſurus, quemadmodum opprimit, qui pede calcatur.

XXIII. Ad id, quod additur, dico, nos credere Eccleſiam Sanctam, quia omnes ſuos ad ſanctitatem ſuis monitis, ac legibus perducere conatur. Sanctam inſuper, quia omnes, qui verè, & propriè ejus membra ſunt, ſancti ſunt. Pro hujus explicatione, noto, quòd in aliquo toto aliud eſt eſſe membrum, aliud eſſe partem: pars refertur ad totum, membrum verò ſolum ad totum, ſeu corpus animatum. Sic pars invenitur ſine vita, ut in lapide, vel ligno; membrum autem ſine vita nec concipi quidem poeſt. Sic improbi partes quidem Eccleſiæ ſunt; membra Eccleſiæ, aut Chriſti non ſunt, ſunt autem Diaboli membra. At Eccleſiæ partes, & in Eccleſia eſſe ceniunt, cuius facti per fidem baptiſmatis hujus Civitatis Cives, & huic adſcripti, per infidelitatem ab ea non reſceſſerunt. Cives ergo adhuc ſunt, ſed cives mali: & flagitioſi. Fide cives Jeruſalem, opere cives Babylonis. Nec quòd improbi in Eccleſia ſint, ejus ſanctitati præjudicat. Totum enim dicitur tale à partibus ejus præcipuis, idèquæ cum viri probi, ac juſti, qui Eccle-

Ecclesiae partes, & membra sunt, caritate cum ea copulati, Sancti sint, Ecclesia sancta ratione istorum dicitur, quamvis toleret alias partes, non membra tamen, quibus nec vita inest, nec sanctitas. Ità ex Cano laudato lib. 4. c. ultimo.

XXIV. Attamen D. Thomas 3. p. qu. 8. art. 3. ad 2. dicit, peccatores, & improbos esse membra Christi, non actualiter, quasi ab ipso vitam perfectam participantia, & simpliciter talem, sed esse membra Christi potentialiter: nisi fortè imperfectè per fidem informem, qua unit Christo secundum quid, & non simpliciter, ut scilicet per Christum homo consequatur vitam gratia: fides enim sine operibus mortua est, ut dicitur Jacobi 2. Percipiunt tamen tales à Christo quandam actum vitae, qui est credere; sicut, si membrum mortificatum moveatur aliquantulum ab homine. Sicut enim, [est doctrina ejusdem in 3. serm. dist. 13. qu. 2. art. 2. quaestione 2.] in corpore naturali invenitur quadruplex unio membrorum ad invicem. Prima secundum conformitatem naturae, quia omnia membra constant ex iisdem similibus partibus.... sicut manus, & pes ex carne, & osse: & sic dicuntur membra unum, sicut genere, vel specie. Secunda est per colligationem eorum ad invicem per nervos, & juncturas; & sic dicuntur unum, continuatione. Tertia est secundum quod diffunditur vitalis spiritus, & vires animae per totum corpus. Quarta est secundum quod omnia membra perficiuntur per animam, quia est una numero in omnibus membris. Ità haec quatuor uniones invenimus in corpore mystico. Prima est inquantum omnia membra ejus sunt unius naturae, vel specie, vel genere. Secunda est inquantum collegata sunt ad invicem per fidem, quia sic continuantur in uno credito. Tertia est secundum quod vivificantur per gratiam, & caritatem. Quarta est secundum quod in eis est Spiritus Sanctus, qui est.... quasi anima in corpore naturali. Subdit deinde quod prima

dictarum unionum non est unio simpliciter, quia illud, in quo est unio hac, non est unum numero, sicut est in tribus sequentibus, quia per fidem, & caritatem in uno credito, & amato secundum numerum ununtur; similiter Spiritus Sanctus unus numero omnes replet. Postquam autem dixit, infideles non pertinere ad unitatem Ecclesiae, nec eorum Christum esse caput, nisi in potentia, quatenus ei sunt unibiles, si venerint ad fidem, de fidelibus peccatoribus subdit: homines autem fideles peccatores pertinent quidem aliquo modo ad unitatem Ecclesiae, inquantum continuantur ei per fidem, quae est unitas materialis, non tamen possunt dici membra propriè, nisi sicut membrum mortuum, scilicet aequivoce. Quia nempe eis deest gratia, & Spiritus Sanctus, qui est forma, & vitae membrorum Christi. Sed hæc satis.

XXV. Objicies tertio. Duæ Ecclesiae sunt, Græca, & Latina, cui ex his credendum erit? Si dixeris, Græcos esse schismaticos, idcirco apud eos Ecclesiam periisse, quia à Romano Pontifice desciscendo privilegium Ecclesiastici nominis amiserunt.

Contrà est. Ex uno Pontifice Ecclesiae nomen, ac veritas non pendet, sed ex uno Christo, unâ Fide, uno Baptismate, ut ait Paulus ad Ephes. 4. v. 5. Unus Dominus, una Fides, unum Baptisma; sed hæc omnia insunt Græcis, qui unum Filium agnoscunt, unum Spiritum, unam fidem, unum baptismum; in quibus etiam multi boni sunt; ergo &c. Secundo ante Christi Nativitatem una veterum omnium Ecclesia fuit, nec in ea tamen fuit unus Pastor, & Rector. Tertiò mortuo Pontifice nihilo fecius Ecclesia una est, & tamen tunc sine Capite, ac Rectore invenitur; ergo ex hoc Capite visibili Ecclesiae veritas non dependet; ergo arroganter Ecclesia latina Catholicae nomen sibi usurpat; ergo nisi idem cum græca sentiat, Ecclesiae universalis auctoritate caret, nec teneamus ejus judicium revereri.

XXVI. Respondetur, optimè, ac verissimè dictum, apud Græcos Ecclesiam non esse, ex quo à Romano Pontifice schisma fecerunt. *Primatus Petro datur [scribat D. Cyprianus I. de unitate Ecclesiæ Novatiano, qui à Cornelio Romano Episcopo schisma fecerat] ut una Christi Ecclesiæ, & Cathedra una monstretur... Hanc Ecclesiæ unitatem, qui non tenet, tenere se fidem credit? Qui Ecclesiæ renititur, & resistit, qui Cathedram Petri, super quam fundata est Ecclesiæ, deserit, in Ecclesiæ se esse confidit? Ex uno ergo Rectore nomen, & unitas, ac proinde Ecclesiæ veritas pendet; non enim potest esse unus Christus, una Fides, unum Baptisma, nisi unus sit spiritus, teste Apostolo laudato. Unus autem spiritus non est, qui ab Episcopatu, qui unitatis tessera est, schisma facit. Prosequitur Cyprianus: Quando & Beatus Apostolus Paulus hoc idem doceat, & sacramentum unitatis ostendat, dicens: Unum corpus, & unus spiritus, una spei vocationis vestra, unus Dominus, una Fides, unum Baptisma, unus Deus. Quam unitatem firmiter tenere, & vindicare debemus, maxime Episcopi, qui in Ecclesiæ presidemus, ut Episcopatum quoque ipsum unum, atque indivisum probemus. Porro huius unitatis originem ex D. Petri Cathedra sumendam esse, jam docuerat dicens: Christus ut unitatem manifestaret, unam Cathedram constituit, & unitatis ejusdem originem ab uno incipientem suâ auctoritate disposuit. Hor erant utique, & ceteri Apostoli, quod fuit Petrus, pari consortio præditi, & honoris, & potestatis, sed exordium ab unitate profectus. Primatus Petro datur &c. Græci ergo, qui ab obedientia Petro debita, ejusque successoribus recesserunt, ab unitate, & consequenter ab Ecclesiâ recesserunt.*

Nec proinde tantum schismatici sunt, sed etiam hæretici: tum propter alia, quæ negant: tum hæc præcipuè causâ, quod inficiuntur, unum totius Ecclesiæ Pastorem esse à Christo in B. Pe-

tro institutum. Sed hoc importunè hæc agitur.

XXVII. Ad secundam probat. nego antecedens. Imò retorqueo argumentum. Ex quo enim apud Judæos forma regiminis per Moysen instituta fuit, semper usque ad Christum extitit unus Summus Sacerdos, ad quem, ceu ad Supremum Caput, & Judicem omnes causæ deferrentur, ut fatetur Calvinus lib. 3. Instit. cap. 6. §. 2., & Bellarmino referente lib. 1. de Rom. Pont. cap. 9., etiam Centuriatores Magdeburgenses: ergo cum ea, quæ in veteri Lege contingebant, essent figura eorum, quæ in nova futura erant, sequitur, in nova lege dari debere unum totius Ecclesiæ Pastorem Supremum, ad quem omnes causæ Ecclesiasticæ referantur, & qui in negotio religionis omnibus præsit.

Ad tertiam dico: mortuo Summo Pontifice, unam sine dubio Ecclesiam manere, quia licet tunc non habeat unum Pastorem de facto, servat ordinem ad illum habendum. Manet etiam in ea spiritus veritatis: at si controversiæ fidei, & religionis pro eo tempore oriantur, Ecclesiæ judicia sine Capite in terris non adeo certa erunt. Quæ persequi huius loci non est.

XXVIII. Obicies quartò contra primam partem secundi asserti. Si standum esset auctoritati Ecclesiæ, maxime Ecclesiæ Catholicæ; sed hæc modò non est; ergo Ecclesiâ, quæ modò est, non est indubie auctoritatis. Minor probatur, Catholica Ecclesiâ idèd vocatur, quia per omnes gentes, & per totum Orbem diffusa est, ut contra Donatistas ostendit D. Augustinus tum lib. 2. contra Petilianum cap. 38., tum lib. 2. contra Gaudentium c. 2., lib. de unitate Ecclesiæ cap. 2., & alibi passim: atqui Ecclesiâ diffusa per totum Orbem amplius non est, cum in angulum Europæ redacta sit, Mahumetanâ sectâ totam sere Asiam, & Africam occupante, & partem etiam Europæ, cujus non modica pars hodiernis hæresibus infecta est; ergo &c.

Ref.

Respond. neg. min., ad ejus prob. concedo maj. Nomen enim græcum *Catholon* idem est latine, ac *secundum totum*, unde, ut ait August. laudatis locis, Ecclesia dicta fuit Catholica, eò quòd ejus doctrina prædicata sit in toto Orbe, non tamen ità, ut sola semper occupaverit, & occupet totum Orbem, sed ut sit illa, cui oportet, ut credant omnes gentes. Unde D. Augustinus *epist. 80.* nunc 199. ad Hefychium cap. 12. *In quibus ergo gentibus nondum est Ecclesia, oportet, ut sit, non ut omnes, qui ibi fuerint, credant, omnes enim gentes promissa sunt, non omnes homines omnium gentium: non enim omnium est fides.* Cum ergo Ecclesia, quæ modò est, sit illa eadem, quam Christus jussit prædicari per totum Orbem, quamque omnes amplecti tenentur, licet non omnes eam amplectantur, reverà Catholica dici debet, & est. Rursus nomen Catholici, teste Vincentio Lirinensi *Compendio* 1. nu. 2., dicitur ab universalitate nedum hominum, & locorum, sed etiam doctrinæ. Quod enim ab omnibus, ubique, & quovis tempore creditum est, & creditur, id verè dogma Catholicum nuncupatur, & quæ hujusmodi dogmata profitetur, ea verè Catholica Ecclesia est: *In ipsa item Catholica Ecclesia* (ait Lirinensis) *magis curandum est, ut id teneamus, quod ubique, quod semper, quod ab omnibus creditum est. Hoc est etenim verè, proprièque Catholicum, quod ipsa vis nominis, ratioque declarat, quæ omnia ferè universaliter comprehendit.* Cùm ergo Ecclesia, quæ modò est, sit illa eadem, quam Apostoli de Christi mandato per totum Orbem. evangelarunt, quamque omnes gentes profiteri tenebantur, & adhuc tenentur: cùm insuper eadem dogmata credat, quæ Apostoli prædicarunt, quæque ab omnibus verè Christianis ubique, & semper credita sunt: etsi nou totum orbem complectatur, neque modò ad eos fines protendatur, ad quos olim sese extendebat, adhuc

verè Catholica est. Quare sicut Ecclesia, verè Catholica erat, dùm ab initio ad solos Apostolos, aliosque paucos Hierosolymis restricta erat, quia illa, cujus fides toti Orbi annuncianda erat, quamque omnes ad salutem tenebantur amplecti; Ità nunc. Imò si Christiana fides ad unius Provinciæ angustias redigeretur, nihilominus eadem ratione Catholica esset; & Provincia, quæ illam amplecteretur, esset verè Ecclesia Catholica, quia esset illa, quam Apostoli fundarunt, cujusque doctrina ab omnibus ubique, & semper credita fuit.

Quæ solent opponi contrà auctoritatem sumtam ex Ecclesiæ Pastoribus, proponuntur, & solvantur dubio sequenti.

DUBIUM V.

De loco ab Auctoritate Conciliorum.

§. I.

Quid sit Concilium, quibus constet, & quotuplex sit.

I. **C**oncilii nomen latinum correspondet græco *Synodus*, & Hebraico *Synedrion*, & *Synagoga*. Nomen Concilii passim in scripturis legitur, Synodi verò nunquam, quod enim nobis Concilium est, in græca versione redditur, vel *Synedrion*, vel *Synagoga*. Synodus est vox græca ex voce *Sin*, idest *Simul*, & *Odos*, idest *Iter*. Unde Synodus idem est, ac *simul itio*, seu *coitio*, vel *conventio* plurium in eundem locum. Concilia porrò in Ecclesia Christi idem sunt; ac comitia in Regno. Sicut ergo ad comitia soli Optimates, ac regni ministri convocantur, & accedunt. ut ferant suffragium; sic in Conciliis soli Ecclesiarum Præsules, nimirum Episcopi, sunt accerfendi, ut de rebus controversis judicium proferrant, ac sententiam ferant.

II. Hoc dico, ut obstruam os Pro-

te.

testantibus, qui ad suas Pseudo-Synodos admittunt quoscumque viros doctos, etsi laicos, eisque jus inesse, votum, ac sententiam in rebus fidei ferendi, asseverant; Contrà quos fusè oppositum ostendi in *Versa Christi Ecclesia* to. 1. cap. 11. §. 5., & suo loco iterùm dicam. Is enim est Hierarchicus ordo à Deo statutus, tum in veteri Lege, tum in nova, ut sicut de temporalibus Principes, ac Reges, ità de spiritualibus Præsules Ecclesiæ judicent, ac Sacerdotes. In veteri quidem, nam *Deuter. 17.* dicitur, *si dissimile, & ambiguum apud te iudicium esse perpexeris... venies ad Sacerdotes Levitici generis... sequerisque sententiam eorum, nec declinabis ad dexteram, neque ad sinistram.* Hinc Aggei c. 2. v. 12. interrogat Sacerdotes legem. Et *Milach. 2. v. 7.* *Lahia Sacerdotis custodient scientiam, & legem requirent de ore ejus, quia Angelus Domini exercituum est: ergo in rebus fidei, & religionis iudicium Sacerdotum expectabatur.* In nova item, doctrinam fidei & morum ab Episcoporum, & Sacerdotum labiis, & iudicio pendere testatur D. Paulus *Ephes. 4. v. 11.* dicens: *& ipse dedit quosdam quidem Apostolos, quosdam autem Prophetas, alios verò Evangelistas, alios autem Pastores, & Doctores &c.* Quo loco Paulus cum Apostolos, Prophetas, & Evangelistas quasi in tres classes distribuisset, Pastores tamen, & Doctores reipsà prudenter coniunxit, ut iidem in Ecclesia esse, qui pascere, & qui docerent, intelligerentur. Hinc *Act. 20.* idem Paulus v. 28. *Attendite, inquit, vobis, & universo gregi, in quo vos Spiritus Sanctus posuit regere Ecclesiam Dei: & hoc, ut populum continerent in fide, quam eis annuntiaverat, nec sinerent, eum decipi à lupis rapacibus, & perversa loquentibus, quos prædicit venturos, ut abducant discipulos.* Item 1. ad *Timot. cap. 3. v. 4.*, sicut & ad *Titum cap. 3.* scribens, utrique dat monita pro pascendo grege bonis moribus, & suam

Tom. I.

doctrinà, pro vitandis hæreticis &c. sciebat ergo Paulus, omnia hæc, quæ ad mores fermandos, & sanam fidem tuendam spectant, Episcopis munus esse: uterque enim Episcopus erat, Timotheus quidem Ephesiorum, Titus verò quasi Metropolitæ super omnibus Ecclesiis Crete.

III. Quapropter *act. 15.* tradit Lucas, quòd cum venissent Paulus, & Barnabas, & quidam alii Hierosolymam, suscepti quidem sunt ab Ecclesia, quæ erat Hierosolymis; sed cum ventum esset ad quæstionem *v. 6.* *convenierunt, ait, Apostoli, & Seniores (Presbyteri) videre de verbo hoc: non dixit, convenit omnis Ecclesia.* In eo concilio locutus est Petrus, & Jacobus, Barnabas, & Paulus; tacuit autem omnis multitudo. Concilii litteræ, seu Acta ab Apostolis, & Presbyteris destinata fuerunt, nomen Apostolorum, & Seniorum præferentia, ut ibidem legitur. Hujus Concilii, apud Chriianos primi, normam secuta sunt subsequenter seculorum Concilia, in quibus solis Episcopis, ac Presbyteris jus ferendi iudicium, ac formandi decreta concessum est. Interfuere quidem aliquibus Conciliis Imperatores, Reges, Principes, Senatores, alique ex laicis, non tanquam iudices, aut suffragium ferendo, aut sententiam, sed ut Protectores, pacis, & securitatis Conciliorum custodes. Hoc pacto interfuere Conciliis Constantinis Magnus, Marcianus, alique, & meritò quidem. Cum enim in dubium venit, quænam pascua sint ovibus permittenda, quæ contrà vitanda, Pastorum ea consultatio est, non ovium; Imperatores autem, Reges, ceterique Laici in Ecclesia oves sunt, non Pastores. Rursus solvere quæstiones circa fidem exortas, & expleto iudicio ligare fideles ad credendum, cælumque claudere detestantibus, non quorumcumque est, sed eorum tantum, quibus ligandi, & solvendi facultas concessa est, & quibus traditæ Claves Regni Cælorum sunt; at

R

at

at huiusmodi Potestas, huiusmodi Claves solis Episcopis, & Sacerdotibus tradita sunt: ergo solis istis traditum est jus in Conciliis ferendi sententiam. Sed hoc satis.

IV. Conciliorum quatuor sunt genera; quædam enim sunt Generalia, quædam Nationalia, quædam Provincialia, quædam Diocesana. Generalia dicuntur ea, ad quæ Episcopi totius Orbis convocantur; inde enim dicuntur OEcumenica, idest orbis terræ Concilia. Licet autem ad hæc omnes totius orbis Episcopi convenire teneantur, si impediti non sint; non tamen est necesse, ut omnes omnino totius orbis conveniant, sed sufficit, ut ex qualibet orbis parte, saltem præcipua, adsint aliqui. His nemo rectè præsidet, nisi Summus Pontifex, aut alius ejus nomine.

V. Nationalia dicuntur ea, quibus interesse possunt, & debent Archiepiscopi, & Episcopi unius Regni, vel Nationis. His præsidet aliquis, vel Patriarcha, vel Primas: & talia sunt multa Concilia Romana, Toletana, & Africana, quæ aliquando vocantur provincialia, aliquando etiam generalia, seu universalia. Provincialia quidem, quia certis Provinciis illius Regni, aut Nationis continentur: Generalia verò, non absolute, sed in illo Regno, vel Natione.

VI. Provincialia dicuntur ea, ad quæ conveniunt Episcopi Provinciæ, quibus Metropolitanus, sive Archiepiscopus præest. Horum plurima in tomis conciliorum leguntur.

Diocesana verò ea sunt, ad quæ accedunt tantum Presbyteri unius Diocesis, Episcopo Præsidente. Hæc vix nomen Concilii merentur, cum demto Episcopo nullus ordinariè in eis sit, qui jurisdictione polleat.

VII. Hac divisione posita, & omnium assensu probata, emergit alia Conciliorum divisio, sive Generalium, sive Nationalium, sive Provincialium, sive Episcopalium, seu Diocesanorum, in Concilia congregata à Romano Pon-

tifice, & non congregata: in confirmata ab eodem, & non confirmata. Nam Concilium Ephesinum II. auctoritate Leonis Papæ coactum est quidem, sed nec ab ipso, neque ullo Summo Pontifice confirmatum. Basileense quoque Eugenius IV. indixit, nec tamen confirmavit; At Constantiense, quamvis à principio nullius Romani Pontificis auctoritate congregatum fuerit, illud tamen Martinus V. confirmavit. Et in Concilia nec congregata, nec confirmata, quorum aliqua sunt, vel in totum, vel quoad partem reprobata, alia, nec approbata, nec reprobata. His suppositis.

§. II.

Dua priores resolutiones.

VIII. Dico primò. Concilium Generale, quod auctoritate Romani Pontificis, nec congregatum est, nec confirmatum, argumentum Theologo præbere non potest. Probat. primò, quia in fide errare potest: sicut de facto erraverunt cum Ario Concilium Ariminense sexcentorum Episcoporum, cum Dioscuro Ephesinum, secundum Constantinopolitanum trecentorum Pontificum cum Leone Imperatore. Probatur secundò, sicut Comitia alicujus Regni nulla sunt, nullius auctoritatis, imò suspecta, quæ nec à Rege convocata sunt, nec approbata; ita Concilia totius Christiani orbis nulla erunt absque auctoritate illius, qui in Christiano Orbe Caput, & Rector est; atqui hic est Romanus Pontifex, ut suo loco dicitur; ergo &c. Hinc Julius I. Romanus Pontifex ad Orientales Antiochiæ congregatos scribens, doliuit, quoddam contra Canones ipsum ad Synodum non vocassent: cum Ecclesiasticâ regulâ interdictum sit, ne præter sententiam Romani Pontificis quidquam ab Ecclesiis decernatur. Ità Socrates lib. 2. *hystor. Eccles.* cap. 17. Quod idem referens Sozomenus lib. 3. *hyst.* cap. 10. exprimit his

his verbis Julii querelam: quod prater Ecclesiam leges ipsum ad Synodum non vocassent. Legem enim esse Pontificiam, ut pro irritis habeantur, qua prater sententiam Episcopi Romani fuerint gesta. Et D. Athanasius ex integro Julii epistolam referens, *Apolog. contr. Arianos*, Julium refert argumentum Orientales, qui Athanasium damnaverunt his verbis: *An ignoratis, hanc esse consuetudinem, ut primum nobis scribatur, & hinc, quod iustum est decernatur? Sane, si qua huiusmodi suspicio in illius Urbis [Alexandrinæ] Episcopum [Athanasium] cadebat, ad hanc Ecclesiam illud rescribendum fuit. Nunc autem illi, & nobis non indicata, posteaquam, quod libuit, egere, nos, qui-bus ea criminis explorata non sunt, sibi suffragatores esse volunt. Nequaquam talia sunt Pauli statuta, non hac Patres tradiderunt: sed aliena est ista forma, novum hoc institutum. Nullum, ergo erat quarto seculo, quia contra statuta Patrum, quod non erat Romani Pontificis Apostolica Auctoritate firmatum. Quæ autem Julius scribebat, à B. Petro Apostolo se accepisse, assererat. Subjungit enim: *Nam quæ accepimus à B. Petro Apostolo, ea vobis significo.* Videndus Gratianus plura Roman. Pontificum dicta in hac materia congerens *dist. 17.* Sed nedum Romani Pontifices id sibi asseruerunt; Verùm & Concilia ipsa tale jus in ipsis noverunt. De quo videnda Synodus VII. *act. 6.*, & VIII. *act. 1.*, & 7.; Et Concilium Lateranense V. sub Leone X. *sess. 11.*, ubi hoc, & asseritur, & probatur.*

IX. Dices, Confirmare, & approbare superioris est, non inferioris; sed Pontifex Romanus non est superior Conciliis Generalibus, sed inferior; ergo &c. minor probatur. Concilium Constantiense *sess. 4. 5.*, & ultimâ definivit, Concilium esse supra Papam, quod & Concilium Basileense confirmavit *sess. 33.*, addens, hæreticum esse, qui hoc negaverit.

Respondeo negando min., de cuius

falsitate suo loco fusiùs agetur. Ad prob. De Concilio Constantiensi multa dicenda essent. Nunc verò dicam, Concilium illud eo tempore, quo formavit illud decretum, non fuisse universale, & integrum. Erat enim tunc schisma in Ecclesia sub tribus Pontificibus Joanne XXIII., Gregorio XII., & Benedicto XIII., quorum nullus erat legitimus, & ab universali Ecclesia acceptatus. Illud coegerat Joannes XXIII., sed timens, ne Papatum abdicare cogeretur, jam aufugerat, & cum eo ejus factionis aliqui recesserunt. Aberant Gregorius XII., & Benedictus XIII., & qui pro illis stabant. Quomodo ergo generale, & integrum erat Concilium, cui decrant duæ Ecclesiæ partes? Nec refert, quod Martinus V. in eo Concilio electus illud approbaverit, nam Martinus approbavit omnia à Concilio statuta in materia fidei contra hæreticos Jo: Wicleffum, Hieronymum de Praga, & Joannem Hus: approbatio enim illa, ad petitionem Oratoris Regis Poloniæ facta est, qui hoc tantum exigebat, ut acta in concilio contra hæreticos confirmarentur. Insuper Martinus in dicta approbatione dicit, se omnia conciliariter facta approbare, & non aliter, nec alio modo: eo autem tempore, quo factum illud decretum *sess. 4. & 5.*, nihil adhuc conciliariter gestum erat; nondum enim fuerant delecti viri docti ad disserendum, & tractandum illa, quæ in fidei doctrina essent constituenda; Hi enim, fuere delecti postea *sess. 6.* Hoc autem requiritur, ut aliquid conciliariter dicatur fieri, & ut decretum Concilii omnes obliget, maxime in re tam ardua, qualis est subiectio Summi Pontificis Concilio. Demum dico, decretum illud, si bene perpendatur, non esse generale, & absolutum, sed restrictum ad circumstantias illius temporis, & relatè ad Papas illos dubios, quorum nullus erat ab Ecclesia universali acceptatus; & ideo bene dicit, quemlibet, etsi Papali dignitate insi-

gnitum, teneri obedire, idest quemlibet ex illis tribus. Et ideo addit obedire teneri, nedum in his, quæ pertinent ad fidem, sed ad extirpationem dicti schismatis. Quis autem unquam in dubium vocavit, nullo existente in Ecclesia Papæ certo, & acceptato, quemlibet, etsi Papam se jactet, Concilio Generali teneri parere? hinc electo, & ab omnibus approbato ut certo, & legitimo Papæ Martino, fuit ab eo postulata Concilii approbatio. At cur hoc, si Papa esset subiectus, & teneretur obedire Concilio Generali?

Ad id, quod dicitur in Concilio Basileensi, quis ignorat, illud fuisse quidem in principio legitimum, cum fuerit auctoritate Eugenii IV. congregatum, at in conciliabulum postea degenerasse, cum Eugenius ab eo recedens, illud transfudit Ferrariam, deinde Florentiam? Cum ergo decretum de superioritate Concilii ad Papam factum fuerit post Eugenii recessum, nullius momenti esse debet. Hinc

X. Dico secundò. Concilium Generale, etiam auctoritate Romani Pontificis congregatum, ab eo tamen non approbatum, certum argumentum prebere non potest. Concilium itaque Generale potest carere Pontificiâ approbatione, vel in toto, vel in aliqua sui parte. Si careat in totum, ex nulla ejus parte potest certum sumi argumentum: Si verò solum careat in aliqua parte, ex illa parte non probatà certò argui nequit. Hoc apertè ostenditur. Nam in fide errare potest: & de facto erravit Concilium Basileense, de quo supra, dum hæreticum declaravit, qui negaret Concilium esse supra Papam; & tamen licet post ea tempora aliqui neaverint, & negent, Concilium esse supra Papam, nullus adeò audax (ne dicam insanus) fuit, qui contrarium tenentes, ut hæreticos traduceret. Erravit etiam Concilium Ephesinum secundum, ubi Legatis Leonis Papæ repugnantibus, Episcopi ferè omnes Diocòri hæresi

subscribere; ut constat ex S. Leonis litteris ad Theodosium, & ad Pulcheriam Augustos datis, & Concilio Chalcedonenſi insertis. Id confirmant Synodus VIII. *actio. 7.*, Nicolaus I. *ad Michaelè Imperatorem*, & Eugenius IV. *in decreto super unionè Jacobinorum*, quo, postea quàm Ephesinam secundam Synodum sub Leone congregatam condemnavit, quæ videlicet Eutychiano errori consensit. *Suseipit*, inquit, (Sacra Romana Ecclesia) *omnes alias universales Synodos auctoritate Romani Pontificis legitime congregatas, ac celebratas, & confirmatas*. Non dixit *congregatas* solum, sed *celebratas, & confirmatas*. Et Jure quidem merito. Nam ut in præcedenti conclusionè statuimus, nullum concilium ratum est, aut fuit, quod Romani Pontificis non fuerit auctoritate munition; at quamvis Concilium sit, edicente Pontifice coactum, si tamen decreta in eo facta non fuerint ab ipso probata, & dogmata confirmata, vel potius ipse, vel ejus Legati repugnarunt, tum certè Synodus non est flicita Apostolicâ auctoritate. Non igitur rata, & firma erit, aut idonea, ut ex ea fidem faciamus.

§. III.

Resolutio præcipua de Concilio congregato, & confirmato auctoritate Papæ.

XI. Dico tertio. Concilium Generale congregatum, & confirmatum auctoritate Apostolicâ Romani Pontificis certam fidem facit Catholicorum dogmatum. Hoc assertum, quod Catholicis omnibus usque adeò exploratum est, ut oppositum censeant hæreticum, non placuit Luthe-
ro, qui *lib. de Conciliis* propterea docuit, nullum esse Concilium quantumvis Generale, aut quantacumque auctoritate probatum, quod à Verbo Dei recedere non possit, & proinde errare in fide, & moribus. Luthe-
ro scri-

scripsit Calvinus *lib. 4. Instit. c. 9. §. 8.* In hanc sententiam conveniunt hi duo Hæretici: quod pleraque ex dogmatibus, quæ propugnabant, quæque falsæ suæ reformationis sunt fundamenta, jampridem à Conciliis Generalibus damnata viderent, cernerentque brevè iterum damnanda in Concilio Tridentino, quod contra illos Paulus III. convocarat. E contra Catholici omnes in hoc asserto conveniunt.

XII. Et probatur primò. Nam Conciliorum Generalium infallibili auctoritate sublata redibunt omnes hæreses ab illis damnatæ; Symbolum quoque Nicenum erit ambiguum. Secundò, & si Concilium Generale congregatum, confirmatum auctoritate Apostolica, deviare potest à veritate, nulla supererit via ad finiendam certè religionis negotia, & fidei controversias: non Concilii Generalis judicium, hoc enim (ut ajunt) infirmum est, & errare potest: non judicium solius Summi Pontificis, hoc enim execrantur. Quem ergo vivum Judicem inveniunt, à cujus tribunali discedere fas non sit? Si dicant superesse Sacram Scripturam. At Scriptura, cum nec sentiat, nec intelligat, nec eloqui judicium valeat, indiget Interprete, qui ejus verum sensum exponat. Quis ergo erit vivus Judex, de cujus sententia dubitari non possit? Lutherus, Calvinus, ac similes? At unde certi erimus istorum judicium certum esse, si judicium omnium Episcoporum in Concilio congregatorum incertum est, & ambiguum? Et cujus ex duobus judicio stabimus? Lutherus clamat, hæc verba, *hoc est Corpus meum*, propriè, & litteraliter accipienda. Zuinglius, Calvinus è contra, figuratè. Cujus sententiæ acquiescemus? Num idem dicere potuissent Arius, Nestorius, & quotquot retroactis seculis damnati fuerunt Hæretici, nimirum, ut effugerent sententiam Concilii, recurrendum ad scripturam, & standum interpretationi ab ipsis affixæ; & ita face-

re se Judices in propria causa?

Judex ergo vivus in Ecclesia statuendus est, & is erit, quemadmodum *Deuter. 17.* scriptum est, Summus Sacerdos cum Concilio Sacerdotum; aliàs Conciliorum fide rejecta, Scripturarum quoque bonam partem amittemus. Nam si quis Libros Sacros, de quibus olim dubitatum fuit, è catalogo expunxerit, per Scripturam certè lis finiri non potest. Cujus ergo judicio stabimus certi, si Canones Sacrorum Librorum editi à Conciliis, vel Summis Pontificibus dubii, & suspecti esse possunt? Vivi ergo Judices constituentur, oportet. Si enim Pastorum judicium declinans, ad aliud Tribunal provocet, nil aliud facies, quàm Ecclesiæ declinatis judicibus, quos Spiritus Sanctus posuit regere Ecclesiam Christi, confugere ad judicium merè humanum, & pro divinis humanos substituere. Quoscunque enim, præter Pastores, Judices elegeris, humanà, ac incertà auctoritate pollebunt.

XIII. Rursus, vel fidelis populus tenetur stare definitioni Concilii, vel repugnare potest. Si tenetur, jam errante Concilio, populus in eodem errore versabitur, sicque Christus pessimè providisset Ecclesiæ suæ, imò promissa non implevisset, quibus Spiritum suum perpetuò in ea mansurum, ut eam omnem doceret veritatem, & se cum ea futurum omnibus diebus usque ad consummationem seculi pollicitus est, ut dubio præcedenti expendimus. Si repugnare potest, & super statuta à Concilio instituire examen; ergo populus Judex fiet supra sententiam Pastorum. Quod si sententia Pastorum infirma esse potest, quo sententia populi certa probabitur? quid stultius, quàm quòd oves regere, ac ducere presumant Pastores? Rursus. Ubi nam illud erit Christi effatum *Luce 10. 16. Qui vos audit, me audit: & qui vos spernit, me spernit. Qui autem me spernit, spernit eum, qui misit me?* Ubi illud alterum *Matth. 23. v. 2. & 3. Super*

Super cathedram Moysi sederunt Scribæ, & Pharisei: Omnia ergo quaecumque dixerint vobis, servate, & facite? ubi notanda illatio illa ergo, quasi dixerit: etsi Scribæ sint, & Pharisei, idest in vita, & moribus corrupti, si tamen sedent in Cathedra Moysis, & ex ea vobis loquuntur, sequitur infallibiliter, eos non errare, & faciendam esse omnia ea, quæcumque dixerint.

XIV. Ajunt. Si quæcumque dixerint, ea facere jubemur, cur dicit Christus *Matth. 16. v. 6. Cavete à fermento Phariseorum: idest non à fermento panum, sed à doctrina Phariseorum*, ut exponitur ibi *v. 12.*? Cur rursus *Matth. 15. v. 3. & 9.* vocat eos *docentes doctrinas, & mandata hominum*, eorumque traditiones etiam proprio exemplo contemnere docuit? Possunt ergo Pastores loqui, & Legem Dei, & sua. Si legem loquantur, audiendi erunt, si sua, & de suo, spernendi. Quod non obscure interpretatus est Augustinus *tract. 46. in Joannem*. Et Hieronymus *in eap. 7. Matthæi* super illis verbis *v. 21. Non omnis, qui dicit mihi Domine &c. sicut supra [inquit] dixerat, eos, qui haberent vestem vita bona, non recipiendos propter dogmatum nequitiam, ita nunc è contrariis, ne his quidem accommodandam fidem, qui cum polleant integritate fidei, turpiter vivunt, & doctrina integritatem malis operibus destruunt. Utrumque enim Dei servus necessarium est, ut & opus sermone, & sermo operibus comprobetur.*

XV. Sed respondetur dist. consequ., ergo Pastores aliqui, concedo consequentiam, omnes, nego consequ. Esto enim aliqui Pastores docere possint, quæ sua sunt, ea proponendo ut Verbum Dei, non tamen omnes. Responsio hæc est D. Augustini *tractatu 46. in Joannem* ab arguente citato. Proponens enim Paulum *Philipp. 2. v. 11.* conquerentem, se non habere, quem mittat, qui pro Philippensibus sollicitus sit, præter Timotheum omnes e-

nim, quæ sua sunt, querunt, non quæ Jesu Christi, ait, *Inter mercenarios Pastor ingemuit. Quasvovit aliquem, qui sinceriter diligeret gregem Christi, & circa se in eis, qui cum illo eo tempore fuerant, non invenit: Non enim in Ecclesia Christi tunc præter Paulum, Apostolum, & Timotheum nemo erat, qui germanè de grege sollicitus esset. Si ergo contingit, multos quidem quærere, quæ sua sunt, non tamen omnes; ita contingere potest, multos docere, quæ sua sunt, non quæ Jesu Christi, non tamen omnes; & maxime cum ad docendum populum conciliariter conveniunt. Imò & Pharisei aliud docebant, dum ex Cathedra Moysis proponebant Dei Legem, aliud, dum loquebantur ex propriis. In primo casu semper docebant veritatem, & idèd Christus dixit: *Omnia quaecumque dixerint servate, & facite.* In secundo verò, dum loquebantur sua, loquebantur fermentum, idest doctrinam non puram, & ab hac cavendum monebat Christus. Audiatur iterum S. Aug. laudato loco. *Scriba, inquit [Christus], & Pharisei super Cathedram Moysi sedent; quæ dicunt facite, quæ autem faciunt, facere nolite. Quid aliud dixit: nisi per mercenarios vocem Pastoris audite? sedendo enim super Cathedram Moysi legem Dei docent, ergo per illos Deus docet... certè enim tales sua querunt, non quæ Jesu Christi: nullus tamen mercenarius ausus est dicere populo Christi: tua quære, non quæ Jesu Christi. Quod enim facit malè, non prædicat de Cathedra Christi: inde latet, unde mala facit, non unde bona dicit. Hæc Augustinus. Ex quo sequitur, quòd Pastores Ecclesiæ, etsi mercenarii, dum tamen ex Cathedra Christi loquuntur, & verbum Dei populum docent, nunquam possint docere falsum, quia per eos Christus loquitur; & oves absque hestitatione debent eos audire, maxime dum eadem omnium sententia est. D. autem Hieronymus solum docet, ad perfectum. Dei ministrum utrumque requiri, &**

bona

bona opera, & sanam doctrinam, quod libenter concedimus: non verò quidd, etsi desit bona vita, desit etiam vera doctrina, quod negamus. Dùm enim congregantur ad res fidei decernendas, & proponendas toti Ecclesiæ, congregantur in nomine Christi, & Christus in medio eorum est, ut ipse promissit *Matthæi cap. 18. vers. 20.* Insuper Christus loquitur per illos, & tunc repræsentant totam Ecclesiam, quam se nunquam deserturum Christus sæpe pollicitus fuit. Quare prudenter Martinus V. in Concilio Constantiensis inter cætera, de quibus suspecti in fide examinandi sunt, hoc proponit. Utrum credant, quodd quodlibet Concilium Generale universalem Ecclesiam repræsentat. Si igitur Concilium Generale universalis Ecclesiæ auctoritatem habet, æquè infallibile est, ac universalis Ecclesia, ut supra probatum est; & qui auctoritatem Concilii Generalis de medio tollit, totius Ecclesiæ auctoritatem eadem operâ dissolvit. Præclare igitur D. Augustinus *lib. 1. de bapt. contr. Donatist. c. 18.* Plenarii Concilii sententiam totius Ecclesiæ consensionem vocat.

XVI. Demum Sanctus Paulus exortâ questione de legalibus, non aliam tuam viam invenit ad eam finiendam, quàm ad Concilium Hierosolymitanum eam deferre. Hanc igitur viam, quam Paulus nobis aperuit, & in qua ipse prævit, ingredi, & ipsum sequi debemus, omnesque veri Christiani eam modestiam imitari, quæ in Judæis, & in Gentilibus à Luca *Act. cap. 15.* laudatur. Poterant sanè Gentiles à Concilio expostulare, cur libertatem sibi à Christo datam eriperet, cur hæc humeris discipulorum tanquam necessaria imponerent, cum tamen minùs necessaria viderentur, cum sola in Christum fides sufficeret ad salutem. Judæi etiam opponere poterant Scripturam *Gen. 17. v. 14.* dicentem: *masculus, cujus præputii caro &c.* Ità fortè respondissent Lutherus, & Calvinus, si eo tempore fuissent. At

non ità Gentiles, & Judæi conversi: audito conciliaris decreti exordio *Visum est Spiritui Sancto, & nobis,* tantum honoris illi detulerunt, ut absque ulla cunctatione paruerint. Quod fecerunt Apostoli, fecit subsequenter seculis Ecclesia. Cur ergo si illi Conciliorum exemplari divinus adstitit spiritus, non credatur adfuisse ceteris? Cur si omnes ejus decreto acquieverunt, acquiescere recusant aliqui Novatores? Meritò igitur Ecclesia Catholica Conciliorum Generalium decreta semper accepit, atque ut hereticos habuit, qui eorum auctoritatem infirmare frustra conati sunt.

§. IV.

Solvuntur, quæ contra præcedens assertum militant.

XVII. **P**rimò obijciunt. Ad Concilia Generalia soli vocantur Pastores, Archiepiscopi, Episcopi, Cardinales; sed hi omnes possunt errare; imò & fidem amittere; ergo &c. min. prob. primò in veteri Testamento omnes de facto errarunt. *Isaia 56. v. 10.* *Speculatores ejuscegi omnes, nescierunt universi: canes muti non valentes latrare, videntes vana, dormientes, & amantes somnia.* Jeremiæ 6. v. 13. *A Propheta usque ad Sacerdotem cuncti faciunt dolum.* Secundò, tempore Dominicæ Passionis omnes Apostoli fidem amiserunt. Hoc videtur Christus innuisse *Matth. 26. v. 31.* dum ait: *Omnes vos scandalum patimini in me in ista nocte. Scriptum est enim: Percutiam Pastorem, & dispergentur oves gregis: idest ab unitate fidei solvantur,* ait glossa interlinealis. Tum quia *Lucæ 24. v. 11.* Verba mulierum renuntiantium Apostolis Resurrectionem Christi *visa sunt ante illos sicut deliramentum verba ista: & non crediderunt illis.* Hinc Christus *Marci 16. v. 14.* *Exprobravit incredulitatem eorum, & duritiam cordis, quia his, qui viderant, eum resurrexisse, non credide-*

alderunt. Quare in sola B. Virgine, fidem remansisse creditur tempore Passionis Christi: quod indicare dicunt Candelam illam, quæ cæteris extinctis, sola non extincta illis Passionis diebus in inartutinis relinquitur. Si ergo in omnibus Apostolis defecit fides, cur deficere non poterit in omnibus Episcopis, Apostolis succedentibus?

XVIII. Respond. nego min. ad primam probationem dico primò, ut supra dictum est Dub. præced. §. 3. ex Augustino *lib. de Unit. Eccles. cap. 13.*, morem esse Scripturarum sic arguere aliquos malos, ac si omnes essent mali, & sic commendare aliquos bonos, ac si omnes essent boni. Sic Paulus ad *Philippenses 1.* ait: *omnes enim quæ sunt querunt, non quæ sunt Jesu Christi.* Et tamen, ut nuper observavi cum S. August. *tractat. 45. in Joann.* in Ecclesia Christi aderant multi, qui quærebant ea, quæ sunt Christi. Imò Paulus ipse *cap. 1.* dixerat, quoddam esse, qui annuntiabant Christum ex caritate *v. 14.* Respondeo secundò dist. mi. omnes seorsim, & distributivè sumti, concedo min. omnes collectivè, & congregati in concilio, nego minorem. Deus enim cuilibet individuo Pastori non promisit infallibilitatem, quam tamen corpori Pastorum, dum representant in Concilio totam Ecclesiam, pollicitus est, ut diximus.

Respondeo tertid. Dato etiam, quòd Pastores Ecclesiæ Judaicæ omnes errare potuerint, quia illis infallibilitas à Deo promissa non erat, non sequitur, errare posse Pastores omnes Ecclesiæ Christi, quibus ipse suum Spiritum in æternum mansurum, & seipsum in medio eorum fore, dum essent in nomine suo congregati, spondit.

XIX. Ad secundam probat. nego, omnes Apostolos Passionis tempore fidem interiùs amisisse, aliàs omnes infideles fuissent. Non enim fides semel suscepta, nisi per infidelitatem,

tollitur. Quid autem absurdus, quàm universis Apostolis notam infidelitatis inurere? quid magis injurium Christo, & Ecclesiæ? Quæ verò in contrarium adducta sunt, solum evincunt, Apostolos in fidei confessione defecisse, ut Petrum, aut etiam in fide viva, quæ per dilectionem operatur: hæc autem fuit dispersio, quam illis prædixit Christus: sicut enim percussio Pastore, timidæ disperguntur oves, sic Christo percusso, capto scilicet à Judæis, timore dispersi sunt Apostoli. Huc etiam referri potest Ritus Ecclesiasticus extinguendi omnes cereos, uno excepto, quia scilicet omnes Apostoli fidem vivam amiserunt, uno Christo excepto, in quo esto non fuerit fides, fuit tamen quiddam est perfectionis in fide, ut docet D. Thom. *3. p. quæst. 7. art. 9. ad 1.* Quamquam Rupertus *lib. de Divinis Officiis cap. 5.* asserit, extinctos cereos priores significare Prophetas à Judæis interemptos, illum autem, qui ad breve tempus absconditur, Christum in Passione occultatum. Nuncium autem Resurrectionis visum est deliramentum aliquibus Apostolis, non omnibus; Christus exprobravit incredulitatem quorundam, non omnium; unde dicitur *Matth. ultimo v. 17. Et videntes eum.* (Apostoli) *adoraverunt, quidam verò dubitaverunt:* quidam, ait, non omnes. Et certè exprobrandi de incredulitate non erant Petrus, & Joannes, qui audito nuncio cucurrerunt ad monumentum.

XX. Addit tamen Canus *lib. 4. c. 4.*: etiam si Apostoli tunc temporis fide caruissent, nihil contrà conclusionem haberetur. Dato enim, quòd omnes Apostoli fidem amiserint, ut sentit Augustinus *tractat. 103. in Joann.* Nondum tamen personam Ecclesiæ gerabant: hanc enim tunc solum gerere primò ceperunt, quando Christus *Joan. 20. vers. 21. & 22.* eis Spiritum Sanctum contulit dicens, *sicut misi me. Pater, & ego mitto vos. Hoc cum dixisset, insufflavit, & dixit eis: accipe-*

te Spiritum Sanctum, ut observat idem Augustinus lib. 3. de baptismo contra Donat. cap. 18. Si ergo tunc, cum Apostoli gerere personam Ecclesie ceperunt, Spiritu Sancto imbuti fuerunt, quo gubernati, à fide nunquam erraverunt: cur idem dicendum non erit de Episcopis, ac Pastoribus, diu in Conciliis generalibus personam gerunt Ecclesie?

XXI. At inquires. Episcopi in Conciliis congregati homines sunt; ergo poterunt utique, & fallere, & falli.

Nego enim consequentiam. Aliud enim est de humanæ naturæ imbecillitate disputare, aliud de Divina Gratia, & speciali Providentia, quæ homines cæteris fallibiles, in veritate fidei continentur; tota namque fidelium concio homines sunt: Prophetæ item, & Evangelistæ homines erant, sed quoniam Spiritum veritatis accepere, in falsam fidei doctrinam venire non poterant.

XXII. Replicabis primò. Undè constat, Conciliis promissam fuisse perpetuum, & nunquam defuturam Spiritus Sancti assistentiam? Si dixeris, ex illo Matth. 18. vers. 20. ubi enim sunt duo, vel tres congregati in nomine meo, ibi sum in medio eorum. Contrà, quia ex hoc concluditur assistentia Christi nedum Concilio Generali, sed etiam Provinciali, imò cuique pio cætui in Christi nomine congregato. Deinde unde constat, cærum esse congregatum in Nomine Christi, & legitime? Ex hominibus fidem sanam habentibus, & ea quæ facienda sunt, facere?

Secundò. Dato, adesse divinum passum, unde constat, hoc esse absolutum, & non potius conditionatum, idest, si qui Concilium componunt Episcopi non recedant à via Dei, non scandalizent populum lætæ? Quia enim hoc non implevit populus Leviticus, idè dicitur Malach. 2. v. 8. irritum fecistis pactum Levi. Non ergo præcisè ad Christi promissum attendendum est, sed ad eorum mores, an scilicet vitam dignitate concors sit.

Tem. I.

S

pro-

XXIII. Respondetur ad primam: infantiam, Promissionem factam Conciliis Generalibus de speciali Sancti Spiritus assistentia in negotiis fidei discernendis, constare ex iisdem locis, ex quibus constat, promissum fuisse Spiritum Sanctum Universali Ecclesie, quam Concilium Generale representat, nimirum Christum datum Ecclesie Spiritum Veritatis, qui suggerat ei omnia, & maneat cum ipsa in æternum, & cum ipsa futurum Christum usque ad consummationem sæculi. Quæ testimonia supra expendimus. Quare Apostoli hujus promissionis benè consci, in Concilio Hierosolymitano positi, firmarunt decretum hoc modo: *Visum est Spiritui Sancto, & nobis*. Hinc non unice talis promissio deducitur ex loco citato *Matthæi cap. 18*. Verùm, quia Innocentius 10. *dist. c. De quibus*, Synodus 6. *añ. 7.*, & Chalcedonenſis *epist. ad Leonem*, de Synodis locum illum intelligunt; ad id, quod contra opponitur, dico, locum illum probare assistentiam Spiritus Sancti, etiam Synodis Provincialibus, quando tamen congregantur in nomine Christi. Sicut autem in nomine Principis comitia coeunt, cum eius auctoritate indicuntur, & probantur; sic Concilia Ecclesiastica in nomine Christi conveniunt, cum auctoritate Christi, vel eius Vicarii coguntur. Quare (ut dicemus) sicut Concilia Provincialia coacta præter auctoritatem Romani Pontificis errare possunt, & de facto erraverunt, ut Concilium Cypriani: ita si ejus auctoritate cogantur, & decreta probentur, errare nequeunt. Christum etiam esse in medio cujusvis pii cætus in nomine ipsius, non diffitemur: non tamen semper ad docendam veritatem, cum non semper ad hunc finem congregentur, sed ad eos fines, ob quos congregantur, maxime si sint ad salutem necessarii. Specialius tamen est in medio Concilii Generalis, in quo agitur de fide totius Ecclesie, quam se nunquam deserturum aperte

promisit. Porro, ut certi simus, Concilium esse congregatum in nomine Christi, nobis sat esse debet, quod sit coactum ex ordinatis Ecclesiæ Pastoribus, auctoritate ejus, ad quem spectat, de quorum fide nobis oppositum non conitet; quamvis enim internè fidem veram non haberent, non tamen permitteret Christus, ut aliquid contra fidem decernerent, ac totam Ecclesiam in suum errorem pertraherent.

XXIV. Ad secundam instantiam dico, Christi promissiones de sua Ecclesia, & consequenter etiam Conciliis ab omni errore tuendis, esse absolutas, & à nulla conditione pendentes, constare, quia absolute illi promisit Spiritum veritatis in ea mansurum in æternum; se illi adfuturum usque ad consummationem seculi; contra eam portas inferi non prævalituras. Neque est simile de pacto inito cum filiis Levi. Pactum enim illud, sicut & cætera, temporaria erant, sicut Lex, & Sacerdotium, ac proinde aliquando omnia hæc auferenda erant, Regnum, Lex, & Sacerdotium. At Regnum Christi æternum est: *regnabit in domo Jacob in æternum* Lucæ 1. v. 32. *Lex æterna est*, Psal. 47. v. 13. *ipse reget nos in secula*. Sacerdotium æternum, Psal. 109. v. 4. *Tu es Sacerdos in æternum*. Pactum etiam æternum, Jerem. 32. v. 40. *& feriam eis pactum sempiternum*. Certum autem est, Ecclesiam sine lege, sine sacerdote, & doctore, esse sine Christo, & Spiritu veritatis; Si ergo Christi Ecclesia in æternum est mansura, manebit in ea Christus, & ejus Spiritus, & proinde etiam in Pastoribus, & Doctores, dum collecti eam representant. Licet enim iniqui essent in moribus, non deesset Spiritus Sanctus quantum ad ad gratiam gratis datam, esto non adeisset quantum ad gratiam gratum facientem, seu justificantem. Hæc enim non est necessaria, ut Pastores vera doceant, & Sacramentaificent, verique Pastores sint, nisi cum Doua-

tistis, aliisque hæreticis sentire velimus.

XXV. Obijciunt secundo. Concilium, in quo Judæi desinuerunt, Christum non esse Messiam in lege promissum, fuit Concilium Generale; constabat quippe ex Summo Sacerdote, & præcipuis Judæorum Pastoribus, ut Jo: 11., & Marci 14. colligitur: Atqui illud Judæorum concilium erravit, & quidem in re, quæ ad fidem spectabat, quæque maximi momenti erat; ergo Concilia Generalia errare possunt in rebus, quæ ad fidem pertinent.

Respondet Canus *lib. 5. cap. ultimo*, Concilium illud Judaicum firmare potius nostrum avertit, nimirum Pontifices, & Pastores, etsi malos, in conciliis sua, & à se ipsis non loqui, sed ex motione Spiritus veritatis. Cum enim post longam, variamque concilii disceptationem, Caiphas, qui, ut summus Pontifex concilio præsidebat, sententiam, cui omnes ferme consenserunt, pronuntiasset Jo: 11. v. 49. & 50. *Vos nescitis quidquam, nec cogitatis, quia expedit vobis, ut unus moriatur homo pro populo, & non tota gens pereat*. Subjecti mox Evangelista: *Hoc autem à semetipso non dixit. Sed, dum esset Pontifex anni illius, prophetavit*. Quare sit, ut si forte nostrorum Pontificum, & Episcoporum vita, & opera contraria essent Domino Jesu, eorum tamen judicia, dum sunt congregati, quæ à Summo Pontifice comprobata sunt, & vera erunt, & ad salutem utilia, ut divinitus suggesta, & ob eam causam, quam ab Evangelista didicimus; quia scilicet Ecclesiæ Pontifices sunt.

XXVI. Respondent secundò alii, Concilium illud, quamvis Generale, errasse: non inde tamen sequi errare potuisse alia Concilia Generalia Judaica anteriora, & multò minùs errare posse ea, quæ apud Christianos sunt. Erravit enim Judæorum concilium, de quo agitur; quia habitum est eo tempore, quo Judæorum Synagoga desierat esse infallibilis: infallibilitas namque

que illi concessa fuerat solum ad tempus, id est usque ad Christi adventum; tunc enim Synagoga desinere debebat, & Ecclesia Christianæ locum cedere. Eo enim tempore, quo Ecclesia Christiana cepit in Christo, ad iudicandum eum esse Messiam, Judæis non erat necessaria Synagoga infallibilitas, cum hoc ad oculum demonstrarent tot, & adeo evidentiæ miracula, quæ in luce missionis confirmationem Christus operabatur.

XXVII. Neque opponas. Etiam diu ante Christum concilia Judaica errasse, ut patet in Concilio 402. Prophetarum, qui omnes errarunt, ipso Deo protestante, se misisse spiritum mendacem in ore ipsorum 3. Reg. c. 22.

Nam respondeo primò, Prophetas illos, ut dicit ibi Scriptura, non fuisse Prophetas Domini. Deinde concilia non ex Prophetis, sed ex Sacerdotibus cohebantur, non ad indagandum futurum exitum belli, sed ad decernendum de lege. Tertiò Concilium illud ab Achab Rege, non à summo Pontifice coactum fuit; non ergo mirum, si erravit.

XXVIII. Obiiciunt tertiò Patres. Primò Gregorium Nazianzenum ep. ad Procop. dicentem: Ego, si vera scribere oportet, ita animo affectus sum, ut omnia Episcoporum Concilia fugiam, quoniam nullius Concilii finem latum, faustumque vidi, nec quod depulsionem malorum potius, quam accessionem, & incrementum habuerit.

Secundò Sanctum Augustinum lib. 2. al. 3. contr. Maximin. c. 14. Nec ego Nicenum, nec tu debes Ariminense, tanquam prejudicaturus, proferre Concilium: nec ego huius auctoritate, nec tu illius detineris &c. Insuper lib. 2. de Baptismo c. 3. asserit, concilia plenaria priora à posterioribus emendari.

Tertiò S. Leonem, qui epist. 53. ad Anatolium, & 54. ad Marianum, & 55. ad Puleberiam, agnoscit Chalcedonensem Synodum legitimam fuisse, & tamen non dubitat, ei attribueri ambitionem, & inconsultam temeri-

tatem. Ex his ergo sic discuntur: Iis ceteribus non adest Spiritus certus veritatis, quorum nullus felix est exitus, qui pro astringenda fide laudari non possunt, qui nonnunquam à posterioribus ceteribus emendantur, qui ex ambitione, & inconsultà potius temeritate, quam ex veritatis amore procedunt; talia sunt Concilia Generalia; ergo &c.

XXIX. Respondeo. Ad S. Gregor. Nazianzenum distinguendo: & loquebatur de Conciliis sui temporis, concedo: de Conciliis generatim, nego. Incidit ergo Nazianzenus in tempora inter Concilium Nicenum primum, & secundum Concilium Generale, nimirum Constantinopolitanum, quo tempore Ariana impietas grassabatur. Passim ab illis Concilia celebrabantur, & aliqua etiam à Catholicis: cumque ex talibus Conciliis nullum vidisset felicem exitum, & ad quoddam Concilium à Procopio vocaretur, desperans, ex illo aliquid boni in tanta rerum turbatione eventurum, rescripsit preallata verba. Non tamen proinde aspernatus esset Concilium plenarium, ac pacificum, si tunc obtinere potuisset. Quomodo enim aspernari poterat Concilia, qui orat. 22. Nicænos Patres dicit à Spiritu Sancto fuisse in unum coactos; & Constantinopolitanæ Synodi, in qua Macedoniani Spiritus Sancti hostes infensissimi damnati fuerunt, pars magna fuit?

Ad Augustinum dico, eum in primo loco argumentari, non absolute, sed ex suppositione Maximini, qui utpote Arianus, Concilii Nicæni auctoritas nihil deferbat, è contra autem Augustinus Ariminense, quod Maximinus probabat, execrabatur. Cum ergo ex Conciliis, quæ aliter non admittebat, nihil concludi posset, prudenter ait: nec ego Nicenum, nec tu Ariminense proferas; eumque ad rem ex Scripturis conficiendam provocavit.

In secundo autem loco dico, vel Augustinum nomine plenarii Concilii

non intellexisse Concilium Generale, sed Nationale, aut Provinciale, vel etiam Generale, & maximè si illegitimum sit, hoc enim potest per subsequens emendari, sicut Concilium Ephesinum secundum fuit per subsequens Chalcedonense legitimum emendatum. Vel loqui non in rebus, quæ ad fidem, aut mores pertinent, sed in rebus tantum, quæ sunt puri facti, aut ad meram disciplinam pertinent. Et ratio est, quia emendationem, de qua agit, docet, tunc per concilia posteriora fieri, quando experimento aliquo aperitur, quod clausum erat: Id verò locum habet solum in rebus facti, aut meræ disciplinæ, non verò in rebus fidei, circa quas locum non habet experimentum. Cæterum quantum fecerit Augustinus Concilia Generalia, ex hoc colligere licet, quoddum Cyprianum in suo errore de rebaptizandis hæreticis excusat, assert pro ratione, quoddum Causa illa nondum erat in plenario Concilio definita, cui absque dubio Cyprianus parvisset, ut videre est lib. 1. de Baptismo cap. 18., lib. 2. c. 3., lib. 2. contr. Cresconium c. 33., & alibi.

Ad S. Leonem dico, cum in Concilio Chalcedonensi damnavit ambitionis, & inconsultæ temeritatis canonem 17., eò quia ambitione Anatolii Episcopi Constantinopolitani, subdole, repugnantibus S. Leonis Legatis, promotus fuerat ille canon; & insuper continebat falsa, nimirum Romano Pontifici collatum fuisse primatum à Synodo Nicæna, & non ratione dignitatis Sedis, sed ratione antiquitatis Urbis, quare in hac parte Concilium Chalcedonense erravit, at in hac parte nec fuit OEcumenicum, quia à Romano Pontifice reprobatur.



6. V.

*Solvuntur argumenta ex præfatis
Conciliis erratis.*

XXX. **O**bjiciunt primò. In Canonibus, qui dicuntur Apostolici, nonnulli sunt errores; reprobant enim tanquam irritum, & nullum datum ab hæreticis baptisma. Can.

45.

Item in Concilio Eliberitano repertiuntur errores; nam pluribus Canonibus vetat, ne quibusdam Reis, licet ex animo penitentibus, detur etiam in ultimo vitæ discrimine Sacramentalis absolutio: quod hæresim Novatianam sapit. Item can. 35. vetat, ne Imagines in parietibus pingantur, contrarium licet usum probet Ecclesia Catholica. Præfatos autem Canones, tanquam Concilii Generalis habuit antiqua Ecclesia; nam Canonibus Apostolicis usa est tota Ecclesia Orientalis, Eliberitanis verò plures Occidentales Ecclesie.

Respondeo primò, negando, præcitos Canones editos fuisse in aliquo Concilio Generali. Qui enim Apostolici dicuntur, nil aliud sunt, quam collectio facta ex variis Synodis, quæ in Oriente per tria priora secula coacta sunt. Eliberitani verò sunt Concilii Provincialis in Hispania celebrati à XIX. Episcopis anno 313., vel potius Collectio Canonum ex Synodis illis seculis in Hispania celebratis.

Secundò respondeo, Canones dictos Apostolicos apud viros eruditos nullius esse auctoritatis, maximè ob Canonem 45. citatum, nisi fortè Canon ille intelligatur de baptismo dato non à quibuscumque Hæreticis, sed à Paulianistis, qui baptizabant non in nomine Trinitatis, quique iis seculis Ecclesiam Christi sedabant; hoc enim modo Canon ille nullum continet errorem.

Neque etiam errorem continent Canones Eliberitani. Negant enim primo

md quibusdam reis, etiam in mortis articulo absolutionem: non tamen, quia Eliberitani Patres censuerint, Ecclesiam non posse à quibuscumque peccatis absolvere penitentes, ut contenderunt Montanistæ, & Novatiani: sed disciplinæ causâ sic statuerunt, ut à quibusdam gravissimis sceleribus committendis, pœnæ adeo gravis timore custodirentur. Negant secundò, Imagines in parietibus pingi: non quia, pium earum cultum damnant: sed ne Christi, aut Sanctorum Imagines Idololatrarum ludibrio exponerentur, aut saltem, ne quibusdam fidelibus, ex gentilitate recenter conversis, essent offendiculo.

XXII. Obijciunt secundò Concilium Ephesinum secundum, quod fuit auctoritate Romani Pontificis congregatum, fuitque generale, & tamen erravit subscribendo Eutichiano errori.

Rursus Ariminense fuit Concilium Generale, tum quia constans 600. Episcopis: Tum quia ejus veluti pars erat Concilium Seleuciense, quod eodem tempore, & eadem causâ in Orientie celebrabatur. Atqui hoc erravit. Primò, erasit enim ex Symbolo vocem *consubstantialem*, quam Nicœna Synodus contra Arianos inseruerat. Secundò, quia Hieronymus *adversus Luciferianos* ait, per ipsum, Arianismum fuisse innotum in universum Orbem: *Tunc* [inquit] *Nicæna fidei damnatio conclusa est, ingemuit totus Orbis, & Arianum se esse miratus est.* Tertiò, quia Episcopi, qui subscripserunt decreto Ariminensis Synodi, præmissâ tamen facti penitentia, suis fuisse sedibus repositi: quod signum est, eos subscribendo errasse.

Respondeo, de Concilio Ephesino II. jam supra §. 2. *conclusione secunda* dictum esse, quòd fuit quidem generale, & auctoritate Romani Pontificis convocatum, non ab eo tamen confirmatum, imò reprobatum; ideòque potuit errare, & de facto erravit, ut benedicit arguens. Insuper, quæ in

Ephesino II. acta sunt, contrà ordinem, & per vim fuere ab Episcopis extorta. Primò enim Diofcorus contra canones, à Theodosio Juniore præfidentiam extorserat. Item vetuit, ne Flavianus, qui Eutichen Constantino-poli damnaverat, suffragium ferret. Insuper Episcopi, qui eidem Concilio interfuerè, assenserunt postea in Concilio Chalcedonensi, se vim passos fuisse à militibus, qui Basilicam, in qua celebrabatur Concilium, occupaverant. Alia ibi contra ordinem gesta narrat Historici. Falli ergo poterat Concilium, in quo res non secundum Canones agebantur, nec Episcoporum suffragia libera erant.

De Concilio autem Ariminensi mirum est, quòd huc producatum tanquam Concilium Generale, & legitimum. Fuit enim à Liberio summo Pontifice reprobatum, ut legitur in *epist. ejusdem ad Episcopos Macedoniarum* apud Socrat. *lib. 4. hist. e. 12.* ob quod exilium passus est, ex Socrate *lib. 2. hist. cap. 37.* Et coactum fuit dolo, & vi à Constantio Ariano; Episcopi Catholici, qui inviti illuc convenerant, fraudibus circumventi, minis adacti, subscribere coacti sunt. Uno verbo, Concilium Ariminense, totius Orbis scandalum fuit. Quid ergo mirum si erravit?

Aliqui tamen in Concilio Ariminensi distinguunt, initium, quo Concilium liberum fuit; & tunc Patres pro Nicæna fide contra Arianos pugnarunt, ut ex eorum *epistola per viginti Episcopos ad Constantium missa*, quæ refertur ex integro apud Sozomen. *lib. 4. hist. cap. 18.* & progressum. Et sanè tum minis Constantii, tum more tædio (Arimini enim detinebantur diutius, nec ad sua reverti permittebantur); tum denique Arianorum fraudibus circumventi, quòd æquum non esset, ut unius vocabuli, *substantia videlicet gratia*, omnes ubique Episcopi inter se dissisterent, ut legitur apud Sozomen. *lausatum cap. 19.* formulæ sibi oblate, Episcopi alias Catholici, con-

conferunt. Quia in re sustinent aliqui, eos non errasse in fide, animo saltem, sed solum abstinendo à voce *Usque*, idest *sustantia*, putasse tollere dissidiorum causam. Sed cum reverà, ablato *Usque* nomine, filium non amplius *eiusdem*, sed *similis* substantiæ cum Patre se fateri cum Arianis ipsi, compertum esset, in tali consensu errarunt in fidei confessione, idèque totus Orbis scandalo motus, ac miratus est. Sed de hoc satis.

XXXII. Obijciunt tertio, sextam Synodum, nimirum Concilium Constantinopolitanum III., anno 680. habitum adversus Monothelitas, fuisse verè generale, & passim vocari sextum Oecumenicum. Illi enim præfuit Agatho Papa per suos Legatos, Leo II. illud confirmavit, ut ex *eius epistola* ad calcem Concilii posita. Eique totius Orbis Ecclesiæ consenserunt. Atqui istud erravit: nam igne damnavit Honorii Papæ *epistolas ad Sergium*, & ipsi Honorio, ut hæretico anathema dixit; Cum tamen Honorius, nec hæreticus Monothelita fuerit, nec eius litteræ hanc hæresim impiant, sed solum dispensationem, vel economiam; prohibebat siquidem, ne una tantum, ut volebant Monothelitæ, aut duplex, ut asserabant Catholici, diceretur in Christo voluntas: idque cavebat Honorius, ne Monothelitæ exasperarentur animi, quos ad fidem perducendos sperabat. Quare Catholici, tum Honorii epistolas, tum ipsum Honorium ab omni prorsus hæresi liberant. Ergo &c.

In solutione huius difficultatis divisos invenio Theologos, & Eruditos. Baronius putat, Acta sextæ Synodi fuisse corrupta, & loco Theodori Episcopi Constantinopolitani intrusum fuisse Honorii nomen, & omne id, quod contra Honorium in Actis, quæ nunc habemus, legitur.

Hæc tamen responsio voluntaria videtur. Oportuisset enim, quod corrupta fuissent in decem locis, quia in totidem Honorii fit mentio. Insuper in

omnibus omnino exemplaribus, etiam in iis, quæ missa sunt ad Leonem II. Romanum Pontificem, quæque ipse confirmavit, & etiam expressè cum damnatione Honorii. Quid nec ipse, neque Legati Romæ Sedis, qui huic Synodo interfuerunt, hanc fraudem detexerint, quæ omnia incredibilia sunt. Propterea alii

Respondent cum Bellarmino, sextam Synodum de facto errasse in condemnatione Honorii, neque hoc præjudicare infallibilitati Conciliorum Generalium, quia fuit error in re, quæ est *humani facti*, non in re, quæ sit *Juris Divini*: Hoc est, quæ ad fidem, aut mores pertineat. Supponit ergo hæc solutio. Concilia etiam Generalia errare posse in quæstionibus humani facti, non verò Juris, & maxime Divini. Nec mitum (ajunt) quæstiones enim Juris dirimuntur, aut Scripturâ, aut Traditione, quæ cum nitantur Divino Testimonio, infallibilia sunt; quæstiones autem facti ex humana relatione, & judicio, quæ fallibilia sunt. Ita Bellarminus *lib. 4. de Rom. Pont. cap. 11.* concludens. *Itaque tutè dicere possumus, hos Patres deceptos ex falsi rumoribus, & non intellectibus Honorii epistolis, immeritè cum hæreticis connumerasse Honorium.*

Neque hoc est præferre judicium nostrum privatum iudicio præfati Concilii, quasi melius intelligamus nos litteras Honorii, quàm illi. Nam hoc non ex nobis dicimus: sed jam dictum accepimus à Joanne IV. in Apologia pro Honorio ad Constantinum Imperatorem Heraclii filium: ubi conqueritur de iniuria Honorio irrogata à Pyrrho, ipsum ad suum sensum trahente; à S. Maximo Martyre, primò in Dialogo cum Pyrrho; ubi Pyrrho obijcienti: *Quid habes de Honorio dicere, qui ad Prædecessorem meum scribens, unam Domini nostri Iesu Christi voluntatem apertè dogmatizavit? Respondet Sanctus Maximus: Quis epistola illius fide dignus erit interpres? Qui eam ex persona Honorii composuit?...*

An

An Constantinopolitani de corde suo loquentes? Secundò in ep. ad Marinum, quæ inter Anastasii collectanea extat, ubi vindicat Honorium à labe Hæreseos. Ab Anastasio Bibliothecario præfatione in sua ad Joannem Diaconum collectanea, ubi & Apologiam Joannis IV. pro Honorio, & Honorium ipsum strenuè ab Hæresi defendit.

Hæc responsio probabilis est. Attamen, quia cogitur concedere, quòd erraverit etiam Leo secundus, qui dictam Synodum sextam, & Honorii damnationem expressè confirmavit, & in eodem fuerit etiam errore octava Synodus: & insuper quia præbere videtur arma Jansenii Defensoribus, nimirum dicendi, Summos Pontifices damnasse multas propositiones, ut Jansenii, errore facti, vel quia in Jansenio non sunt, vel ii sunt, ad eas damnandas processisse, ex iis non benè intellectis, quod videtur trahere questionem facti ad questionem juris. Idèò ut ab hoc discurrendi more, quàm longè possumus, recedamus.

XXXIII. Tutiùs respondendum existimo, Synodum sextam iuste damnasse Honorium, non tamen ut hæreticum electione, & formalem, sed vel tanquam hæreticorum nimia contumacia fauorem, vel quia indulgentià culpabili inueneri sue Sedis defuit, & nascentem hæresim non compressit. Hæc pacto, & ab omni errore etiam in factò liberamus Synodum sextam, & Honorium ipsum ab errore in fide. Pro hæus explanatione suppono, Hæreticum dici posse dupliciter. Primò propriè, nimirum sententià, ac electione pravà, & pertinaci, quæ ad formalem hæresim necessaria esse, nemo nescit. Aliò modo latè, quo pacto præsumitur prudenter hæreticus, vel in hæresim propendens, qui cum hæreticis communicat, qui cum debeat comprimere, non comprimit, sed favere videtur, & in scriptis suis ità æquivocè, & obscurè loquitur, ut det ansam præsumendi, cum Hæreticis sentire. His fundamentis Sy-

nodus sexta prudenter judicavit, Honorium ad Monothelitarum partes accessisse. Ità probabiliter sentio, salvo tamen meliori judicio. Interim fundamenta hujus solutionis exponam. Quòd enim iustum motivum dederit Honorius sextæ Synodi, cum Monothelitam præsumendi, indicant ejus epistolæ, quarum prima relecta fuit *act. 12.*, & secunda *act. 13.* ejusdem Synodi; Ex quibus colligitur, Honorium filii jussisse Sacras duarum operationum voces, atque in hoc morem gessisse Hæreticis; qui nullum sermonem de cetero de una, vel duabus operationibus moveri cupiebant; ut scribit Sergius ad Honorium. Porro, qui voces illas usurpari vetat, quibus profligatur Hæresis, & Catholica Fides confirmatur, proculdubio Hæreticis favet. Enim verò habiti fuerunt à toto Orbe, ut supra dicebamus, Ariano- rum fautores Patres Ariminenses, quia Ariano- rum fassu à voce *Monothelitæ*, & *Uia* abstinere. Habitus etiam esset Nestorianorum fautor, qui vocem *Deipara* de B. Virgine venisset, sicut & Entichianorum, qui ex duabus, & in duabus naturis Christum subsistentem dici nolisset, vel ab his vocibus abstinendum jussisset. Hinc Synodus Lateranensis sub Martino I. iuste damnavit Eclesiæ Heraclii, & Typum Constantinensis; quia hæc edicta unam, vel duas operationes silentio compimebant, quavis errorem Monothelitarum expressè non faterentur. Cum ergo nihil minus egerit Honorius, iuste à Synodo sexta damnatus fuit. Eo pacto, quo iuste damnaretur, qui licet errorem Calvinitarum circa præsentiam Christi in Eucharistia non assereret, veteret tamen, de reali, vel solum figurativà Christi præsentia amplius loqui.

Neque simile dici debet de Sancto Basilio, qui Macedonianis indulget, ut silentium de Spiritu Sancti divinitate servaretur, quòd eos ad rectæ fidei confessionem revocaret. Nam ut scribit Sanctus Gregorius Nazianzenus

nus orat. 20. Ille in aliis quidem vocibus à Scriptura petitis, testimoniisque minimè dubiis eandem vim habentibus, necessariisque argumentis, Adversarios ita comprimebat, ut nullo modo repugnare, aut contra niti possent. Quare quod per aliquod tempus eos dispensaret à constituenda etiam voce, prudentis æconomiz fuit. Sicut prudentis æconomiz fuit, ait Gregorius, quod Judæis ad aliquod tempus pro Christo vox Uncti concederetur. At de Honorio hoc dici nequit, ut vidimus; nec enim Monothelitas aliquando compressit, aut impugnavit, nec pro geminæ operationis voce, æquivalentia vocabula substituit. Ideoque Hæreticis favere iussit vius est.

XXXIV. Quod verò Honorius ut formalis, & ex electione Hæreticus damnatus à Synodo sexa non fuerit, probant ea, quæ supra adduximus, ex apologia foen. 4., ex S. Maximo, & Anastasio Bibliothecario. Hanc autem fuisse de Honorio Concilii mentem, nullus poterit tutior interpret esse, quam Leo II. Concilii confirmator. Is enim in litteris confirmatoriis de Honorii damnatione loquens, ait: *Nec non & Honorium, qui hanc Apostolicam Ecclesiam, non Apostolica traditionis doctrinâ lustravit, sed propbanâ prodicione immaculatam maculari permisit.* Ubi non ait, *maculavit*, sed *maculari permisit*, conniventia scilicet, & favore hæreticorum; & clarius Epistolæ ad Ervigium Regem Hispaniæ de eodem argumento scribens, post relatos alios formalis hæresis in synodo sexta damnatos, subdit: *Quia cum eis Honorius Romanus, qui immaculatam Apostolicam traditionis regulam, quam à Prædecessoribus suis accepit, maculari consensit.* Et ad Episcopos Hispaniæ magis se explicans, nimirum quomodo traditionem Honorius maculari consenserit, aut permisit, ait: *Cum Honorio, qui flammam Hæretici dogmatis, non ut decuit Apostolicam auctoritatem, incipientem extinxit, sed negligendo confovit.* Non ergo

cum Monothelitis annumeratus est à Concilio Honorius, quia talis iudicaretur sententiâ, & electione; sed quia Monothelitam se exhibuerat conniventia, favore, & negligentia. Sed de hoc satis.

XXXV. Obijciunt quartò. Septimum Concilium Generale definit, pium esse cultum, qui Sacris Imaginibus exhibetur. E contra verò Concilium Francofordiense, quod anno 794. habitum est, & cui adfuerunt Legati Roman. Pontif., & 300. Occidentales Episcopi, damnavit decretum in Concilio Nicæno secundo, seu septima Synodo Generali latum de colendis Imaginibus; ergo erravit, aut Concilium Nicænum secundum, aut Francofordiense, utrumque Universale.

Respondendo, errasse errore facti Concilium Francofordiense (quod tamen Generale non fuit, cum nullus Orientalium ad illud vocatus fuerit, sed interfuerit, sed solum Nationale), non iuris, non enim dogma in septima Synodo de Imaginum veneratione statutum imponavit, sed solum in facto, quia Patres Francofordienses putaverunt, Nicænos tribuisse Sacris Imaginibus eundem Latræ cultum, qui soli Deificæ Trinitati atque tribuendus est, dicendo anathema ei, qui contrarium sentiret, ut patet aperte ex Canone secundo dicti Concilii Francofordiensis, in quo sic habetur: *Allata est in medium questio de nova Græcorum Synodo, in qua scriptum habebatur, ut, qui Imaginibus Sanctorum, ita ut deifica Trinitati servitium, aut adorationem non impenderent, anathema iudicarentur. Qui supra Sanctissimi Patres nostri omnimodis adorationem, & servitutem renuentes, contemserunt, atque consentientes condemnaverunt.* Hoc autem ex scripto mendoso Nicæni II.; quod habebant præ manibus, decepti pronunciarunt. Nicænum enim II. nufquam Sacris Imaginibus eundem, quem Deificæ Trinitati, cultum, & adorationem decrevit. Quod autem ita

stā fuerit, ex eo colligitur, quòd detecto ab Occidentalibus germano Nicenæ II. Synodi sensu, omnes Occidentales Ecclesiæ pro OEcumenica illam receperunt, ejusque definitioni de cultu Sac. Imaginum subscripserunt.

Alia Conciliorum præterita errata coarcevant Hæretici, à quibus referendis, & solvendis supercedemus, ne prolixi simus; maximè cum videri possint apud Canum lib. 5. cap. 1. & ultimo: Bellarminum lib. 2. de Concil. auctoritate cap. 8.: aliosque, qui hæc de re tractaverunt. Nos interim ad alia digrediamur.

§. VI.

Auctoritas Conciliorum non Generalium.

XXXVI. **D**ico quartò. Concilia non Generalia, non probata à Summo Romano Pontifice, certum argumentum pro fide, & moribus non faciunt, inagnæ tamen auctoritatis sunt, adeo ut temerarium sit eis non acquiescere. Prima pars probatur, quia absolutè errare possunt, ideoque non sunt prorsus infallibilia eorum judicia. Quòd si hoc diximus supra de Conciliis Generalibus à Romano Pontifice non confirmatis, multò magis de particularibus dici debet. Hujus veritatis testis est Concilium Carthaginense sub Cypriano, quod fuit nationale celeberrimum, legitimum, Episcoporum lxxxv., quorum plerique Martyres, aut Confessores erant, ut ex epistola Cypriani ad Jubajanum: & tamen erravit. Secundò, testis est quinta Synodus Romana sub Symmacho, & refertur 17. distict. c. Concilia, ubi dicitur, *Concilia Sacerdotum Ecclesiasticis Legibus quotannis decreta per Provincias, quia presentiant Papa non habent, vauitudo nem perdidit.* Quare cum Theodoricus Rex congregasset Synodum anno 501., ut de his, quæ contra Symmachum objiciebantur, judicaret;

Tom. I.

Pontifices, quibus allegandi imminabat occasio, suggererunt, ipsum, qui dicebatur impetitus, debuissè Synodum convocare: scientes, quia ejus Sedis primum Petri Apostoli meritum, vel Principatur, deinde secuta jussionem Domini Conciliorum venerandorum auctoritas ei singularem in Ecclesiis tradidit potestatem, nec prius acquieverunt, quam Theodoricus denunciasset, ipsum quoque Papam in colligenda Synodo voluntatem suam litteris demonstrasse, & litteræ exhibitæ, lectæque fuerunt. Hoc in Synodo quarta Romana dicta Palmari.

Quòd si cap. ad abolendam extra de hæreticis excommunicantur omnes illi, qui judicantur hæretici ab Ecclesia Romana, vel à Concilio Provinciali, aut Dicecesano: Ibi non est sermo de dogmate, sed de Persona. Quia licet Synodi particulares non possint constitnere, vel declarare dogmata fidei, omnes obligando, ita ut qui eis refragetur, per hoc sit hæreticus, & excommunicandus (nisi fortè id faciat ex commissione Apostolicæ Sedis, ut fecerunt Arausiana II., & Toletana I. Synodi tempore S. Leonis, & Complutenses tempore Sixti IV. Vel cum Sedis Apostolicæ approbatione, quomodo factum fuisse in Conciliis Milevitano, & Carthaginensi, testatur D. August. epist. 90. 91. 92. 93. modo 175. 181. 176. 181. Vel materia adeò sit facilis, & clara, ut in ea doctores conveniant, quomodo Concilium Antiochenum judicavit olim de hæresi Pauli Samosatani apud Eusebium lib. 7. hist. cap. 17. &c.: Cujus judicium à Dionysio Rom. Pont., & tota Ecclesia acceptatum fuit.) Possunt tamen judicare de Persona, nimirum, an aliquis incidit in hæresim manifestam, ipsumque declarare excommunicatum. Ad quem finem collectum fuisse creditur Concilium Aquileiense tempore Ambrosii, ubi nil aliud definitum fuit, nisi Palladium quendam verum esse Arii discipulum. Quod judicium, esto non sit prorsus infallibile, suffi-

T

cit

cit tamen ad excommunicandum.

XXXVII. Quodd verò Concilium particulare, non expressè confirmatum, faciat argumentum aded probabile, ut temerarium sit ei non acquiescere, planum est, tum excitato canone *ad abolendam*, ubi Lucius III. declarans eos, qui iudicati fuerunt hæretici à Concilio particulari, esse excommunicandos, indicat, ex illo non leve argumentum pro fide sumi posse. Tum, quia Concilia particularia perrard in fide falluntur (licet falli possint) quare ex innumeris, quæ à secundo seculo celebrata sunt, excepto Concilio Africano sub Cypriano in materia rebaptizandi hæreticos, vix ullum invenitur legitime coactum, quod erraverit in dogmate: at ex iudicio, quod raro contingit falli, potest non leve duci argumentum: Si enim aliquot Sancti Patres casu in aliquam sententiam convenientes faciunt argumentum probabile, quantum magis plures Episcopi simul convenientes, & invocato Spiritu Sancto aliquid communi consensu statuentes? Propterea plurima istiusmodi Concilia ut Toletana, Bracarenſia, Arelatenſia, & alia videntur ipso usu Ecclesiæ quodammodo probata; & Concilia ipsa OEcumenica de Conciliis Localibus honorificè locuta sunt. Unde Synodus septima *act. 3.* in litteris synodicis Theodori Patriarchæ Hierosolymitani, *Locales* (inquit) *autem Synodos non aversemur, sed magis amamus, amplectimur, & recipimus, earum etiam divinitus inspiratas Canonicas constitutiones, correctiones, & utiles earum leges summa observantia colimus.* Synodus etiam octava *act. 10. canone 1.* Sanctiones Ecclesiæ ab Orthodoxis OEcumenicis, & Provincialibus Conciliis acceptas, servandas, & custodiendas decernit.

XXXVIII. Dico quintò. Concilia Particularia à Romano Pontifice approbata certum præbere possunt Theologo argumentum: etenim in fide, & moribus errare non possunt. Hanc

licet aliqui, nondum declarati Hæretici, inficiuntur, tenendam tamen sic existimo, ut oppositum temerarium, erroneum, & hæresis proximum iudicem. Quod, dum de auctoritate Romani Pontificis sequenti dubio agam, conabor ostendere. Si ergo Summus Pontifex in decernendis iis, quæ fidem, ac mores spectant, errare non potest, certè nec Concilium, quamvis exiguum, ab illo comprobatur. Secundò, si hæc conclusio esset incerta, multorum hæreticorum damnatio incerta esset, atque iterum revocari posset in dubium hæresis Pelagianorum, Priscillianistarum, Joviniani, & aliorum, quæ à solis Conciliis particularibus damnatæ fuerunt. Nec enim factum est, nec fieri expedit, ut singulis Hæreticis condemnandis singula Generalia Concilia convocentur. Cum ergo Deus Ecclesiæ suæ in necessariis prospexerit, nimirum de medio ad hæreses in privatis Provinciis confutandas, Concilia Provincialia factis erunt, si erunt modò auctoritate Summi Pontificis roborata. Hinc Priscillianus refutatus fuit in Concilio Toletano primo firmato à Leone II.; Helvidius in Concilio Thelenſi firmato à Siricio III.; & Pelagius in Conciliis Milevitano, & Carthaginensi confirmatis ab Innocentio I., & tandem à Zosimo. Unde D. Prosper in Chronico: *Concilio* [inquit] *apud Carthaginem habito 214. Episcoporum, ad Papam Zosimum Synodi decreta perlata sunt, quibus probatis, per totum Mundum hæresis Pelagiana damnata est.* Imò D. Augustinus lib. 2. de *retract. cap. 50.*, eam hæresim scribit fuisse damnatam ab Innocentio, & Zosimo, cooperantibus Africanis Conciliis. Verba ejus sunt: *Posteaquam Pelagiana hæresis cum suis Auctoribus ab Episcopis Ecclesiæ Romana, prius Innocentio, deinde Zosimo, cooperantibus Conciliorum Africanorum litteris convicta, atque damnata est &c.*, videndus S. Doctor *epist. 190.*, alias 157. ad *Optatum*, & *epist. 194.*, alias 105. ad *Sixtum*,

tum, quàm honorificè de Sedis Apostolicæ judicio loquitur. Item lib. 2. contr. duas epist. Pelagian. c. 3. apertè dicit, quòd in causa contra Pelagium, litteris beata memoria Papa Innocentii de hac re dubitatio tota sublata est, & ferm. 2. de Verb. Apostoli, nunc ferm. 231. cap. 10. Jam enim de hac causa duo Concilia missa sunt ad Sedem Apostolicam: inde etiam rescripta venerunt. Causa finita est: utinam aliquando finiatur error. Audiant ergo, qui ultra judicium Romani Pontificis, aliud judicium postulant. Sed hos pressius alloquemur sequenti Dubio.

§. VII.

De Concilio Generali per Legatos Rom. Pont. celebrato.

XXXIX. Quæres primò. An Concilium per Legatos Summi Pontificis celebratum firmam, certamque habeat auctoritatem, priusquam accedat Romani Pontificis confirmatio?

Respondeo negativè. Superest enim adhuc ille, pro cuius fide Christus rogavit; ille nimirum, ad quem fidei summa tandem referenda est, ut dicebam nuper. Quare nisi definitiones Conciliorum, eorum etiam, quæ per Legatos Summi Pontificis celebrata sunt, probentur, confirmenturque, ut omnino certæ, ac indubiæ haberi non debent. Nam Legatus Pontificis aderat Concilio Basileensi, cum in secunda, & tertia sessione vehementer erratum est, ac errori cæterorum Legatus ipse consensit, ac subscripsit. Ratio autem est: quia Summus Pontifex nec transfert, nec transferre potest in Legatos suæ fidei soliditatem, quam sibi soli privativè vindicat, eò quòd Christi Vicarius est, Pastor Ecclesiæ Universalis, soli enim Petro dictum fuit, dum dicitur: Ego rogavi pro te: tu autem confirma fratres tuos. Sicut non potest in alium transferre, & alterum delegare, ut sit Christi Vi-

carius, Petri in fide, & Sede successor, Pastorque Universalis; ita nec, ut in fide habeat firmitatem.

XL. At dices. Concilium per Legatos Papæ celebratum repræsentat Ecclesiam Universalem, ut statutum est à Martino V. in fine Concilii Constantiensis; imò adest etiam per Legatos ipse Rom. Pont., qui est Ecclesiæ Caput. Quid ergo ei deest, ut habeat omnimodam firmitatem?

Ut respondeam huic instantiæ, suppono ex Mag. Cano lib. 5. cap. 5., ex quo Bellarm. l. 2. de auct. Conc. c. 11., Legatos aliquando mitti ad Concilium cum instructione Sedis Apostolicæ, ut factum legimus in Concilio IV. VI. & VII.; aliquando sine instructione, ut factum est in Concilio Tridentino. Cujus ratio est, quia in præfatis prioribus Conciliis una tantum quæstio tractanda, & definienda erat; & idèò facile poterat Papa mentem suam, & S. Sedis suis Legatis aperire. At in Tridentino tot quæstiones agitandæ erant, & tam varix, ut non posset instructio præmitti.

Suppono secundo, quatuor modis contingere posse, ut fiat Concilii Generalis definitio. Primò, ut Patres definiant, dissentientibus Apostolicæ Sedis Legatis... & hoc modo consistat, Concilia errare posse, sicut de facto errasse Concilium Ephesinum II., dum repugnantibus Sancti Leonis Legatis, definire voluit, superius vidimus.

Secundo, ut Patres definiant, consentientibus Legatis, sed contra instructionem Papæ agentibus: & hoc modo etiam Concilium potest errare, & de facto erravit Concilium Constantinopolitanum, sedente Nicolao I., cum contrà Papæ instructionem egerint, ut ex epistolis ejusdem Nicolai ad omnes fideles, & ad Michaelem Imperatorem datis, quibus omnia ibi acta rescindit, eò quòd Legati ipsius instructionem illis datam examinandi, & referendi tantum, decernendo ex-
cesserint. Ratio autem est, quia non possunt dici legitima Concilia, quæ

cum suo Capite pignant, & quando consentiunt Legatis agentibus contra mandatum; tunc enim Legati non agunt ut Legati, & nomine, & auctoritate Pontificis. Dùm enim Legatos mittit, non intendit dare eis auctoritatem, nisi agant secundum sibi præscriptas regulas, ut protestatur Agatho in *epist. ad Imperatorem*, quæ lecta fuit in sexta Synodo añ. 4. *Licentiam* (inquit) *eis, sive auctoritatem dedimus..... simpliciter satisfaciendi, in quantum eis duntaxat injunctum est; ut nihil profectò præsumant augere, minuire, vel mutare; sed traditionem hujus Apostolicæ Sedis, ut à prædecessoribus Apostolicis Pontificibus instituta est, simpliciter enarrare.*

Tertiò, Concilii definitio potest fieri consentientibus Patribus, & etiam Legatis, sed qui certam instructionem de mente Sedis Apostolicæ non habuerunt, & talis definitio non habet certam auctoritatem, quousque per Summum Pontificem non fuerit approbata. In hoc ergo sensu, & casu procedit supra data responsio ob rationes ibi allatas, & insuper, quia firmitas omnimoda Concilii nascitur ex conjunctione Corporis Ecclesiæ cum Capite ipsius, quæ in casu nondum habetur; non enim Legati sciunt, quænam sit Pontificis mens. Quare Concilium Basileense *sess. 2.* una cum Legato, communi consensu statuit, Concilium esse supra Papam, quod certè nunc judicatur erroneum à saniori, & majori Ecclesiæ parte. Eò vel maxime, quia si potest errare Concilium, quando aliquid definit contra instructionem Papæ; ergo potest etiam errare, quando nulla habetur instructio, cum possit contingere, quodd ejus definitio repugnet menti Pontificis.

Quare ad instantiam ab initio propositam, distinguo antecedens: Concilium &c. repræsentat Ecclesiam Universalem imperfectè, conced. antec. : perfectè, nego antecedens: repræsentat quippe corpus, sed nondum repræsentat perfectum, idest cum Capite. Et si

autem adit aliquomodo Pontifex per Legatos, non tamen adit ut sententiam ferens; dùm enim mittit Legatos non instructos, mittit eos non ad nomine suo ultimatè decernendum, sed solum ad referendum. Quare nisi accesserit ejus judicium, Concilium non censetur absolutum, nec perfectè repræsentans Ecclesiam Universalem.

XLII. Quod si opponas, Concilium Generale, cui Legati præfunt, in Spiritu Sancto congregatum esse: insuper anathema pronunciare contrarium sentientibus, etiam ante Papæ confirmationem.

Respondeo, utique Concilium tale esse in Spiritu Sancto congregatum, non tamen constare illi adesse Spiritum Sanctum judicantem, nisi judicium corporis comprobetur à judicio capituli, cui Spiritus Sancti infallibilis adfinitia promissa est, dùm pro Petro Christus rogavit, ne fides ejus deficeret. Quare et si major pars Concilii aliquid statuat, non erit credenda Spiritus Sancti sententia, nisi per Summum Pontificem confirmetur. Dùm verò Concilium dicit anathema, debet intelligi, si fuerit à Pontifice approbatum, vim suam habiturum; sicut quando Judex, à quo appellari potest, fert sententiam mortis in aliquem, intelligitur, illum debere mori, nisi Princeps sententiam retractet.

XLIII. At dubium est, num, quando Concilium decernit, consentientibus omnibus cum Legatis habentibus, & sequentibus Papæ instructionem.

Cui respondeo, tunc tale Concilium fore indubie auctoritatis, quia tunc adit expressus consensus capituli, & membrorum, & consequenter totius Ecclesiæ. Dùm enim Concilium consentit cum Pontificis sententia, formaturque à Legatis nomine Pontificis, tunc incipit esse sententia definitiva, & ultima, non solum Concilii, sed etiam Pontificis, loquentis per suos Legatos in Concilio, neque potest illam retractare; Nam certò intelligit, sententiam suam esse à Deo, quando à

Con-

Concilio approbatur: unde S. Leo *epist.* 63. ad Theodoretum. *Qua* (inquit) *Dominus noster prius ministerio definiebat, universa fraternitatis irretractabili firmavit assensu, ut verè à se prodire ostenderet, quod prius à prima omnium Sede formatum, totius Christiani Orbis iudicium recepisset, ut in hoc quoque Capiti membra concordent &c.* Hinc in Concilio Chalcedonenſi *act.* 3. cum Patres iudicio S. Leonis circa depositionem Dioscori consensissent, mox Legati ipsius Paschasius, Lucentius Episcopi, & Bonifacius Presbyter pronuntiaverunt sententiam his verbis: *Unde Sanctissimus, & Beatissimus Archiepiscopus magna, & senioris Roma Leo, per nos, & per presentem S. Synodum, unà cum ter Beatissimo, & omni laude digno Beato Petro Apostolo, qui est petra, & crepido Catholica Ecclesia, & recte fidei fundamentum, mandavit cum Episcopatus dignitate, quin etiam, & ab omni Sacerdotali alienavit ministerio.* Quod si in *epist.* ad S. Leonem, quæ habetur 3. p. c. 2. ejusdem, Concilium petit à S. Leone confirmationem, exprimit, se illum petere eorum, quæ definierat præter Pontificis sententiam. E contra verò S. Leo rescribens *Concil. part.* 3. *cap.* 14. indicat, non fuisse opus suâ confirmatione, in rebus Fidei à Concilio statutis, nisi quia maligni aliqui dubitabant, an reverà cum ejus consensu decretum Concilii factum fuisset. Quâ ratione Pontifices confirmarunt multa alia Concilia, & decreta per Legatos ex sui sententia facta; non quia errare possent, & egerent ad firmitatem suâ confirmatione, sed, ut omnibus certius constaret, quæ Legati egerant, ea verè ex mandato Pontificis egisse.



§. VIII.

De Patribus Concilii.

XLIII. **Q**Uæres secundò. An Patres Concilii verè Judices sint, an potiùs consiliarii?

Martinus Lutherus in *assert. articulorum art.* 28. & 29. Potestatem judicalem in definiendo adimit, non solum à Pontifice, sed etiam à Conciliis, sed vult, solum Judicem scripturam esse, ità ut cuique liberum sit, à statuto Concilii iterum ad Scripturam accedere: *Scripturam* (inquit) *volo iudicem esse Conciliorum.* Quod si etiam dicerem cuilibet pro libidine licere Concilii resistere, restè dicerem. Et adducit Panormitanum dicentem: *Plus esse credendum uni privato fideli, quàm toti Concilio, aut Pape, si meliorem auctoritatem, vel rationem habeat.* Hunc secutus est Calvinus *l. 4. inst. c. 9. §. 7. & 8.*, & hæc est doctrina Protestantium, ut evadant Conciliorum statuta contra ipsos militantia, ac si privatus homo plùs sciret, ac melius Scripturam intelligeret, quàm tota Ecclesia in Concilio representata. Idèque in horum sententia Patres Concilii, nec Judices sunt, nec Consiliarii saltem tuti, sed eorum inquisitio cuiuscumque criterio adhuc subijci poterit. Optima sane via ad excutendum omne obedientiæ iugum, necnon effreni licentiâ omnia subvertendum.

Alii verò, quos suppresso nomine refert Cinus *lib.* 5. *cap.* 5., sentiunt, Conciliorum auctoritatem, non in iudicanda, & finienda causa fidei, sed in quærenda, & investiganda veritate sitam esse. Omnem quippe iudicii vim ad unum Ecclesiæ Principem eundemque Christi Vicarium revocant, qui fidei causæ decernendæ, eò vel plures, vel pauciores in Concilium adhibet, quò causâ, vel gravior, vel faciliior est.

Co-

Contra primos ergo respondeo, confesum Episcoporum in Conciliis esse verum, & ultimum in causis fidei iudicem, nec eorum decreta esse ulterius examinanda, sed debita obedientia illis esse parendum, & probo. Si enim *Deuteron. 17.*, qui dubia habebant, Deo iubente, recurrere debebant ad Sacerdotes, & ad Iudicem, qui fuerit illo tempore, querere ab eis, qui indicabunt iudicii veritatem, facere quodcumque dixerint, & docuerint, sequi sententiam, non declinare ad dexteram, neque ad sinistram, indicâ pgnâ mortis ei, qui noluerit obedire, ut legitur ibi *v. 9. 10. 12.* & *11.* Cur non idem facere debet Christianus? maxime, quia Christus *Matth. 18.* confirmans legem præfatam *Deuteronomii Matth. 18. v. 17.* dicat, quod si non audierit, dic Ecclesie; & si Ecclesiam non audierit, sit tibi velut Ethnice, & Publicanus. Non dicit, ut sententia Ecclesie privato iudicio examinetur, num ad normam legis pronunciata sit. ut volunt Novatores.

Rursus. Consideremus primum Concilium Apostolorum, quod cæterorum exemplum esse debet. Ibi non ex scripturis, sed ad suffragia Apostolorum quæstio definita fuit. Ibi Apostolorum sententia non fuit permixta examini discipulorum, sed simpliciter imperatum fuit, ut obedirent, ut *act. 15.* & *16.* Ibi decretum Apostolicum fuit vera lex obligans in conscientia. Ibi sententia Concilii fuit sententia Spiritus Sancti: *Visum est Spiritui Sancto, & nobis.* Cur non idem dici debet de subsequentibus Conciliis legitime congregatis, & de quæstionibus in iis propositis, & definitis? cur novo examini reducendæ sunt, & à quibus? à quocumque privato, ac si privati sententia præferenda esset sententia Concilii, & Ecclesie, & Ecclesia in Concilio errare posset, privatus verò non posset?

XLIV. Sed inquit. Solus Paphnutius vir laicus liberè restitit, & prævaluit Concilio Nicæno Primo volenti

prohibere usum uxorum Sacerdotibus; ut referunt Socrates *lib. 1. cap. 8.*, & Sozomenus *lib. 1. cap. 13.* Cur ergo idem contingere nequit?

Respondetur variè à doctioribus. Primò, incertam esse hanc narrationem ex silentio Eusebii, Athanasii, Epiphani, Ruffini, & aliorum. Secundò, Paphnutius erat unus ex Episcopis in Concilio sedens, restitit ante definitionem Concilii, non post eam factam. Solùm optavit, ne interdiceretur usus uxorum iis, qui eas habebant, Sacerdotibus, tamen hortatus est Synodum, ut severè interdiceret Sacerdotibus, ne post sacram ordinationem uxorem ducerent. Hæc testantur Socrates, & Sozomenus: cur ergo Lutherani, & Calvinistæ exemplum Paphnutii jactant, & ejus sententiam non sequuntur, dum ipsi uxores ducunt, etsi Sacerdotes, & Monachi fuerint?

Addo, Concilium decrevisse planè oppositum ejus, quod isti ex Paphnutio referunt. Nam *can. 3.* statuit, ne in domibus Sacerdotum sint ullæ feminae præter matrem, sororem, & amitam; addere debuisset uxorem, si eam Sacerdotibus permittebat. Dicendum ergo cum Epiphano *heresi 59.*, esse contrà canones, ut Sacerdos, aut Diaconus, aut Subdiaconus liberos gignat. Sed hoc alibi locuti sumus.

Contra secundos verò respondeo, Episcopos in Concilio sedentes, non merè Consiliarios esse, sed Judices. Eodem enim modo ibi sedent, sicut Apostoli in Concilio Hierosolymis habito; at isti fuerunt Judices, non puri Consiliarii, *Visum est* (inquiunt) *Spiritui Sancto, & nobis.* Sicut ergo Spiritus Sanctus consiliarius non est, ita nec fuerunt Apostoli, nec sunt Episcopi eorum successores. Hinc sententiæ Episcoporum in Conciliis non vocantur consultationes, sed decreta, statuta, sanctiones, definitiones, ut legenti Conciliorum acta constabit. Præterea in Conciliis adhibentur etiam docti Theologi ad examinandas, & discuti-

tiendas quæstiones, & consiliandum; ergo si Episcopi nil aliud faciunt, pares erunt Theologi cum Episcopis in ferenda sententia, quod tamen est inauditum: soli enim Episcopi sententiæ Concilii subscribunt. Rursus. Non solus Romanus Pontifex, verum reliqui etiam Episcopi potestatem ligandi, & solvendi a Christo acceperunt; ergo in causa fidei omnes præceptum imponunt, omnesque simul sententiæ Synodalis auctores sunt: *Visum est* (inquiunt) *Spiritus Sancto, & nobis nihil ultra imponere vobis oneris*. Non ergo solus Petrus, sed omnes Apostoli decretum Synodale formarunt.

XLV. Dices. Si ita est, nimirum quoddam omnes Episcopi in Concilio sint Iudices, Summus Pontifex tenebitur in ferenda sententia maiorem partem iudicium sequi, eorumque doctrinam approbare. In omni enim recto tribunali, is qui præest plurium iudicium confirmare debet. Quid ergo si maior pars erraret, ut contingere potest? Contigit hoc in Concilio Ephesino II., ubi maior pars errori Eutichetis subscripsit.

Respondeo negando sequelam. Esto enim Præses, qui non est supremus, teneatur maioris partis sententiam approbare, non tamen Præses, qui supremus est. Is enim iudicium maioris partis, si sibi videatur iniustum, retractare potest, ut in comitiis aliqujus Regni sæpè accidit, ubi Princeps rescindit aliquando acta, esto à maiori parte statuta. Cum ergo Summus Pontifex sit in Ecclesia Supremus, non tenetur maioris partis sententiam amplecti. Imò sive pauci, sive multi ad errorem deflexerint, manus est Apostolici Antistitis eos ad veram fidem revocare, juxta illud, quod Petro dixit Christus. *Ego rogaui pro te, ne deficiat fides tua, & tu, non unum, aut alterum, sed sive paucos, sive multos confirma fratres tuos*. Hinc Damasus Papa scribens ad Episcopos per Illyricum constitutos, numerum Concilii Ariminensis magnam

libertate contempsit, eique tantæ multitudini unum Vincentium, aliosque paucos opposuit, qui contrà illius Concilii sententiam dixerunt. Et S. Leo *epist. 51. ad Anatolium*, qui decretum Concilii Chalcedonenensis de Ecclesiæ Constantinopolitanæ Primatu sexcentorum triginta Patrum consensione firmatum narrabat. *Quasi* (inquit) *refutari nequeat, quod illicitè voluerit multitudo..... nulla subivit de multiplicatione congregationis concilia blandiantur &c.* Videndi in hac materia Turrecremata summ. de Eccles. lib. 3. c. 63. 64., & Canus lib. 3. c. 5. *quisito 2.*

§. IX.

Auctoritas Concilii relatæ ad Sacram Scripturam.

XLVI. **A**lia quæstio ex hæcenus dictis emergit. Si enim Concilium Summi Pontificis auctoritate firmatum Spiritu Sancto regitur in fidei causis iudicandis, eius ergo definitiones ad Sacram Scripturam pertinebunt, vel saltem pariter erunt auctoritatis cum Sacra Scriptura; hæc enim talis dicitur, quia Spiritu Sancto astante scripta est.

Respondeo, Sacræ Scripturæ majorem esse auctoritatem, quàm Conciliorum etiam Generalium. Pro cuius intelligentia observo, multiplex esse discrimen inter Scripturam Sacram, & Conciliorum decreta.

Primum, quoddam Sacra Scriptura est Verbum Dei immediatè revelatum, & Deo inspirante, & quasi loquente scriptum, juxta illud 1. Petri 1. 21. *Spiritu Sancto inspirati locuti sunt sancti Dei homines*, & 2. ad Timoth. 3. v. 16. *Omnis Scriptura divinitus inspirata &c.*, quia Sacris Scripturibus, vel nova quædam, & antea eis incoenita revelabantur, vel Deus immediatè inspirabat ad scribendam ea, quæ videbant, vel audierant, eosque dirigebat, ne aliquomodo errarent. At

Con-

Concilia non scribunt immediatas Dei loquentis revelationes, nec decreta. Concilii sunt Verbum Dei: sed potius declarant, quodnam sit Verbum Dei, & ex Verbo Dei scripto, vel tradito suas conficiunt definitiones, quæ ex conformitate cum Verbo Dei suum pondus, & auctoritatem accipiunt. Ex quo formatur hæc discussio: id majoris auctoritatis est, propter quod, & ratione cujus Conciliorum decreta, & Pontificum definitiones firmitatem, & auctoritatem habent, juxta Philosophicum axioma: propter quod unumquodque tale, & illud magis; sed Conciliorum decreta, & definitiones Pontificum suam firmitatem, & auctoritatem habent ex Verbo Dei, quia nimirum secundum Verbum Dei pronunciant: ergo Sacra Scriptura majoris auctoritatis est, quam decreta Conciliorum.

Secundum discrimen, quod ex hoc primo oritur est, quod Scriptores Sacri non debuerunt multum laborare, in suis libris edendis, sed tantum sibi revelata scribere, vel revocare in memoriam, quæ videant, vel audierint: Concilia verò debent rem ipsam disquirere, discutere disputando, legendo, inquirendo; unde in l. Concilio adl. 15. magnam legimus factam fuisse conquisitionem. Quare cum dixerunt: *Vidimus Spiritui Sancto nostram industriam, & disquisitionem adjuvantem, & dirigenti*. Porro Scriptores Sacri soli Deo tribuunt ea, quæ scribunt, unde sequebantur ajunt dicit Dominus, & de suo nihil ponunt, nisi forte sermonem, non sensum.

Tertium discrimen est, quod in Scriptura nullus potest esse error, si ve agatur de fide, si ve de moribus, si ve assumentur aliquid generale, & toti Ecclesiæ commune, si ve aliquid particulare, & ad unum tantum hominem pertinens. Tam enim certum de fide est Christum fuisse passum sub Pontio Pilato, quam neminem si-

ne gratia Christi posse salvari; Cùm utrumque eadem Scriptura verissima testetur. At Concilia in judiciis particularibus, & in quæstionibus facti errare possunt.

Quantum, quod in Scriptura nemini sententiæ, sed etiam verba omnia, & singula ad Fidem pertinent. At in Conciliis licet de fide sint definitiones, non tamen disputationes, quæ præmittuntur, aut rationes, quæ adducuntur, neque ea, quæ ad explicandum, aut illustrandum adferuntur, sed sola decreta, & hæc non omnia, sed ea tantum, quæ tanquam de fide proponuntur.

Denique, quod Scriptura non eget approbatione Pontificis, ut sit authentica, sed tantum, ut innotescat ejus auctoritas. At Concilia etiam legitima, & generalia, non sunt certæ, ac indubie auctoritatis, nisi sint à Pontifice confirmata, ut vidimus.

XLVII. At dices. Gratianus Divi Augustini testimonio confirmatus 19. *distin.* cap. in *Canonicis* Summorum Pontificum epistolas decretales, canonicas scripturas dicit; cur ergo non etiam Conciliorum decreta?

Resp. negando antecedens. Nec enim Gratianus, nec D. Augustinus hoc dixere, sed solum in judicando quænam Scripturæ sint canonicæ, videndum esse, quid Catholicæ Ecclesiæ sentiant, atque ex potissimum, quæ vel Sedes Apostolica fuerint, vel ad quas Apostolica litteræ directæ fuerint. Videatur Gratianus *cit. loco*, & Augustinus *lib. 2. de Destr. Christ.* cap. 8. Vel si hoc Gratianum dixisse credimus, ut tertio arguens; vel ex codice depravato Augustini quod habuit ad manus Gratianus, contigisse credendum est; vel nomine Scripturæ Sacræ, & Canonice non intellexisse Gratianum Scripturam Divinam, sed Scripturam Sacram, ut à profana distinguitur, in quo sensu etiam Innocentius III. de celebrat. *Missa*. Cum *Marta*, ait, Scripturam Sacram asserere, quod injuriam facit

Mar-

Martyri, qui orat pro Martyre. Ubi Scripturam Sacram usurpat pro Scriptura alicujus Sacri Doctoris; tale enim dictum in nulla Scriptura Divina reperitur. Sic cum D. Gregorius *lib. 2. epist. 24.* dixit, se venerari quatuor prima Concilia, sicut quatuor libros Evangeliorum, *ly sicut* sumendum est non secundum æqualitatem, sed similitudinem, eo modo, quo dixit Christus *Mattb. 5. vers. 48. Estote perfecti, sicut Pater vester Cælestis perfectus est*, quia sicut Evangelia infallibilis veritatis sunt, ita & Concilia, licet in inferiori gradu.

XLVIII. At instabis. Fides Catholica nihil credit, nisi quod est à Deo revelatum; sed Conciliorum decreta tenemur certa tenere secundum fidem; ergo sunt à Deo revelata; ergo sunt Scriptura Canonica.

Secundò. Secundum aliquos in Scripturis Sanctis non omnia verba sunt à Deo dictata, sed Scriptor Sacer aliqua interfert de suo, licet Spiritu Sancto ipsum dirigente, idèque Sacer Scriptor aliquando excusationem facit, si non diserte, & ornatè scripsit, ut patet in Audore 2. libri Machab. c. 15. v. 39. Ergo cum similiter decreta Conciliorum sunt ab homine de suo sententiam proferente, dirigente tamen Spiritu Sancto, dici poterunt paria cum Scripturis Canonicis, & Divinis.

Respondetur ad primam instantiam disting. min., tanquam novæ revelationes, nego min., tanquam explicationes eorum, quæ Apostolis revelata fuerunt, conc. min. Duplex genus definitionum considerari potest in Conciliis. Unum earum, quæ sunt Theologicæ Conclusiones, quoniam vel ex duabus præmissis de fide, vel ex una de fide, & altera naturali certò colliguntur: & istæ spectant ad fidem solum mediata, & qui eas negaverit hæreticus erit, quia ex consequenti censetur negare principium, unde inferuntur. Alterum verò earum, quæ concernunt res immediatè à Deo

Apostolis, Evangelistis, aut Prophetis revelatas: & istæ immediatè de fide sunt, & ut tales habendæ; non quia novæ revelationes sint, sed quia sunt explicationes eorum, quæ Deus jam revelaverat, licet non ad eò clarè; nec quia Ecclesia sic definit; sed quia Deus illas dixit.

Ad secundam instantiam dico, in illa opinione adhuc esse disparitatem inter definitiones Conciliorum, & Sacros Scriptores, quod Sacris Scriptoribus, dum facta historica narrabant, esto verba, & elocutionem Deus immediatè non dictaret, tamen eis sic adfuit, eosque ita regebat, ut nil erroris, ac mendacii vel in minimo committere possent; at in Conciliis, esto Deus adfuit in rebus fidei decernendis, & in hoc error contingere non possit, in factis tamen, in rationibus, quæ ibi adducuntur, Deus non adfuit, idèque error accidere potest. Unico verbo. In Scripturis Sanctis, vel omnia verba sunt à Deo Sacro Scriptori dictata, vel omnia Spiritu Sancto suggerente, ac mentem dirigente à Sacro Scriptoris conscripta. Non ita in Conciliis.

XLIX. Inquires. Cum supra diximus, definitiones Conciliorum habere Spiritus Sancti adfuitiam, supposita tamen humanà diligentia, ac disquisitione, quis nos certos reddit, à Concilio, aut Summo Pontifice adhibitam fuisse omnem necessariam diligentiam?

Respondeo. Ille idem, qui promisit, Ecclesiæ, Conciliis, & Petro semper adfuturum, ne in fidei negotio errarent, promisit etiam, se non defuturum, quin in tali negotio omnis necessaria diligentia adhiberetur. Quemadmodum enim si Christus dixisset Petro: ego rogavi pro te, ne deficiat caritas tua, certò certius intelligeretur promississe, aut ei impetrasse diligentiam, curam, vigilas, preces, ceteraque auxilia opportuna, quæ ad caritatem conservandam sunt necessaria; ita, cum dixit: ego rogavi pro te,

ne deficiat fides tua, procul dubio intelligimus, id eum à Patre suo consecutum, ut quæ ad rectum fidei iudicium oportere, ea adessent Petro omnia, quæ sive à Deo, sive ab Homine expectarentur; sicut si Deus in sequentem annum frugum abundantiam polliceretur, statim intelligeremus, homines, ut oportet, semina terræ mandaturos. Vide Canum lib. 3. cap. 3.

DUBIUM VI.

De Loco ab Auctoritate Summi Pontificis.

§. I.

Aliqua prænotantur.

I. **L**ocum ab Auctoritate Ecclesiæ, & Conciliorum prænotamus. Nunc locum ab Auctoritate Summi Pontificis, in quem auctoritas Ecclesiæ, & Conciliorum, sicut corporis in suum caput resolvitur, & à quo accipit firmitatem, expendere aggredimur. Neque huc intendimus advocare omnes quæstiones, quæ de Summo Pontifice agitari solent, de quibus egimus de *Vera Ecclesia* tom. 2. part. 2. articul. 1., & in *Colloquiis Theologico-Dogmat. Class. 2. Colloquio 1. Gr.*, & si Deus dederit speciali tractatu complectemur. Supponimus hic, dari, & existere in Ecclesia Summum Pontificem, qui Christi vices gerat in Terris in gubernio totius Catholicæ Ecclesiæ, qui sit in auctoritate, sicut in Episcopatu D. Petri successor, & hunc esse Episcopum Romanum. De ejus auctoritate in fidei causis finiendis scorsim à Conciliis, & præviè ad consensum Ecclesiæ, esto non pro dignitate materiæ, (quod plures præstantissimi Theologi perfecerunt) saltem pro sufficienti tyronum instructione, ut fiant, quale ex ejus auctoritate trahere possint argumentum, disseremus.

Hic nobis erit concertatio non solum contra Lutheranos, Calvinistas, aliosque, qui Pontificum Romanorum decreta, constitutiones, definitiones nihili faciunt, imò probris, ac disertiis insectantur, Primum Episcopi Romani in Catholica Ecclesia auctoriter negantes; sed etiam cum aliquibus, qui se Catholicos profitentur, Primum Romani Pontificis venerantur, auctoritatem ipsius summi faciendam prædicant; sed cum ad infallibilitatem in judicandis etiam rebus fidei venit, claudicant dicentes, esse quidem infallibilem, sed accedente consensu Ecclesiæ. Cui opinioni, ne dixerim errori, quidam adeo inhæserunt, ut cum ad hanc infallibilitatem Pontificis præviè ad Ecclesiæ consensum aliquando ventum fuit, ausi sint, vocare hanc Apostolicam infallibilitatem, chimeram infallibilitatis, Potestatis Apostolicæ falsam prærogativam, illius propugnatores Monstra, Enisarios Curæ Romanæ, Monasticam cabalam &c.: ut videre est apud Matthiam à Corona tract. 2. de potest. spirituali Gr. c. 16.

Ceteri verò Theologi sanioris consilii, non adulandi animo, sed veritatis amore, sustinent, auctoritatem. Romani Pontificis esse infallibilem, dum definit circa res fidei, & dum, ut Pastor Ecclesiam universalem ex Cathedra docet, etiam extra Concilium, nulloque expectato Ecclesiæ consensu, quibus subscribimus.

§. II.

Romani Pontificis infallibilitas asseritur.

II. **D**ico. Romanus Pontifex, dum per Bullas toti Ecclesiæ aliquid fide divinæ credendum proponit, esse se infallibilis, præviè ad Ecclesiæ consensum. Igitur in Romano Pontifice separo personam à dignitate Vicarii Christi, successoris Divi Petri in Cathedra Apostolica, & Pastoris uni-

ver-

versalis Ecclesiæ. Ut Persona, homo est, sicut ceteri, fallibilis. Ut verò Christi vices gerens est, ex Cathedra loquens, tanquam Pastor, & Doctor toti Ecclesiæ aliquid, ut credendum proponit; asserto infallibilem in iudicando, nec aliud iudicium esse expectandum. In hac assertione probanda dicam primò, quod ait Christus *Joannis* 5. Judæis, qui sua oracula contemnebant v. 30. *Sicut audio, iudico, & iudicium meum iustum est*: deinde v. 39. ipsos remisit ad Scripturas *scrutamini Scripturas*. Sic Apostolica Romana Sedes iudicii sui infallibilitatem deirectantibus respondere potest: non à me iudico, sed sicut audio à Spiritu Sancto huic Cathedræ promisso iudico, & iudicium meum iustum est; quod si non vultis credere, scrutamini Scripturas.

III. Sic igitur discurre. Quod à Christo fuit Divo Petro concessum in ordine ad regimen Ecclesiæ, credendum est continuari in eo, qui illi in eodem regimine, & in eadem Cathedra succedit: sed qui in regimine, universalis Ecclesiæ Petro, sicut, & in Cathedra succedit, est Romanus Pontifex, ut modò suppono; ergo in hoc continuatur, quod pro Ecclesiæ regimine fuit Petro concessum. Atqui Petro fuit à Christo collata infallibilitas in iudicandis quæstionibus fidei; ergo hæc perseverat in ejus Successoribus. Maj. videtur certa, nam esto Privilegium Personale corrumpat extingatur Personâ, cui concessum est, Privilegium tamen reale concessum Personæ, non ratione Personæ, sed ratione officii, continuatur in omnibus in eodem officio illi succedentibus.

Tota difficultas est in minori subsumta, quam primò ostendo, ex illo *Matth.* 16. v. 18., ubi Petro, qui ipsum confessus fuerat Filium Dei vivi, Christus in præmium talis confessionis dixit, se ipsum destinasse, ut sit Petra, supra quam ipse ædificaturus esset Ecclesiam suam, contrà quam portæ Inferi non forent præva-

lituræ: *Et ego dico tibi, quia tu es Petrus, & super hanc Petram ædificabo Ecclesiam meam: & porta Inferi non prævalebunt adversus eam*. Neque hic in Petro alloquitur totam Ecclesiam: quod indicant illa verba, *ego dico tibi*, nimirum, qui me confessus es. Insuper statuit Christum, Petrum fore Petram, super quam ædificaturus erat Ecclesiam. Petra autem ista non est Ecclesia; nam si Petra esset Ecclesia, Christus ædificasset Ecclesiam super Ecclesiam. Petrus ergo fuit Petra, & Fundamentum Ecclesiæ perpetuò mansuræ, atque ita firmæ, ut inferiorum impetus non essent prævalituri contrà eam. Ergo hoc modo loquendi Petro promissit stabilitatem, firmitatem in doctrina, & iudicio inconcussam, immobilem, quæ ex ipso derivaret in Ecclesiam, cum firmitas fundamenti insinuat firmitatem in ædificium, non è contrà.

Secundò, eadem minor probatur ex verbis Christi *Lucæ* 22. v. 32. *Ego autem rogavi pro te (Petro) ut non deficiat fides tua: & tu aliquando conversus confirma fratres tuos*. Hic Christus rogavit pro Petri indefectibilitate in fide, eique commisit officium confirmandi fratres suos: quæ verba ad Petrum, non ad Ecclesiam referenda sunt; Ecclesia enim non habet fratres, sed filios. Vel ergo Oratio Christi inanis fuit, & vacua, si Petro non impetravit indefectibilitatem in fide, & in ea confirmandis fratribus: quod nullus dixerit: vel Petrus, & consequenter ejus Successores in Officio, indefectibiles in fide sunt. Audiendus hic est Jansenius Yprensis in Tetrateucho super hunc locum. Ego autem rogavi pro te, peculiariter tanquam pro capite cæterorum, per quem reliquos ad salutem adducere decrevi: ut non deficiat, id est non penitus eradicetur, & extinguatur fides tua. Nam quamvis eribrandus, & concutiendus esset usque ad negationem Christi, quam ore fecit, fidem tamen internam, quæ ad iustitiam corde creditur, non amiserit;

fit; sicut arbor folia vi tempestatis abjicit, non tamen vitam in radice permanentem, ut sentit Ambrosius in vers. 12. psalm. 43., & explicat Theophylact. Et hoc quidem personale fuit Petri privilegium, de quo August. lib. de corrept., & gratia cap. 8. Quando, inquit, rogavit, ne fides ejus deficeret, quid aliud rogavit, nisi ut haberet in fide liberrimam, fortissimam, invictissimam, perseverantissimam voluntatem? Sed, quia confirmare fratres, quod sequitur, ad Officium Pastoris pertinet, & proinde perpetuum esse debet, hinc juxta sensum antiquorum impetravit ei: & aliud privilegium, ad Successores propagandum, ut videlicet tanquam Caput Ecclesia nunquam nec ipse, nec Successores ejus in docenda vera fide deficerent.

Idem probatur ex verbis Christi Joan. 21. v. 15., ubi cum Petrum iter interrogasset, an plus ceteris eum diligeret: semel atque iterum dixit ei: *Pasce agnos meos*; tertio autem: *Pasce oves meas*. Ubi ait Jansenius praefatus: Vel per agnos hic repetitis significantur duo populi, Judaicus, & Gentilis: per oves vero Episcopi, & Pastores tanquam matres agnorum. Vel commodius Agni primo loco significant simplices fideles: Agni secundo loco (vel ovicularum, ut legitur in graeco) Presbyteros velut minores Pastores: Oves vero Episcopos. Si ergo Petrus datur Pastor agnorum, ovicularum, ovium, id est fidelium simplicium, Presbyterorum, & Episcoporum; ergo omnes debet regere, omnes ab eo doceri debent fideles, Presbyteri, & Episcopi. Quis enim dicat, Pastorem doceri, vel ab agnis, vel ab ovicularis, vel ab ovibus, aut expectandum totius gregis votum, ut judicium Pastoris firmum, ratumque habeatur? Hoc autem officium cum sit ordinarium, ac tamdiu necessarium, quandiu erit ovile, profecto iisdem istis verbis eandem potestatem omnibus Petri legitimis Successoribus tribuit. Ità claudit Jansenius.

IV. Hæc potestate definiendi, &

docendi, & interpretandi Scripturas, easque proponendi toti Ecclesiae primò usus est Petrus act. 1. v. 15., ubi legitur, & exurgens Petrus, tanquam Princeps Apostolorum, tanquam Universalis Pastor gregis dominici sibi concrediti. Quam est servidus? Quam agnoscat creditum à Christo gregem? Quam in hoc eboro Princeps est? & ubique primus omnium incipit loqui? ait Chrysost. hom. 3. in act. Deinde v. 16. Viri fratres (inquit) oportet impleri Scripturam, quam praedixit Spiritus Sanctus per os David de Juda &c. 2 ubi dictum Scripturae interpretatur de Juda. Tandem communibus suffragiis duo fuerunt statuti, Barfabas, & Matthias, datisque sortibus, Matthias in locum Judæ successus est; ut legitur vers. 23. 24. 25. 26. Ubi observo, quod licet in electione personæ Petrus vota singulorum requisivit, etsi (ut ait Chrysostomus laudato loco) solus ipse posset eligere, tamen in definiendo negotio, in Scriptura interpretanda, nullius expedat votum, nullum requirit consensum. Oportet (inquit) impleri Scripturam &c. Oportet ex his viris &c. Fieri unum ex istis &c. Quod iterum præstitit D. Petrus act. 15. v. 7., ubi dicitur: Surgens Petrus dixit ad eos: Viri fratres, vos scitis, quoniam ab antiquis diebus Deus in nobis elegit, per os meum audire gentes verbum Evangelii, & credere &c. Petrum ergo (observat Canus lib. 6. cap. 3.) peculiariter inter ceteros elegit Christus, ut eum gentes in fidei controversia non audirent solum loquentem, sed etiam crederent. Ità enim cum Petrus sententiam edixisset, tacuit omnis multitudo, Petro definienti consentiens, ut actum 15.

Quod si audire oportebat Petrum loquentem Evangelium, & credere; cur non oportebat audire Petri successorum, dum Evangelium, & Fidem loquitur Ecclesiae, quæ ex gentibus collecta est, & nullo alio expectato eidem credere? Si Petro succeditur in Primatu, ut adversarii Catholici faten-

fatentur, cur non succeditur, in infallibilitate iudicii, cum hoc Primatus, & prerogativa sit, quam Christus Petro, ut Capii Ecclesiae, implevit in bonum fratrum, idest Ecclesiae, non Personae, ut supra vidimus? Si Petri indefectibilitas ad posterum non esset translata, nec ceterorum quidem Apostolorum potestatem, & firmitatem ad succedentes Episcopos transmissam agnosceremus; Ita nunc in Ecclesia, nec in Sacerdotibus, & Episcopis collectam, ulla indefectibilitas erit: sicut omni vento doctrinae circumferemur.

V. Sanè huius rei exemplum nobis exhibet Synagoga ipsa Exodi 18., in qua statutum erat, ut minores quidem causae à Iudicibus inferioribus terminarentur; at graviores, & maxime pertinentes ad Deum, ad Iudicem Supremum referrentur. Cum enim Iethro Moysen observasset levioribus causis iudicandis nimium fatigari v. 10. *audi (inquit) verba mea, atque consilia, & erit Dns tecum.* Ego tu populo in his, quae ad Deum pertinent, ut referas, quae dicuntur ad eum: ostensasque populo ceremonias, & ritum colendi, viamque, per quam ingredi debeant, & opus, quod facere debeant. Proinde autem de omni plebe viros potentes, & timentes Deum, in quibus sit veritas... qui iudicent populum omni tempore, quicquid autem majus fuerit, referant ad te &c. Quibus auditis, Moyses fecit omnia, quae Iethro suggererat. Quae Moyses instituerat, apud Hebraeos perdurarunt. Huc respicit illud Deuteronomio 17., ubi praecipitur, si quid ambiguum fuerit &c. adiuvens esse Sacerdotes, & Iudices, & sciendum quidquid ipsi dixerint, & qui superbiebat nolens obedire mandato Sacerdotis, qui pro eo tempore ministraverit Domino, morte moreretur. Haec fuit forma, apud Synagoga, ut omnes causae graviores, & maxime legem spectantes ad unum Supremum Iudicem Sacerdotem deferrentur, cujus iudicio

standum erat sub mortis poena. Quem Iudicem in suis iudiciis indefectibilem fuisse, comprobatur exemplo Cayphae, qui etsi impius, protulit tamen sententiam contra votum Concilii, quae vera fuit; & hoc, quia cum esset Pontifex, non à semetipso, sed spiritu prophetico locutus fuit. Si ergo hoc in Synagoga provisum fuit, ut omnes referrentur ad unum Supremum, qui non à seipso sententiam, sed Spiritu Divino afflante sententiam proferebat, cuius sententiae standum erat: cur credemus, minori providentiā cautum esse à Christo in Ecclesia sua, ut esset unus Supremus, ad quem omnes fidei causae ultimum deferrentur, cuiusque iudicio ab omnibus standum sit, cum non minus sit necessarium? audiat igitur D. Bernardus ep. 188. scripta ad Episcopos, & Cardinales, qui sunt in Curia Romana, ostendens, ad ipsos pertinere, errores Petri Abailardi suffocare. *Sic enim (inquit) praecipit Moyses, cum montem subijt [Exod. 24. v. 14.] Habebitis inquit Aaron, & Hur vobiscum: si quid natum fuerit quationis, referetis ad ipsos... & quoniam pro Hur, & Aaron stat zelus, & auctoritas Romanae Ecclesiae super populum Dei; ad ipsam meritò referimus, non quationes, sed lusiones fidei, & injurias Christi: Patrum probra, atque contemptus, praesentium scandala, pericula posterorum.*

VI. Quid si dixeris, ex typo, & figura non sumi idoneum argumentum: memineris, omnia, quae in veteri delineata reperies, ad speciem Ecclesiae, cuius Synagoga fuit continua figura, referenda esse. Ceterum dico, nuperrimè non fuisse nos argumentatos ex typo, aut figura, sed à minori ad maius. Incredibile enim est, Synagoga pro componendis de fide, lege, & religione controversiis unum Iudicem à Deo auctore habuisse, quae tamen minori pretio habebatur, aique in una tantum gente restringebatur; & Ecclesiam majoris digni-

gnitatis, quæque ex tam variis nationibus, linguis, ingeniis, & institutis coalescit, talem Judicem, ad quem controversias deferat, cujusque judicium sequi teneatur, non habere.

Nec dicas, habere Concilia. Nam ista non ita facile convocari possunt, obstitentibus sæpe Principibus, bellis, aliisque incommodis, quæ nonnisi morâ temporis superari vix possunt. Preterea, ut supra ostendimus, Concilia, nisi sint Summi Pontificis judicio comprobata, nullam in rebus fidei firmitatem habent. Insuper Christus Ecclesiam voluit monarchicè regi. Eam unus ipse fundavit, super unum, idest supra Petrum, ædificavit, uni, idest Petro dixit, ut confirmaret fratres suos, uni, ut pasceret oves suas, & agnos; cur ergo eam ad Aristocratiam trahere conantur?

VII. Inquires primò contra dicta. Sicut Petro dicitur, *super te ædificabo Ecclesiam*, ita idem de aliis Apostolis dictum est, *Ephef. 2. v. 20.* Fideles dicuntur *superædificati super fundamentum Apostolorum, & Prophetarum. Apoc. 21. v. 14.* Idem dicuntur *fundamenta duodecim sunt nomina Apostolorum.* Imò ipsa Ecclesia 2. ad *Timoth. 3. v. 15.* vocatur *Columna, & Firmamentum veritatis.* Item Apostolis, & Episcopis dicitur *Act. 20. v. 28.* *Vos Spiritus Sanctus posuit Episcopos regere Ecclesiam Dei.*

Secundò, dum Christus Petrum alloquebatur, restat ostendere, Christum allocutum fuisse solum Petrum, & non potius in Petro totam Ecclesiam, cuius Personam gerebat Petrus, & consequenter infallibilitatem in judicando immediatè esse in Ecclesia, mediatè vetò in Summo Pontifice. Vid. D. Aug. ser. 85., aliàs 13. de Verb. Dom.

Respondéo ad primam instantiam, aliter dici fundamentum ædificii Ecclesiastici Petrum, aliter Apostolos ceteros. Hi enim sunt fundamentum ratione doctrinæ, & prædicationis. Pe-

trus autem est fundamentum neddum ratione doctrinæ, quam sicut cæteri prædicavit, sed ratione jurisdictionis ordinariæ, quam loco Christi lapidis angularis, & fundamenti primarii, exercet in Ecclesia, eam gubernando, & in doctrina Apostolorum, & Prophetarum fratres continendo, & confirmando. Et quidem, si non obstante, quòd cæteri Apostoli fundamenta vocentur non minùs, ac Petrus, adhuc subsistit in Petro singularis prærogativa Primatus, non solum ordinis, sed jurisdictionis, ut auctores Catholici, cum quibus hic agimus, admittunt; cur non subsistet etiam specialis prærogativa infallibilitatis? Ecclesia dicitur columna, & firmamentum veritatis. Fateor. Sed qui, insurgente in ea aliquo errore contra fidem, eam continet in veritate, Petrus est, & qui Petro succedit. Item Spiritus Sanctus posuit Apostolos regere Ecclesiam Dei: non singulis tribuendo auctoritatem Supremi Capitis in Ecclesia Universalem, aliàs rueret in Petro dignitas Supremi Capitis, & Pastoris, quam adversarii supponunt: sed singulos posuit regere Ecclesias particulares, quas ut Episcopi fundabant; vel si sermo sit de tota Ecclesia: posuit eos regere auctoritate extraordinariâ, quam singuli ut Apostoli habebant ad effundendum Evangelium per Orbem universum, non ad eam gubernandam tanquam Caput jurisdictionis. Audiendus est Cyprianus lib. de unit. Eccl. *Super illum unum ædificat Ecclesiam suam, & illi pascendas mandat oves suas; & quamvis Apostolis omnibus post resurrectionem suam parem potestatem tribuat, & dicat: sicut misit me Pater, & ego mitto vos, accipite Spiritum Sanctum: si cui remiseritis peccata remittuntur illi: si cui tenueritis, tenebuntur: tamen, ut unitatem manifestaret, unam Cathedram constituit, & unitatis ejusmodi originem ab uno incipientem sua auctoritate disposuit: Hæerant utique & cæteri Apostoli, quod suis*

fuit Petrus, pari consortio pradi, & honoris, & potestatis, sed exordium ab unitate proficiscitur. Primatus Petro datur, ut una Christi Ecclesia, & Cathedralis una monstretur: & Pastores sunt omnes, sed grex unus ostenditur, qui ab Apostolis omnibus unanimi consensione pascatur. Audiendus etiam est D. Hieronymus lib. 1. advers. Jovin. At dicis (inquit) super Petrum fundatur Ecclesia, licet id ipsum in alio loco super Apostolos omnes fiat, & cuncti Claves Regni Caelorum accipiant; & ex aquo super eos Ecclesia fortitudo solidetur: tamen propterea inter duodecim unus eligitur: ut Capite constituto, schismatis tollatur occasio. Testibus ergo istis Patribus appareat differentia inter Petrum, & ceteros Apostolos. Quamvis argumentum ex Apostolis nec contrariis faveat, nam si Episcopos cum Apostolis comparemus, cum isti infallibiles essent in docendo, nedum simul congregati, sed etiam sigillatim iuncti, dicere tenerentur, non solum Episcopos conciliariter congregatos esse infallibiles, sed unumquemque illorum. Dicendum igitur est, infallibilitatem in multitudine ab unitate proficisci, ut statuit Christus; non autem infallibilitatem in uno originem trahere à multitudine.

Ad secundam instantiam, dato, quod supponit arguens, & videtur esse mens D. August. loco citato, dist. antec.: cuius Personam gerebat tanquam Caput, quod designabatur ad eam regendam, conc. antec., aliter nego. Erat ergo tunc Petrus gerens Personam Ecclesie, vel significans Ecclesiam, sive Populum Christianum, ut dicit D. August. loco citato; sed in Petro significabatur etiam unitas Ecclesie; unde D. Augustinus ibi unus (inquit) pro multis dedit responsum, unitas in multis; & infra, Petrus (inquit) Ecclesia figuram portans, Apostolatus Principatum tenens &c. Ergo Petrus significabat Ecclesiam, sicut Rex gerit figuram Regni, quod regit, sicut Princeps ditionis sibi com-

misit, sicut unus, ad quem multitudo debet referri. Cum ergo causæ Regni, ditionis, Populi, multitudinis debeant referri ultimæ, non ad multitudinem, sed ad unitatem, non ad Comitiam, sed ad Regem, ad Principem, cuius iudicio standum sit; ideo causæ fidei, ad Petrum, ejusque Successores ultimæ referendæ sunt. Unde Sanctus Augustinus Dub. præced. §. 5. relatus serm. 131. cap. 10., alias serm. 2. de Verb. Apost. de causa Pelagii agens: Jam enim (inquit) de hac causa duo Concilia missa sunt ad Sedem Apostolicam: inde etiam rescripta venerunt. Causa finita est. Si finita causa est ex rescripto Sedis Apostolicæ; ergo ejus iudicium infallibile est. Recolantur jam dicta supra de Auctoritate Summi Pontificis confirmandi Concilia etiam OEcumenica. Nam si Pontifex acciperet infallibilitatem à Conciliis, & acceptance Ecclesie, acta Concilii non deberent confirmari à Pontifice, sed potius definitiones Pontificis deberent à Concilio confirmari.

Superfedeo à referendis auctoritatibus PP., Pontificum, Conciliorum, in infallibilitatem Summi Pontificis conspirantium; has enim studiosus audire poterit apud Doctores, & nos earum multas referemus, agentes de Summi Pontificis Primatu.

VIII. Omnia hætenus dicta paucis comprehendit D. Thom. 2. 2. qu. 1. ar. 10. in corp. his verbis: Ad illius ergo auctoritatem pertinet editio symboli, ad ejus auctoritatem pertinet finaliter determinare ea, quæ sunt fidei, ut ab omnibus inconcussa fide teneantur. Hoc autem pertinet ad auctoritatem Summi Pontificis, ad quem majores, & diffidilioris Ecclesia quæstiones referuntur, ut dicitur in decretalibus extra de Baptismo c. Majores. Unde & Dominus, Luca 22., Petro dixit, quem Summum Pontificem constituit: Ego pro te rogavi, Petre, ut non deficiat fides tua, & tu aliquando conversus confirma fratres tuos. Et hujus ratio est, quia una

una fides debet esse totius Ecclesiae, secundum illud, 1. Cor. 1. Idipsum dicatis omnes, & non sint in vobis schismata. Quod servari non posset, nisi quaestio fides exorta determinetur per eum, qui toti Ecclesiae praest, ut sic ejus sententia à tota Ecclesia firmiter teneatur. Et ideo ad solam auctoritatem Summi Pontificis pertinet nova editio symboli, sicut & omnia alia, quae pertinent ad totam Ecclesiam, ut congregare Synodum generalem, & alia hujusmodi.

Et ibidem ad secundum argumentum, quod intendebat probare, non esse sub alicujus hominis potestate novam symboli editionem condere, quia in Synodo Ephelina p. 2. ar. 4. in decr. de fide, nova editio symboli interdictur sub anathemate, quod reiteratur in Synodo Chalcedonensi part. 2. art. 5. sub fine. Respondet: dicendum, quoddam prohibitio, & sententia Synodi se extendit ad privatas Personas, quarum non est determinare de fide. Non enim per hujusmodi sententiam Synodi Generalis ablata est potestas sequenti Synodo, novam editionem symboli facere, non quidem aliam fidem continentem, sed eandem magis expositam. Sic enim quilibet Synodus observavit, ut sequens Synodus aliquid exponeret supra id, quod praecedens Synodus exposuerat, propter necessitatem alicujus haereseos insurgentis. Unde pertinet ad Summum Pontificem, ejus auctoritate Synodus congregatur, & ejus sententia confirmatur. Hæc D. Thomas. Videndi Porreeta, & Cajetanus super hunc articulum, & insuper Commentatores. Videndus quoque D. Thomas qu. 10. de pot. artic. 4. ad 13., ubi ostendit, particulam filioque iuxta additam fuisse symbolo, quia id factum auctoritate Ecclesiae, & maxime Romani Pontificis, cujus auctoritas sola sufficit; nec est necessarium, Universale Concilium ad symboli expositionem faciendam convocare.

IX. Tandem ex antiqua Ecclesiae praxi constat, plures doctrinas, ut hæreses fuisse declaratas, & damna-

tas à solo Summo Pontifice, nullo coacto Generali Concilio, & tanquam hæreses à tota Ecclesia fuisse habitas. Quodnam enim Concilium Generale, Pelagianos damnavit, ut pro Hæreticis haberentur? Quodnam condemnavit Novatianos, qui jam tempore Cypriani inter hæreticos censebantur? Concilium Nicænum omnium Oecumenicorum primum 125. annis præcesserunt Appellitæ, Valentiniani, & Marcionitæ, qui ab Ecclesia, ut hæretici habiti sunt; quodnam quæso Generale Concilium celebratum fuit, ut tanquam hæretici à tota Ecclesia haberentur? Romanus Pontifex sine Concilio Generali hæreses Priscilliani, Joviniani, Vigilantii damnavit, & ut hæreticos Catholica Ecclesia statim rejecit. Si ergo priorum seculorum hæreses solus Romanus Pontifex judicavit, ejusque judicio tanquam infallibili tota Ecclesia absque ulla cunctatione paruit: Cur non modo? audiat quàm magnificè de Cælestino Romano Pontifice loquatur Sancti. Prosper lib. contr. Collatorem cap. 12. Unde, & venerabilis memoria Pontifex Cælestinus, cui ad Catholica Ecclesia præsidium multis Dominus gratia sua dona largitus est; sciens, damnatis non examen judicii, sed solum patientiæ remedium esse præstandum; Cælestium, quasi non discussio negotio, audientiam postulanti, totius Italia finibus iussit extrudi: addo, & Præcessorum suorum statuta, & decreta Synodalia inviolabiliter servanda censebat, ut quod semel meruerat abscindi, nequaquam admitteret retraheri. Nec verò segnitiam ab hoc eodem morbo Britannias liberavit, quando quosdam inimicos gratia, solum sua originis occupanter, etiam ab illo secreto exclusit Oceani, & ordinato Scotis Episcopo (scilicet Palladio) dum Romanam insulam studet servare Catholicam, ferit etiam Barbaram Christianam. Per hunc virum etiam Orientales Ecclesie geminâ peste purgatae sunt, quando Cyrillo Alexandrina Urbis Antisliti, gloriosissimo Fidei Catholica

fica Defensori , ad exsecandam Nestorianam impietatem , Apostolico auxilium est gladio : quo etiam Pelagiani , dum cognatis confederantur erroribus , iterum prosternebantur &c. Ecce igitur Cælestinum Romanum Pontificem proscrībentem eos , qui damnati ab Apostolica Sede petebant , causam ab ipso iudicatam iterum in examen vocari ; & hoc sequendo Præcessorum suorum statuta , & rursus damnantem hæreses etiam in Orientali Ecclesia . Et infra : cum Pelagiana hæresis subdole adhuc pullulare tentaret , ait : Quod ne hypocritarum obtineatur insidiis , confidimus , Domini protectione præstandum , ut , quod operatus est in Innocentio , Zozimo , Bonifacio , Cælestino , operetur in Xisto , & in custodia Dominici gregis , hæc sit pars gloria huic reservata Pastori , ut , sicut illi lupos abegere manifestos , ita hic depellat occultos . Vides , qualis esset quarto seculo Ecclesiæ consuetudo ? à Romanis Pontificibus iudicio irrefractabili hæreses damnabantur .

Merito igitur Conventus Episcoporum Gallia factus Parisiis 15. Julii anno 1553. in epistola (quam refert Dominicus à SS. Trinitate. Biblioth. Theol. art. 3. §. 4. c. 16.) Innocentium X. sic affatur . *Hujus doctrina lucem pristino decori restituit , juxta veterem fidei regulam Prolatum à sanctissimæ vestræ , postulantis quampluribus Galliarum Episcopis , decretum , de quo in negotio illud observatione dignum accidit , ut quemadmodum ad Episcoporum Africa relationem , Innocentius I. Pelagianam hæresim damnavit olim , sic ad Gallicanorum Episcoporum consultationem , hæresim ex adverso Pelagiana oppositam Innocentius X. auctoritate sua proseripserit . Enimvero vetusta illius ætatis Ecclesia Catholica , Cathedra Petri communionem , & auctoritatem sulta , quæ in decretali epistola Innocentii ad Africanos data , elucebat , quamque dein Zozimi altera ad Universos Orbis Episcopos subsecuta , est , Pelagiana hæresis damnationi ab-*

Tom. I.

que cunctatione subscripsit . Perspectum enim habebat , non solum ex Christi Domini pollicitatione Petro facta , sed etiam ex actis priorum Pontificum , & ex anathematismis adversus Appollinarium , & Macedonium , nondum ab ulla Synodo OEcumenica damnator , à Damaso paulò antea jactis , iudicia pro faciendâ regula fidei à Summis Pontificibus lata , super Episcoporum consultatione (sive suam in actis relationis sententiam ponant , sive omittant , pro ut illis colluberis) divinâ aequè , ac summâ per universam Ecclesiam auctoritate niti ; cui Christiani omnes ex officio ipsius quoque mentis obsequia , præstare teneantur . Eâ nos quoque sententiâ , ac fide imbuti , Romana Ecclesia præsentem , qua in Summo Pontifice Innocentio X. viget , auctoritatem debitâ observantiâ colentes , Constitutionem divini numinis instinctu à Beatitudine vestra conditam , nobisque traditam ab Illustrissimo Athenarum Archiepiscopo , Nuncio Apostolico , promulgandam curabimus in Dicecisi , ac Dicecibus nostris , atque illius executionem apud fideles populos urgebimus . Hæc Gallicani Episcopi : quæ sigillatim ponderanda sunt .

Comparant ergo primò Innocentium X. Innocentio I. , ajuntque , quod sicut ad relationem Africanæ Ecclesiæ Episcoporum Innocentius I. hæresim Pelagianam auctoritate Apostolicâ damnavit ; ita Innocentius X. , postulantibus compluribus Galliarum Episcopis , hæresim oppositam , scilicet Jansenianam , auctoritate suâ proseripxit .

Secundò ajunt , utrique Innocentio Africanos respectivè , & Gallicanos parvisse , memores à vetusta ætate , idest semper , hoc Privilegium Romanam Sedem habuisse , ut suâ auctoritate , nullo expectato Concilio OEcumenico , hæreses profligaret , eisque iudicio mens omnium captivaretur fidelium ; & hoc perspectum haberi , non solum ex pollicitatione facta Petro à Christo Luca 12. Ego rogavi pro te &c. confirmas fratres tuos &c. : sed etiam , quia priores Pontifices , nul-

X

lo

lo prævio OEcumenico Concilio, suâ auctoritate hæreticos damnarunt, ut Damasus Apollinarium, & Macedonium.

Tertiò fatentur, iudicium Summi Pontificis esse indeclinabile, quia divinâ æque, ac summâ per universam Ecclesiam auctoritate nititur.

Quartò asserunt, ejus auctoritati Christianos omnes ex officio ipsius quoque mentis obsequia præstare teneri. Quare Clerus Gallicanus non petit, Jansenianas propositiones auctoritate Concilii Generalis iterum examinari, & condemnari, sed ex quo Pontificia damnatio Divini, ut ajunt, Numinis instinctu ad ipsos pervenit, pollicentur, se ejus decisionem apud fideles sibi commissos promulgaturos, executionem promoturos; & tandem concludunt, absque ulla conditione, violatores, & contumaces statim penis per Episcopos, Regis Christianissimi præsidio, fore puniendos. Hic placuit aliquantulum immorari, ut novit studiosos, contrariam sententiam non à tota Gallicana Ecclesia esse adoptatam, ut quidam vel decipiti, vel decipere volentes, in vulgus spargunt.

§. III.

Referuntur contraria motiva, & solvuntur.

X. **A**fferam ea præsertim, quæ opponit Dupin in suis de antiqua Ecclesiæ disciplina dissertationibus, dissertat. 5. cap. 1.

Primò ergo sic arguit. Gal. 1. v. 14. Petrus à Paulo reprehensibilis fuisse perhibetur, & accusatur, quòd non rectè ad Evangelii veritatem ambularet, quòdque Gentes auctoritate suâ ad judaizandum impelleret. Si potuit ergo Petrus adversus veritatis regulam, quam Ecclesia postea secuta est, cogere Gentes ad judaizandum; Cur non poterunt Petri successores contrâ veritatis regulam ali-

quid, aut docere, aut præscribere?

Hinc D. Augustinus. lib. 2. de Baptismo cap. 1. ex hoc facto Petri insert: quanto facilius, & fortius, quod per universam Ecclesiam statuta firmatum est, vel unius Episcopi auctoritati, vel unius Provincia Concilio præferendum est?

Ante Augustinum verò Cyprianus idem ex hoc Pauli erga Petrum factò intulit in epist. ad Quintum concludens, quòd si Petrus, super quem Christus ædificavit Ecclesiam, cum secum Paulus de Circumcisione postmodum disceptaret, non sibi aliquid insolenter, aut arroganter adsumpsit, ut diceret, se Primatum tenere, & obtemperari à novellis, & posteris sibi potius oportere, sed consilium veritatis admisit, & rationi legitima, quam Paulus vindicabat, facile consensit, ut non pertinaciter nostra amemus, sed qua aliquando à Fratribus, & Collegis nostris utiliter, & salubriter suggeruntur, si sint vera, & legitima, nostra potius ducamus. Ex quibus conficitur, exemplo Petri doceri, Episcopos omnes in errorem prolabi posse, & ab aliis emendari.

Id verò ad Romanos etiam Pontifices pertinere, docet Pelagius secundus in ep. ad Ileria Episcopos, ubi ex Petri facto excusandos dicit esse Vigilium, & Præcessores suos in causa trium Capitulorum, si affirmarunt postea, quod antea improbaverant.

Primò retorqueo argumentum: si ex facto Petri, ut exposito ab arguente, Romanus Pontifex eque fallibilis est, ac quilibet alius Episcopus; Cur Gallicani Episcopi ad Innocentium X. recurrerunt, ut suum de propositionibus Jansenianis iudicium definitivum pronunciaret, ad eum ita scribentes: *Majores causas ad Sedem Apostolicam referre sollemnis Ecclesia mos est, quem fides Petri nunquam deficiens perpetuò retineri pro jure suo postulat. Equissima huic legi obsequentes &c.* Cur rogant, ut quid in hac re sentiendum sit, clarè, distinctèque definias? Cur subdunt: *Expertæ est nuper beatitudo tua, quan-*

tuam

rum Apostolica Sedis in gemini Ecclesie Capitis errore profigiendo valuerit auctoritas: continuò sedata est tempestas, atque ad Christi vocem, & imperium venti, & mare obedierunt. Quamobrem flagitamus, Beatissime Pater, ut clarâ, firmâque de propositionum istarum prolata sententiâ, cui reverendus ipse Jansenius mortis proximus opus suum subiecit, caliginem omnem dissecias, animos fluctuantem componas, dissidia prohibeas, Ecclesiam tranquillitatem, splendoremque restituas? Cur demùm prolatam ab Innocentio sententiam, tanquam Divino Numine inspiratam, latis ulnis suscipiant, veneranturque, ut in responsis ad Innocentium datis, ac supra relatis, clarè patet?

Rursus. Si Petrus adeo turpiter in fide erravit, ut fingit arguens, ubinam in fide indefectibilitas, ubinam constantia illi in Christo impetrata ad confirmandos in fide fratres; & quare Gallicani Episcopi in litteris superius allatis hanc Christi pollicitationem Petro factam extollunt, si effectui suo frustrata fuit?

Tertiò. Jam ergo necdum Generale Concilium, sed, & quilibet Episcopus poterit sententiam Papæ docentis Ecclesiam reprehendere, utpote non secundum veritatem Evangelii prolatam, sicut Paulus reprehendit, & resistit Petro. Quid adhuc Dupin?

Ad rem ergo veniens, mitto quorundam opinionem volentium, Cephæ à D. Paulo reprehensum, non fuisse D. Petrum, sed alium diversum; quæ à Bellarmino Clementi Alexandrino tribuitur. Mitto etiam opinionem S. Hieronymi, & aliorum dicentium, S. Petrum non verè fuisse à Paulo reprehensum, sed tantum simulatoriè, & ex conditio; de quo acerrima fuit disceptatio inter S. Augustinum, & Hieronymum. De hoc legitur Hieronymi *epistol. ad Augustinum*, inter Sandi Augustini *epist. 75.*, aliàs 11., & *epistola* S. Augustini ad Hieron. 81., aliàs 19. Tandem S. Hieronymus in S. Augustini sententiam

concessit, ut testatur S. Augustin. *ep. 260.*, modò 180. ad Oceanum, & retractatio extat lib. 1. *Dialogorum adv. Pelagianos* c. 8.

Respondeo ergo, Cephæ à Sancto Paulo reprehensum, fuisse reverè S. Petrum Apostolorum Principem; non fuisse reprehensum simulatoriè, sed verè; fraternâ tamen, non juridicâ reprehensione: non de errore capitis, & doctrinæ, sed personæ, & conversationis. Eadem enim Petri doctrinæ erat, & Pauli, Circumcisionem scilicet, aliasque cæremonias legis nullius esse momenti ad justificationem, & salutem. Quod Petrus ipse jam decreverat in Concilio Hierosolymitano *act. 15.* Verùm in conversatione errabat. Petrus enim apud Judæos Judaicè vivere poterat, & debebat, ne ipsi offenderentur; nondum enim legalia esto mortua, evaserant mortifera; sed non ideo debebat subtrahere se à mensa Gentilium, quam prius frequentabat; hoc enim perturbatio-nis, & scandali occasio erat ipsis Gentilibus, quibus posterius hoc factum Sandi Petri retractatio, & emendatio videbatur, ac animata quædam prædicatio, quâ docebatur, legem esse servandam. Judei autem ex hoc, quòd Petrum vidissent cum Gentilibus edentem immeritò offensi fuissent, scandalumque passivum dumtaxat ex illorum parte, non activum ex parte Petri fuisset, quia jugum legis non debere Gentibus imponi, & definire legalium observantiarum umbras, assurgente veritatis Evangelicæ luce, palam Apostoli prædicabant; Imò Petrus ipse in Concilio Hierosolymitano decreverat, ut dictum est. Reprehensus ergo fuit, non errore doctrinæ, quasi doceret Ecclesiam doctrinam Evangelio contrariam, sed errore personæ, & conversationis, quia nimirum imprudenter, & nimium condescendendo infirmitati Judæorum, scandalo fiebat Gentibus, quæ exemplo suo inducebantur ad judaizandum, licet ejus intentio talis non esset. Unde obser-

vo, D. Paulum citato loco, ubi ait, D. Petrum reprehensibilem fuisse, non dicere quâ non rectè doceret ad veritatem Evangelii, sed quòd non rectè ambularet, quod apertè indicat, fuisse errorem imprudentis conversationis, non verò doctrinæ, & prædicationis. Ità ex Natali Alexandr. tùm in *Comment. ad cap. 2. ad Galat.*, tùm in *hystor. Eccles. secul. 1. differt. 11.*, qui tamen unus est ex Academiæ Parisiensis Doctoribus.

XI. Ità respondet Tertullianus lib. 5. *contr. Marcionem cap. 3.*, ubi de S. Paulo hæc habet: *sed reprehendit Petrum, non recto pede incedentem ad Evangelii veritatem. Planè reprehendit; non ob aliud tamen, quàm ob inconsistentiam vitiis, quem pro personarum qualitate variabat, timens eos, qui erant ex circumcissione; non ob aliquam divinitatis perversitatem, de qua & aliis in faciem restitisset, qui de minori causa conversationis ambigua Petro ipsi non pepercit.* Et lib. de *prescript. Hæreticorum cap. 23.* Caterum [inquit] si reprehensus est Petrus, quòd, cum convixisset Ethnicis, postea se à cæntastis eorum separabat, personarum respectu; atque conversationis fuit vitium, non prædicationis.

Ità respondet Sanctus Cyrillus Alexandrinus lib. 9. in *sine contra Iulianum* similiter opponentem. *Ad hæc, inquit, audax ille, & confidens Petrum Apostolorum præcipuum cavillatur, & hypocrisiam esse dicit, atque à Paulo reprehensum, quòd modò Græcorum, modò Judæorum ritu vivere vellet, ignorans planè singularem in his consuetudinem. Non enim diversa sentiebat ille discipulus, sed congruâ moderatione tempestivè utens, omni ratione prudenter studebat, qui ad se venirent. Quùm autem unis ritibus additus esset Beatus Paulus, aggressus commonefecit. Metuebat enim, ne propositum lateret, & ille dispensandi modus nonnullos offenderet.*

Ità respondet S. Thomas tùm in c. 2. *ad Galat. lect. 3.*, tùm 1. 2. q. 103.

art. 4. ad 2., ubi ait: *Non autem peccavit Petrus in hoc, quòd ad tempus legalia observabat; quia hoc sibi licebat, tanquam ex Judæis converso: sed peccabat in hoc, quòd circa legalitatem observantiam nimiam diligentiam adhibebat, ne scandalizaret Judæos; ità, quòd ex hoc sequeretur Gentilium scandalum.* Concordant ergo omnes, quòd error D. Petri, de quo fuit à Divo Paulo reprehensus, fuit, non error in doctrina, & prædicatione, sed in conversatione. Ergo extra chorum canit Dupin; neque enim nos abnuimus, Papam esse defectibilem in conversatione, sed esse defectibilem in doctrina, seu posse Ecclesiam docere aliquid contra Verbum Dei, & siccitate.

XII. Neque contrarius est Sanctus Augustinus, cuius votum, pro Romani Pontificis infallibilitate in definiendo, supra retulimus. Comparat enim utriusque, scilicet Petri, & Cypriani modestiam, quòd sicut Petrus passus est, se corrigi à Paulo, ità Cyprianus paratus fuit, se corrigi ab iis, qui diversa sentientes; & hoc probat ex ipsismet Concilii Cyprianici verbis. Non tamen comparat in hoc, quòd sicut Cypriani error de reprobando hæreticis fuit error in doctrina, ità in doctrina fuerit error Petri; non enim Petrus cogebat Gentiles circumcidi, docendo hoc fieri debere, sed quia cum oppositum sentiret, sic tamen conversabatur cum Gentilibus abstinens ab eorum mensis, ut isti exemplo suo inducerentur ad iudaizandum. Cum verò ait: quod per universæ Ecclesiæ statuta firmatum est, vel unius Episcopi auctoritati, vel unius Provinciæ Concilio præferendum est: alludit ad Episcopum Cyprianum, & ad Concilium Africanæ Provinciæ ab ipso coactum, quibus certè prævalet auctoritas universæ Ecclesiæ, quæ auctoritas tamen sine Romano Pontifice, qui universæ Ecclesiæ Caput est, firmitatem habere non potest. Quod verò nomine unius Episcopi,

pi, nec Petrum, nec ejus Successores includat Augustinus, indicat ipse citato loco; postquam enim Cyprianum Petro comparavit, sese corrigens ait. *Ceterum magis vereri debeo, ne in Petrum contumeliosus existam. Quis enim nescit, illum Apostolatus principatum, cuiuslibet Episcopati preferendum? sed etsi distet cathedrarum gratia, una est tamen Martyrum gloria.* Hæc Augustinus.

Quoad Cyprianum autem, puto, Dupin ejus mentem non fuisse assecutum. Sanctus enim Martyr adducit ibi exemplum D. Petri, qui licet primum haberet, tamen à Paulo passus est corrigi, non ut hinc inferat, Episcopos omnes, nullo excepto, in errores prolabi posse; sed D. Petrum adducit in exemplum humilitatis, & moderationis, illius facti ceteros collegas suos ad concordiam invitans; ut quemadmodum ipse, quum primus esset, non tamen primum insolenter jactavit: sic, nec ipsi suam sententiam ita mordicus tenerent, ut alios præ se contemnerent. Et certè (ut advertit Pamelius) de Stephano Papa illi non erat sermo, quia nondum de rebaptizandis hæreticis ad illum scripserat, sed dum res adhuc tractaretur in Africa inter suos. Addo, quod si adhuc vellet Dupin, D. Petrum huc trahi in exemplum erroris, dicam, trahi in exemplum erroris, non doctrinæ, sed conversationis. Cæterum si melius perpenderit arguens, à Cypriano abstinuisset. Dum enim & Cyprianus, & Concilium esset in errore rebaptizandi hæreticos, quis hunc errorem repressit, nisi Stephanus Papa? ergo hinc argumentum infallibilitatis potius, quam fallibilitatis eruitur.

De Pelagio II., qui loquitur maxime de Vigilio ejus prædecessore, qui in causa trium capitulorum, nimirum Theodori Mopvesteni, Theodreti, & Ibae Edeffenæ quondam Civitatis Episcopi, varium sese ostendit, cum prius eos damnare recuissset, & postea in eorum damnationem consense-

rit; Respondeo primò, nihil esse ad rem: disceptatio enim illa erat, non de fide, sed de folis personis, & de factis, sicut ea, quæ inter D. Petrum, & D. Paulum versabatur; idèque bene potuit cum Petro mutare sententiam Vigilius, absque præiudicio infallibilitatis suæ Sedis, quia hanc nos statuimus, non in rebus puri facti, sed in rebus fidei, & dogmatis. Sicut enim Petrus, & Paulus conveniebant in fide, nimirum, circumcissionem, & cætera legalia non esse amplius necessaria ad salutem, & solum diffidebant, an essent adhuc observanda, Petro affirmante, negante Paulo; ita Vigilius cum Orientalibus conveniebat ab initio in doctrina trium capitulorum rejicienda, solumque ab iis diffidebat circa damnationem Auctorum trium Capitulorum, quod cum ab initio obscurum, procedente autem tempore compertum evasisset: idè Vigilius, & Occidentales, qui prius repugnaverant, in damnationem postea consenserunt; & hoc est, quod dicit Pelagius: *aliud eum veritas quaereretur, aliud autem inventa veritate dictum est: cur mutatio sententia huius sedi in crimine obijcitur, qua à cunctis Ecclesiis in ejus auctore veneratur?* Neque enim Judici vitio verti debet, si variato rerum statu, magisque cognita veritate sententiam mutat. Hoc in casu præfenti ex hoc processisse scribit Pelagius, *Lutini quippe homines, & graecitatis ignari, dum linguam nesciunt, errorem tardè cognoverunt: & tanto eis celerius eredi debuit, quanto eorum constantia, quousque verum cognoscerent, à certamine non quievit. Quorum consensum eertè fraternitas vestra despicere, si ausu præcipiti, priusquam verum cognoscerent, consensissent.* Hæc Pelagius, & merito. Cum enim scirent, Theodorum, Theodoretum, & Ibam, eorumque scripta fuisse in Concilio Chalcodonensi admittenda, non debebat Vigilius statim in eorum damnationem consentire, nisi prius exploratâ veritate,

tate, ne videretur damnare ea, quæ in Concilio Chalcedonensi gesta fuerant. Videatur Epistola citata Pelagii II., quæ est tertia, & insuper prima, & secunda ad eisdem Iſtrix Episcopos, ubi fidem Cathedræ Apostolicæ illibatam strenuè defendit.

XIII. Objicit secundò. Apud antiquam Ecclesiam ignotum fuit per decem, & ampliùs secula hoc non erandi Privilegium, quod Romano tribuitur Episcopo. Non pauca etiam de fide olim lata sunt Judicia, inconsulto Romano Pontifice, nec habitus ille fuit, ut Supremus controversiarum Judex. Sed sæpè sapiùs Judicia ab ipso lata, in Conciliis præsertim OEcumenicis, iterùm examinata, ac retractata sunt. Ex quibus sic discutrit. Si extra controversiam tunc fuisset Romani Pontificis infallibilitas, ceteri Episcopi nequaquam judicassent, absque illius consensu, & auctoritate, aut aliquid ab ipso judicatum retractassent; sed oppositum contigit; ergo &c.

Respondeo, debuisse probari à Dupin, per decem, & ampliùs secula ignoram fuisse Romani Pontificis infallibilitatem, sicut nostri probant oppositum, inter quos Dominicus à SS. Trinitate *Biblioth. Theologica lib. 3. fests. 4. c. 16.* percurrrens per omnia secula, id ostendit; & quidem primo seculo id probat adventus S. Petri Romam, ad debellandum Simonem Magum, & hæresiarcham; unde refert Eusebius *lib. 2. bist. c. 16. benigna*, & *elementissima Dei Providentia fortissimum, & maximum inter Apostolos Petrum, & virtutis merito reliquorum omnium Principem, ac Patronum, Romam, adversum illam generis humani labem, ac pestem perduxit*. Primum ergo hæreticorum Simonem, jam in Judæa à Petro prædamatum, tandem Romæ ab eodem Petro primo Apostolorum contundi decuit, ut in Petro, ejusque Romana Sede ad hæreses profigandas summum jus posterì agnoscerent. Hinc secundo seculo Irenæus

lib. 3. advers. hæreses c. 3. Ad hanc enim Ecclesiam [Romanam] propter potiorem principalitatem necesse est, omnem convenire Ecclesiam, hoc est eos, qui sunt undique fideles, in qua semper ab his, qui sunt undique, conservata est ea, quæ est ab Apostolis traditio. Pergit insuper. Cum sub Clemente Petri successore exorta fuisset inter Corinthios dissensio non modica, *scripsit, quæ est Roma, Ecclesia potentissimas litteras Corinthiis, ad pacem eos congregans, & reparans fidem eorum, & annuncians, quam in recenti ab Apostolis acceperat, traditionem*. Inde formato Catalogo Episcoporum Romæ, usque ad Eleutherium, *hæc ordinatione [inquit] & successione, ea, quæ est ab Apostolis in Ecclesia traditio, & veritatis præconatio pervenit usque ad nos*. Et est plenissima hæc ostensio, *unam eandem vivificatricem fidem esse, quæ in Ecclesia ab Apostolis usque nunc sit conservata, & tradita in veritate*. Quare, quia Asiatici Quartodecimani eodem seculo traditioni Ecclesiæ Romæ contrarii erant, Victor tunc Episcopus Romanus voluit, eos excommunicare, & Sanctus Irenæus, esto cum deterruerit, ne pax rumpereetur, auctoritatem tamen in Victore non negavit. Et Victoris sententia in Concilio Nicæno I. comprobata fuit.

Tertio quoque seculo Stephanus martyr Papa restitit Cypriano, aliisque rebaptizantibus hæreticos, & sententia Stephani fuit sententia Ecclesiæ. Cùm ergo undique ad novitatem rei cuncti reclamarent [ait Lirinenſis Commemorator. t. c. 6.], atque omnes quaqueverùm Sacerdotes, pro suo quisque studio venirentur; Tunc beata memoria Papa Stephanus, Apostolica Sedis Antistes, cum ceteris quidem collegis suis, sed tamen præ ceteris restitit, dignum, ut opinor, exillimant, si reliquos omnes tantum fidei devotione vinceret, quantum loci auctoritate superabat. Denique in epistola, quæ tunc ad Africam missa est, his verbis sanxit: *nihil innovandum, nisi quod traditum est &c.*; expo-

exponens deinde, quid post Stephani sententiam eveniret : Quid postremo, inquit, ipsius Africani Concilii, seu decreti, qua vires ? Donante Deo, nulla ; sed universa tamquam somnia, tanquam fabula, tanquam superflua, abolita, antiquata calcata sunt. Et de verum mira conversio ! Auctores ejusdem opinionis, Catholici, consiliatores vero, haeretici judicantur. Ità Vincen-

XIV. Nimius essem, si vellem singula percurrere secula, infallibilitatem Romani Pontificis in docendo Ecclesiam adtestantia ; de quo videri potest laudatus Domin. à SS. Trinitate. Unum, vel alterum ex Conciliis proferam testimonium. Primum sit ex Concilio Ephesino, anno 431., in quo acta est causa unius Personae in Christo contra Nestorium : ibi enim lectis Caelestini litteris act. 1. Patres publicè acclamatione eum appellant novum Paulum, custodem fidei ; & Firmus Caesareus Episcopus dixit, Caelestinum sententiam, regulamque praescripsisse, quam Synodus secuta est. Secundum sit ex Concilio Chalcedonensi, in quo duplex natura in Christo anno 451. contrà Eutichem statuta est ; lectà enim act. 1. epistolà synodicà S. Leonis, clamaverunt Patres. *Hae Patrum fides : omnes ità credimus, orthodoxi ità credunt. Anathema ei, qui ità non credit. Petrus per Leonem ità locutus est. Apostoli ità docuerunt. Pide, & vero Leo docuit... hae in Epheso cur lecta non sunt ? hae Dioscorus occultavit. Et infra : nos ità credimus, sicut Leo, ità credimus : nostrum nullus dubitat : nos jam subscripsimus.* Quare act. 3., petente Concilio, Legati S. Leonis sententiam contra Dioscorum pronuntiaverunt his verbis : *Sanctissimus, & beatissimus Archiepiscopus magna, & senioris Romae L'o, per nos. & per praesentem Sanctam Synodum una cum ter beatissimo, & omni laude digno Beato Petro Apostolo, qui est petra, & crepido Catholicae Ecclesiae, & recta fidei fundamentum, nudavit eum tam Episco-*

pali dignitate, quàm & ab omni Sa- cerdotali alienavit ministerio &c. Rursus act. 4. Cum Aegyptii Episcopi damnationi Eutichis subscribere detrectarent, Phorius Episcopus Cyri, *consentitis* (inquit) *epistola beatissimi, & sanctissimi Archiepiscopi Roma, Leonis, sicut & universalis Synodus consensit, & subscripsit ? & versà in graecam linguam epistolà, omnes Episcopi clamaverunt : Qui non consentit epistola sanctissimi Archiepiscopi Leonis, haereticus est : & quia Episcopi Aegyptii dicebant, se dicere anathema Eutichi, se tamen subscribere non posse, iterùm clamaverunt, & dixerunt : subscribant epistola Leonis. Qui ei non subscribit : anathema sit.* Tanti ergo fecere Chalcedonenses Patres S. Leonis sententiam, ut ejus subscriptioni fidem alligarent. Quare Petrus Ravennas (Chrysologus) *epistol. ad Eutichen.* relatà in Concilio Chalcedonensi parte primà. *In omnibus* (inquit) *autem hortamur te, frater benemerabilis, ut his, quae à beatissimo Papa Romana Civitatis scripta sunt, obedienter attendas ; quoniam Beatus Petrus, qui in propria Sede vivit, & praesidet, praestat quarantibus fidei veritatem.*

Quartò. Anno 680. scripsit Agatho Papa ad Imperatores, occasione sextae Synodi Oecumenicae, damnans errorem Monothelitarum, atque inter alia, haec verba : *Cujus annuente praesidio, hae Apostolica ejus Ecclesia nunquam à via veritatis in qualibet erroris parte desinens est : cujus auctoritatem, utpote Apostolorum omnium Principis, semper omnis Catholica Christi Ecclesia, & universalis Synodi, doctrinam, amplexi.* Et infra, *per quam, & probatissima Ecclesia Christi luminaria claruerunt, & sancti quidem Doctores orthodoxi venerati, atque secuti sunt. Haeretici autem falsis criminationibus, ac derogationum odiis insculti &c.* Et infra post allegatam Christi promissionem Petro factam subdit : *Consideret itaque vestra tranquilla clementia, quoniam Dominus, & Salvator omnium,*

ejus

eujus fides est, qui fidem Petri non desecuram promisit, confirmare cum fratres suos admonuit; quod Apostolicos Pontifices mea exiguitatis predecessores confiderenter fecisse semper, cunctis est agnitus. Ecce Agathonem, indefectibiles in fide, & doctrina tum Ecclesiam, tum Romanos Pontifices asserentem. Quid ergo huic epistolæ rescripsisset Dupin? Lectis hinc litteris aethone 8. Patres omnes Synodi responderunt, ita esse, ut Agatho scripserat. Imò aet. 18. sic Agathonem rescripserunt. Itaque tibi, ut Prima Sedis Antiquitati Universalis Ecclesiae, quid agendum sit relinquimus, stanti super firmam fidei petram, libenter acquiescentes vera confessionis litteris à vestra paternae beatitudine ad piissimum Imperatorem missis: quas, si à summo Apostolorum vertice divinè perscriptas agnosceamus, per quas exortam nuper multiplicis erroris haereticam sectam depulimus &c. Hæc erat Veterum Conciliorum erga Romanos Pontifices observantia. Relinquabant istis quid agendum esset in causis fidei; eò quia novum ipsis erat, stare supra firmam Petram, sententias eorum, ut divinas agnoscebant, & consequenter ut infallibiles.

XV. Dicit Dupin. Si ita esset, nonnulli Episcopi, maximè Catholici, ab eo dissentire, nefas duxissent. Si enim iudicium Victoris habitum fuisset, ut infallibile, ei non restitissent nedum Asiatici, sed nec Irenæus, & cæteri Orbis Episcopi, qui non obstante Victoris sententiâ, in illorum communionem permanserunt. Similiter Cyprianus, & Africani Præsules, nec non Dionysius, & alii Orientis Episcopi in Stephani sententiam pedibus ivissent, si eam judicassent infallibilem, nec disciplinam suam contra ejus auctoritatem mordicè retinuisent. Quare Sanctus Augustinus lib. 2. de baptismo cap. 5. dicit, eos illesâ fide, & caritate à Stephano dissentisse, quia nondum veritas perspecta erat, necdum sublata quæstio; quod certè non

dixisset, si iudicium Stephani judicasset infallibile, & ultimum.

Retorqueo instantiam. Etsi Asiatici in causa celebrationis Paschatis non ierint in sententiam Victoris, in eam tamen ivit Concilium Nicænum, quod eos damnavit, tamquam hæreticos, sub nomine *Quartodecimanorum*. Etsi Cyprianus, alique rebaptizantes non acquieverint sententiæ Stephani, illi tamen subscripsit Concilium Plenarium, sive Nicænum fuerit, sive Arelatense, & oppositum sentientes, ut hæretici proscripti sunt: ergo iudicium Victoris, & Stephani fuit infallibile; & consequenter iudicium Romani Pontificis à veritate non deviat.

Respondeo ergo, nec Asiaticos reituros fuisse Victori, nec Africanos Stephano, si, ut par erat, rem considerassent, tamquam ad fidem spectantem, & animum ab omni præiudicio liberum habuissent. Cæterum, cum quæstio utraque, sive de Paschate, sive de Baptismo eis videretur non ad fidem, sed ad puram disciplinam spectans, nec aliud illis objicerent Romani Pontifices, quàm disciplinam, & usum suæ Ecclesiæ, unde Stephani decretum non aliud erat, nisi: *nihil novandum, nisi quod traditum est*; inde nimio servandæ propriæ consuetudinis, & traditionis amore ducti, quam (licet falsò) putabant meliorem, crediderunt, se salvâ fide, & caritate posse resistere: & hoc, eò vel maximè, quia Stephanus decreto suo excommunicationem non junxerat contra oppositum tenentes, & facientes. Victor verò, etsi excommunicationem intentasset, hanc tamen suâsu Irenæi suspendit. Ut probat Natalis Alexandri *bist. Ecclæs. secul. 2. disert. 5. t. 2. Eusebii lib. 3. cap. 24. bist. Nicephori lib. 4. bist. cap. 38. & 39.* Rebaptizantes verò Stephano resistentes, esto notâ hæreseos inurendi non sint, sicut neque Asiatici, quia res nondum declarata erat, ad fidem spectans, erroris tamen labem effugere nequeunt. Videndus propterea S. Augusti-

gustinus lib. 2. de Baptismo contra Donatistas cap. 4. §. 8., & alibi Cyprianum excusans.

Non possum tamen, quin mirer, Dupin ex factis istis Stephani cum Cypriano, & rebaptizantibus, Romani Pontificis infallibilitatem evterere conari, cum è contrâ Vincentius Lirinensis hoc idem factum producat commentis. 1. c. 9. ad eandem adstruendam. Ut enim tenendæ antiquitatis, & fugiendæ novitatis exemplum adferat, conitantiam Stephani, & fux Sedis contra rebaptizantes laudat. Unum aliquod [inquit], & hoc de Apostolica potissimum Sede sumemus, ut omnes luce clariùs videant, Beatorum Apostolorum beata successu, quantâ vi semper, quanto studio, quantâ contentione defendentis suscepta semel religionis integritatem. Tùm recensito Agrippini, & Cypriani de rebaptizandis hæreticis decreto, deinde resistentiâ Stephani, ejusque Epistolâ in Africam missâ, subdit. Intelligebat enim vir sanctus, & prudens, nihil aliud rationem pietatis admittere, nisi, ut omnia, qua fide à Patribus suscepta forent, eâdem fide filijs consignarentur, nosque religionem, non quâ vellemus ducere, sed potiùs quâ illa duceret, sequi oportere..... Quis ergo tunc universi negotii exitus? Quis utique, nisi usitatus, & solitus? recte est scilicet antiquitas, explosa novitas. Infallibile ergo Stephani decretum, & decretum opponentium erroneum.

XVI. Pergit ulteriùs Dupin: Basilii, cæterique Orientales nunquam tres Hypostasies rejicere voluerunt, & eos probare, qui unam dicerent, quamvis id maxime urgeret Romanus Pontifex cum cæteris Occidentalibus, qui non aliâ conditione cum Meletio communionem habere vellent; ergo Basilii judicium Romani Pontificis non existimabat infallibile.

Respondeo, dist. consequ., infallibile in causis fidei, nego consequ., in causa, de qua tunc agebatur, transeat consequens. Causa enim, quæ con-

trovertebatur inter Orientales, & Occidentales, non erat de fide, sed de significato hujus vocis *hypostasis*. Orientales enim, quorum principes erat Basiliius, adferebant, *hypostasis* nomine significari Personam, idèquæ tres hypostasies in Deo fatebantur. Occidentales verò cum Romano Pontifice, quibus significatio illius vocis græcæ videbatur suspecta, atque idem expræmere, ac usiam, seu essentiam, vel substantiam, idèquæ trepidabant, ne fatentes tres hypostasies, fateri viderentur in Deo tres substantias. Timebant ergo, ne hoc nomine hypostasis sibi fraus fieret ab Arianis; idèquæ D. Hieronymus epistol. 37. ad Damasum, sufficiat, ajebat, nobis dicere nam substantiam, tres Personas subsistentes, perfectas, æquales, coeternas. Taceantur tres hypostasies, si placet, & una teneatur. Non bona suspitionis est, cum in eodem sensu verba dissentiant; aut si rectum putetis, tres hypostasies cum suis interpretationibus debere nos dicere, non negamus. Sed mihi credite, venenum sub melle latet. Eodem timore laborabat Sanctus Augustinus lib. 3. de Trinitate cap. 8., volens, *hypostasis* nomine non aliud intelligi, quàm substantiam. Et prudenter quidem timebant, nam, ut refert Theodoretus lib. 2. cap. 8., Ariani *hypostasis* nomine substantiam intelligebant. Eò autem magis timor augebatur, quia Meletius trium hypostasicon adfector (licet Catholicus) ab Arianis in Ecclesiâ Antiochenam suspectus fuerat, excluso Paulino legitime in ea sedente, qui tres hypostasies fateri nolebat. Eadem ergo omnium Catholicorum, tum Orientalium, tum Occidentalium erat fides de Unitate essentia, & Trinitate Personarum, sola concertatio erat de voce *hypostasis*. Occidentales volebant, significare substantiam absolutè, Orientales aliqui, Personam. Hi reludabantur illis. At in quo? in fide? non. In voce: quid ergo hic contra infallibilitatem Romani Pontificis, quem dicimus quidem infallibilem in fide,

fide, sed non in grammatica, præsertim græca. Quivis nec in hoc ejus oppositio error fuerit, sed prudentialis cautela. Videatur D. Thom. 1. p. qu. 29. artic. 2., ubi quærit, an sint idem *Persona*, *Hypostasis*, *substantia*, & *essentia*. In 1. sent. dist. 26. quæst. 1. artic. 1.

XVII. Objicit tertio. Plures Romani Pontifices ad causas finiendas Synodos petierunt convocari. Sic Liberius ad Athanasii causam judicandam Synodum petiit à Constantio. Sic Damasus, & Occidentales Synodum Universalem petierunt ad res Orientis componendas. Siricius Bonosum ad Concilium remisit judicandum. Innocentius petiit Synodum ad causam Chrysostomi examinandam. S. Leo ad Eutychis causam retractandam, rescindendumque latrocinii Ephesini decretum, Synodum Universalem necessariam esse, duxit. Mitto alios innumeros. Si ergo Romani Pontifices judicium suum supremum, ac infallibile judicassent, illud solum interposuissent, non Synodos cogi posuissent.

Confirmat hoc tali discursu. Posito, quod infallibile sit aliquod judicium, absurdum est, causam in eo terminatam, iterum examinare, & judicare. Quid ergo necesse erat, totius orbis Episcopos fatigare? Quid opus, Ecclesias Pastoribus orbari ad cogenda Concilia, quorum judicium non plaris fieri deberet, quam unius Romani Episcopi? certe ex duobus infallibilibus judiciis, unum plaris altero fieri non potest, nec duo infallibilia judicia majorem auctoritatem habent, quam unum; quod enim infallibile est, omnem omnino meretur fidem. Vel ergo prorsus superflua sunt Concilia, vel Judicium Romani Pontificis infallibile non est. Ità Dupin.

Primo eadem retorssione respondeo. Licet Romani Pontifices aliquando Concilia petierint ob motiva, quæ ita adducam, causas tamen live fi-

dei, sive facti prius ipsi judicarunt, & eorum judicium fuit Concilii confessione probatum; ergo eorum judicium fuit infallibile.

Secundò respondeo ad singula. Liberius, ut refert Theodoretus lib. 2. hist. cap. 16. disputabat cum Constantio, in causa Athanasii, quærat causam puri facti; agebatur enim, num vera essent crimina, quæ illi obijcebantur, necne. Quid ergo agere poterat Liberius cum Imperatore Ariano, ejus judicium detrectante, eique dicente; *tu solus es, qui impii illius amicitiam retineas?* prudentissimè ergo respondit, quod prius revocetur ab exilio fratres, & Ariani subseribant veræ fidei, tunc *universi Alexandriam convenientes, ubi, & accusatus ipse, & accusatores sunt, & defensor eorum, examinato illorum negotio, concordem sententiam proferamus*. Quid ex hoc contra Romani Pontificis infallibilitatem? Quia eam negabant Ariani? At cur auctoritatem etiam Concilii, ad quod provocabat Liberius, recusarunt?

Damasus petiit, fieri Synodum Generalem, quæ fuit Constantinopolitana prima, anno 381., ad condemnandum Macedonium, quem tamen in Synodo Romana ipse prius condemnarat, anno 379.; unde condemnatio Synodi Generalis fuit repetitio condemnationis factæ à Synodo Romana, ut ab utraque Ecclesia Orientali, & Occidentali condemnaretur. Apollinare tamen, & Timotheum, instantibus Orientalibus, absque Synodo Generali damnavit, ut refert Theodoretus lib. 5. hist. cap. 10., recitans epistolam Damasi ad Orientales, qui Damasi damnationem venerati sunt.

Bonosus Sardicenis Episcopus, Christum purum hominem asserens, duas in eo personas agnoscens, Mariam à Christi partu mansisse Virginem negans, denunciatus ad Concilium Capuense, ab isto remittitur ad Anysium Episcopum Thessalonicensem, qui ejus causam cognovit, eumque

con-

condemnavit. Non video, quomodo Siricius hunc Bonosum remiserit ad Concilium judicandum: nisi fortè ex quibusdam litteris, quæ ab aliquibus tribuuntur Siricio, & extant *tom. 1. Concil. Harl. col. 85.*; sed ex his litteris colligo, Anysum, priusquam de Bonoso sententiam ferret, judicium Siricii petiisse. *Accepi litteras vestras (respondit Siricius) de Bonoso Episcopo, quibus vel pro veritate, vel pro modestia nostram sententiam scifestari voluistis.* Et licet judicium non adsumat, cum apud se non haberet Synodum congregatam, in qua judicare consueverat, sed judicium remittit ad Synodum ab Anyso congregatam, Bonosum tamen condemnat dicens: *Sanè non possumus negare de Maria filius (Bonosum) jure reprehensum: adscens, qui hoc adstruit, nihil aliud, nisi perfidiam Judæorum adstruere.* Nihil ergo conficit Dupin ex isto Siricii facto: si Concilium, ad quod remisit Bonosum, à Siricio sententiam petit; & quamvis adferat, nolle se formam judicii adsumere, sententiam tamen condemnationis, & ipse profert.

Porrò, quodd sententia Siricii expectanda jure esset ab Anyso ante condemnationem Bonosi, testatur Sanctus Ambrosius *epist. 78. ad Theophilum Alexandrinum Episcopum*, cui à Concilio Capuano commissæ fuerat causa inter Evagrium, & Flavianum, quæ magnos in Oriente tumultus excitabat. Scribit enim: *Sanè referendum, arbitramur ad Sanctum Fratrem nostrum Romanæ Sacerdotem Ecclesiæ, quoniam præsumimus ea te judicaturum, quæ etiam illi displicere nequeant. Ita enim utilis erit consultum sententia, ita pacis, & quietis securitas; si id vestro statuatur consilio, quod communioni nostræ dissensionem non adferat, ut nos quæque accepta nostrorum serie statutorum, cum id gestum esse cognoverimus, quod Ecclesiæ Romanæ haud dubie comprobaverit, læti fructum hujusmodi examinis adipiscamur.* Epistolam hanc per ex-

tenum videbis etiam apud Baron. ad *ann. 389. num. 58.* Si ergo judicium Pattiarchæ Alexandrini cum sua Synodo referendum erat pro approbatione ad Romanum Pontificem: quid obstat ejus infallibilitati, quod res examinentur, & judicentur in Conciliis, quandoquidem absque ejus approbatione ab universali Ecclesiâ acceptandum non erat?

Ad Innocentium I. appellavit S. Joannes Chrysostomus, ipsum suscepit; Acta Synodi ad Quercum, quâ iniussè, ac illegitimè damnatus, & inconsultâ Sede Apostolicâ contrâ Canones depositus fuerat, rescidit. Fateor, noluisse Innocentium causam Chrysostomi decretorio judicio per se ipsum terminare, sed Synodum Universalem convocari ad hunc finem, optasse, imò, & procurasse; non quia pro dignitate Sæ Sedis id non posset, hoc enim fecerat Julius cum Athanasio, Paulo, Marcello, & Asclepa ab Arianis excommunicatis; sed summae Innocentii prudentiæ fuit, considerato rerum statu, ut schisma imminens evitaret, ut benè advertit Natalis Alexandrè *bislor. Eccles. secul. 1. c. 5. ar. 2.* Cum verò Synodi celebrandæ nullam spem superesse videret (Chrysostomo jam defuncto) decretorio judicio usus est, compellens Orientales, ad memoriam Joannis Chrysostomi inter Constantinopolitanos Episcopos in Ecclesiâ Dypticha restituendum, nec prius suspensam redintegrans cum Orientalibus communionem, quàm id executioni mandassent.

Acta Ephesini secundi, seu verius prædicatoriæ Synodi, auctoritate suâ S. Leo rescidit, & Flaviani, ac Theodreti iniquè depositorum appellationem suscepit. Concilium Chalcedonenſe equidem coegit, ibi iterum rescissa Ephesini lacerationi acta, ibi retractata Eutichianæ hæresis condemnatio. Sed quare? quia res Orientis ita exigebant. Theodosius acta Ephesinæ Synodi firmaverat, hæc debebat rescindi, ut factum fuit à Mar-

ciano Imperatore . Dioscorus depositione erat dammandus , hæresis Eutychiana in Ephesino Concilio probata , erat anathematizanda . Hæc omnia , per se facere poterat Leo ; sed consultius paci Orientis fuit ad hæc Synodum convocare . Sed in hac Synodo quantum emicuit Leonis , & S. Sedis dignitas ! Auctoritate Leonis sententia in Dioscorum lata est . Epistola Leonis ad Flavianum , velut oraculo Sancti Petri per Leonem loquentis , hæresis Eutychiana conficta est ; tandemque acta Concilii , pro ut ipsi libuit , à S. Leone confirmata . Hæc pro veritate , ac Tyronum notitia dicta sint .

Cæterum fallitur Dupin , dum putat , ex convocacione Conciliorum , optata , petita , facta per Romanos Pontifices , ad res fidei decernendas , eveneri eorum infallibilitatem , quasi id factum fuerit ex conscientia propria fallibilitatis . Nunquid enim infallibiles erant Petrus , cæterique Apostoli , per Spiritum Sanctum in veritate firmati ? Et tamen exortâ controversiâ de legalium observatione , opportunum judicarunt cogere Concilium Hierosolymitanum , ut communi voto firmaretur , quod à quolibet eadem firmitate poterat decerni . Sed in hoc Concilio etiam emicuit auctoritas Petri : Is enim in Concilio sententiam tulit , ac sententia Petri Concilii pariter sententia fuit . *Tamen omnis multitudo , & in sententia ejus (Petri) Jacobus Apostolus , & omnes simul Presbyteri transierunt . Hæc non debent esse molesta lectori , sed & mihi , & illi utilia , ut probemus , ante Apostolum Paulum non ignorasse Petrum Principem esse hujus decreti , legem post Evangelium non esse servandam . Hieronym. epist. 89. , nunc 74. ad Augustinum .* Sic Romani Pontifices Petri successores in Conciliis per epistolas , vel Legatos sententiam dixerunt , ac in eorum sententiam Patres transierunt .

XVIII. Ad confirmat. nego assum-

tum . Non enim congregantur Concilia , ut definitioni Pontificis dent infallibilitatem , sed aliis causis . Prima , quia licet in Pontifice sit infallibilitas in decernendo , tamen debet hoc præstare per media humana , & ordinaria , nimirum discussionem , & disquisitionem , ut fecerunt Apostoli in Concilio Hierosolymitano : hæc autem discussio non melius fieri potest , quam in Concilio Generali , si res sit magni momenti , aut ad totam Ecclesiam pertinens ; vel in Concilio Particulari , si res non sit tantæ magnitudinis . Secunda , quia definitiones de fide , in quibus agitur de sensu Scripturarum , pendunt maxime ex traditione , & consensu Ecclesiarum ; ad quod dignoscendum non est melior ratio , quam ut conveniant Episcopi ex omnibus Provinciis , & unusquisque referat suæ Ecclesiæ traditionem , & consuetudinem . Tertia , utilissime convocantur Concilia , ut finis imponatur controversiis sententiâ concordandi , & ut definitiones de fide nedum fiant , sed generaliter servantur ; quod optime evenit , cum illi omnes Episcopi subscribunt , & profitentur , eas se amplecti , & in suis Ecclesiis prædicaturos .

XIX. Objicit quartò , multa Divi Augustini testimonia . Primò , ex iis , quæ habet in *libris de Baptismo* , ubi observat , nec Stephani , nec Cypriani judicio quæstionem de hæreticis rebaptizandis fuisse terminatam , sed universalis Concilii , ac totius Ecclesiæ judicio . Hinc ibidem apertè pronunciat , omnes omnino Episcoporum litteras , & omnia omnino Concilia Provincialia , ne exceptis quidem Romanis , emendari posse à Conciliis majoribus . Secundò , *lib. 2. ad Bonifac. 6. 3.* supponit possibile , Romanam Ecclesiam falsum judicasse in causa Cælestii . Tandem adfert sententiam Concilii Gen. 5. *collat. 8.* , quod videatur sentire , veritatem alibi deiniri non posse , quam in Conciliis Generalibus , nec ab ullo privato Episcopo (etiam Ro-

Romano) quicquam circa fidem statui posse, quod ita certum sit, ac ea, quæ in Conciliis definita sunt.

Respondeo. Quintum detulerit S. Augustinus iudicio Romani Pontificis, supra vidimus, ubi in causa Pelagianorum, post Africana Concilia, missa ad Sedem Apostolicam dixit, Romani Pontificis rescripto omnem dubitationem fuisse sublatam, & causam finitam. In libris autem de Baptismo contr. Donatistas verè dicit, causam rebaptizantium hæreticos non fuisse terminatam à Stephano, sed in Concilio, & iudicio totius Ecclesiæ; non quia Stephanus eam terminare non posset, sicut alii Pontifices alias causas sine Concilio terminarunt, ut Giliarum Episcopi supra laudati fatentur, sed quia noluit: præcepit quidem, nihil esse novandum, sed non desinivit, & hoc prudenter: videbat enim Cyprianum, & Socios plus a quo suæ opinionis tenaces; qua in re non in totum à labe illos excusat S. Augustinus. Si ergo Sanctus Augustinus reprehensibilis aliquomodo iudicat Cyprianum, quia Stephano præcipienti non cessit, iudicat, Stephani decretum tale fuisse, ut quilibet ei parere teneretur, & consequenter infallibile.

Quando verò dicit S. Augustinus lib. 2. de Bapt. c. 3., litteras Episcoporum, & Conciliorum priorum posse per Episcopos potiores, & subsequenter Concilia emendari; Vel præscindit ab Episcopo Romano, de quo supra dixerat, esse cuiuslibet Episcopatu præferendum; Vel loquitur in causis facti, non fidei, ut supra dictum fuit; Vel loquitur causâ nondum terminatâ, & decisâ, qualis causa Cypriani. Hoc autem dicendum cenico: nam cum Augustinus ibidem dicat, etiam ipsa Concilia plenariæ ex universo Orbe conlata emendari posse à posterioribus; videretur Sancti Doctor, auferre ab Ecclesia omnem regulam infallibilem, & inemendabilem, & insuper sibi contradiceret,

dum post pauca subdit, Cyprianum, cedere debuisse, si suo tempore veritas eliquata, declarata, & solidata, fuisset per Concilium plenarium; ubi admittit Concilium plenarium firmum, infallibile, & irreformabile, aliàs Cyprianus ei cedere non debuisset.

Quod verò adfert ex lib. 2. ad Bonifacium Episcopum Romanum, non est ad rem. Primum, quia illa verba, sed si, quod absit, indicant, Augustinum ibi proponere, & loqui de defectu à fide in Ecclesia Romana, tanquam de re impossibili; statim enim ostendit, quid egerint Romani Pontifices contra Cælestium, & Pelagium, imò & Zozimus ipse, qui nimis lenitatis circa eos notabatur. Secundò, si bene observetur, ibi S. Doctor non loquitur de Romana Ecclesia includente Caput ipsius, sed de Romanis Clericis. Calumniabantur enim Pelagiani, Romanos Clericos sub Zozimo admisisse prævaricationis crimen contra priorem sententiam suam. Ab hac calumnia eos liberat Augustinus, ostendens primum, esse falsum, quod ipsis obiciebatur. Deinde dato (quod absit) ita tunc fuisse in Romana Ecclesia (non dicit, à Romana Ecclesia) iudicatum, ex hoc potius esset nota prævaricationis Romanis Clericis (non dicit, Romano Episcopo, nec Romane Ecclesiæ) inurenda.

Quod demum producit ex Synodo quinta Generali, nos potius iuvat, sicut enim Apostoli, quamvis infallibiles Spiritus Sancti gratiâ, tamen, voluerunt collatis consiliis rem in Concilio definire; Ità etiam, etsi Summus Pontifex sit absque Concilio infallibilis, tamen quando ipse iudicat, rem exigere, vult rem in Concilio statuere. In hoc tamen stat discrimen inter Apostolos, & Romanos Pontifices, quod illi, nec prævio aliorum consilio indigebant ad ea, quæ agenda erant; extraordinariâ enim vi circa ipsos Deus agebat; at à Romano Pontifice ordinario Pastore, ordinaria, ac humana via premenda est, idèque non

non veniendum ad decisionem, nisi re prius examinata, & discussa.

§. IV.

Argumenta ex Pontificum erratis, & invicem pugnantibus definitionibus.

XX. P Utat Dupin, se ad oculum demonstrare Romanorum Pontificum fallibilitatem, ex facto aliquorum, qui in fide, vel moribus errant.

Primus est Eleutherius (sen quisvis alius Romanus Pontifex) qui, teste Tertulliano *lib. contr. Praxeam c. 1.*, litteras pacis dedit Montanistis hæreticis (quod idem fuit, ac eorum hæresim approbare), quas deinde revocare coactus est.

Secundus fuit Victor, qui in Asiaticos temerè excommunicationem tulit, cujus reprehensus fuit, quia, licet in re disciplinam spectante, graviter erravit.

Tertius Stephanus, qui, ut sese Cypriano opponeret, in errorem extremum lapsus fuit, asserens, omnium omnino hæreticorum baptisinata, sive in nomine Trinitatis, sive secus collata, esse admittenda.

Quartus Liberius, qui non tantum Athanasii damnationi subscripsit, sed & fidei formulæ hæreticæ, ut censuerunt Catholici Hilarius, & Hieronymus.

Quintus Zozimus, qui Celestii Pelagiani hæretici libellum, Catholicum esse, pronuntiavit: ut apud S. Aug. *lib. 2. ad Bonifacium c. 3.*

Sextus Honorius, qui hæresi Monothelitarum favit, ac subscripsit, idcirco in Synodo sexta cum Monothelitis damnatus fuit.

Septimus Joannes XXII., qui erravit, docendo, animas SS. non visuras clarè Deum, nisi post universalem resurrectionem; et hunc suum errorem in totam Ecclesiam inducere conatus est. Hæc Dupin, quibus suo ordine respondendum est.

XXI. Ad primum de Eleutherio dico primò, non temerè suspicari posse, hanc fuisse calumniam impostam Romano Pontifici à Tertulliano; jam Montanista, & ut Praxeam carperet, ad quem scribebat, nimirum quòd Romanum Pontificem benè affectum, & litteras pacis dare paratum Montanistis, Praxeas litteras revocare coegit. Quovis enim seculo hæreticis persuasum fuit, multum suæ causæ accessurum, si Romani Pontificis favorem, arte, vel dolo aucupari, vel tanquam fauorem describere liceret. Secundo dato, quòd Tertullianus verum dicat de Eleutherio, dicit tamen, quòd cognoverit, seu non improba-verit, non quidem Montani errorem circa fidem, sed Montani prophetias; ait enim: *agnoscentem jam prophetias Montani, Priscæ, & Maximilla*, non verò eorum hæresim: quod in Eleutherio fuisset error circa Personam, & circa factum, putando veras eorum prophetias, non circa fidem. Videndus propterea Pamelius in *hunc Tertulliani locum*; quamquam & ipse concludat, etiam hoc saltum deprehendi ex historiis, maxime Eusebii, ubi hoc nro, nec Eleutherius, nec Zephyrinus notatur. Quare dici debet, quòd sicut Artemon (ut refert Eusebius *lib. 5. hist. cap. 28.*) falsò iactaverat, Victorem Pontificem, & etiam Zephyrinum secum sentire, & Christum purum hominem fateri: Cum tamen Victor Theodotum illius sectæ Principem excommunicasset; ità Tertullianus Montanista in Montani sententiam trahere conatur Eleutherium. Hinc videat Dupin (inquit Rhenanus) summam Romani Pontificis auctoritatem etiam illis temporibus, dum illud, quod recipiebat ipse, aut dam-nabat, Ecclesiæ Catholicæ doctrina, vel error contra illam putabatur.

De Victore iam dictum est, sententiam excommunicationis contra Asiaticos intentasse quidem, sed deterri-tum ab Irenæo, aliisque Episcopis, pro bono pacis de facto non tulisse.

In

In hoc tamen Victor excessit ad summum in zelo, non tamen in dogmate, pro quo pugnabat, circa celebrationem Paschatis erravit; cum tantum dogma Catholicum in Concilio Nicæno statutum postea fuerit.

De Stephano, nequaquam. Falsum enim est, eum incidisse in errorem, nimirum Baptismum sub quibuscumque verbis collatum validum esse, ut, dān a genus de Ministro baptismi, fuisse ostendimus. Neque enim concertatio inter Cyprianum, & Stephanum erat de verbis, quibus deberet conferri baptismus, sed de fide: an hæc foret in conferente sic necessaria, ut baptismus collatus ab hæretico fidem veram non habente, etsi consuetis verbis conferretur, repetendus esset tanquam invalidus. Quare Stephanus in epistola sua, quam refutat Cyprianus epist. 74. ad Pompejum dicit: *Si quis ergo à quacumque heresi venerit ad nos, nihil innovetur, nisi quod traditum est, ut manus illi imponatur ad penitentiam*. Non dixit, *si quis ergo quibuscumque verbis baptizatus venerit, sed, à quacumque heresi*, ut ostenderet, se solum velle hæresim in conferente non obitare validitati Baptismi; quod ex eo maxime colligitur, quod in decreto subdit *nihil innovetur, nisi quod traditum est*; ubi verò traditio, Baptisma valere, etsi verbis Evangelicis non consecratum?

Neque dicat Dupin, omnes ferè Hæreticos, qui à temporibus Apostolorum, usque ad tempora Cypriani emerferunt, in Trinitatis nomine minime baptizasse; ergo Stephanus baptismum hæreticorum admittens, admittit Baptismum non collatum in nomine Trinitatis.

Etenim hoc debuisset Dupin ostendere. Nam Concilium Nicænum primum, in quo causa hæc terminata fuit, solos Paulianitas rebaptizandos censens, cæterorum Baptisma comprobare videtur. Item Laodicenum can. 8 addit Cataphrygas, nil de aliis dicens. Alii ergo in nomine Trinitatis

baptizasse credendi sunt.

De Liberio, dicam in *tractatu de Trinitate qu. 1. dub. 3. §. 4.* Bellarminus lib. 4. de Rom. Pontif. c. 9. censet, Liberium reverà exilii tædio, ac graminis fractum à fide exterius defecisse, subscribendo formulæ Arianae manu, non tamen mente, nec corde; sicut Petrus, qui timore victus, ore negavit Christum: quare hæreticus non fuit. Is tamen error fuit error personæ, qui nostrum assertum non destruit; quando enim dicimus, Romanum Pontificem esse infestibilem in fide, non loquimur de eo, ut persona privata est, sed de eo, ut persona publica, seu ut Pastor docens gregem. Huc enim respicit illud Christi dictum: *confirma fratres tuos*.

Natalis verò Alexandre *hist. Eccles. secul. 4. dissert. 32. art. 2.* sustinet, Liberium neque manu falsæ fidei subscripsisse. Ex tribus enim formulis Sirmii confectis subscripsit primæ, quæ licet vocem *consubstantialis* non exprimeret, Arianum tamen errorem non continebat. At, quia Ariani de hoc gloriantes spargere ceperunt, Episcopum Romanum suis Synodis tandem subscripsisse, ex hoc falso rumore, & Hilarius, & Hieronymus crediderunt, Liberium Arianae perfidiæ subscripsisse; eò vel maxime, quod videbatur, etiam damnationem Athanasii comprobasse, cum qua causa Arianorum conjuncta erat. Videatur Alexander præfatus, & Sozomenus lib. 4. *hist. c. 15.* secundum editionem Valeii, factum hoc ex integro referens.

Miror, quomodo contra Zozimum adferat Divus Augustinus, cum *loco citato L. 2. ad Bonifacium c. 3.* ejus causam defendat. Audiatur ergo: *Nunc verò, cum primitus Beatissimi Papa Innocentii littera Episcoporum litteris respondentis Afrorum, pariter hunc errorem, quem conantur illi persuadere damnaverit. Successusque ejus Sanctus Papa Zozimus hoc tenendum esse, quod isti de parvulis sentiunt, nunquam dixerit, nunquam scripserit; insuper etiam*
Ccle-

Celestium se purgare molientem, ad consentiendum supradictis Sedis Apostolica litteris, crebra interlocutione constrinxeris: professio quidquid interea lenius actum est eum Celestio, servata dumtaxat antiquissima, & robustissima fidei firmitate, correctionis fuit elementissima, suasio, non adprobatio exitiosissima pravitatis. Et quod ab eodem Sacerdote postea Celestius, & Pelagius repetita auctoritate damnati sunt paululum intermisit, jam necessariis proferenda ratio securitatis fuit, non pravaricatio prius cognita, vel nova cognitio veritatis. Quid pro hunc Zozimi fortius?

De Honorio I., in quo putat, se triumphare Dupin, jam dixi dubio precedenti, ipsum nimis indulgentia errorem fovisse, quem debebat pro debito sui officii coercere, ex quo fundavit prudentem presumptionem, ipsum favisse Monothelitis, & cum Monothelitis damnandum. Videantur ibi dicta.

Pro defensione Joannis XXII. dicam in tractatu de Visione Dei, ubi statum, quidquid Joannes locutus est de animabus Iustorum post hanc vitam, non asserendo, sed opinando, & disputationis gratia fuisse locutum; quod firmis documentis ostendam. Interim videri potest Natalis Alexandre *bist. Eccl. secul. 14.*

XXII. Objicit ulterius, Romanos Pontifices in suis definitionibus secum invicem pugnavisse, & consequenter alterutrum errasse.

Primò. Celestinus III. decrevit, uno conjugum ad hæresim transeunte, alterum, qui manet in fide, posse ad secundas vota transire. Cujus determinatio, ut dicit glossa c. *Quantum de divortio*, olim extabat in corpore Juris. Innocentius verò III. eodem cap. determinat contrarium.

Secundò. Pelagius constitutionem fecit, quòd omnes Subdiaconi Sicilia à suis uxoriis abstinere, quas in minoribus ordinibus duxerant, aut ab officio cessarent. Hanc retractavit Gregorius I. ejus successor, ut patet 31. *distinct. c. Ante triennium* in textu, & glossa.

Terriò. Innocentius IV. in c. *Presbyter* de Sacramentis non iterandis, ait, formas Sacramentorum post Apostolos esse inventas. Contrarium statuit Eugenius IV. cum universa Theologorum schola.

Quartò. Stephanus II. consultus, decretalem statuit c. 11. *epist. Si quis in vino*, propterea quid aquam non inveniebat, omnino periclitantem infantem baptizavit, nulla ei exinde adscribitur culpa. Infantes sic permancant in ipso baptismo. Nam si aqua adfuit præsens, ille Presbyter excommunicetur. Hæc definitio est contraria responsi Nicolai I. ad consulta Bulgarorum.

Quintò. Septem Romani Pontifices, Gregorius IX., Innocentius IV., Alexander IV., Nicolaus III., Martinus IV., Nicolaus IV., & Clemens V., adprobarunt institutum eorum Franciscanorum, qui illorum, quibus utebantur, proprietatem abdicabant, eamque Pontifici ultro largiebantur, qui in hoc Christum se imitari dicebant: & damnarunt eos, qui hoc improbarent. At Joannes XXII. totum hoc damnavit, abolevit, manifestè damnans doctrinam de expoliatione Christi, & Apostolorum uti pestiferam, erroneam, damnatam doctrinam, & hæresim, ac blasphemiam. Ità in sanctione: *Quia quorundam anno 1314.* promulgata. Quod ergo alii Pontifices, ut pium, Sanctum, & ad Christi imitationem sacrum laudant, & adprobant; Alter damnat, ut pestiferum, erroneum, damnatum ut hæresim, ut blasphemiam, & eos, qui imposterum dicturi, & defensori sunt, hæreseos notà inurit, & tanquam hæreticos contumaces, Romanæque Ecclesiæ rebelles ab omnibus haberi, mandat. Ubi ergo infallibilitas in Romanis Pontificibus?

Alias plures repugnantias, & contradictiones passim deprehendet, qui Decretales, ac Bullas Pontificum percurreret. Bonifacius enim VIII., ut fidei articulum definiret, reges suæ Sedi in temporalibus subesse. Sic in *extra-*
vag.

vag. unam Sanctam. At Clemens V. hanc constitutionem revocavit in *cap. Meruit de Privilegiis*. Sixtus V. suam de Bibliis vulgatis editionem emendatissimam esse, pronunciat, *Bullâ editionis sue præfixâ*. Clemens verò VIII., cum multos in illa errores deprehendisset, illam suppressit, novæque editioni, & correctioni manum apposuit.

XXIII. Priùsq̃am ad hæc responderem, aliqua prænotanda sunt. Primò, Romanum Pontificem posse considerari, vel ut Persona privata est, seu particularis Doctor, vel ut Persona publica, seu ut Pastor, & Doctor universalis fidelium, & ut loquens ex Cathedra. Sicut Regem possumus considerare, ut homo particularis est, & ut Rex loquens ex Throno, condens edicta in bonum totius Regni. Quando ergo dicimus, Romanum Pontificem esse infallibilem, etiam sine Concilio Generali, in decernendis rebus ad fidem, morefque ad universalem Ecclesiâ spectantes, non loquimur de Pontifice, ut Personâ privatâ, sive, ut Doctore particulari: idèdque infallibilis auctoritatis esse non dicimus responsâ variorum Pontificum, in Jure Canonico contenta, ad casus quosdam particulares, quibus rogati opinionem suam aperuerunt, nec dogma sancire intenderunt; cum ibi non exponerent mentem Sedis Apostolicæ, sed suam particularem. Loquimur ergo de Pontifice docente ex Cathedra, & ut Doctore universali.

Et insuper loquimur de quæstionibus Juris concernentibus dogma tangens fidem, aut mores, & toti Ecclesiæ proponendum: nam in quæstionibus puri facti particularis connexionem non habentis cum dogmate, potius videtur gerere personam humani Judicis procedentis ex humana informatione, quàm Capitis, & Doctoris Ecclesiæ docentis; nec videtur in hoc habere locum privilegium confirmandi fratres Petro concessum,

Tunc autem Pontifex loquitur, ut Pontifex, ex Cathedra, & ut Doctor

Tom. I.

Universalis, quando excitatâ, & ad eum delatâ controversiâ de aliquo dogmate, adhibitis consiliariis, & factâ debitâ materiæ disquisitione, Pontifex, imploratâ Spir. S. adfûsentia, decernit, ac proponit universæ Ecclesiæ quid credendum sit, vel quid faciendum. In tali judicio dicimus, Pontificem prorsus esse infallibilem, & per eum loqui Petrum, utpote, qui à semetipso non loquitur, sed ex adfûsentia speciali Spiritus Christi ipsum gubernantis in decernendo.

XXIV. His suppositis ad objectâ dissolvenda descendo. Ad primum. Cælestinum III. fateor itâ sensisse, ex illo Pauli 1. Cor. 7. v. 15. *Si infidelis discedit, discedat: non enim servituti subiectus est frater, aut soror hujusmodi*, opinando tamen, non decernendo, ut Doctorem privatum, non ut Ecclesiæ universalis Magistrum. Hoc testatur Innocentius c. *Quanto de divortii citato* his verbis: *Licet quidam prædecessores nostri sensisse aliter videantur, sensisse (ait), non definivisse.* Sed nec Innocentius quidem definivit quidquam, sed explicat sententiam, & opinionem suam inquitens, *Non credimus, quòd in hoc casu is, qui relinquitur, possit ad secundas nuptias transire.* Verum dixit Innocentius, falsum Cælestinum, neuter tamen definiendo processit. Rem postea definivit Tridentinum *sess. 24. can. 5. anathemate feriens, qui dixerit, propter brevem dissolvi posse matrimonii vinculum.* Nec enim statim, si aliquid in juris volumine continetur, fidei dogma esse, credendum est.

Ad secundum dico, Pelagium II., & Gregorium I. invicem non pugnare. Nam Pelagius decrevit, ut omnes Subdiaconi Siciliæ abstinere à suis uxoribus, quas in minoribus ordinibus duxerant, quia supponebat, eos secundum morem Ecclesiæ Romæ in ordinatione ad Subdiaconatum, votum continentiae emisisse. Verùm cum itâ non esset, idèdque propterea multi reclamarent, re à Sancto Gregorio comper-

Z

perit, rescidit Pelagii decretum, permittitque eis, qui continentiam in susceptione Subdiaconatus non voverant, uxoribus antea ductis commisceri: factum tamen præcepto Episcopis, ut nullum Subdiaconum facere præsumerent, nisi, qui se victurum eamdem promiserit: Laudans deinde eos, qui constitutioni Pelagii parentes, continenter cum suis uxoribus vivere ceperant, exhortantque eos, ut in bono suo permanent; ita *dist. 31. cap. Ante triennium*. Pelagium verò potuisse falso supposito laborare in materia facti, ut in re disciplinam concernente, non lædit Romani Pontificis adfertam infallibilitatem.

Ad tertium, si verum est, quod de Innocentio IV. refertur, dico, eum opinativè locutum, non adfervivè, ut doctorem privatum suam opinionem declarantem, non ut Pontificem decisivè loquentem. Quamvis (ut ex verbis Innocentii observo) non negat, Apostolos absque omni prorsus forma, seu verbis Sacramenta contulisse: dicit enim, quoddam *manus imponebant*, & *orationem fundebant*, sed solum vult, Apostolos non fuisse usos, saltem in aliquibus Sacramentis, eadem specie formam, seu iisdem verbis, quibus modò utitur Ecclesia, & quoddam, nisi Ecclesia formas postea advenisset, quibus utimur, sufficeret ordinatori sic dicere: *Sis Sacerdos*, vel *alia quæpollentia verba*; quod non contradicit Eugenii IV. definitioni, qui licet statuerit, omnia Sacramenta debere perfici verbis, non dicit tamen, verba in omnibus Sacramentis esse in specie determinata à Christo: estque satis probabilis Theologorum sententia, in aliquibus Sacramentis (& præsertim Ordinis) Christum determinasse verba solum in genere, relinquendo, ut Ecclesia determinaret, quæ in specie verba essent adhibenda.

Ad quartum, de Stephano II., vel d'co, eum non pronunciasse validum Baptisma in vino collatum (hoc enim vel pueri sciunt) sed solum dixisse,

Præbytero, qui, non existente aqua, sic baptizavit, non debere adscribi culpam puniendam penâ canonica. Illa autem verba *Infantes sic permanent in ipso Baptismo*, censet Labbeus (ut notat Harduin. *to. 3. Concil. eol. 1987.*) esse glossam in margine primò positum, & à margine in textum temerè intrusum. Vel, ut placet Natali Alexandre, mendosum esse textum, ut à Sirmondo refertur, & sic restituendam videri sinceram lectionem, *nulla ei exinde adscribitur culpa, si Infantes sic permanent in ipso Baptismo*; ita laudatus Auctor *hist. Eccl. secul. 8. c. 1. art. 6.*

Ad quintum, in quo videtur facere magnam vim, multa dicit Natalis Alexandre *hystor. Eccl. secul. 13. & 14. dissertat. 11.*, ubi agit de controversia à Dupin allata, & ostendit, Constitutiones Joannis XXII. de paupertate Christi, & Apostolorum, dominioque, vel usu PP. Minorum, in dogmate fidei, non esse contrarias Nicolai III. Constitutioni *Exiti*, qui *seminat*.

Duas enim quæstiones tanguit illæ Constitutiones. Prima est de paupertate Christi, & Apostolorum; altera de jure, ac dominio Fratrum Minorum. Prima Fidem spectat: secunda verò Philosophiam Moralem. Quoad primam Joannes XXII. à Nicolao non dissentit. Nam Nicolaus adserit, Christum abdicationem absolutissimam dominii rerum temporalium tam in communi, quam in particulari, verbo, & exemplo docuisse; quod sanè verissimum est. Verbo enim docuit *Matth. 10.*: exemplo autem *Matth. 8.*, & *Luce 8.* Non negat tamen, Christum aliquando rerum aliquarum dominium habuisse, earum maximè, quibus utebatur, vel quas ad suos, & suorum us us accipiebat, & aliquando tempore servabat tanquam ad victum necessarias, dicitur enim in *Evangelio form. 13.*, loculos cum Apostolis possedisse, ex quibus emi jubebat necessaria ad communem sustentationem, & pauperi-

peribus etiam erogari; quod vitæ genus maximè imminente Passione amplexus fuit. Hoc est, quod Joannes XXII. adferit, & hæreseos damnat oppositum, & quia esset contra Scripturam, & quia, si Christus dominium propriè dictum in illas pecunias non habuisset, injustè illas possedisset, injustè expendisset; quia bona non sua, sed aliena, & ex bonis alienis, injustèque possessis elemosynas largitus fuisset. Nec in hoc dissentit à Nicolao, qui etiam docuit, Christum infirmorum personam suscepisse in loculis, & infirmorum imperfectionibus condescendisse, infirmitati scilicet naturæ, quam assumpsit, cui sustentandæ multa necessaria sunt, sese accommodans. Ecce igitur, quomodo in fidei puncto non discordant Nicolaus III., & Joannes XXII., cujus sententiam ita exposuere Cardinales, Episcopi, & Doctores ab ipso consulti, quos refert præfatus Alexander.

In altera verò quæstione, de Fr. Minorum arctissima paupertate, an scilicet simplicem usum facti, an verò etiam jus, & dominium habeant iis in rebus, quæ usu consumuntur: Nec etiam invicem pugnant Nicolaus, & Joannes. Nam Nicolaus decrevit, apud Minoritas esse solum simplicem usum facti, loquendo de iis rebus, in quibus usus à dominio separabilis est, quod in rebus, quæ usu ipso consumuntur, contingere nequit. Quid verò in hoc sensu locutus sit Nicolaus, ostendunt ipsius verba. Nam respondens legi dicenti, *non posse usufructum à dominio perpetuo separari* &c., respondet. *Quæ quidem lex de rebus illis intelligitur, quarum penes unum usus rei, & penes alium dominium possit, licet inutile remanere, quod nequaquam in rebus usu consumptibilibus potest esse; cum in illis per usum, vel ab usum usufructui, substantia talis rei esse desinat, & per consequens proprietas etiam inutilis non subsistat.* En quomodo, nec in hoc discordes sunt hi

duo Pontifices. Cæterum etsi in hoc Joannes à Nicolao dissentiret, neuter illorum in fidei dogmate errasse dicendus est; hujusmodi enim quæstio fidei summam non spectat, sed tantum Moralem Philosophiam. De hoc ægemus fusiùs in *Tractatu de Justitia, & Jure.*

Ad id, quod addit de Bonifacio VIII., fallitur, dum ait, eius Constitutionem *Unam sanctam* fuisse à Clemente V. abrogatam. Eam quidem, sicut & aliam, *Rem non novam*, moderatus est Clemens, non abrogavit. Ità declaravit in c. *meruit*, ubi irritans omnes sententias, constitutiones &c., quæ in sexto decretalium libro non continentur, quatenus præjudicare possunt juribus Regum &c., *duabus* (inquit) *Constitutionibus, quæ non sunt in eodem libro inclusa, quarum una incipit Unam sanctam, & alia Rem non novam, quas secundum moderationem easdem alias per nos factas, & non aliter intelligi volumus in suo robore, permanere, exceptis.* Consideratissimam enim ratione perpendit Clemens V. in decretali *Unam sanctam*, duo esse distinguenda. Unum, definitionem, quæ Bonifacius pronunciat, de necessitate salutis esse Reges Romano subesse Pontifici, eique parendum esse, etiam in temporalibus; & hanc adprobat, ut de fide tenendam Clemens. Alterum, rationes, quibus Bonifacius hanc necessitatem adstruebat, & secundum hanc partem, quæ ad fidem non spectabat, & in qua doctrinam suam non Ecclesiæ, Bonifacius effundebat, moderatus est. Ità concordat cum Bonifacio Clementem Alexandre *hiss. Eccles. secul. 13. & 14. dissertat. 9.*, cui tamen non in omnibus, quæ ibi dicit adharendum est. Alexandrum adduxi, ut Doctorem Sorbonicum Sorbonico contraponam, & ut, qui legerit, videat, doctrinam Dupin esse doctrinam suam, non (ut ipse venditat) Academiæ Parisiensis.

Falsitatis etiam evincitur contrarietas, quæ supponitur circa Bibliorum

correctionem, inter Sixtum V., & Clementem VIII.; non enim Sixtus V. publicè toti Ecclesiae editionem suam proposuerat, sed cum opus jam esset excusum, & ut in lucem emitteretur, idem Pontifex operam daret, animadvertens, non pauca in Sacra Biblia praeli vitio irrepsisse, quae iteratà diligentia indigere viderentur, totum opus sub incudem revocandum censuit, atque decrevit. Id verò cum morte praeventus prestare non potuisset..... tandem sub initium Pontificatus Clementis VIII..... opus, quod Sixtus intenderat, Deo bene juvante perfectum est. Ità legitur in Bibliorum praefatione. Non ergo, quod Sixtus iudicavit perfectum, Clemens emendatione dignum existimavit, sed quod Sixtus perfectum putaverat, idem Sixtus advertens in aliquibus emendandum, exemplaria jam impressa revocavit, & emendationem novam indixit, quam Clemens absolvit. Et si autem deceptio aliqua fingeretur in Sixto, dum putavit emendata Biblia, quae adhuc erant mendosa, nihil tamen praediceretur infallibilitati Romani Pontificis, quia menda illa ex typographorum vitio irrepsissent, & error facti erat: praeterquamquod mendae minoris momenti erant, quae sensum & doctrinam Sacrae Scripturae non corrumperent.

§. V.

Argumenta ex testimoniis Pontificum, & Conciliorum.

XXV. **P**rosequitur Dupin intendens, ex confessione eorundem Pontificum evincere eorum fallibilitatem in discernendo.

Primo opponit Paulum IV., qui in confesso satis frequenti, in quo agebatur de solvendo matrimonio, per verba de praesenti contracto, inter Franciscum Montmorantium, & Joannam Halluyriam Piennecam: Ne quaso (inquit) vos teneant decessorum meorum facta, & exempla, quae ratenus

sequi volo, quatenus Scriptura auctoritas, & Theologorum rationes, vos ad illud agendum inducent.... non dubito, quin ego, & praedecessores mei errare aliquando potuerimus, non solum in hoc, sed etiam in pluribus aliis rerum generibus, & tamen condemnandi plane non sumus: nam Deus suam ita regit Ecclesiam, ut illi certum ad tempus abscondat multa, quae ita inde patefacit.

Si vera sunt haec, quae unius testis dicto refert Dupin, nimirum Joannis Haze Parisiensis Theologi, quae refert etiam Natalis Alexandre *bisf. Eccles. secul. 15., & 16. cap. 1. artic. 18.* Respondeo, Pauli, ut Doctoris privati fuisse specialem opinionem, Pontificem non posse solvere matrimonium, per verba de praesenti contractum, non tamen consummatum; cum tamen opinio contraria communior sit: & ante ipsum aliqui Summi Pontifices dispensarint, & post ipsam Pius IV., Gregorius XIII., & S. Pius V., quorum iudicio potius standum est. Id autem, quod subdit, *plures suos decessores errare potuisse*, vel privata ejus opinio fuit, vel locutus est de suis praedecessoribus in casibus particularibus, & meri facti, non de ipsis, ut ex Cathedra definientibus, & totam Ecclesiam docentibus; & proinde ejus dictum nil obesse infallibilitati, prout à nobis statuitur. *Fidei enim causas* (ait Natalis Alexandre citato loco scholio 2.) *sive dubia circa fidem emergentia ad Sedem Apostolicam referenda esse, censeo, & ad Ecclesiam Romanam, in qua semper fides intacta servata est, & ea, quae ab Apostolis tradita; & illius decretis, iudicio, & Constitutionibus, ita esse parendum, ut his obviare, plane sit haereticæ pravitatis notam incurtere.* Haereticum enim esse constat, qui Romanae Ecclesiae in fide non concordat, ut scribit Ivo Carnotensis episc. 8. Hinc mari etiam Remensis Archiepiscopi verba ex animo usurpo in opusculo de divortio Lotharii Regis, de omnibus du-

bis,

biis, vel obsecris, quæ ad rectæ fidei tenorem, vel pietatis dogmata pertinent, Sancta Romana Ecclesia, ut omnium Ecclesiarum Mater, & Magistra, Nutrix, & Doctrix est consulenda, & ejus salubria monita sunt tenenda, maxime ab iis, qui in illis regionibus habitant, in quibus Divina Gratia per ejus prædicationem omnes in fide genuit, & Catholico lacte nutrit, quos ad vitam præordinavit æternam. Hæc Natalis Alexandre, & ita Galli antiqui sentiebant.

XXVI. Objicit secundò Adrianum VI., qui in 4. sent. de Ministro Confirmationis ait, *ad secundum principale de facto Gregorius I. dico, quod si per Romanam Ecclesiam intelligatur Caput illius, puta Pontifex, certum est, quod possit errare, etiam in iis, quæ tangunt fidem, hæresim per suam determinationem, aut decretalem docendo; Plures enim fuerunt Pontifices Romani hæretici; item, & novissimè fertur de Joanne XXII., qui publicè docuit, declaravit, & ab omnibus teneri mandavit.* Hæc licet scripserit adhuc Lovaniensis Theologus; factus tamen Pontifex non retractavit.

Respondeo, Adrianum, dum ea conscripsit, errasse, sicut erravit, dum ait, Joannem XXII. hæresim publicè docuisse, declarasse, & ab omnibus teneri mandasse; cuius oppositum firmis documentis ostendam, in *tractatu de Visione*. Nisi fortè dicatur, locutum fuisse de Pontifice, ut Persona privata est, non verò ut Doctor universalis ex Chatedra Ecclesiam instruens. Quare suspicor, Adrianum fuisse ita locutum, quia fortè erat in opinione quorundam Theologorum, qui distinguebant Romanam Ecclesiam à Romano Pontifice, & dicebant, hunc in fide errare posse, illum non posse: sicque sibi videbantur omnia argumenta solvere, quia pleraque non Romanæ Ecclesiæ, sed Summi Pontificis fidem impugnant. Porro Adrianum in hac opinione fuisse, credibile reddunt illa verba, *si per Romanam Ecclesiam intel-*

ligatur Caput illius, puta Pontifex &c.

Verùm placere non potest hæc distinctio. Isti enim ab errore vindicant quidem Romanam Ecclesiam, sed non Romanum Pontificem. Nullum ergo discrimen invenio inter Apostolicam Sedem, & Apostolicæ Sedi insidentem, dum ex ea loquitur, & in ea sedens judicat. Cùm enim Galliarum Episcopi accesserunt, fidei oracula postulaturi tempore Innocentii X., ut supra dictum est, interrogaruntne singulos Romanæ Ecclesiæ fideles, aut Ecclesiam ipsam Romanam? An potius Innocentii Summi Pontificis judicium, quæsierunt? & meritò, nam non Romanus Populus, aut Clerus adhuc congregatus est qui Ecclesiam universalem docet ea, quæ fidei sunt, sed Romanus Episcopus. Nec potestas judicandi de causis fidei, ligandi, solvendi, pascendi, fratres confirmandi, in populo, aut Clero Romano est, sed in Romano Pastore. Nec Concilia exigunt Confirmationem, & robur ab ipsa Romana plebe, sed à plebis Romanæ Antistite. Melius ergo discurremus, dum in Romano Pontifice duplicem singimus contingere posse errorem, unum Personalem, Judiciale alterum. Error itaque Personalis est privatus error Personæ. Judicialis verò est error Ministerii, & Publicus. Consultus Pontifex de aliquo casu, vel facto particulari respondet. Si in hoc aliquis error esset, hominis esset, & Personalis, non Pontificis, quamvis responsum illud à Pontifice datum sit. At si idem Pontifex, instituto iudicio de fidei questione, iudicando aliquid definiret, quod reverà falsum esset, tunc hic error à publico Ecclesiæ censore prodiret, essetque error Judicialis, error Sedis. De erroribus primi generis loquitur Adrianus, non de erroribus secundi generis.

Hoc errore, nimirum Personali, factetur, se potuisse labi Gregorius XI. in testamento suo, ut refert idem Dupin. De quo pariter loquitur Innocentius III., dum *serm. 2. (non 3.) de con-*

consecratione Pontificis, ait, in tantum enim fides nobis necessaria est, ut, cum de cæteris peccatis solum Deum iudicem habeam, propter solum peccatum, quod in fide committitur, possem ab Ecclesia judicari. Hic enim cum loqui de errore Personali in fide, manifestum est: nam immediatè ante, ubi loquitur de se ipso ratione officii, sic ait. Nisi enim ego solidatus essem in fide, quomodo possem alios in fide firmare? Quod ad officium meum noscitur pertinere, Domino protestante: Ego, inquit, pro te rogavi Petre, ut non desiciat fides tua; & tu aliquando conversus, confirma fratres tuos. Rogavit, & impetravit... & ideo fides Apostolica Sedis in nulla unquam turbatione defecit, sed integra semper, & illibata permansit, ut Petri privilegium persisteret inconcussum. Imò nec Romani Pontificis Personam unquam amissuram fidem, adserit, *serm.* 3. de consecr. Sum. Pontif. dicens, Ego tamen faciliè non crediderim, ut Deus permetteret, Romanum Pontificem contra fidem errare, pro quo spiritualiter oravit in Petro, & *serm.* 4. de eodem, ut ostendat, quomodo posset ab Ecclesia judicari, si fortè laberetur in hæresim: Verùm (inquit) non frustra sibi blandiatur de potestate, neque de sublimitate, vel honore temerè gloriatur: quia quantò minùs judicatur ab Homine, tantò magis judicatur à Deo. Minùs dico; quia potest ab hominibus judicari, vel potius judicatus offendi, si videlicet evanescat in hæresim. Nihil ergo ex Adriano conficit pro sua causa Dupin.

XXVII. Obijcit tertid Eugenum IV., qui in tertia Bulla adversus Concilium Basileense, licèt se supra Concilium Generale efferret, ait, in questionibus, quæ ad fidem respiciunt, vel statum universalis Ecclesiæ, potius attendendam esse Concilii, quàm Papa sententiam.

Sed quid dicit Dupin, si ipsi ostendero, præfatam tertiam Bullam non solum fuisse cum aliis duabus prioribus revocatam, sed nunquam reverà

ab Eugenio proditiisse? Quodd præfatam Bullas revocaverit Eugenius, evidenter ostendo, ex Bulla revocationis, quæ legitur *sess.* 14. Concilii Basileensis tom. 8. Concilior. edit. Harduin. col. 1172. Quodd verò dicta tertia Bulla Eugenii scetus nunquam fuerit, præfata revocationis Bulla apertè loquitur. Ubi enim se revocare duas priores, protestatus est, de tertia subdit: nam tertias, quarum tenor de verbo ad verbum inferius describitur, qua dicuntur incipere Deus novit, cum à nobis, aut de scitu nostro nunquam emanaverint, licèt supersuum videatur, quodd non exstat, revocare, tamen, quia petitum est. & ad cautelam, si ullò unquam tempore apparerem cassamus & rev.

XXVIII. Obijcit quartò. Adrianus II. in epist., quæ Synodi sextæ *ass.* 7. lecta, & adprobata est, ait, licèt Honorio ab Orientalibus post mortem anathema sit dictum: sciendum tamen est, quia super hæresi fuerat accusatus, propter quam solum licitum est minoribus majorum suorum moribus resistere, vel pravos sensus liberè respicere.

Leo etiam II. epistol. ad Constant. confirmatoriâ Synodi sextæ de Honorio, ait, ipsum Romanam Apostolicam Ecclesiam non Apostolica traditionis doctrinâ lustrasse, sed prophanâ traditione immaculatam fidem maculari permisisse, & in epist. ad Hervigium acculat eum, quodd immaculata traditionis regulam, quam à prædecessoribus acceperat, maculari consenserit.

Respondetur de Honorio satis dictum fuisse dubio præcedente, nimirum, ipsum non fuisse reverà animo hæreticum, licèt talis apparuerit, ac peccasse lenitate, ac indulgentiâ culpabili, non infidelitate. Hinc Adrianus citatus non ait, quodd fuerit hæreticus, sed quodd super hæresi fuerat accusatus. Et Leo II., quodd immaculatam fidem maculari permisit, consensit, non errore proprio maculavit. Dici etiam potest, epistolas Honorii ad Sergium, ob quas hæresis notâ inustus fuit,

fuit, fuisse litteras privatas consultivas, non decretorias; ideòque, si erravit, fuit error Personalis, non Judicialis.

XXIX. Objicit quintò epistolam Synodicam Concilii Basileensis, quæ sic habet: *Si Ecclesia errare possit, cunctum sit, Papam errare posse; tunc & Papa, & reliquo toto corpore errantibus, tota erraret Ecclesia, quod esse non possit. Experientia etiam demonstrat, quia sæpe experti sumus, & legimus, Papam, licet caput, & principalem partem, errasse, reliquum autem corpus, tam errante, errasse nunquam legimus; propterea reliquum sæpe totum corpus condemnavit, aut deposuit Papam, tam ratione fidei, quam morum.* Hæc est definitio Concilii Generalis, & approbata à Pontifice: nam Basileense Concilium approbavit, & OEcumenicum esse, declaravit Eugenius IV. in Bulla, quæ lecta est sessione 14. *Decernimus, inquit, & declaramus, præfatum Concilium Generale Basileense à tempore prædictæ inebriationis suæ legitimè constitutum fuisse, & esse &c.* Cum ergo prædicta epistola Synodica à Synodo probata fuerit *sess. 3.*, haud dubium, quin pro definitione Concilii Generalis habenda sit, & inter acta Concilii ab Eugenio approbata, numeranda. Adde, quòd Nicolaus V. Eugenii successor omnia facta, gesta, concessa, data indulta, disposita, & ordinata Concilii Basileensis approbavit.

Hoc Basileense Concilium est, vel Palladium, ad quod Pontificiæ infallibilitatis hostes confugunt; Vel equus Trojanus, ex quo armati profiliunt. Sed reverà potius, quàm Concilium Christiano-um, Babelica confusio fuit. Convocatum quidem fuerat à Martino V., & ab Eugenio IV. confirmatum. Vix autem expleta *sess. 1.* Eugenius iustis, pluriusque de causis, quas refert Auguit. *Patrit. tom. 9. Concil. col. 1085.* Concilium dissolvit, illudque Basileà Bononiam transtulit, suumque Legatum revocavit. Hoc au-

ditò, pauci, qui Basileam conveniant, contra dissolutionem Concilii obstrepere ceperunt, contententes, id ab Eugenio fieri non potuisse; ideòque *sess. 2.* decretum de superioritate Concilii, cæteraque contra Ecclesiæ Capitis dignitatem, pauci membra moliri ausi sunt; & ex tunc cepit à natura Concilii legitimi deviare, & in errores prolabi usque ad depositionem Eugenii, & electionem alterius Pontificis successive procedens. Fatentur, Basileenses ad tantum facinus non statim progressos fuisse. Multa interea, contra Pontificem attentata sunt, quæ in apertum schisma eruptura, videns Eugenius, pacis studio, & Principum precibus pernotas, maxime Sygismundi Cæsaris, Concilio Basileensi iterum adherere decrevit, revocatis hincinde litteris, & gestis tum à Pontifice contra Concilium, tum à Concilio contra Pontificem. Hoc habetur *sess. 14.* Forma adhesionis sibi à Concilio præscripta, ideoque summæ Apostolicæ libertatis lesiva; Litteræ Eugenii revocatoriæ dissolutionis, & adhesionis Concilio, leguntur *sess. 16.* Verum Concilio in dies contra supremam ejus Auctoritatem moliente, & alia contra Jus, fasque statuenta, tandem Eugenius à Concilio recessit: Concilium alium Papam elegit Amedeum Sabaudæ, Felicis nomine suscepto, aliaque subsecuta fuerunt, non sine piorum scandalo. Vicit tamen, auctoritas Eugenii. Post ejus separationem, Concilium Basileense in Conventiculum versum est, & Synodus ei opposita Bononiæ, Ferratiæ, & tandem Florentiæ ab Eugenio convocata, pro legitima habita est non solum à Latinis, sed etiam à Græcis, qui illuc convenientes pacem cum Latinis inierunt.

Hæc puto apud omnes certa esse. Difficilis est, à quo tempore Concilium Basileense desierit esse legitimum, ejusque gesta nullius esse roboris ceperint. Volunt quidam, hoc tunc solum cepisse ab eo tempore, quo

quo Eugenius totaliter se à Concilio separavit, nimirum *sess.* 19.; aëla verò in prioribus sessionibus habenda esse tanquam à Concilio legitimo edita: inter quæ sunt decreta de Concilii superioritate, & infallibilitate supra Papam. In hac sententia procedit argumentum contrarium Dupin.

Respondeo, negando epistolam illam Synodicam, & cetera acta Basiliensis Concilii, maximè ea, quæ sunt lætiva, & injuriosa auctoritati Pontificiæ, fuisse ab Eugenio, aut ab ullo alio Pontifice confirmata. At inquis. Hoc declaravit Eugenius in Bulla, quæ lecta fuit *sess.* 14., nimirum Concilium illud à tempore suæ inceptionis legitimè continuatum fuisse, & OEcumenicum esse. Distinguo. Declaravit Eugenius, approbando progressum, & continuationem Basiliensis Concilii, concedo, approbando decreta ejus, nego. Approbavit ergo Eugenius (ut schisma, quantum fieri posset, declinaret) progressum, & continuationem Concilii, declarando illud incepisse, continuasse, & adhuc continuare, ut legitimum, idest habuisse, & habere progressum legitimè auctoritate sulcitum: non enim fuerat Eugenii intentio, ut Concilium illud evacuaretur virtute suâ, si causæ, ob quas illud transfulerat, aut non essent veræ, aut non tantæ gravitatis, sicut postea ipse agnovit. Non tamen declaravit, illud continuasse legitimum quoad materiam processum, ita, quod omnis declaratio facta per tale Concilium fuerit vera: aut approbando omnia gesta, & decreta in illo. Primum summæ prudentiæ Eugenii fuit. attendentis ad circumstantias temporum. Secundum verò summæ insipientiæ fuisset. Quis enim, nisi imprudentissimus, approbaret gesta, aut decreta aliqua, antequam illa videret, examinaret, atque plenè, & integrè ponderaret, si quid in eis minus rectum, minus verum, aut minus expediens contineatur? Porro, quod per approbationem processus, & con-

tinuationis Concilii, non intenderit Eugenius, approbare decreta in illo, vel ipsi Basilienses intellexerunt; Si enim aliter intellexissent: cur tanto studio, & tam repetitis vicibus laborarunt per oratores suos, ut eorum decreta approbaret, & confirmaret Eugenius? Stante autem legitimatione in processu Concilii, sed non accedente confirmatione decretorum, stare potest error in decretis, ut apparet in secunda Synodo Ephesina: quæ, sicut fuit legitimè auctoritate inchoata, ita etiam continuata, quæ tamen gravissimè erravit, ut dictum est supra. Hæc, & alia plura Turrecremata, *responsione ad secundum articulum in Concilio Florentino ad Basilienses anno 1439.*, quæ extat *tóm. 9. Concil. Harduin. col. 1269.*, & *lib. 2. summa de Ecclesia cap. 100.*

XXX. Quod autem Eugenius decreta Basiliensa non confirmaverit, quin potius hoc detestaverit, imò ea, quatenus ledentia summam Romani Pontificis auctoritatem, ejuraverit, manifestè evincit ejusdem Eugenii Bulla, quæ incipit *Moses vir Dei*, edita in Concilio Florentino an. 1439., & ab eodem Concilio probata, existens 3. p. *ejusdem Concilii to. 9. Concil. col. 1004.*, quæ Basiliensium omnia acta, gesta, statuta, & decreta, maximè in duabus ultimis sessionibus circa veritatum suarum approbationem, & temerariam depositionem, cassavit, revocavit, & annullavit, ut perniciofa, & à nullam habentibus potestatem temerè condita; decernens; puniendos tanquam hæreticos cum suis fautoribus, ultra statutas penas, æterno Dei judicio, ut qui confusionem, atque scissuram in Ecclesiâ Dei, & Principatu Ecclesiastici Ordinis ponere conarentur.

Neque ea confirmavit Nicolaus V. Eugenii successor. Is enim, ut videre est in eis, Bullâ positâ *to. 8. Concil.*, in Calce Concilii Basiliensis, solum pro bono pacis confirmavit, & approbavit omnia gesta in materia concessionum, dispositionum, benefici-

ciorum, aliarumve dignitatum collatarum, sive à Concilio, sive à Felice Papa nuncupato; quod totum tangit materiam facti. Non autem approbavit, aut tetigit decreta circa dogmata, aut materiam Juris.

Hactenus dicta confirmat Concilium Lateranense quintum sub Leone X. sess. 11., ubi, Concilio approbante, Leo annullans pragmaticam sanctionem, sic ait: *Nec illud nos movere debet, quodd sanctio ipsa, & in ea contenta in Basileensi Concilio edita, & ipso Concilio instante, à Bituricensi congregatione recepta, & acceptata fuerunt; Cum ea omnia post translationem ejusdem Basileensis Concilii per felicis memoria Eugenii Papam IV. etiam Prædecessorem nostrum factam, à Basileensi Conciliabulo, seu potius Conventicula, qua præsertim post hujusmodi translationem Concilium amplius appellari non merebatur, facta extiterint, ac propterea nullum robur habere potuerint: cum etiam solum Romanum Pontificem pro tempore existentem, tanquam auctoritatem super omnia Concilia habentem, tam Conciliorum indiendorum, transferendorum, ac dissolvendorum plenum jus, & potestatem habere, nedum ex Sacra Scriptura testimonio, didicist Sanctorum Patrum, ac aliorum Romanorum Pontificum etiam prædecessorum nostrorum, Sacerdotumque Canonum decretis, sed propriè etiam eorumdem Conciliorum confessione, manifestè constet &c.* Deinde refert aliqua Concilia id contentia.

XXXI. Verùm, quia respondere quis posset, Leonem X. vocare Concilium Basileense Conciliabulum, conventiculum, nullius roboris in ipso gesta, post separationem Eugenii IV. ab ipso, non verò ante; ideoque nil tetigisse, sed reliquisse in suo robore decreta de superioritate, & infallibilitate Concilii supra Papam, sicut & præfatam epistolam Synodicam.

Propterea sic inno primò. Qui habet auctoritatem super omnia Concilia, est superior Conciliis; sed Leo dicit, Papam habere auctoritatem super

Tom. I.

omnia Concilia, ità, ut si ipse à Concilio recedat, Concilium transeat in conciliabulum; ergo Papa superior Concilio est; ergo firmitatem, & infallibilitatem habet Concilium ex adhesionem Papæ Concilio.

Secundò. Ille est ex se infallibilis, ex cujus approbatione, & subscriptione robur accipiunt acta Conciliorum; sed Leo X. inferiùs dicit, consueverunt antiquorum Conciliorum Patres, pro eorum, quæ in suis Conciliis gesta fuerunt, corroboracione, à Romano Pontifice subscriptionem, approbationemque humiliter petere, & obtinere; ergo Papa dat Concilio infallibilitatem, non Concilium Papæ.

Tertiò. Concilia à Romano Pontifice non approbata, nullius roboris sunt, errareque possunt, ut supra ostendimus; sed Concilium Basileense Romani Pontificis approbationem non obtinuit: subdit enim Leo. *Quam laudabilem consuetudinem [nimirum obtinendi approbationem] si Bituricenses, & Basileenses secuti fuissent, hujusmodi molestia proculdubio careremus, scilicet Pragmaticam sanctionem abolendi; Ergo &c.*

XXXII. Objicit sextò, Parisiensem Academiam contra Romani Pontificis infallibilitatem semper pugnassee.

Respondeo. Verius dixisset, ex Parisiensi Academia aliquos, non omnes. Parisiensis enim facultatis Doctores, & Professores fuere D. Thomas, Thomas Waldensis, Thomas Beuxamis, Duvallius, Ludovicus Bail, Coeffetau Ordinis Prædicatorum Episcopus Massiliensis, Carolus Franciscus Abra Episcopus Vabrensis, Abelly Episcopus Ruthenensis, alique: quorum dicta referunt Matthias à Corona tract. 2. de potestate Spirituali circa res fidei cap. 16. §. 7. 8., & Aloysius Andruxi de perpetua Ecclesia doctrina de infallibilitate Papa lib. 1. cap. 4. &c.; qui omnes pro infallibilitate Papæ steterunt; quibus adjungendus est Cornelius Iprensis supra relatus; Augustinus item Triumphus, qui seculo 13. floruit,

A a

floruit,

floruit, fuitque Parisiensis Academix sub D. Thoma, & Bonaventura alumnus de Potestate Ecclesiastica quæst. 10. art. 1., ubi quærit, utrum ad Pontificem spectet determinare, quæ sunt fidei, & sic resolvit. *Ad illum ergo pertinet determinare, quæ sunt fidei, qui est Caput totius Ecclesiæ, talis autem est Summus Pontifex successor Petri, pro cuius fide singulariter rogavit Salvator. Lucæ 22., quando dixit, ego pro te rogavi Petre, ut non deficiat fides tua. Tu autem aliquando conversus confirma fratres tuos. Illud autem satis figuratum est Exodi 18., ubi dictum est Moysi, qui fuit Rex Judæorum, sicut Papa est Rex omnium Christianorum: esto tu populo in his, quæ ad Deum pertinent, ut ostendas ei cærimonias, & ritum colendi Deum. Sicut ergo omnes quæstiones emergentes de Lege, & de Cultu Dei, reservabantur Moysi determinanda: sic omnia, quæ sunt fidei Christiana, Papa est propriè determinare. Unde dicit Cyrillus in libro Theauri. Ut membra maneamus in Capite, in nostro Apostolico Throno Romanorum Pontificis maneamus: à quo nostrum est quærere, quid credere, quid tenere, & quid quærere debeamus. Et Maximus in ep. Orientalibus missa dicit, omnes fines Orbis terræ, qui Dominum sincerè receperunt, & ubique terrarum Catholici veram fidem confitentes, in Pontificem Romanum tanquam in Solem respiciunt, & ex ipso lumine Catholicæ, & Apostolicæ fidei recipiunt veritatem. Nec immerito, quia Petrus legitur primò perfectam silem esse confessus, Domino revelante, cum dixit Matth. 16. Tu es Christus filius Dei vivi. Hæc Triumphus. Quæ idè describere statui, ut omnes videant, quàm subdole Dupin ipsum in suam sententiam trahere conetur: Nam quæst. 5. art. 1. à Dupin citat Triumphus loquitur de Papa, ut quædam Persona est, dicens, quòd si laboretur in hæresim ipso facto esset depositus, Non de Papa, ut Caput Ecclesiæ, & ut ex Cathedra totam Ec-*

clesiam docet: sic enim errare in fide non posse sustinet Triumphus citato loco.

Amplissimè etiam de Romani Pontificis auctoritate sensit Petrus de Marca in admonitione edita anno 1647. præfixa suo Operi de Concordia Sacerdotii, & Imperii, ubi Romanæ Sedi integram vindicat auctoritatem, præsertim in judiciis sine provocacione reddendis, & lib. 1. Concordia cap. 2., inter alia multa dicit, *communi omnium Ecclesiarum consensu fuisse receptum, ut ad Cathedram Petri, tanquam in descriptione circulari linea ad centrum respicerent, non solum nos docuit Leo 1., sed omnes Africani Patres: inde citans Cyprianum epistol. 55., Optatum lib. 2. contr. Parmenianum, D. Hieronymum epistol. ad Damasum, ad ostendendum Ecclesiam Romanam esse centrum unitatis, concludit ex Gelasio primo in tractatu adversus Gracos, Ecclesiæ Romanæ Principatum ab unitate Ecclesiæ, quam Christus sermone directo ad Petrum instituit, esse petendum; Petrum enim solum Christus allocutus est, ut Capite constituto, schismatis tolleretur occasio, & una monstraretur compago Corporis Christi, quæ ad unum Caput gloriosissimâ dilectionis Societate concurreret, & una esset Ecclesiæ, cui fideliter crederetur, unaque domus unius Domini, & unius Redemptoris, in qua de uno pane, & de uno calice nutrimur. Hæc Gelasius.*

XXXIII. Sed dato, facultatem Parisiensem, imò totam Ecclesiam Gallicanam non admittere infallibile prorsus Romani Pontificis iudicium, etiam in materia fidei, nisi accedat consensus Ecclesiæ: quid de aliis facultatibus, & Ecclesiis dicit Dupin, quæ iudicium Papæ judicant ex se infallibile, etiam priusquam accedat Ecclesiæ consensus? Quid enim de Lovaniensi Academia, quæ in defendenda Romani Pontificis infallibilitate extra Concilium, & præviè, ac independentè à consensu Ecclesiæ tota semper fuit? Ejus enim est ista The-

sis

his die 9. Octobris 1638. exposita. Tanta verò Pontificis hujus ex divina dignatione est auctoritas, ut in controversiis fidei, & morum determinatis ex Cathedra, Judex sit omnibus numeris absolutus, licet OEcumenicum Concilium non accedat, quod infra Pontificem esse, non è converso, fidei proximum censetur. Similes alix sunt expositæ anno 1638., & 1640., quibus absoluta, & prorsus independens Romani Pontificis in definitionibus fidei, & morum infallibilitas adseritur. Quid de Duacensi, quæ anno 1714. 3. Augusti, dum Constitutionem *Unigenitus* accepit, declaravit, illos hodie re ipsa efficacissimè, & per cuniculos adversari Sedis Apostolica Principatui, qui quidem vacuum, & inane Primatus Pontificis vocabulum retinent, & prædicant, sed solemnibus fidei decretis ex Petri Cathedra manantibus pertinaciter obstant. Deinde die 17. ejusdem mensis decretum edidit, ut ex *Scripturis*, *Summis Pontificibus*, *Conciliis*, *Patribus*, aliisque auctoribus Ecclesiasticis testimonia proferantur... quibus demonstretur, necesse esse, ut fideles cum Petro, ejusque Successoribus Ecclesiam pascentibus, seu ex Cathedra docentibus, perpetuò consentiant, nisi ab ovili Christi, ut ovis putrida sejungi velint. Ex Harduin. tom. 11. Concil. column. 1670.

In hac eadem se esse sententia testata est Facultas Conimbricensis, quæ occasione præfatæ Bullæ *Unigenitus* anno 1717. Summi Pontificis infallibilitatem prædicavit quatuor adsertis; quorum primum est tale: *Romanum Pontificem etiam extra Concilium, supra quod est, de re dogmatica, sive de rebus ad fidem, & mores pertinentibus ex Cathedra docentem universa Ecclesia fideles, habere adfessionem infallibilem Spiritus Sancti, proindeque nec decipi, nec decipere posse.*

Idem confessæ est Clementi XI. Ecclesia Hispalensis, suis litteris ad ipsum datis, occasione Bullarum *Vineam Domini Sabaoth*: & *Unigenitus Dei filius*; de quibus sic loquitur:

Utramque eadè fidei obedientiâ amplexati sumus, tanquam Dei à Cælo promunciantis oracula, nullius examini obnoxia, nullius acceptationis indiga, non quasi assensu nostro aliquid illis auctoritatis, aut roboris adderemus &c. Hoc idem testantur cæteræ Hispaniarum Ecclesiæ, ac Universitates. Pro Academia Salmanticensi integro tomo infallibilitatem Summi Pontificis testatus est P. Aguirre postea Cardinalis. In idem conspirant Catholicæ Germaniæ Academiæ, & quotquot in Italia sunt in hoc jurant; adeò ut, exceptis Parisiensis Facultatis Professoribus, hisque nec tamen omnibus, sicut, nec omnibus Gallicanis Ecclesiis, vix reperias Ecclesiam Catholicam particularem, aut Universitatem, quæ Pontificis Romani infallibilitati, etiam dum definit extra Concilium, eadè obedientiâ non subscribat.

XXXIV. Dicam ergo sic. Dogma, in quo omnes Ecclesiæ, & Universitates Catholicæ consentiunt, quamvis ex aliqua particulari Ecclesia, & Universitate aliqui contradicant, ut dogma certum, & infallibile tenendum est; In dogmate, quod Romanus Pontifex ex Cathedra docens universam Ecclesiam aliquam veritatem spectantem aut fidem, aut mores, etiam si doceat extra Concilium, infallibilis sit, nec errare queat in docendo, independentè à quocumque consensu subsequuto, consentiunt omnes Ecclesiæ, & Universitates totius Orbis Catholici, & solum aliqui ex Gallicana Ecclesia, aut Parisiensi facultate refragantur; ergo tenendum est tanquam dogma infallibile. Major patet, quia ut aliquid dicatur, & sit ab universa Ecclesia acceptatum, non obest, si aliqui, iique pauci, acceptare recusent, dummodo cæteri acceptent.

Satis, superque hanc quæestionem evoluvimus. Omittimus alia, quia sive apud Canum *toto lib. 6. de Locis Theologicis*, sive apud Bellarminum *de Romano Pontifice integro 4. libro*, sive

apud Dominic. à SS. Trinitate *Bibliothec. Theologica lib. 3. sect. 4. c. 16. 17. 18. & 19.*, sive alios quamplures videri poterint.

DUBIUM VII

Locus ab auctoritate SS. Patrum.

6. I.

Quadam præmittuntur.

Sanctorum, veterumque Patrum auctoritatem de gradu deicere moliantur recentiores hæretici, præeunte Luthero, qui in suis scriptis passim Patrum auctoritatem pessundat, & præsertim lib. *contr. Regem Angliæ* dicens: *Ita fit, ut ego clamem Evangelium, Evangelium, Christus, Christus: Ipsi respondent: Patres, Patres, usus, usus, statuta, statuta. Ubi verò dico, Patres, usum, statuta sapientiùs errasse, oportere ejusmodi firmiore, & certiore auctoritate munire, Christum verò non posse errare. Hic piscibus magis muti &c.*, ut *Scriptura dicit: si aut aspides surda obturant aures, ne audiant vocem ineantis. Aut hoc demud, quod semper in summa natas saluta, mihi reddunt. Ambrosius sic dicit. Tu ne doctior es Ambrosio? &c.* Quod impudenter repetit lib. *de abroganda Missa privata*.

Idem dixisse visus est S. Augustin. pluribus in locis, quæ adfert Gratianus 9. *dist.*, tum ex prologo lib. 3. *de Trin.*, tum lib. 4. *de anima*, & ejus *origine contr. Vincentium Victorem c. 1.*, tum ad *Hieronymum ep. 19.*, modò *S. c. 1.*, ubi ait: *Solis eis scripturarum libris, qui: jam Canonici appellantur, didici, hunc timorem, bonoremque deferre, ut nullum eorum autorem scribendo aliquid errasse, firmiùs credam. ... Alios autem ita lego, ut quantalibet sanctitate, doctrinâque præpollent, non idè verum putem, quia ipsi ita senserunt: sed quia mihi, vel per illos Auctores Canonici, vel probabili ratione,*

quod à vero non abhorreat, persuadere potuerunt. Idem ait epistol. ad Vincenzium 48., modò 93. *cap. 10.*, & lib. 2. *de Baptismo contr. Donat. cap. 3.*, ubi ait, quemcumque Episcoporum, aut Doctorum (solâ exceptâ Scripturâ) per concilia licere reprehendi, si quid in eis fortè à veritate deviatum est. Ex his ergo D. Augustini repetitis testimoniis videtur sequi, nullum omnino à Sanctis Doctoribus firmum argumentum duci posse ad fidei, Theologiæve dogmata comprobanda.

Auctoritate D. Augustini roboratus hoc idem testari videtur ejus discipulus D. Tho. 1. p. *quæst. 2. art. 8. ad 2. his verbis. Auctoritatis autem canonica scriptura (Sacra Doctrina) utitur propriè ex necessitate argumentando. Auctoritatibus autem aliorum Doctorum Ecclesia, quasi arguendo ex propriis, sed probabiliter. Innititur enim fides nostra revelationi Apostolicæ, & Prophetis facta, qui canonicos libros scripserunt, non autem revelationi, si qua fuit, aliis doctoribus facta. Ubi S. Doctor nedum suam sententiam proferit, sed etiam rationem adducit, quia nimirum Theologia conclusiones suas necessarias trahere debet ex principiis infallibilibus, qualia sunt scripturæ canonice, secus verò scripta SS. PP., in quibus, ut dicemus, unam, vel alteram falsitatem licet reperire, vel in his etiam, quæ ad fidem pertinent.*

II. Ut ergo in hac re, quàm fieri poterit, veritatem indagemus, de auctoritate SS. PP. trifariam possumus disputare. Primò de unius, vel alterius proprio placito, quale fuisse videtur illud S. Augustini lib. 4. *super Genes. ad lit. c. 22.*, & 11. *de Civ. Dei cap. 9.* (de quo D. Thom. 1. p. qu. 74. art. 2.) de diebus creationis mundi, nimirum quòd omnes, qui dicuntur septem dies, sint unus dies septemplexiter rebus presentatus: Et alia ejusdem. S. Doctoris circa penam parvulorum sine Baptismo decedentium. Secundò de communi plurium Patrum consensu, à quo tamen unus, aut alter de-

scive-

sciverit. Tertiò de omniâ omnino Patrum unanimi, concordique sententia, nemine dissentiente.

Rursum id considerandum est; Patrum testimonia referri posse, vel ad Philosophiæ confirmanda dogmata, vel ad assertiones, aut fidei, aut Theologiæ comprobandas. Erant enim ex Sanctis Patribus quidam nedum in Sacris Litteris, & Disciplina Christiana, sed etiam in Philosophicis eruditi.

Id etiam advertendum est, in quæstionibus etiam Ecclesiasticis duo esse disputationum genera. Alterum, quæ ad fidem spectant, aut Doctrinam Catholicam, sive ex Doctrina Catholica necessariò inferuntur. Alterum, quæ citra iacturam pietatis, salvâque fide in utramque partem agitari possunt, quia nec revelata sunt, nec cum revelatis connexionem habent; idèquæ nedum ab imperitis, verum & à doctis ignorari possunt, uti sunt illæ, quæ in scholis Theologorum Catholicorum hinc inde, salvâ fide, & pietate, etiam nunc disputantur.

III. Hic quæret aliquis, quos nomine *Ecclesiæ Patrum* intelligamus?

Ad hoc dico, tria requiri ad hoc, ut aliquis inter Ecclesiæ Patres habeatur. Primò antiquitatem, ut scilicet sit de numero illorum, qui seculo Apostolorum, aut virorum Apostolicorum vicini, vel saltem non longè remoti fuerunt, quæ propterea fidei plantandæ adlaboraverunt, vel pro ea saltem tuenda insudarunt. Juniores enim Doctores, esto in lata quadam significatione dici possint Patres, propriè tamen potius Pedagogi dicuntur, *Pater enim est, qui primò generat, Pedagogus verò, qui jam natum nutrit, & erudit*: ità D. Tho. in c. 4. 1. ad Cor. less. 3. super illa verba *Estis decem millia pedagogorum habeatis in Christo, sed non multos Patres*. Dicit ergo (ait D. Tho.) *Apostolus se patrem eorum in Christo, quis eis primò Evangelium predicavit. Unde assignans rationem ejus, quod dixit, subdit: nam*

in Christo Jesu per Evangelium ego vos genui. Id tamen non tollit, quin geniti ab Apostolis, quique relatè ad illos sunt filii, respectu subsequentiū fidelium, quos in Christo genuerunt, Patres dici possint: unde D. Augustinus exponens illud Psalm. 44. *Pro patribus tuis nati sunt tibi filii, constituit eos Principes super omnem terram*, dicit, hos esse Episcopos, qui filii Apostolorum Patres sunt succedentium populorum.

Secundò ad veram notionem Patris requiritur vera fides. Quare, qui ex præfatis priorum seculorum Doctores aperte, & pertinaciter, hoc est, post Ecclesiæ definitionem, hæreici fuerunt, & permanere, Ecclesiæ Patribus adnumerandi non sunt; neque eorum auctoritate petendum est argumentum, nisi fortè in dirimendis fidei controversiis adducantur, ut traditionis testes. Non loquor tamen de iis, qui in uno, vel altero errore, versati sunt circa quæstiones fidei obscuras, & nondum definitas, alioquin parati sententiam suam deponere, si Ecclesiæ in oppositum definiret. Quo pacto D. Cyprianus inter Patres summo loco habendus est; quia, esto in errore rebaptizantium hæreticos fuerit, paratus tamen erat retrahere suam opinionem, si Ecclesiæ oppositum statuisset. Ità eum defendit S. August. lib. 2. de Baptismo cap. 4. Imò priusquam aliqua quæstio obscuritatem habens definatur, necesse est, ut prius in utramque partem disputationibus, & altercationibus ventiletur. *Quomodo enim* [inquit prelaudatus Doctor] *potuit ista res tantis altercationum nebulis involuta ad plenarii Concilii luculentam illustrationem, confirmationemque perducere, nisi primò diutius per orbis terrarum regiones, multis hinc, atque hinc disputationibus, & collationibus Episcoporum pertractata conficeret?*

Tertiò requiritur ad verum Ecclesiæ Doctoris characterem fidei conjuncta doctrina, non qualiscunque, sed ex-

excellens, quæque sibi junctam referat vitæ sanctitatem. Nam licet fidem necessariò non comiteret sublimis doctrina, nec sublimis doctrina inferat vitæ sanctitatem, in Ecclesiæ tamen. Doctore hæc omnia debent sociari. Patres enim Doctores in Ecclesia posuit Spiritus Sanctus, ut essent in ædificationem Corporis Christi, ac lumina, ad quæ fideles respicerent, tum in agnoscendis fidei mysteriis, tum in moribus componendis: oportet ergo, ut præditi sint speciali, & eximiâ mysteriorum fidei cognitione, & rursus eximiâ erga Deum pietate, & caritate, qui enim fecerit, & docuerit, hic magnus vocabitur in Regno Cælorum: Matth. 5. v. 19.

Observandum denique est id, quod Patres scripserunt: An obiter tantum scripserint, & quasi aliud agentes; an verò primò, principaliter, & ex proposito de tali materia tractantes; & hoc, an semel tantum, vel sæpè, & constanter affirmarint; siue dogmaticè, & positivè docendo; siue disputativè, contentiosè contra hæreticos agendo: ut Athanasius contra Arianos, Basilii, Hilarii &c.: Augustinus contra Donatistas, Manichæos, Pelagianos, Arianos &c.: S. Leo contra Nestorianos, Eutichianos &c. Rursus observandum, quid de eorum doctrina in rebus Theologicis Ecclesiæ, sanxerit, num illam approbaverit, vel saltem in dubiis eos consuluerit &c. His omnibus prænotatis.

IV. Hæretici, licet Patrum auctoritatem, quàm eis obijcitur, flocci faciant: tamen, ut facilius succum simplicibus faciant, suos errores auctoritate Patrum tegere aliquando studuerunt. Id maxime præstant moderni hæretici; Lutherus enim postquam omnes Patres damnavit erroris, ut diximus, non rarò tamen eorum auctoritate se tueri conatur. Calvinus item in præfat. ad suas Instit., licet in Patribus suos navos adesse adfirmet, & eorum scripta nobis servire quidem, sed non dominari debere di-

cat, conatur tamen ibidem; & alibi passim Patrum clypeo se munire. Imò in *syntagmate confessionum Protestantium*, post enumeratas varias in variis eorum Pseudo-Synodis Confessiones, adnectuntur etiam pro singulis articulis suæ doctrinæ testimonia veterum qui Patres dicuntur. Verùm hoc est Patribus reverà illudere, non honorem deferre. Catholici verò omnes summo in honore Patres habent, tanquam sanæ doctrinæ custodes, & traditionis testes, eo modo, quo infra dicemus.

§. I. I.

Assertiones statuuntur.

V. Dico primò. Doctrina Philosophica, & purè humana nullam habens connexionem cum fidei dogmate, quæ in scriptis unius, vel plurium Patrum invenitur, certum argumentum ex eorum auctoritate nobis non suppeditat, sed solum tantum valet, quantum ratio allata persuaserit, ita, ut, si ratio allata sit tantum probabilis, faciat argumentum probabile, si verò sit demonstrativa, demonstrativum.

Ratio est primò, quia Spiritus Sanctus non adfuit Ecclesiæ, aut ejus Doctoribus, ut Philosophi sint, sed ut doceant ea, quæ sunt ad *consummationem Sanctorum, in ædificationem Corporis Christi*, ut docet Divus Paulus *Ephe. 4. 12.*, & ut vanam philosophiam, & seductivam vitare fideles instruant, ut jam non *simus parvuli fluctuantes, & circumferamur omni vento doctrinae &c.*, ut subdit idem Paulus *v. 14.*

Unde Patres non fuerunt solliciti in Philosophicis dogmatibus perscrutandis: quoniam Philosophorum libros, aut valere sinebant, aut etiam interdum à limine salutabant, ut totos sese divinæ sapientiæ dederent. Gregorius quippe Nazianzenus, & Basilii tredecim annos, omnibus libris secularium remotis, solis divinæ scripturæ volu-

voluminibus operam dedidit, referuntur à Rufino *lib. 2. hist. Eccles. cap. 9.* Et Hieronym. *lib. 3. comment. super ep. ad Galat.* Plus [inquit] quàm quinquaginta anni sunt, ex quo in manus meas nunquam Tullius, nunquam Maro, nunquam Gentilius litterarum quilibet auctor ascendit: etsi quid fortè inde, dum loquimur, obrepit, quasi antiqui per nebulam somnii recordamur. Et infra de studio Fidelium sui temporis sic ait: Quotus quisque nunc Aristotelem legit? quanti Platonis, vel libros novere, vel nomen? Vix in angulis otiosi eos senes recolunt. Rusticanos verò, & Piscatores nostros totus Orbis loquitur, universus mundus sonat. Audiant hæc, qui in Aristotelis evolvendis Philosophicis, Metaphysicisque questionibus totà vità occupati, sacrorum librorum nec titulum noverunt, coque, si qui habent, vix unquam lectione dignantur.

Insuper ex antiquis Patribus nonnulli Physicen, aut Metaphysicen, vel non habuere, vel certè leviter attigerunt. Alii verò magna ex parte fuerunt Platonici priùs, quàm converterentur ad fidem. Ex quo fit, ut dum in philosophicas quæstiones incidunt, aut vulgi, aut Rhetorum opiniones sequantur, aut etiam quas à Platonis acceperant in Christianorum Scholas inducant; Unde viri docti errores fortè quosdam in Patrum scriptis noverunt, quod attinet ad humanam Philosophiam, quos persequi, nec vacat modò, nec expedit. Satis enim ex dictis apparet, in Philosophicis dicta Patrum facienda tanti esse, quanti valent naturalis ratio, quam adducunt.

VI. Dico secundò. In rebus, quæ nec fidei dogmata sunt, neque ex his certè derivantur, argumentum sumum ex communi etiam consensu SS. PP., est quidem probabilissimum, non tamen per se loquendo certum de fide est. Prima pars constat: quo enim majori auctoritatis pondere firmari potest probabilitas alicujus opinionis, quàm consensu tot virorum, sancti-

tate, & doctrinâ illustrium? Certè, qui contrarium opinari vellet, temeritatis notam vix effugeret.

Secunda verò pars probatur: nam in hujusmodi questionibus fidei summam nullatenus tangentibus, ac proinde hincinde disputabilibus, Patres loquuntur, non ut custodes traditionis, neque ut testes doctrinæ Ecclesiæ (in quo casu posuit illos Spiritus Sanctus, ut Ecclesiæ Doctores) sed ut privati Doctores proprium sensum exprimentes; atqui Patres etiam communi consensu sic loquentes, esto faciant argumentum probabilissimum, non ita tamen certum, ut vel fide sit tenendum, vel excludat omnem formidinem de opposito, homines enim sunt, & possunt errare; ergo &c.

Nota tamen, nullum fortè problemam inveniri posse, in cujus altera parte omnes Sancti Patres consentiant, quin illud ad fidem spectet. Si namque est doctrina omnium Sanctorum Patrum, etsi in scripturis expressè non habeatur, est tamen signum evidens, vel ex scripturis necessarîo deduci, vel esse saltem doctrinam ab Apostolis per traditionem relictam.

VII. Dico tertîo. Auctoritas unius Patris, vel paucorum, etiam in rebus, quæ sacras litteras, vel doctrinam fidei concernant, non facit argumentum de fide, sed probabile tantum. Imò nec etiam si ex majori parte conveniant in aliqua ejusmodi re Patres, si tamen pauci alii, vel tantum unus, summe tamen auctoritatis, dissentiant, nisi fortè singularis hujus, vel horum opinio sit ab Ecclesiâ reprobata.

Prima Pars est manifesta. Primò, quia multi Sanctorum Patrum aliqua dixerunt, quorum oppositum posita, ut de fide definitum fuit, vel quia eorum tempore veritas nondum sufficienter erat comperta, aut Ecclesiæ auctoritate firmata, ut de S. Cypriano dicit S. Augustinus *lib. 1. de Baptismo cap. 18.* Vel etiam, qui putabant, emergentes illas quæstiones ad do-

doctrinam fidei minimè pertinere: unde D. Cyprianum volunt multi existimasse, doctrinam de repaptizandis hæreticis, non fidem, sed puram disciplinam concernere.

Secundò probatur: non enim plus auctoritatis tribuendum est Patribus, quàm ipsi sibi tribui voluerunt; sed noluerunt Patres sibi distributivè tantum, aut sorsim sumtis irrefragabilem tribui auctoritatem, nec majorem sibi fidem haberi voluerunt, quàm hominibus, doctis quidem, sed qui docendo errare potuerunt; ergo &c. minor probatur eorumdem Patrum testimonio. Hieronymus ep. 83. aliàs 84. ad Magnum, recensitis Patribus, qui ante ipsum scripserunt, fatetur, se comparatione illorum imperitissimum. Epist. 43. ad Ctesiphontem adversus Pelagianos: *Si quid [inquit] in meo ingenio vitti repererint, proferant in medium. Aut enim bona erunt, & contradicam eorum calumnia: aut reprehensibilia, & confitebor errorem, malems emendari, quàm perseverare in pravitate sententia.* Idem facitur in Isaia cap. 19. 22. In Ezechiel. cap. 18. probato proprio sensu. *Si quis autem, [inquit] vel meliorem, vel alterum sensum potuerit reperire, qui contrarium inter se testimoniorum scandalum tollat, illius magis acquiescendum sententia est; quod repetit in e. 26. in e. 39., ubi sic concludit: Hucusque in Ezechiel Prophetam, Deo, ut optamus, & credimus, auxiliante, & apertiente os nostrum, loquuti sumus: non aliorum, si qui scripserunt, vel deinceps scripturi sunt, sententiam destruenter; sed adserentes qualiacumque sunt nostra.*

Præ omnibus verò modestiam suam expressit S. Augustinus in lib. retractionum, ubi emendavit, quæ mendosè scripserat in lib. 4. de anima, cap. 2. ad Vincentium Victorem, qui eum de doctrina laudaverat. Item l. 2. de ordine, ubi postquam c. 9. ostenderat, humanam auctoritatem plerumque falli, cap. 10. subdit, nolle sibi

credi, nisi docenti, & rationem reddenti; & lib. 2. de Baptismo contra Donat. cap. 3. aperitè dicit, omnia Episcoporum, & Doctorum scripta, solà exceptà Divinà Scripturà, licetè reprehendi, non per quemlibet tamen privatum doctorem (ut hæretici putant) sed per sermonem fortè sapientiorum cujuslibet in ea re peritioris, & per aliorum Episcoporum graviores auctoritatem, doctiorumque prudentiam, & per concilia. De sua verò doctrina in Proemio lib. 3. de Trinitate sic dicit: *Sanè cum in omnibus litteris meis non solàm pium lectorem, sed etiam liberum correctorem desiderem, multò maxime in his, ubi ipsa magnitudo questionis utinam tam multos inventores habere possit, quàm multos contraditores habes.* Ne autem ex hoc hæretici putent, datam sibi libertatem, ut à quocumque qualibet Patrum scripta, carpi, & reprehendi possint, audiant quod sequitur: *Verumtamen, sicut lectorem meum nolo mihi esse deditum, ità correctorem nolo sibi. Ille me non amet amplius, quàm Catholicam Fidem; isse se non amet amplius, quàm Catholicam Veritatem. Sicut illi dico, noli meis litteris, quasi scripturis canonicis inservire, sed in illis, & quod non credebas, cum inveneris, incunctanter crede; in istis autem, quod certum non habebas, nisi certum intellexeris, noli firmiter retinere: ità illi dico, noli in eas litteras ex tua opinione, vel contentione, sed ex divina lectione, vel inconcussa ratione corrigere.* Num hoc Augustini monitum servaverit Lutherus, serventque ejus, & Calvini Gregales, judicet pius, & catholicus Lector.

Tertiò probatur eadem prima pars ratione quasi à priori. Quilibet enim Sanctorum singulariter consideratus (his dumtaxat exceptis, qui libros canonicos ediderunt) spiritu, & scientià humanà locutus est; ergo errare aliquando, etiam in his, quæ ad fidem spectant, potuit; ergo si considerentur singuli Patres, veluti discri-

distributivè, & seorsim, aut secundum quoddam aliqui eorum pauci in aliquo conveniunt, firmum ex eorum auctoritate sumi non potest argumentum, sed solum probabile. Et in hoc sensu locuti sunt Sanctus Augustinus, & Thomas supra relati §. 1., dum hic ultimus dicit 1. part. quæst. 1. art. 8. ad 2. ex auctoritate SS. PP., nimirum distributivè, & seorsim sumtorum, sumi argumentum solum probabile. Cum tamen eorum multi insignem doctrinam cum admirabili sanctitate conjunxerint, eorum auctoritas ad taurum humanæ probabilitatis fastigium evasit, ut sicut imprudentis hominis esset, paucorum tantum SS. Patrum auctoritatem pro regula assumere, ita illam despicerè, impudentis omnia frontis esset. Quare Viri pietate, & doctrinâ celebres eorum dictis apertè contradicere, & adversari non audent; sed si quis ab eis minus consonè dictum visum fuit, reverenter, ac benignè interpretari consueverunt.

VIII. Secunda verò pars, nimirum quoddam nec sumi possit certum argumentum ex auctoritate majoris partis Patrum, si aliqui dissentiant, intelligenda est de illis quæstionibus, quæ fidem non tangunt, quæque salvâ fide in alterutrum defendi possunt. De quibus D. Augustinus lib. 1. contr. Julianum c. 6. *Alia sunt* [inquit], *in quibus inter se aliquando etiam doctissimi, atque optimi regula Catholica defensores, salvâ fidei compage, non consonant, & alius alio de una re melius aliquid dicit, & veridius.* Si enim quæstio fidem tangat, vix invenietur aliqua propositio, quæ ab omnibus Patribus fuerit asserta, cuique unus, vel alter repugnari, quin horum doctrina ab Ecclesiâ fuerit reprobata.

Sic ergo explicata secunda pars probatur, quia dum Patres, magnâ licet consensione, aliquam doctrinam docent, & unus, aut alter (Ecclesiâ non contradicente) repugnat, signum est, eam ad fidem non pertinere, &

Tom. I

consequenter ex illis, licet pluribus, quia loquuntur ut homines, non potest firmum trahi argumentum. Unde Vincentius Lirinensis *commonit. c. 28. antiqua* (inquit) *Sanctorum Patrum consensio, non in omnibus divina legis quasiunculis, sed solum certè præcipuè in fidei regula magno nobis studio, & investiganda est, & sequenda.* Hinc licet omnes ferè SS. Patres, tam Græci, quàm Latini doceant, mundi hujus partes omnes non eodem simul die, sed multis potiùs succedentibus fuisse editas, ornatas, absolutas; communis tamen hic eorum consensus certitudinem fidei non facit, uno D. Augustino in contrarium opinante, nimirum omnes, qui dicuntur septem dies, fuisse unum diem, septemplexiter præsentatum cognitioni mentis Angelicæ, ac proinde omnia simul tempore fuisse edita, ornata, & absoluta. Quam opinionem aded probabilem D. Thom. 1. part. quæst. 74. art. 2. admittit, ut problematicè utramque sententiam defendat. Item major Patrum pars asserit, Moysen Dei naturam, dum in hoc mortali corpore viveret, apertè, seu facie ad faciem non vidisse; & tamen hæc sententia non pertinet ad fidem, cum oppositum teneat Divus Augustinus lib. 12. de Genes. ad litteram cap. 27., & 28., quod & de Paulo in raptu asserit (D. Thom. dicente quæst. 10. de veritate artic. 11. ad 2., ut in hoc Judæorum legifer, & doctor gentium equarentur) quamvis lib. 2. contr. Maximinum cap. 25., & tract. 53. in Joann. oppositum dicere videatur Augustinus.

IX. Dico quartò. Unanimis SS. PP. consensus in explicatione Sacræ Scripturæ, & in re pertinente ad fidem, bonosque mores, est signum à posteriori, & infallibile testimonium divinæ revelationis, ideoque certum, & irrefragabile nobis suppeditat argumentum. Contra hanc assertionem obstrepunt Protestantæ, ut videre est in Dallæo Calvinista Lib. de usu Patrum. Eam tamen omnes Theologi

§ b

Ca-

Catholici invidiæ sustinent: Canus lib. 7. de locis cap. 3. conclusionem 5. & 6. 2. Dominic. à SS. Trinit. Bibl. Theolog. lib. 2. sect. 5. cap. 6. concl. 4.: Natalis Alex. bishp. Eccles. secul. 2. dissertat. 16. §. 22., & 23. Dallæum refellens: & quotquot de hac materia Catholicè scripsere, uno excepto Cajetano Præfat. comment. in 3. libr. Moys., quem acriter peritringit Canus; quamvis non desint, qui Cajetanum benignè interpretentur, volentes, Cajetanum locutum fuisse, vel non de omnibus Doctoribus, vel in materia fidem non tangente, vel nondum ab Ecclesia definita; quod indicare videntur ejus verba, dum ait: *nullus detestetur novum Sacra Scriptura sensum, ex hoc, quod à sonat à præfatis Doctoribus, sed scrutetur perspicacius textum, ac contextum Scripturæ; & si quadrare invenerit, laudet Deum, qui non alligavit expositionem Scripturarum Sacrarum præfatorum doctorum sensibus: sed Scripturæ ipsi integra, sub Catholica Ecclesiæ censura.* Verùm, quomodocumque sit, conclusio posita communis est, & Catholica, debetque intelligi de generali Patrum consensu, accepto, non mathematicè, addeò ut ne unus quidem desit, sed moraliter: Cùm enim non omnium omnino, qui fuerunt Patrum, scripta habeamus, imò nec nomina sciamus, imò aliqui eorum ab Ecclesiâ defecerint, impossibile esset omnium omnino consensum explorare, aut aliquando invenire.

Huius affectionis testes habemus primò Patres ipsos: qui in rebus fidei provocare consueverunt ad veterum traditionem, & arguere eos, qui ab ea discesserunt. Primus est Irenæus lib. 3. cap. 30., & alibi, probans, doctrinam Apostolorum per successiones Episcoporum pervenisse usque ad nos: Et cap. 2. hereticos arguens, obijurat eos, quòd præsumant plus sapere, quam Apostoli, eorumque Successores, quasi ipsi soli invenerint veritatem. Secundus est Clemens Alexandr. lib. 7. Stromat. pag. 752., ubi ait: *Glo-*

ria autem tenentur desiderio, qui ea, quæ ex sua natura conveniunt sermonibus divinitus inspiratis, tradita à Beatis Apostolis, & Magistris, sua sponte fallaci sapientia simulatione corrumpunt per alias traditiones, humanis doctrinis, resistentes divinæ traditioni, ut hæresim constituent. Deinde ostendit, hoc fecisse hereticos ambitione ductos, ut aliquid dicerent, non dictum ab aliis: Nam inter eos viros, qui tanti erant in Ecclesiastica cognitione, quid restabat dicendum à Marcione, verbis gratia, aut Prædico, & similibus, qui non sunt ingressi rectam viam? Hic delineavit Clemens vultum omnium hæreticorum, etiam recentium, quos omnes peperit humanæ gloriæ desiderium, & ad veteres aspersionados impulit. Quid enim restabat dicendum à Luthero, aut Calvino, & similibus, si id, quod dixerant veteres, dixissent & ipsi?

Tertius Origenes in præfat. lib. 1. Periarchon: *cùm [inquit] multi sint, qui se putent sentire, quæ Christi sunt, & nonnulli eorum diversi à prioribus sentiant, servetur Ecclesiastica prædicatio, per successione ordinem ab Apostolis tradita, & usque ad præsentem in Ecclesiâ permanens: illa sola credenda est veritas, quæ in nullo ab Ecclesiastica discordat traditione; & homil. 29. in Matth. Quoties autem [inquit] hæretici canonicas proferunt Scripturas, in quibus omnis Christianus consentit, & credit, videntur dicere: Ecce in dominibus Verbum est veritatis. Sed nos illis credere non debemus, nec exire à prima, & Ecclesiastica traditione, nec aliter credere, nisi quemadmodum per successionem Ecclesiæ Dei tradiderunt nobis. Hæc Origenes.*

Idem Tertull. lib. de corona milit. c. 3. & 4., lib. de carne Christi c. 2., lib. de præscript. hæretic. cap. 17. 21. 28. 37. Idem S. Athanasius epistol. ad Afros, ubi vocem *homousion*, quæ Ariannum hæreticum jugalarunt, dicit, Nicænos Patres non invenisse sibi ipsis, sed à Patribus accepisse: Episcopis non sibi metipsis adinvenientes verba, sed bene-

ventes ea à Patribus, testimonia conscripserunt; quod repetit libro de Synodi Nicænæ decretis. Idem S. Hieronymus in cap. 11. Daniel. Imperitissimos vocans, qui Scriptura Sancta intelligentiam absque Dei gratia, & doctrinam maiorem sibi vel maximè vendicant. S. Ambrosius lib. 3. de fide ad Gratian. cap. 7. Servamus igitur, ait, præcepta maiorum, nec hereditaria signacula ausi vultu temeritate violamus. Librum Sacerdotalem, quis nostrum resignare audeat, signatum à confessoribus, & mulierum jam martyrio consecratum?

Accedit S. Augustinus, qui toto lib. 1. contr. Julianum, & præsertim c. 9. & 10. argumenta Pelagianorum convellit, auctoritate Patrum Irenæi, Cypriani, Reticii, Hilarii, Olympii, Gregorii, Ambrosii, Innocentii, Joannis, Basilii, Hieronymi; quod non fecisset certè, si argumentum ab omnium auctoritate Patrum certum non existimasset. Dico ergo sic. Cum omnes Patres audio unum idem professentes, non existimo, totidem hominum, quidem & doctissimorum, & sanctissimorum (sed tamen hominum) me audire sententiam, sed Catholicæ Ecclesiæ, cujus illi fuere columnæ præcipuæ. Nec enim aliud viri illi omnes tanto consensu sentisse credendi sunt, quàm quod communiter Ecclesia Catholica sentiebat; ergo doctrinam omnium Patrum signum est, esse doctrinam Ecclesiæ Catholicæ; sed ex doctrina Ecclesiæ Catholicæ, utpote infallibili, validissimum pro fide sumitur argumentum; ergo similiter ex doctrina omnium Patrum consensu probata.

X. Confirmo hoc. Certè majus privilegium concedendum non est multitudini fidelium, quàm multitudini, & collectioni Doctorum, & Pastorum: quia licet fideles laici quantitate numerica Pastores, & Doctores superent, ab his tamen quantitate virtutis, & scientiæ longè illi superantur, cum ab his illi docendi sint, ac regendi; atqui fideles simplices toto orbe diffu-

si collectivè sumti errare nequeant in credendo, aliàs tota erraret Ecclesia; ergo neque errare possunt omnes Doctores, & Pastores simul sumti, sive culpabiliter, sive etiam inculpabiliter, & per ignorantiam, docendo aliter, ac docendum esset: quia errantibus istis in docendo, errarent, & illi in credendo.

Urgeo hoc ex Apostolo 1. Cor. 12., & ad Eph. 4. 11. dicente: & ipse dedit quosdam quidem Apostolos, quosdam autem Prophetas, alios verò Evangelistas, alios autem Pastores, & Doctores ad consummationem Sanctorum in opus ministerii, in ædificationem Corporis Christi... ut jam non simus parvuli fluctuantes, & circumferamur omni vento doctrinæ, in nequitia hominum, in astutia ad circumventionem erroris; atqui si Sancti, ac Doctores simul omnes toto Orbe diffusi, in iis, quæ fidem tangunt, errare possent, docendo, ut credendum, quod credendum non est, aut non credendum, quod credendum est, non solum non essent dati à Deo in ædificationem Corporis Christi (Ecclesiæ) ut non circumferrentur fideles omni vento doctrinæ, ad circumventionem erroris: sed potius ipsi errando causa essent fluctuationis, imò & erroris in populo Dei, quia populus tenetur sequi doctrinam suorum Pastorum, & Doctorum, dicente Christo Matth. 23. v. 3. Omnia ergo quacumque dixerint vobis, servate, & facite; & Luca 10. v. 16. Qui vos audit, me audit. Ergo &c.

Item Pastores, & Doctores, quales fuere omnes Sancti Patres, dicuntur Matth. 3. v. 12. sal terra, quia per eos condiendi sunt quodammodo populi, & v. 14. dicuntur lux mundi, quia eorum doctrinâ illuminanda est Ecclesia. Si ergo sal illud, ut ait Christus, infusatum fuerit, in quo salietur? id est, ut ait Augustinus lib. 1. de serm. Domini in monte c. 6.: qui erunt homines, per quos à vobis error auferatur, cum vos elegerit Deus, per quos errorem auferat cæcorum? Item

B b 2

fi lux

si lux non fuerit lucida, sed potius erroribus obscurata, quomodo totum Ecclesiæ corpus non erit tenebrosius?

Pulchrè ergo, & ad rem aptissimè Vincentius Lirinensis *common. 1. c. 28. Quorum* [inquit] *beatorum Patrum sanctum, Catholicumque consensum, ne quis sibi temerè contemnendum fortè arbitretur, ait in prima ad Corinthios Apostolus: & quosdam quidem posuit Deus in Ecclesia, primum Apostolos (quorum ipse unus erat) secundò Prophetas (qualem in actibus Apostolorum legimus Agam) tertio Doctores, qui tractatores nunc appellantur, quos hic idem Apostolus etiam Prophetas interdu nuncupat, cò quòd per eos Prophetarum mysteria populis aperiantur. Hos ergo in Ecclesia Dei divinitus per tempora, & loca dispensatos, quisquis in sensu Catholici dogmatis unum aliquid in Christo sentientes contemneris, non hominem contemnit, sed Deum. &c.*

XI. Hanc veritatem exemplo suo testata sunt Concilia, & Pontifices ipsi: quoties enim aliquid circa fidem occurrit determinandum, singulari diligentia præcedentium Patrum monumenta scrutari consueverunt, & ubi concordēs illos invenerunt, secundum eorum sententiam definitiones protulerunt. Concilium Nicænum primum, teste Athanasio *ep. ad Afros supra laudatâ* vocem *homousion* statuit, quia eam à Patribus accepit; atque Eusebius Cæsariensis testatur, ob eandem causam se eidem vocem subscripsisse. Ità *epist.*, quam refert Theodoretus *bislor. Eccles. lib. 1. c. 12. quandoquidem* [inquit] *nonnullos ex veteribus insignes Episcopos, & disertos scriptores in explicanda Patris, ac Filii divinitate, hoc vocabulo consubstantialis usus esse cognovimus.*

In Concilio Ephesino passim, & maxime *act. 1.*, ex relatis Patrum sententiis Nestorius damnatus est. Patres Concilii Chalcedonenis *act. 1. & 4.* proficiuntur, se regulam SS. Patrum amplecti, & maxime in allocutione ad

Marcianum Imperatorem, quæ habetur 3. p. Conc. Chalc. c. 1. Justinianus Imperator in Concilium Constantinopolitanum secundum *tom. 3. Concil. Harduin. col. 58. & sequimur autem* (inquit) *in omnibus SS. Patres, & Doctores Sancta Dei Ecclesia, idest Athanasium, Hilarium, Basilium, Gregorium Theologum, & Gregorium Nissenum, Ambrosium, Theophilum, Joannem Constantinopolitanum, Cyrillum, Augustinum, Proculum, Leonem, & omnia, quæ ab his de fide rectè, & ad condemnationem hæreticorum conscripta, & exposita sunt, suscipimus. Quod repetitur in eodem Concilio coisat. 3. colum. 71. iidem ferè verbis, addendo alios sanctos, & orthodoxos Patres, qui in sancta Dei Ecclesia rectam fidem irreprehensibiliter usque ad finem vitæ prædicaverunt. Quibus relictis in Concilio Lateranensi anno 649., Martinus Papa dixit: Manifestatur nobis ex his, quæ relecta sunt, sive definita à Sancto quinto Concilio, condemnatum esse, & alienum Sancta Dei Ecclesia unumquemque, qui non susceperit verbo, & mente omnes sanctas Synodos, & venerabiles Patres, cunctaque, quæ ab eis pro orthodoxa fide exposita sunt, in destructionem omnium hæresum. Idem Constantinopolitana tertia, seu sexta Generalis Synodus *act. 12.* expressè proficetur; quod & septima Synodus, seu Nicæna secunda protestatur, dum *act. 7.* decretum eidem pro cultu Imaginum contra Iconomachos his verbis: *sanctorum nostrorum, & divinorum Patrum doctrina insistentes &c.* Et infra: *hec est fides Apostolorum: hæc est fides Patrum &c.* Opus erat percurrere omnia Concilia, quæ in suis decretis formandis semper ad Patres, eorumque dicta respexere. Qui plura desiderat, adeat Magist. Canum *lib. 7. de locis cap. 3. conclus. 5.*, & integrum Vincentii Lirinensis *commonitorium* attentè perlegat.*

Merito igitur Concilium Tridentinum *sess. 4.* hisce verbis veterum Conciliorum mentem, ac suam exprimens,

Ad

Ad coercenda petulantia ingenia decernit, ut nemo sua prudentia innixus, in rebus fidei, & morum, ad adificationem Doctrinae Christianae pertinentium, Sacram Scripturam ad suos sensus contorqueat, contra cum sensum, quem tenuit, & tenet Sancta Mater Ecclesia... aut etiam contra unanimem consensum Patrum, ipsam Scripturam Sacram interpretari audeat &c.

§. III.

Solvuntur argumenta contra ultimam conclusionem.

Patrum auctoritatem enervare totis viribus conantur Heterodoxi, inter quos Rivetus, & Dallæus, sperantes, Patrum auctoritate de medio sublatâ, se traditiones non scriptas funditus evertisse.

XII. Primò ergo obijciunt Augustinum lib. 11. contra Faustum cap. 5., & locis supra citatis §. 1. bujus dubii, quibus soli Scripturæ Canonice infallibilem tribuit auctoritatem; quæ autem ab aliis scripta sunt, non erunt credendi necessitate, sed cum judicandi libertate legenda sunt: liberum ibi habet lector, auditorve judicium, quo vel approbet, quod placuerit, vel improbet, quod offenderit &c.; Ergo negat Augustinus tantam esse Patrum auctoritatem, ut illis dicentibus adherere teneamur.

Respondeo disting. consequ., ut illis seorsum, ac distributivè dicentibus &c., conc. consequentiam, illis collectivè, & simul sumtis, nexò consequentiam. Ponit ergo Augustinus differentiam inter Scriptores Sacros, seu Canonicos, & alios Doctores, quòd cuilibet Sacro Scriptori seorsum, & sigillatim sumto cum necessitate credendum est, etiamsi unus sit, ait enim: *In illa verò Canonica eminentia Sacrarum Litterarum, etiamsi unus Prophetæ, sed Apostolus, aut Evangelista aliquid in suis litteris posuisse, ipsâ Canonis confirmatione declaratur, non licet dubitare, quòd ve-*

rum sit. Cuilibet tamen Sancto Doctori, si unus, aut alter dicat, non ità credendum est, ut non liceat dubitare, quòd verum sit. Non tamen loquitur Sanctus Augustinus de Sanctis Doctoribus collectivè acceptis, seu prout summo consensu apertè, frequenter, perseveranter Scripturam Sacram exponunt, aut dogma aliquod proponunt, asseruntque, ut ab Ecclesiâ Catholica creditum, & prædicatum. Tunc enim traditionis testes sunt, & custodes, & vindices, & fides eorum est fides Ecclesiæ, cui credendum esse S. Augustinus testatur lib. contr. ep. fundam. c. 5., & lib. 1. contr. Cresconium cap. 33., ubi hæc habet loquens de baptismo hæreticorum: *Quapropter hujus rei certè de Scripturis Canonice non proferatur exemplum, earumdem tamen scripturarum etiam hæc in re à nobis tenetur veritas, eam hoc facimus, quòd universa jam placuit Ecclesiæ, quam ipsarum scripturarum commendat auctoritas: ut quoniam Sancta Scriptura fallere non potest, quisquis falli metuis hujus obscuritate questionis, eandem Ecclesiæ de illa consulat, quam sine ulla ambiguitate Sancta Scriptura demonstrat.*

XIII. Secundò obijciunt, & replicant. Nullum testimonium humanum aptum est, facere ex se fidem indubitatam in rebus divinis; sed testimonium SS. PP., sive divinis, sive collectivè sumtorum, est merè humanum; ergo &c. Minor videtur certa: labi enim, & errare hominis est, quod non tantum singulis accidit, sed hominum plurium collectioni. Minor verò probatur. Singula Patrum testimonia humana sunt; Ergo & singula in unum collecta: non enim possunt esse alterius generis in unum collecta, quàm cujus sunt per se singula; quia licet fortassis crescat auctoritatis gradus ob multitudinem attestantium, non tamen mutatur auctoritatis species.

Confirmatur. Testimonium PP. non ideo verum est, quia ipsi dixerunt, sed

sed quia, vel ratio ab illis adducta, vel scriptura, quam referunt, persuadet, esse verum; ergo eorum testimonium non per se sufficit ad fidem divinam ingenerandum. Antecedens patet, alioquin Testimonium Patrum à divino non distaret, si nullo rationis præsidio, vel auctoritatis indigeret. Et etiam probatur, cum enim fides sit certitudinis, & veritatis immotæ, non potest referri ultimò, nisi ad testimonium per se verum, & immotum, quale unicè est divinum; unde D. Augustinus hoc inter Christum, & Ecclesiam discrimen constituit lib. 2. *contr. Crescon.* cap. 21. nimirum *Christum semper veraciter judicare, Ecclesiasticos autem iudices, homines, plerumque falsi.* Ità Rivetus.

Respondetur primò, disting. minorem, testimonium Patrum est humanum, & doctrina, quam proponunt universi, & in qua consentiunt omnes, aut saltem maxima pars, non est humana, conc. min., & doctrina, quam proponunt &c., est humana, nego min. Licet ergo testimonium Patrum, etiam in dogmate fidei docendo, aut exponendo consentientium, humanum sit, dogma tamen, quod summo consensu docent, humanum non est, sed Apostolicum, & Divinum; non enim illud semper docuisset Ecclesia, nisi ab Apostolis accepisset, nec Apostoli tradidissent, nisi à Christo, vel à Spiritu Sancto edocuiissent.

Quare aliter secundò respondeo disting. min., consensus PP. testimonium humanum est, quatenus Patrum est, conced. min., quatenus fides Ecclesiæ est, nego min. sicut enim regia diplomata regiam auctoritatem non habent, prout à Ministris conscripta sunt, sed ut mandata regia continent, & ut regio sigillo sunt obsignata: ità Patrum sententiæ in eisdem dogmatis assercionem, diversis locis, atque temporibus consentientium, illudque, ut dogma fidei proponendum, per se spectata testimonii humani vires non ex-

cedunt; sed ut continent doctrinam Ecclesiæ, & ut Ecclesiæ auctoritate receptæ, ac veluti sigillo obsignatæ, credendæ sunt, non Patrum, sed Apostolorum, atque Christi doctrinam continere.

Ad confirmat., omisso anteced., disting. consequ., eorum testimonium solitarie acceptum non per se &c., cor consequ., testimonium eorum consentiens, subdist., non per se sufficit à priori, & tanquam causa fidei diving, concedo consequentiam, non per se sufficit à posteriori, & per modum signi, nego consequ., testimonium ergo universale, & consentiens Patrum non est per se sufficiens, ingenerare fidem divinam per modum causæ, & à priori; est tamen signum, & argumentum, quo à posteriori colligimus, id, quod omnes SS. Patres, ut de fide proponunt, esse verè de fide, seu esse doctrinam ab Apostolis Ecclesiæ traditam, & à Christo acceptam. Rursus consensus Patrum traditionis index est, & argumentum certissimum à Scriptura verò Sacra docet, inesse traditioni divini testimonii pondus, & in rebus divinis esse supremæ auctoritatis, ac demum non esse accipiendam, ut verbum hominum, sed ut verè est, verbum Dei.

Ad id, quod addit ex S. August., dico, eum vel loqui de Iudicibus Ecclesiasticis, seorsum sumtis, non collectivè, vel in quæstionibus facti: quo pacto falli possunt, iudicando aliquem hæreticum, qui hæreticus non sit: quomodo Christus solus falli nequit; non verò in quæstionibus dogmaticis; quo pacto Iudices Ecclesiasticos collectivè sumtos errare non posse, idem Augustinus docet.

XIV. Terriò obijciunt, & instant. Ut testimonio Patrum efficaciter uti possimus in rebus fidei, deberemus esse certi, illud verè esse testimonium Patrum, & non suppositum, & illorum sensus deberet esse nobis exploratus; atqui nec sumus certi, ea, quæ nomine Patrum circumferuntur, verè esse

esse illorum, quorum esse dicuntur: cum multa, quæ alicujus Patris genuina opera putabantur, in dies, ut spuria, & supposititia ab Eruditis respuantur. Similiter vel tempore, vel imperitiâ, vel malitiâ, quæ ab illis scripta fuere, variis in locis immutata sunt, vel adulterata; quare in antiquitate nihil sanum, nihil incorruptum existere, prudenter timeri potest. Sensus pariter Patrum aliquando aded implexi sunt, atque intricati, ut vix ullus extrahi sensus certus possit. Itâ Dallæus.

Respondetur negando min. intellectam de scriptis omnium Patrum. Etsi enim sint aliqui Patrum loci, quorum de Auctore, vel sensu ambigi possit, ut sunt illi, qui vel ex supposititiis, vel dubijs veterum monumentis proferuntur, vel qui sunt itâ obscuri, ut verus eorum sensus vix percipi queat: non tamen omnes, aut plerique tales sunt; & si qui sunt, à nobis non adhibentur, cum de summa fidei agimus. Rursus etsi dubium esse possit, an iste, vel ille liber sit hujus Auctoris, cuius dicitur esse, hoc tamen dubium esse nequit de tota Patrum collectione, vel de majore parte eorum. Quis enim dicat, omnes Patrum libros, aut etiam majorem partem illorum esse suppositam, vel falsatam? hoc esset, omnibus veteribus monumentis in quacumque materia fidem derogare, & in summam antiquitatis obscuritatem homines deijcere. Cum ergo testimonium sufficiens in rebus fidei non sit unus, vel alter ex Patribus, sed tota eorum collectio, aut saltem major pars, inde est, quodd de testimonio Patrum, pro ut eo in rebus fidei utimur, & ad probandum Ecclesiæ traditionem assumimus, nullus sanæ mentis dubitare possit.

XV. Quatò obijciunt, & urgent Patres vel narrant, ut testes, ea, quæ in sui seculi Ecclesiæ credebantur, aut gerebantur, vel, ut doctores, quod ipsi sentiant, exponunt; sed si quilibet ex his modis loquatur, eorum

dictum falli potest; ergo &c. minor pro prima parte probatur. Scire, quæ singulis seculis fuerit Ecclesiæ sententia, est cognitio facti, non juris, historiæ, non fidei, & dogmatis: sed Patres in re facti, & historica falli potuerunt, imò de facto multi errarunt; ergo &c. Pro secundâ, etiam parte probatur. Esto enim Patres, sancti fuerint, & docti, homines tamen fuerunt; ergo in sua proferenda sententia decipi potuerunt: non enim habuerunt specialem Spiritus Sancti adistentiam, qualem sortiti sunt librorum canonicorum Scriptores.

Respondeo, neg. minorem pro utraque parte, intellectam tamen de omnibus collectivè, vel de majore parte, & de rebus fidem spectantibus, & cum ab Ecclesiâ probatz fuerunt Patrum dicta. Ad prob. min. pro prima parte dist. min., possunt falli in re facti, si sit inerum, & simplex factum, conc. min., si sit factum conjunctum cum Jure, & à Jure indivisum, nego min. Quæstio facti est, an libri, qui ab Ecclesiâ leguntur, ut canonici, sint verè canonici; quæstio tamen meri facti non est, sed quæstionem juris involvens, an scilicet in judicando de authenticitate Sacrorum Librorum judicium Ecclesiæ sit infallibile; unde qui negat, Libros, qui in Ecclesiâ leguntur, esse canonicos, negat in Ecclesiâ esse firmum judicium de Libris Sacris. Sic quæ singulis seculis fuerit Ecclesiæ sententia, quæstio facti est, conjuncta tamen cum jure, nempe cum ista quæstione, quæ fuerit illis seculis vera fides. Quare si Patres universi, quando ut testes oculari, & approbati ab Ecclesiâ retulerunt de fide Ecclesiæ sui temporis, errassent, sequeretur, & errare Ecclesiâ, quæ illos ut testes sequitur.

Ad probat. secundæ partis respondeo ex dictis, probare quidem, singulos seorsim sumtos errare potuisse, non tamen omnes simul, cum docent fidei

fidei dogma; aliàs Ecclesia, qui illos sequitur, erraret; hæc satis sint. Qui plura velit, adeat inter cæteros Natalem Alexandræ *hyst. Eccles. secul. a. totâ dissertat. 16.*

XVI. Pro coronide hucusque dictorum observandum cenëo, quod licet auctoritas unius, vel altæius ex Patribus, etiam in rebus fidem spectantibus, se solâ non faciat argumentum infallibile, specialis tamen ratio habenda est illorum Patrum, quos Deus posuit quovis seculo in sua Ecclesia, ut errores, ac hæreses eo tempore nascentes eliderent, sicut Ariani opposuit Athanasium, Hilarium, & alios; Pelagianis, Donatistis, Manichæis S. Augustinum, aliisque hæreticis alios Doctores suâ providentiâ opposuit.

Quapropter, si pro divinitate Filii Dei contra Arianos agendum erit, consulendi erunt Athanasius, Hilarius, alique, qui causam hanc ex professo tractaverunt, & quorum doctrinam Ecclesia Catholica amplexa est; atque horum auctoritati magis deferendum, quàm eorum, qui rem solum obiter tetigerunt.

Eâdem ratione, quia S. Augustinus Gratiam Dei contra Pelagianos strenuè propugnavit, ejus auctoritas in causâ Gratiæ plurimi est faciendâ; quia quos Deus specialiter elegit ad alicujus erroris confutationem, speciali lumine illustravit ad Catholicam veritatem tuendam. Hinc S. Augustini doctrinam, maximè dùm de Gratia agitur, Sedes Apostolica summo pretio semper habuit. Eam à detractoribus tutatus est (Augustino vix mortali virâ functo) Cælestinus I. in *rescripto ad Episcopos Gallia*, ubi ait, eum *sinistra suspitionis* saltem rumore fuisse nunquam asperitum; tanta scientia fuisse, ut inter magistros optimos etiam à suis prædecessoribus semper haberetur. Causam Augustini non esse solum Prosperi, & Hilarii, qui pro magistro suo agebant, sed *universalis Ecclesia*, quæ quâcumque *novitate pul-*

*sat*ur. Demum jubet, ut *improbis impostis silentio*, cesser imposterum hujusmodi querela. Hoc Cælestini rescriptum celebrat S. Prosper *lib. advers. Collatorem cap. 21.* Hormisdas etiam *epist. ad Possessorem Africanum Episcopum*, qui ipsum consuluerat, quid sentiret de Libro Fausti Galli Regiensis Civitatis Episcopi, in quo de Gratia Dei agebatur, multis pro eo contententibus, aliis scandalum ab eo summentibus. Respondit, Fausti librum non recipi. Fixa esse à Patribus, quæ fideles seclari debeant, instituta. Et tandem concludit. *De arbitrio tamen libero, & Gratia Dei, quid Romana (hoc est Catholica) sequatur, & asseveret Ecclesia, licet in variis libris beati Augustini, & maximè ad Hilarium, & Prosperum, possit cognosci; tamen in scriptis Ecclesiasticis expressa capitula continentur &c.* Ex his apparet, sexto seculo doctrinam Sancti Augustini in materia de libero arbitrio, & Gratia Dei fuisse doctrinam Ecclesiæ Romanæ, idest Catholicæ. Quod comprobatur quoque ex *epistola Synodica Episcoporum Africanorum in Sardinia exsulum*, data eodem seculo, quæ reperitur *tom. 2. Concil. column. 1055.*, de Gratia Dei, & humano arbitrio scripta, in qua *nu. 27.* sic eos, ad quos scribitur, adhortantur. *Præ omnibus studium gerite, libros Sancti Augustini, quos ad Prosperum, & Hilarium scripsit, memoratis fratribus legendos ingerere. Quorum mentionem beata memoria Hormisdas Sedis Apostolica gloriosus Antistes, in epistola, quam consulenti se sancto fratri, Consecratorique nostro Possessori rescripsit, eum magno præconio Catholica laudis inferuit. Cujus hæc verba sunt. Deinde verba Hormisdæ mox laudata subiungunt. Sanctus Augustinus, ejus doctrinam secundum præcessorum meorum statuta, Romana sequitur, & servat Ecclesia (inquit Joann. II. *epist. 3. to. 2. Concil. col. 1250.*) Unde Capitula à Sede Apostolica ad Concilium Arafricanum secundum transmissa, & ab hoc sub-*

scri-

scripta, & in Canones redacta, quæ gratiæ necessitatem concernunt, serè omnia ex libris D. Augustini desumpta sunt.

Merito igitur Clemens XI., suo Brevi dato Romæ 28. Jun. 1704., Joannis Lanoii libellum *traditionem* nuncupatum, quo S. Augustini nomen, & auctoritatem obscurare, ac elevare in iis, quæ gratiam spectant, conatus est, diris devovit, repertumque flammis aboleri, mandavit. Quem secutus Benedictus XIII. feliciter, & sanctè regnans contra calumniantes doctrinam SS. Augustini, & Thomæ, ac si hæc in Quænellianis propositionibus à Clemente XI. in Bulla *Unigenitus* proscriptis damnata fuisset, in solamen utriusque Magistri Discipulorum, suis litteris in forma Brevis sub die sexta Novembris 1724. declaravit, SS. Augustini, & Thomæ inconcussa, & tutissima dogmata *de gratia per se, & ab intrinseco efficiat, & de gratuita Prædestinatione ad gloriam sine ulla prævisione meritum*, nedùm præfixâ Constitutione non esse damnata, sed eorumdem Discipulos jure merito gloriari, esse & Verbo Dei, Summorumque Pontificum, & Conciliorum decreta, & Patrum dictis consona, distictè inhibens, *ne quis in posterum hoc nomine calumnias struere, & dissensiones ferre audeat.*

DUBIUM VIII.

Locus ab auctoritate Theologorum Scholasticorum.

§. I.

Aliqua præmittuntur.

I. Scholasticæ Theologiæ ortum, ac progressum, ejusque utilitatem supra exposuimus. Modò investigamus, quantæ auctoritatis sit argumentum ab ea petitum, seu quanti faciendi sit Theologorum Scholasticorum in re fidei, ac morum sententia.

Tom. I.

Hic tamen, memento Lector, me, sicut & supra, Theologi scholastici nomine, seu scholæ doctrinæ intelligere eam, quæ ex sacrarum litterarum fundamentis deducta sit. Non enim Theologos illos (quos Theologi nomine vix dignos reputo) hic intelligo, qui universas quæstiones Theologicas frivolis argumentis absolvunt, in quibus Sacrorum Bibliorum testimonia rarissima sunt, Conciliorum mentio nulla, nihil ex antiquis Patribus olement, nihilque ex gravi Philosophia, quidem. Imò, quæstionibus verè Theologicis omisiss, toti sunt in metaphysicis, vanisque aliis summâ animi contentione agitandis, impletes hujusmodi commentariis codices; & tamen, si Diis placet, ut ait Cano lib. 8. de locis cap. 1.) Theologi Scholastici vocantur, nec Theologi, nec Scholastici, sed Theologiæ, & Scholæ corruptores. Quod si hos solos damnassent Lutherus, Melancthon, Calvinus, culpandi propterea non essent. Theologum ergo scholasticum illum nuncupo, qui de Deo, rebusque divinis aptè, prudenter, doctè è litteris, institutisque sacris ratiocinatur.

Porrò Theologos scholasticos ità usurpatos, esse in pretio habendos, jam supra ostendi; quod adèd certum est, ut ex eorum contemptu inferat Canus laudato loco, Lutherum, aliosque ejus gregales in omnes errores ruissè præcipites. Principio namque (ait ille) quod erat facile, schola auditoribus contentis, schola quoque judicia contemserunt. His neglectis, mox necesse erat, Hieronymus, Augustinus, Gregorius, Ambrosius, Basilus negligerentur, quos Theologi recenter dogmatum suorum auctores habebant. At antiquis Sanctis posthabitis, despectui quoque habita sunt eorum concilia. Unde consecutum est, ut & libros quosdam Canonicos, & Ecclesiasticam auctoritatem Lutherani contemnerent. Adèd verum illud est, qui minima negligit, paulatim desinit. Absit invidia verbo. Nec enim minima schola auctoritas esse

Cc

possit,

potest, quam parvi facere nemo sine fidei discrimine potest. Ità Canus, attentè hac in re audiendus.

Posiunt Scholastici Doctores, ut de Patribus diximus, sumi vel sigillatim, & seorsim; vel collectivè, & simul; sed de eorum doctrinis, in quibus inter se discordes sunt; vel de iis, in quas omnes concordia sententiâ conspirant. His ergo præhabitis.

§. II.

Statuantur assertiones.

II. **D**ico primò. Theologorum Scholasticorum etiam multorum testimonium, si alii viri docti contrarium asserunt, neque Ecclesia quidquam statuit, non plus valet ad faciendam fidem, quàm vel ratio ipsorum, vel gravior auctoritas comprobabit. Ità Canus laudatus c. 4. qui addit: *In scholastica disputatione plurimum auctoritas obstruere Theologum non debet; sed si paucos viros modò graves secum habet, poterit sanè adversum plurimos stare, non enim numero hac judicantur, sed pondere.* Et post pauca. *Quo loco sanè arguendi sunt scholastici nonnulli, qui ex opinionum, quas in schola acceperunt, præjudiciis, viros aliàs Catholicos notis gravioribus incurrunt, idque tantâ facilitate, ut meritis rideantur... nec enim si quid, aut Scoticis, aut Thomisticis pronunciatis contrarium est, error illicò est.* Cum enim admittantur ab Ecclesia utriusque partis, sed scholæ placita propria, tanquam probabilia, censurâ dignus posset existimari, qui alterius scholæ dictis aliquam censurâ notam incurrere vellet, nisi quid contra illam ab Ecclesia definitum fuisset.

III. Dico secundò. Ubi Theologi Scholastici summo consensu docent, aliquam doctrinam ex principiis fidei deduci, usque adeò probabile, imò & firmum fundant argumentum, ut illi doctrinæ refragari, temerarium, imò

hæresî proximum sit. Hoc probo primò. Nam in quacumque arte Peritis credendum esse, ratio demonstrat: nec enim sanus crederetur, qui omnibus nautis in navigandi ratione non crederet; sed judicare, aliquam doctrinam deduci, & esse connexam cum principiis fidei, Theologorum scholasticorum ars est; ergo, qui omnibus Theologis asserentibus aliquam doctrinam necessariò connecti, & deduci ex principiis fidei refragaretur, vel non sanus, vel temerarius esset. Ac insuper, quia qui negat doctrinam deductam ex principio fidei, videtur virtualiter negare principium fidei, ex quo deducitur; ideò etiam hæresî proximus esset.

Secundò probatur. Quotiescumque Theologi Scholastici cujuscumque scholæ, qui magnâ ferè ubique dissensionem concertant, in una asserenda conclusione concordant, argumento est, illam adeò clarè ex suis principiis deduci, ut negari non possit; Non enim Doctores in factiones dissecti in unam veritatem conspirarent, nisi suâ claritate illos captivaret; ergo, qui vellet contrarium sentire, temerè, & sine ullo fundamento procederet, hæresisque suspicionem non effugeret. Eò vel maxime, quòd tanta concordia inter Doctores, qui ordinariè, & naturaliter in contraria studia feruntur, potius, quàm humanum, divinum opus par est credere. Non abàmili modo, quo mirabile fuit, ac divinum, quod septuaginta duo senes (ut aliqui autumant) diversis cellulis inclusi unanimes conspirarint in eadem adornanda Sacre Scripturæ Versione.

Huic assertioni pondus accedit, ex Clement. *unica de summa Trinit.*, ubi Patres Concilii Viennensis statuunt, opinionem illam, quæ dicit, tam parvulis, quàm adultis conferri in Baptismo informantem gratiam, & virtutes, tanquam probabiliorè, & Doctorem modernorum Theologiæ magis consonam, & concordem, fore à Catholicis eligendam. Si ergo in re, quæ olim

olim inter ipsos etiam Theologos Scholasticos controversa fuerat, opinio concors juniorum tanti apud Patres in Concilio fuit : quanto magis nos res omni tempore à schola præscriptas tenere, ac revereri debemus. Dùm enim omnes consentiunt, veritatem aliquam eum principiis fidei connecti, non datur amplius fundamentum prudens contrarium opinandi, quia certò constat oppositum; opinio autem de uno essentialiter supponit, non esse certum oppositum.

IV. Dico Tertio. Concors omnium Theologorum Scholasticorum toto Orbe diffusorum sententia in re fidei, aut morum, ità firmum præbet argumentum, ut ei contradicere hæreticum sit, vel saltem hæresi proximum. Probatur primò. Nullum dogma reperietur, quod eadem mente, & ore Scholastici omnes eorundem, ac firmiter asseruerint, quin idem in universum Ecclesiam teneat, eorum auctoritate mota; & quod apertè ex Sacris Litteris, vel ex Apostolorum traditione, vel ex Conciliorum, aut Pontificum definitionibus non habeat certam originem. Quòd si aliquid in contrarium invenire possunt Hæretici, proferant. & tacebimus. Ergo qui ejusmodi omnium Scholasticorum asserito refragatur, contradicit Ecclesie universæ, & vel repugnat Sacris Litteris, vel Apostolorum traditioni, vel Conciliorum, Pontificumve decretis.

Secundò prob. Si qua in questione universi Theologi idem omnino con-
cinnunt, prosequi, si in eo errant, Ecclesiam item errandi periculo exponunt, quia sive qui confessiones excipiunt, sive qui couciones spargunt, sive qui ut Pastores fideles sibi commissos docent, omnes instruunt in rebus fidei, & morum, pro ut à schola accipere; ergo si tota schola erraret, totus populus erraret, & Ecclesia communem errorem dissimulans, omnes Christi fideles suo silentio deciperet. Error enim cui non resistitur, approbatur : & veritas, cum non de-

fenditur, opprimitur : ut ait Innocentius 83. dist. cap. Error, & Felix III. ad Acacium. Quòd si ità esset, Deus Ecclesie suæ deficeret in necessariis. Quid enim facturus esset populus imperitus, nisi eos sequi, quos pro illo tempore Ecclesiasticæ Doctrinæ Magistros accepit? Erraret ergo populus, erraret, vel saltem errori consentiret Ecclesia; quomodo ergo staret Christi promissio?

Confirmatur. Cùm Dominus dixit, qui vos audit, me audit : qui vos spernit, me spernit, Lucæ 10. v. 16. Item eùm Paulus ad Ephes. 4. dixit, quòd Deus posuit in Ecclesia alios Pastores, & Doctores in opus ministerii, in adificationem Corporis Christi, donec occurramus omnes in unitatem fidei in virum perfectum, ut jam non simus parvuli fluctuantes, & circumferamur omni vento doctrina in nequitia hominum, in astutia ad circumventionem erroris, non modò ad primos Theologos, & Doctores, hoc est Apostolos, verba illa referebat, sed ad Doctores etiam in Ecclesia futuros, quandiu pascendè essent oves in scientia, & doctrina; ergo sicut qui communem Theologorum Christo immediatè succedentium vocem audiebat, Christum audiebat, qui eam contemnebat, Christum contemnebat; ità qui Theologos juniores antiquis succedentes audit, Christum audit, qui spernit, Christum spernit. Similiter sicut primi Doctores, & Pastores positi fuerunt in edificationem Ecclesie, ne sinus, ut parvuli fluctuantes omni vento doctrinae, ne circumveniamur errore; ità positos fuisse doctores, illis per secula frequentia prioribus succedentes, credendum est. Quandiu enim Christi Corpus, hoc est Ecclesia fuerit, ad divinam procuracionem pertinebit, ut ii, qui in Ecclesia Sacre Doctrinæ Doctores habentur, tanquam à Deo positi veritatem in fidem teneant, ne populus parvulorum more circumferatur, & ab errore circumveniat. Sed qui antiquis succederunt, & qui modò in

Ecclesia, ut Doctores habentur, sunt Theologi Scholastici; ergo horum concors sententia in fide firma esse debet, sicut firma esse debet fides totius Ecclesiae.

V. Dices, magnam esse differentiam inter veteres Doctores, & modernos Theologos. Illi enim docti erant, & simul sancti; isti non ita. Illi, idest Apostoli, habebant adfidentiam Spiritus, qui eos docebat, ita, ut neque omnes, neque singuli errare possent; isti nec sigillatim, nec simul sumtis adfidentiam Spiritus promissam legimus. Latum ergo discrimen est inter hos, & illos, ut illis credere teneamus, istis non.

Respondeo primò, me non intendisse, Juniores Theologos priscis illis aequare. Scio, quantum antiquitati deferendum sit, quantum sanctitati. Scio, Apostolos accepisse Spiritum Sanctum, & quidem singulos. Hoc de scholasticis non audeo dicere. Post Apostolos veteres Patres habeo, & veneror, ut traditionis testes, ut Patres fidei, ut Proceres, & Doctores primarios Ecclesiae. Posteriores verò, & Juniores agnosco, ut discipulos; qui tamen dum eadem docent, quæ à suis Patribus acceperunt, sunt in eorum virtute, & loco subrogati, quia & dum annosa arbuscula succeduntur, in eorum robore tenera virgulta succrescunt, ait D. Gregor. lib. 36. moral. cap. 17. Sicut ergo Sanctorum veterum consensus, ut dubio præcedente dictum est, non in omnibus questionibus sequenda nobis, & tenenda est, sed solum in fidei regula; ita Juniorum Theologorum concors sententia non in omnibus questionibus, sed in iis solum, in quibus concorditer docent ex scripturis, vel traditione, & Patribus, vel ex Conciliorum, aut Pontificum auctoritate, quamam sit fides Patrum, Ecclesiae, Christi. Esto enim non asseram, Scholasticis Theologis, dum concorditer loquuntur, immediatè adesse præsentiam Sancti Spiritus, eam adesse toti Ecclesiae fatendum est; quæ

cum in his rebus audire soleat, & consulere Theologos, eorumque concordii sententiæ veluti manu duci, & disponi ad definiendum, ut in Florentino, & Tridentino Conciliis factum est; sequitur consequenter, saltem mediatè, concordiam omnium Theologorum non esse opus prorsus humanum. Eò vel maximè, quia ordinariè, & naturaliter in contraria fludia ferri solent.

Ecclesia ergo quavis ætate, & tempore, quasi corpus quoddam spirituale, & mysticum, perfectum, & absolute solum fuit, & erit usque ad consummationem seculi. In eo debent esse omni tempore oculi, ac cætera membra, Spiritusque veritatis instar animæ, omnia pro cuiusque conditione vegetans; oculi nimirum, ut manus, pedesque regant, & ducant, ne fluctuent, circumferantur, circumveniantur errore. Cum ergo hujus mystici corporis oculi, & lumina, Doctores sint, qui in Ecclesia, quovis tempore fuerunt, ad providentiam Spiritus, cuius est hoc corpus servare, pertinebit nunquam permittere, ut concordii sententiæ omnia membra in errorem inducant.

Respondeo secundò, Instantiam hanc, quæ ex hæreticorum officina prodit, spiritum Pharisaicum sapere, qui, teste Christo Matth. 23. v. 30., dicebant, si fuissetis in diebus Patrum nostrorum, non essemus socii eorum in sanguine Prophetarum. Sic dicunt moderni Protestantes (ait Canus laudatus) Si essent Scholastici Doctores, quales erant Hilarius, Hieronymus, Basilus, sequeremur eos. Si in diebus Augustini, Ambrosii, Hieronymi fuissetis, non essemus socii Manichæi, Novati, Vigilantii, Pelagii, Joviniani. Ipsi tamen optime aptatur Christi responsum v. 31. Testimonio estis vobismetipsis, quia filii estis eorum, qui Sanctos antiquos contemserunt, quorum errores ab inferis excitastis, ut susce ostendi in Vera Ecclesia tom. 1. cap. 9. §. 3. Qui ergo Juniores Theologos contemnitis, eadem

eādem audaciā veterēs Patres contemneretis, sicut eos de factō contemnit Lutherus, ut §. 1. dubii præcedentis ostendi. Benè ergo, ait Chrysostomus, seu quisquis alius auctor operis imperfecti super Matth. hom. 42. Cū audieris aliquem beatificantem antiquos doctores, proba, qualis est circa suos doctores. Si enim illos, cum quibus vivit, sustinet, & honorat, suo dubio illos, si cum illis vixisset, honorasset; Si autem suos contemnit, si eum illis vixisset, illos contempsisset. Tandem contra Protestantes urget hæc instantia. Si juxta vos cuique fideli adeit Spiritus privatus, ne in re fidei erret, discernendo ve. um à falso: Quare iste idem Spiritus non aderit omnibus Ecclesiæ Catholicæ Doctores, dum concorditer aliquid ad fidem pertinens docent, cū Christus dicat Matth. 18. v. 19. 20. Si duo ex vobis consenserint super terram, de omni re, quæcumque petierint, fiet illis à Patre meo, qui in Cælis est. Ubi enim sunt duo, vel tres congregati in nomine meo, ibi sum in medio eorum? Si ergo adesse dignatur, ubi duo, vel tres fuerint: quantò magis non deerit, ubi plures convenerint Sacerdotes? Ità Sanctus Gregorius lib. 7. epist. 111., modò lib. 9. epistol. 105.

Quæ hæcenus dicta sunt de Scholasticis Theologis, applicanda sunt Academicis, sive Universitatibus ex præfatis Doctores congregatis. Quod enim omnes Universitates, vel Academiae toto Orbe diffusæ unanimiter docent, vel tanquā quid certò ad fidem pertinens, vel ex fidei principiis consequens, ità certum debet haberi, ut hæreticum sit primum negare, hæresis verò proximum negare secundum. At si illud doceant tanquā probabile tantum; vel si una, vel altera Academia illud doceat, alterā, vel aliis contradicentibus, tunc, ut merè probabile haberi debet: Una enim Academia, præsertim si sit clara, & illustri (in re tamen, cui Sedes Apostolica non contradicat) sufficit ad faciendam opinionem probabilem. Unde

Caramuel lib. 1. Theologia fundam. talis, fundam. 5. per totum, & præsertim §. 24. hanc materiam fusè pertractans, statuit sequentem regulam. Modò nec in fidem, nec in Catholicam, totoque Orbe receptam morum doctrinam impingat in materia Politica; quidquid exteri Ecclesiastici, aut seculares sentiant, dicantve, unusquisque tenetur defendere jura sua patria.

DUBIUM IX.

Locus ab auctoritate Juris Pontificii Doctorum.

§. I.

Theologi, & Canonisti invicem comparantur.

I. **S**Acra Theologia, & Canonum scientia comparantur invicem, sicut quasi superior, seu subalternans, & inferior, seu subalternata; quatenus principia, & fontes, unde Ecclesiæ decreta sua, & canonicas functiones eruit, sunt vel principia, vel conclusiones Theologicæ facultatis, cujus est cognoscere, & judicare, quæ à Deo sunt revelata, vel quæ his sunt vel consequentia, vel repugnantia. Quamobrem utraque sæpè in idem objectum materiale concurrat, quamvis diverso modo. Quia Theologia illud magis inspicit propter veritatis cognitionem, & dū actiones humanas dirigit, eas respicit potiùs in communi, tradendo regulas generales pro foro conscientie, & dū de iis etiam in particulari judicat, de iis iudicium profert relatè ad forum internum, & prout causa inter Deum versatur, & hominem. Canonum verò scientia principaliter practica, & de actionibus, non tàm in communi, quàm in particulari, applicando eas ad hęc, & nunc, & ut pertinent ad iudicia, respicit actiones humanas, ut forum exterius præcipue concernunt, ac inter homines, & homines exer-

ccm-

centur. His stantibus. Quæri solet, quænam præferenda sit auctoritas in aliquo negotio, nùm Theologorum, nùm Canonistarum? Qua in re est opinio Alvari Pelagii lib. 2. de planctu Ecclesiæ cap. 20., & Hostiensis c. Penultimo de astate, & qualitate ordinandorum, docentium in materia simoniæ, usurarum, & ubi de peccato agitur, standum esse decisioni potiùs Canonistarum, quàm Theologorum: & Joannis Rojæ 2. p. de hæreticis volentis, materiam dogmaticam, si nondùm decisa sit, spectare quidem ad Theologos, at si decisa sit, ejus cognitionem spectare ad Canonistas; quia tales definitiones Ecclesiæ in corpore Juris Canonici continentur. Hoc tamen non obstante.

II. Dico primò. In rebus ad fidem pertinentibus præferenda est auctoritati Canonistarum auctoritas Theologorum. Probat, quia Summi Pontifices, & Concilia, quorum decreta, & sanctiones Jus Pontificium concludit, nihil, quod ad fidem spectare videatur, unquam ex sensu suo definiunt, sed ex Sacris Litteris, & Apostolorum traditionibus, quæ sunt propria Theologiæ principia; ergo ejusmodi rerum perfectæ, & tuta intelligentia à Theologis, non à Canonistis petenda est, & à Theologis instrui debent Canonistæ: cuius defectu sæpius hallucinati sunt Juristæ, ut satis apparet ex illius expurgatione tempore Gregorii XIII. facta.

III. Dico secundò. Etiam in iis, quæ concernunt Jus naturale, & divinum, sive quæ ad mores per dicta Jura regendos pertinent, Theologorum auctoritas Canonistarum placitis præferenda est. Constat eadem ratione: Nam ea, quæ spectant ad Jus naturale, & divinum, complectens veterem, & novam legem, originaliter determinari debent ex principiis, & fontibus Theologicis; sed agnoscere, ac interpretari propria principia, & judicare de iis, quæ illa consequuntur, potiùs, ac rectius potest facultas

illa, cuius sunt propria, quàm quæ ea accipit solum, & à scientia superiori supponit judicata, & probata; ergo de iis, quæ legem naturalem, & divinam concernunt, determinare, potiùs ad Theologum spectat, ejusque judicio, ut tutiori standum est, quàm Canonistæ.

Propterea D. Thomas quodlib. 12. art. 9. ad 1. cum sibi objecisset auctoritatem plurium, & magnorum Juristarum docentium, comedentem, vel stantem cum excommunicato peccare mortaliter, respondit: *Opinio Decretistarum non est vera, quia ipsi plures assentiunt in his, & sequuntur jus humanum, quàm divinum, cum plures sit assentiendum Juri Divino, quàm Humano; & ideo melior est opinio aliorum, qui dicunt contrarium.* Dominicus etiam Sotus in 4. dist. 13. quæst. 1. art. 8. referens errorem Joannis, qui super Canonem *Accidens* dist. 50. assensit, Clericum degradatum non retinere ordinem, nec consecrere Sacramentum, respondet: *Glossatores isti, quoties in Jus divinum falcem mittunt, eruantur.* Ad eò verum est, quòd in iis, quæ pertinent ad Jus Divinum, magis Theologis, quàm Canonistis deferendum est.

IV. Dico terciò. Ubi agitur de Legibus purè Ecclesiasticis, per quas nimirum determinantur circumstantiæ Juris naturalis, & divini, ut de Ministrorum officiis, de decimis persolvendis, de penis, & censuris, aliisque sexcentis hujus generis, ut iis, quæ ad Forum Ecclesiasticum, causasque, & lites illius pertinent; Canonistarum sententia præferenda est. Probat. In quacunque enim materia, seu facultate à Peritis illius facultatis judicium desumendum est; sed omnia prædicta in Jure Canonico tractantur, & discutuntur; ergo quoad illa Canonistis potiùs, quàm Theologis adhibenda est fides. Quare D. Thom. quodlib. 9. art. 15. tractans illam quæstionem, an liceat alicui plures præbendas habere simul: & exor-

& exortâ controversiâ, an lex abrogetur per consuetudinem contrariam, vel non, subiungit S. Doctor: *Hæ controversia Juristis est relinquenda.*

Porrò, quia Theologia pro ea parte, quâ practica est, maximam habet connexionem cum Jure Canonico, infert Canus, Theologo, præsertim ei, qui ad animum curam est destinatus, maxime utilem fore, & quasi necessariam Canonum notitiam. Nam quemadmodum (ait Canus *lib. 8. c. 6.*) non est in Abbatem eligendus, nisi qui ante fuerit in regula competenter instructus, ut *e. Officii de electione* Innocentius tradit: Ità nec cura quidem Ecclesiâ gubernandi est ei committenda, qui Ecclesiasticas regulas nescit. Theologus igitur, qui vel Episcopus, vel Parochus futurus est, nisi Canones ante didicerit, quibus fideles debent in Christiana Religione, & Ecclesiæ caremoniis institui, non habebit profectò ad rem hanc publicam gerendam Theologiæ officinam satis instructam. Atque idè Sacerdotibus ex Cælestino, Leone, Augustino, septima Synodo, Concilio Carthaginensi tertio, Toletano quarto, ut refert Gratianus *dist. 38. & 61.* Canonum Ecclesiasticorum notitia inculcatur.

Theologi insuper à Summo Pontifice, & Episcopis adfiscuntur, non solum ad prædicationis officium, sed etiam ad confessiones audiendas, ad poenitentias injungendas; quod vix bene præstari potest sine canonum notitia, pro solvendis casibus circa excommunicationes, suspensiones, irregularitates, circa matrimonium, ejusque impedimenta, circa simoniam, vota, perjuriam, usuras, furta: quæ si Theologus ignoret, quomodo officii sui partes implebit, quomodo judicare poterit? ignorabit autem, falsumque judicium proferet, nisi Canones Ecclesiasticos in talibus materiis eolverit. Alia plura videri possunt apud Canum laudatum.

§. II.

Resolutiones dubii.

V. **J**us Pontificium, seu Canonicum vocamus Jus illud, quod in decreto Gratiani, & Decretalibus continetur; de cujus origine, ac divisione in *trakt. de Justitia, & Jure* (si Deus dabit) dicemus. Nunc autem tantum ea degustabimus, quæ ejus auctoritatem concernunt, quantam scilicet certitudinem habeat probatio Theologica ab illo desumpta. Pro cujus explanatione.

Adverto, in decreto (cujus auctor est Gratianus) quatuor species auctoritatum reperiri. Prima est Sanctorum Patrum, Conciliorum tam Generalium, quàm Particularium, & Summorum Pontificum. Secunda ipsius Gratiani compilatoris hujus voluminis. Tertia cujusdam *Palea*, de quo variè sentiunt Doctores. Multi ea capita, in quibus res inanes, tennes, & modicæ utilitatis continentur, paleæ nomine vocitari crediderunt. Alii *Paleam* volunt fuisse quandam Protopaleam Cardinalem, & Collectioni Gratiani capita hæc adjunxisse. Nonnulli sentiunt *Paleam* fuisse Gratiani discipulum, & suâ auctoritate inseruisse huic Volumini capita aliqua, nec authentica, nec ullam fidem facientia. Alii tandem, ut *Barbosa*, in præmio decreti Gratiani putant, *Paleas* nil aliud esse, quàm additiones marginales primò notatas, & fortè ab ipso Gratiano nonnullas, ut in relegendo à se composita fieri solet, quas deinde librariorum quidam omiserint, alii in corpore, & contextu conjunctim cum prioribus capitulis interdum, interdum verò cum aliquo discrimine posuerint. Quarta species est auctoritas Juris Civilis, vel secularium Principum, quorum multæ leges huic volumini insertæ reperiuntur. His suppositis.

VI. Dico primò. Argumentum sum-
tum

tum ex auctoritatibus SS. PP., Conciliorum, Summorumque Pontificum in decreto contentis, si concernat materiam, & definitiones fidei, eam habet firmitatem, quam supra diximus, habere argumenta sumpta ex Patribus, Conciliis, ac Summis Pontificibus. Conclusio hæc regulanda est, & probanda ex supradictis.

VII. Dico secundò. Si præfatæ auctoritates pertineant solum ad Ecclesiastica decreta respicientia disciplinam, ac mores, quæ propriè dicuntur, & sunt leges humanæ, certam quidem facere possunt probationem Theologicam, non tamen certitudinem fidei: mutari enim possunt; & maxime, si fuerint rerum dumtaxat particularium, merique facti nullum jus involventis. Est autem Summus Pontifex in condendis legibus ad statum Universalis Ecclesiæ spectantibus errare non possit, non tamen huiusmodi leges equiparari possunt fidei definitionibus, quæ firmæ prorsus, ac immutabiles sunt.

VIII. Dico tertio. Tres aliæ auctoritatis species, nimirum ipsius Gratiani compilatoris, Palææ, & Juris Civilis, vel secularium Principum, non possunt facere ex se certam probationem, ad alicujus controversiæ Theologicæ decisionem. Primò, quia Gratianus, & Palæa non aliam habent auctoritatem, quam Doctoris privati. Secundò, quia leges civiles insertæ in decreto, ne quidem Juris Canonici vim habent, aut auctoritatem: Gratianus enim, qui eas inseruit, talem non habuit potestatem. Et hoc verum est, etiamsi tales leges civiles sint Clericis, & Ecclesiis favorabiles; talis enim favor nihil suffragatur ad supplendum in concedente facultatis defectum *cap. Ecclesia S. Maria de Constitutionibus*. Intellige tamen, ut dixi, *per se*, & nisi prædictæ leges essent per aliquem Canonem à Summis Pontificibus receptæ, & approbatæ, quia eo ipso suscipiunt vim legis canonice, ut optimè advertit glossa capite mox

citato. *Quod aliàs est infirmum, confirmatio Papa facit firmum.*

IX. Dico quartò. Quod de volumine Decreti, idem proportionaliter asserendum est de altera Juris Pontificii parte, sex Decretalium libros, Clementinas, & Extravagantes comprehendente, quibus addi potest Bullarium; in quibus omnibus, ut sunt multæ Constitutiones spectantes ad particulares etiam communitates, imò & casus ad Personas: ità aliæ sunt spectantes ad regimen Civile, ac Politicum status Ecclesiastici, aliæ ad fidei dogmata, aliæ tandem ad universalis Ecclesiæ regimen in moribus. Pro huiusmodi ergo diversitate materiæ argumenta ab earum auctoritate desumpta maiorem, vel minorem in probationibus Theologicis certitudinem efficiunt. Si enim pertineant ad fidem, & mores, totam Ecclesiam dirigendo, faciunt certitudinem omnimodam: quia in his Papa, & Concilia Generalia infallibilitatem habent, ut supra dictum est. Si tantum Politicam externam, & Ecclesiæ, seu Ecclesiasticorum gubernationem respiciant, non efficiunt certitudinem prorsus indubitam: sicut si respiciant solam materiam facti particularis cum Jure non connexi; quia etsi facta, tùm Pontificum, tùm Conciliorum Generalium universim approbata sint, cum sine maturo iudicio nihil statuant, in his tamen omnimodà infallibilitate non gaudent.

Rursus circa decreta Pontificia spectantia ad fidem, & bonos mores, attendendum, an illa à Pontifice, tanquam à publico totius Ecclesiæ Magistro emanarint, an verò, ut à privato Doctore; quia si emanarint à Pontifice primo modo, certitudinem omnimodam faciunt, & de fide; secus verò, si procedant à Pontifice secundo modo, nimirum ut docente, quid ipse, vel alii sentiant, ut fecit Nicolaus I., cum dixit, Baptismum collatum in nomine solius Christi valere, ubi cum Ambrosio sensit.

Obser-

Observandum etiam est, an Pontifex aliquid jubeat, an verò tenendum, vel credendum statuatur; qui enim solum jubet, non facit esse de fide, & qui contra jussum facit, peccare quidem potest, sed non errabit in fide. Hinc ab hæresi excusatur S. Cyprianus, cum Stephano Papæ in materia de rebaptizandis hæreticis resistit, quia Pontifex in sua epistola nihil definiit, sed præcepit solum, quid, donec res definiretur, agi oporteret. Imò etiam à peccato excusari potest, quia probabili ignorantia id fecit.

In probationibus Theologicis ex Jure Canonico solent aliquando afferri regulæ Juris, quæ in fine 6. decretalium collocantur, quarum auctor fuit Bonifacius VIII., quæ quidem non sunt, nec faciunt jus, sed ex jure sumuntur, tanquam notæ brevissimæ eorum, quæ sparsim traduntur in jure; & ab aliquibus definiuntur *generale axioma, seu pronunciatum, ex cujus notitia, & veritate multas facti species definire licet*, v. g. cum alibi traditum esset: Perjurum ad dicendum testimonium non esse admittendum ob suspicionem perjurii; item marito se-vienti non esse facile restituendam uxorem ab eo digressam ob timorem sævitæ; sumta est occasio condendi hanc regulam: *Semel malus semper præsumitur esse malus*. Hinc etiam in Jure Civili cum statutum esset, ut pisces maris, vel fluminis publici occupantibus concederentur, item lapilli in littore maris inventi, sicut & aves, cum ista in nullius bonis sint, generalis orta est regula: *Quod nullius est, naturali ratione conceditur occupanti*. Si ergo una ex his regulis in Jure Canonico contentis assumatur ad probationem Theologicam, quaeritur cuius sit habenda auctoritatis.

X. Dico quintò. Regulæ Juris magnæ esse auctoritatis in rebus præsertim moralibus, si rectè, & cum suis limitationibus intelligantur. Sunt enim veluti penus quædam, in qua totius ferè Juris Canonici doctrina de-

Tom. I.

litescit; adeoque viam aperiunt, de quavis causa confestim, & ex tempore respondendi; Ac insuper tam firmum suppeditant argumentum, ut nisi ostendatur, contra eas jus militare, vel rationem contrarium suadere, vel non bene applicari materiæ, de qua agitur, eis contradici non possit. Hinc ait glossa, potius esse ejus causam, pro quo militat regula: debet enim adversarius ostendere rationem, quare in illo casu regula non loquatur.

XI. Præter hæc dicta, ad Jus Canonicum reducuntur, & à Theologo in suis disputationibus assumuntur aliquando decreta Sacrar. Congregat. D. D. Cardinalium, & decisiones Sac. Rotæ: de his etiam quaerendum est quanti ponderis sint, & auctoritatis.

Observo, quòd ante annos octingentos Romani Pontifices ad graviora negotia consultanda cogere solebant Concilia, quæ Nationalia vocabantur, iisque Italiæ Episcopi intererant, & insuper etiam Presbyteri Cardinales. Verùm talia Concilia, quòd vel bellorum incurfionibus, vel aliis de causis tam sæpè fortè convocari non possent, omitti cœperunt, totaque res ad Cardinalium cætum redacta est, qui, partito munere variis in Congregationibus, res primùm discutit, deinde ad Summum Pontificem deferunt. Hinc talium Congregationum decreta possunt considerari, & quatenus præcisè ab ipsis Congregationibus prodeunt, & quatenus illis accedit approbatio, & confirmatio Summi Pontificis; & insuper quatenus sunt in materia fidei, vel in alia materia purè Ecclesiastica. De his ergo quaestio est, quantæ sint auctoritatis, ubi ad probationem Theologicam assumuntur.

XII. Dico sextò. Decreta Congregationum in materia fidei, & morum ex se, & ut à Congregatione ipsa prodeunt, multi quidem sunt faciendæ, sed non præbent Theologo firmum, idest infallibile argumentum. Explicandum est hoc assertum. Dixi *ex se*, quia ubi talia decreta in materia fi-

Dei

dei,

dei, aut morum à S. Congregatione edita, adhibitis præcisè omnibus necessariis discussionibus, semel à Summo Pontifice approbarentur, & proponerentur universali Ecclesiæ, si essent in materia fidei, ut credenda, & si essent in materia morum universalem Ecclesiæ statum respiciente, ut tenenda proculdubio certa omnino essent.

Dixi insuper multi esse faciendæ, & jure. Nam præterquamquod multi ex Cardinalibus doctissimi sunt, habent insuper singuli suos consiliarios viros omni scientiarum genere clarissimos: sicut enim in Conciliis, præter Episcopos, Theologi sunt, qui materias examinant; ita in Congregationibus, præter Cardinales, sunt Consultores. Igitur earum declarationes non possunt non esse magni ponderis, & probabiliores contrariis aliorum Doctorum opinionibus: imò forte tantæ auctoritatis, quantæ sunt decreta Concilii Nationalis, in cujus vices sunt subrogatæ, ut dicebam. Quare omnes saltem in foro externo obedire tenentur, non obstante quacunque opinionum probabilitate.

Tertia verò, & principalis pars, nimirum, quod non præbeant Theologo argumentum infallibile, probatur. Num Cardinalium Congregationes neque ex se, nec virtute à Summo Pontifice acceptæ, gaudent privilegio infallibilitatis; ergo etiam decreta &c. Anteced. pro prima parte est certum. Privilegium namque infallibilitatis in rebus fidei, & morum definiendis soli Summo Pontifici convenit, & Conciliis Generalibus eius auctoritate congregatis, ut dictum est. Altera etiam pars prob. ex Bulla Sixti V. de institutione eorundem Congregationum anno 1588. edita, quæ incipit *Immensa*, ubi agitur de Congregatione octava pro executione, & interpretatione Concilii Trid. §. 8., habenturque hæc verba: *Cum ad singularem Romani Pontificis auctoritatem tantummodo spectet, Generalia Concilia indicere, comprimare,*

interpretari, & ut ubique locorum serventur, curare, ac præcipere. Eorum quidem decretorum, quæ ad fidei dogmata pertinent, interpretationem nobis ipsis reservamus. Cardinalibus verò Præfectis interpretationi, & executioni Concilii Tridentini, si quando in his, quæ de morum reformatione, disciplina, ac moderatione, & Ecclesiasticis Judiciis, aliisque hujusmodi statuta sunt, dubitas, aut difficultas emerferit, interpretandi facultatem, nobis tamen consultis, impartimur. Ex quibus constat, Sixtum non dedisse facultatem Cardinalibus decidendi dubia in materia fidei, sed solum in concernentibus reformationem inorum, disciplinam, in judiciis circa casus particulares, ipso tamen semper consulto.

Ratio autem est, quia potestas judicandi, & definiendi in materia fidei, & proponendi articulos ejus, qui totam Ecclesiam ad credendum obligent, alligata est dignitati Supremi Capitis, Pastoris, & Doctoris Ecclesiæ, cui soli à Christo promissa est specialis adiutentia Spiritus Sancti, nec in rebus fidem, & mores totius Ecclesiæ concernentibus, errare possit; ergo sicut non potest delegare alterum, ut sit Ecclesiæ Supremum Caput, Pastor, & Doctor, nec Spiritus Sancti adiutentiam in alterum transferre: ita nec potest facultatem formandæ decreta fidei alteri delegare, aut communicare.

Hinc Congregatio S. Inquisitionis, auctoritate sibi à Summo Pontifice commissâ, potest quidem, quos Ecclesiæ hæreticos dixit, sive articulos, sive homines ultimâ sententiâ condemnare: ab ea tamen controversia aliqua fidei decidi non potest, ita, ut transeat in articulum fidei, & qui dissentiant, immediate sint hæretici, ex vi præcisè judicii S. Congregationis. Similiter Congregatio pro Indice librorum prohibitorum habet quidem à Summo Pontifice auctoritatem prædicam interdicendi libros, non autem illos condemnandi, nisi contineant doctrinam

Strinam jam ab Ecclesia proscriptam. Quo casu Congregatio non facit, quod aliqua propositio, aut Liber sit hæreticus, sed tantum præstat, quod Liber, qui aliunde erat hæreticus, pro tali ab omnibus cognoscatur, & vitetur. Hæc enim est differentia inter Librum interdicere, & condemnare, loquendo de condemnatione infallibili: quod hæc, ut dixi, fundatur in Privilegio infallibilitatis, ita Summi Pontificis proprii, ut illud alteri prorsus communicare non possit; secus verò de potestate, vel auctoritate interditorum. Videri potest Dominic. à SS. Trinitate *Biblioth. Theolog. lib. 3. sect. 6. cap. 14.* rem hanc abundè pertractans.

XIII. Jam ad auctoritatem Rotæ Romanæ fiat transitus. Per Rotæ Romanæ auditorium intelligitur toto Orbe celeberrimum, ac notum Tribunal, seu Collegium, quod Romæ ex duodecim diversarum Nationum, ac Provinciarum Auditoribus, juxta Bullam Sixti IV., pro dicendo jure, & iustitia administranda quibuscumque Personis ad Sedem Apostolicam undique confluentibus, coalescit. Olim enim istum cûsus Summus Pontifex in Capella audiebat, adhibitis tamen in earum expeditionibus Jurisperitis, qui à loco audientiæ dicti fuerunt Capellani, vel etiam simpliciter, & absolute Auditores, quod ad audiendum, & referendum dumtaxat essent deputati, ac deinde secundum eorum relationem Summus Pontifex respondebat. Hinc emanaverunt decretales epistolæ, & magna Juris Canonici pars. Gravioribus postea negotiis haud permittentibus, ut Summi Pontifices omnes causas per se ipsos audirent, aut etiam relatas cognoscerent, ac terminare possent, cesserunt deinceps plenum, ac definitivam illarum discussionem præfatis Capellanis, & Auditoribus committere, qui jam communi vocabulo *Auditores Rotæ* dicuntur; quia in orbem sedentes controversias ad ipsos delatas rotant, discutiunt,

& decidunt. Ità ex Gregorio Tholosano *lib. 15. syntagm. Juris univ. cap. 41.* Modò, quantæ sint auctoritatis in Theologica probatione hujus Tribunalis decisiones, quærimus ad rem nostram.

XIV. Dico septimò. Sacræ Rotæ decisiones non excedere ex se terminos probabilitatis. Probatur primò, quia hæc solùm sunt doctrinales, ut ex communi sententia docet Nicolaus Garfias *in præfat. ad tract. de Beneficiis*, idèque non sunt necessaria, nec infallibiles in jure dicendo, neque constituunt jus, nisi quoad partes, inter quas judicatur. Unde Cardinalis Alexander, qui fuit Auditor Rotæ *decisiones* (inquit) *nostra non sunt jura, & idè possunt reprobari.* Et Barbosa *in cap. 1. de litis contestatione* asserit, communem opinionem esse majoris auctoritatis, quàm sit Rota, contra Imolam, contrarium asserentem. Secundò, quia hujusmodi decisiones quandoque inveniuntur oppositæ, & contrariæ, vel pro diversitate Auditorum Sacram Rotam componentium successivè, & diversas sententias à præcessoribus tenentium; Vel etiam, quia iidem, ceteroquin sapientes, & docti, facti tamen in dies sapientiores, ac majori adhibita diligentia doctiores, primam in melius sæpe mutant sententiam.

Nunquam tamen propterea contentendæ sunt, imò multi semper faciendæ hujusmodi Rotæ decisiones, cùm exeant magnà semper præhabita causæ ventilatione, & discussione, adhibitis etiam, ubi opus est, viris omni scientiarum genere clarissimis. Unde in eo saltem, in quo declaratio, aut decisio fieri debet, esto infallibilis non habeatur, haberi tamen debet per modum Juris, ac legis directivæ ad aliquos controversiæ in simili materia definitionem; & in probationem potest adduci, ut medium magis, vel minus probabile.

XV. Tandem de communi Juris Canonici Doctorum auctoritate agendum est. Hi enim ex Jure Canonico, ut ex

fonte, multas conclusiones intulerunt, illud commentariis, & notis ad perfectam intelligentiam illustrarunt. Et quidem in his, quæ ad fidem pertinent, vel etiam ad mores, quatenus vel ratio naturalis, vel Lex Evangelica de huiusmodi præscribit, Jurisconsultorum auctoritas parum, & ferè nihil Theologo conferre potest. In aliis tamen nemini dubium est, quin professe valeat; maxime quoad confessionem, ministrationem Sacramentorum, eorum ritus, circumstantias loci, temporis, modi; hæc enim per Sacros Canones explicatius traduntur. Sicut etiam de moribus Ecclesiæ, & aliis legibus, de poenis contra transgressores earum, de concernentibus Episcopos, Archidiaconos, Primicerios, Episcoporum Vicarios, Sedis Apostolicæ Legatos &c.

XVI. Dico ergo ultimò, Concordem omnium Juristarum, seu Canonistarum sententiam in Legum Ecclesiasticarum interpretatione, aded firmum præbere argumentum, ut illi refragari temerarium sit. Ità Canus lib. 8. cap. 7. concl. 3. Et probatur primò, quia doctissimis quibusque in arte sua fidem habere opus est. Secundò, quia cum Ecclesiæ Judices, & Ministri concordem omnium Canonistarum sententiam amplectuntur, & Ecclesia talem usum approbet, videtur quoque eorum intelligentiam approbare. Tertio, quia alienum à conjectura non est, Christum Dominum Juris huius Peritis quodammodo etiam adesse in legum Ecclesiasticarum interpretatione, ne omnes errant. Cum enim Sacri Canones, iustigante Spiritu Sancto, ad Ecclesiæ sint utilitatem editi, ut Damasus Papa definit, consentaneum est, ut Ecclesia, cui Canones illi sunt necessarii, quibus in religione, & moribus contineatur, Interpreteres sanos à Deo receperit. Quid enim prodesse leges mortuæ, nisi Respublica vivos Interpretes haberet, qui rectum earum sensum assequerentur?

In iis verd, in quibus non omnes

concordes sunt, quinam, ut magistri probabiliores, præferendi sint, dicam; cæteris paribus, majori in pretio videri habendos esse illos, qui Ecclesiastica aliquà dignitate insigniti fuere; ut sunt Innocentius IV., Guido Grassus, seu Guido Papa, qui Clemens IV., alique Summi Pontifices. Hos excipiunt à Cardinalibus Hostiensis, Cameracensis, Turrecremata, Cusanus, Jacobatius, ac similes. Ex Archiepiscopis Panormitanus, seu Nicolaus de Tudeschis. Ex Episcopis Durantes, qui fuit Episcopus Mimatensis. Quisquis enim prudens existimabit, per se loquendo, in iis, quæ ad Ecclesiasticos Canones spectant, obperitiam majorem, & experientiam, plus deferendum esse iis, qui in dignitate Ecclesiastica constituti fuerunt. Eadem ratione plus deferendum esse Clericis per se, quàm secularibus, & maxime quoad praxim; plus etiam Canonistis, quàm Theologis purè speculativis. Omnibus tamen præferendos conferem illos, qui simul Canonistæ, & Theologi fuerunt, ut à Cardinalibus Hostiensis, Turrecremata, Cusanus, & alii.

DUBIUM X.

Locus à rationis naturalis, & scientiarum naturalium, & Philosophorum auctoritate.

§. I.

Resolutio prima partis.

Locus iste (ait Canus lib. 9. c. 1.) *quamquam non est Theologia proprius, sed alienus, magnus tamen est, & cum ab scholasticis reliquis, tam à D. Thoma familia excultus uberimè.*

Principio autem in hujus loci tractatione duos errores contrarios fuge debemus. Unum eorum, qui nimium rationi naturali tribuentes, ab ea semper sua ducunt argumenta, ut Scriptura-

pturam Sanctam, & Sanctos Patres ne legisse quidem videantur. Alterum eorum, qui solis Sacrarum Litterarum testimonio, aut interdum etiam Scriptorum veterum, omnia definiunt, ab argumentis naturæ haud aliter abhorrentes, quam si essent Theologiæ adversa, & inimica. De his diximus *sup. qu. 1. dub. 2. & 3.*, ubi antiquitatem, & utilitatem Theologiæ Scholasticæ demonstrantes, ad usus Theologicos utilem esse rationem naturalem, si certis limitibus contineatur, ostendimus. Ne igitur eadem repetamus, ad ibi dicta tyronem remittimus. In præfens ergo solùm examinabimus, quanti pro argumento Theologico ratio naturalis facienda sit.

Suppono ut certum, naturæ argumentationes alias esse certas, incertas alias. Certæ sunt, quas dialectici *demonstrationes* vocant, hoc est, quæ ex perspicuis, & exploratis principiis aliquid certò, ac evidenter coniciunt. Incertæ verò, quæ licet probabiles sint, nullam tamen habent suadendi necessitatem.

II. Dico. Estò aliquando ex ratione naturali conjuncta cum fide certum Theologus sumere possit argumentum, plerumque tamen argumentum ex ratione naturali desumptum, Theologo infirmum est. Hic tamen non inficior, rationem naturalem firmum posse præbere argumentum ad probandum de Deo aliqua naturali lumine cognoscibilia; ut enim optimè observat Magister Canus *lib. 9. c. 8.* firmum argumentum est illud, quod *act. 17.* inducitur à Divo Paulo: In Deo vivimus, movemur, & sumus: ergo Deus non longè est ab unoquoque nostrum. Firmum etiam est illud, quo ad probandam in Deo scientiam, & providentiam *Psal. 93.* dixit David: *Qui plantavit aurem, non audit? aut qui finxit oculum, non considerat?* ac si dicat; Deus plantavit aurem: ergo audit; finxit oculum: ergo considerat. Et Apostolus *Roman. 1.* cum rationes à natura profectas manifestas esse dixisset,

tunc demùm ad Deum Auctorem eas revocavit. Quod notum est Dei (inquit) manifestum est illis, idèst Deus illis manifestavit. At quomodo? Num per Angelos? Num per Prophetas? Num per Apostolos? Minime id quidem. Sed *invisibilia ipsius* (ait) *& creatura mundi, per ea, quæ facta sunt, intellectus conspiciuntur, sempiterna quoque ejus virtus, & divinitas, ità, ut sint inexcusabiles, quia cum cognovissent Deum, non sicut Deum glorificaverunt, aut gratias egerunt.* Ex creaturis ergo naturaliter cognitis certum sumitur argumentum ad probandum Deum esse, ac sempiternam habere virtutem, nec non divinitatem, ità, ut inexcusabilis sit, qui cum cùm sic cognoverit, ut Deum non glorificat. Hinc si Philosophi genjiles circa ea, quæ de Deo ratione naturali investigabilia sunt, erraverunt, id non insufficientiæ rationis naturalis, sed eorum vitio, ac menti depravata tribuendum est. His pro declaratione suppositis.

Prima pars conclusionis probatur in discursu, cujus altera præmissa est revelata, altera naturaliter evidens. Talis enim discursus verè, & propriè est demonstratio Theologica: id enim docet D. Thom. *1. p. quæst. 1. art. 8. ad 2.* dicens: *Utitur tamen S. Doctrina etiam ratione humanà, non quidem ad probandum fidem (quia per hoc tolleretur meritum fidei) sed ad manifestandum aliqua alia, quæ trahuntur in hac doctrina.* Et *2. contragent. c. 4.* dicit, quòd Theologiæ *quasi principali Philosophia humana deservit: & idèst interdum ex principiis Philosophia humana sapientia divina procedit.* Rursus: quia talis discursus, & illata per illum conclusio ad nullam aliam pertinet disciplinam. Tertiò, quia conclusio deducta ex una præmissa de fide, & altera naturaliter evidente semper est virtualiter revelata; ergo semper est verè, & propriè Conclusio Theologica. Antecedens probatur in hoc discursu: omnis homo est redemptus à Christo;

sto: Petrus est homo: ergo Petrus est redemptus à Christo; in quo hæc conclusio, cum virtualiter contineatur in ista revalata, *omnis homo est redemptus à Christo*, dicitur virtualiter revelata.

Secunda verò pars probatur. Nam, exceptis paucis principiis evidentibus, scientiæ naturales probabilia tantum docent; sed propositiones probabiles, etiamsi conjungantur cum propositione divinitus revelata, non possunt assensum certum parere (qui solus Theologicus est) sed tantum probabilem; ergo &c. Min. videtur certa: talis enim est assensus conclusionis, qualis est connexio medii termini cum extremis propositionum; sed in discursu habente unam aliquam præmissam probabilem tantum, & alteram revelatam, earum extrema solum probabiliter, & opinativè conjunguntur cum medio termino; ergo non potest concludi, nisi conclusio probabiliter certa: quia conclusio sequitur debiliorem partem, & bonum ex integra causa, malum verò ex quocumque defectu.

Major verò principalis suadetur ex tanta in Philosophicis opinionum, imò & systematum varietate, quæ fit, ut scientiarum naturalium effata, promajori parte, sint tantum probabilia, & opinabilia; quod discurrendo per singulas scientias naturales ostendit Dominicus à SS. Trinitate *Biblioth. Theologica lib. 2. sect. 5. cap. 9.* Inter Philosophos enim modò sunt, qui Platonis placita sequuntur, alii, qui adherent Democrito circa atomorum positionem, & Aristotelem à scholis exulare totis nisibus conantur. Horum alii Cartesium laudant, alii Gassendum, ad fydera extollunt, gloriantes, se suis atomis de rebus naturalibus melius philosophari. Alii sunt adherentes Chymicis, qui se solos veros Philosophos venditant, veraque rerum principia ex rerum dissolutione se invenisse existimant. Inter Peripateticos etiam quanta scholarum, ac placitorum diversitas! adeò, ut verum esse

experimento comprobemus dictum *Eccelesiasticus cap. 3. v. 11.* Deus mundum tradidit disputationi eorum, ut non inveniat homo opus, quod operatus est Deus ab initio usque ad finem. Hinc discursus iste *omnis homo habet tantum unam formam substantialem*; Christus est homo; ergo Christus habet tantum unam formam substantialem est merè opinativus, nec verè Theologicus: quia prima præmissa naturalis est merè probabilis, cum Scotus opinetur oppositum.

Objectiones, quæ contra hunc locum facere possent, ex parte à nobis propositæ sunt, & solutæ *supra qu. 1. dubio 2. & 3.*, ex parte videri possunt expugnatae à Magist. Cano *lib. 9. c. 9.*

§. II.

Locus ab auctoritate Philosophorum.

III. **Q**uanti auctoritas Philosophorum à Theologo faciendæ sit, ex dictis §. præcedenti apparet. Si namque naturalis ratio, & scientiæ naturales locus Theologiæ extraneus sunt, nec ipsi firmiter per se præbere possunt argumentum; multò magis hanc fortientur conditionem talium scientiarum Professores. Quare ad rem hanc D. Th. opusc. 10. *mibi* [inquit] *videtur tutius esse, ut hoc, qua Philosophi communes senserunt, & vestra fidei non repugnant, neque sic esse asserenda, ut dogmata fidei... neque sic esse neganda, tanquam fidei contraria.*

Quomodo autem in rebus fidei Philosophis fidere possemus, quos gravissimis erroribus scimus fuisse implicatos, ut ostendit S. Augustinus *epistol. 56. modò 118. ad Drosorum*; qui insuper ingenuè confessi sunt, se probabiliter tantum fuisse philosophatos? Democritus, & Empedocles nihil verè à nobis sciri, testati sunt. Socrates, se tantum ajebar scire, quod nihil sciret. Imò ne id quidem sciri posse, docuit Arcehilas. Anaxago-

tas cum suis putat, omnem, quam vocamus scientiam, puram esse opinionem. Et Plato sub nomine Socratis determinatum, ac certum circa Philosophica eifata suspensum assensum, iudebat. Quia in re libet modum excefferint, omnem prorsus scientiam de medio tolentes, nos tamen docuerunt, quantam eorum dictis tribuere debeamus auctoritatem. Imò ipsemet Aristoteles, cæteroquin contra præfatos Philosophos acerrimus scientiarum defensor, sæpe etiam fatetur, se probabiliter duntaxat philosophari, ut 3. *Phys. text. 52.*, & *Physic. text. 70.*, lib. 2. de *Cela text. 17.* & 50. Et nullam, quæ sit vera, & rigorosa demonstratio, in omnibus libris ejus reperiri, scribit Possevinus lib. 13. *Bibliotheca selecta c. 10.* Et licet aliquæ asserentur, non concluderent, doctrinam Aristotelis simpliciter esse scientificam. Dari ergo scientiam, certum esse debet; at dari scientiam, rarissimum.

IV. Neque tamen quis putet, hoc discursu me tendere ad omnem Philosophis auctoritatem eripiendam. Fallitur enim. Imò si quid habent boni, ac veri, ab illis ut iniustis possessoribus tanquam nostrum repetendum est, & in usum nostrum vindicandum. Hoc enim monet nos Augustinus lib. 2. de *Doctr. Christ. cap. 40.* Philosophi autem [inquit] qui vocantur, se quæ fortè vera, & fidei nostra accomodata dixerunt, maxime Platonici, non solum formidanda non sunt, sed ab eis etiam tanquam iniustis possessoribus in usum nostrum vindicanda. Sicut enim Ægyptii non solum idola habebant, & vena gravia, quæ populum Israël detestarentur, & fugeret, sed etiam vasa, atque ornamenta de auro, & argento, & vestem, quæ illa populus exiens de Ægypto, sibi potius tanquam ad usum meliorem clanculo vindicavit, non auctoritate propriâ, sed præcepto Dei... sic doctrinæ omnes gentilium, non solum simulatas, & superstitiosas figmenta, gravisque sævina supervacanei laboris habent, quæ unusquisque nostrum duc-

Christo de societate gentilium exiens debet abominari, atque devitare: sed etiam liberales disciplinas usui veritatis aptiores, & quadam morum præcepta utilissima continent, deque ipso uno Deo colendo nonnulla vera inveniuntur apud eos: quod eorum tanquam aurum, & argentum, quod non ipsi instituerunt, sed de quibusdam quasi metallis divine providentiæ, quæ ubique infusa est, eruerunt, & quo perverit, atque injuriose ad obsequia demonum abutuntur, cum ab eorum misera societate sese animo separat, debet ab eis acceptare Christianus ad usum justum prædicandi Evangelii. Vestem quoque illorum, idest bonitum quædam instituta, sed tamen accommodata humane societati, quæ in hac vita carere non possumus, accipere, atque habere licuerit, in usum convertenda Christianis: Nam quid aliud fecerunt multi boni fideles nostri? Nonne adspiciunt, quanto auro, & argento, & veste suffarciuntur exierit de Ægypto Cyprianus doctor suavissimus, & martyr beatissimus? Quanto Lactantius, quanto Victorinus, Optatus, Hilarius, ut de vivis taceam; quanto innumera-biles Græci? Quod prior ipse fidelissimus Dei famulus Moyses fecerat, de quo scriptum est, quod eruditus fuerit omni sapientiâ Ægyptiorum. Hucusque acutè, & eleganter S. Augustinus.

Insuper Philosophi græciæ, si quid rectè scripserunt, hoc à Moysè, & Prophetis hauserunt, ideoque dum ea, quæ nostra sunt, venditabant tamquam sua, vocantur fures à Clemente Alexandrino lib. 5. *Stromat. pag. 550.* Pythagoræ non solum fuisse discipulum cujusdam Nazarati, quem aliqui putant fuisse Ezechielem, scribit idem Clemens lib. 1. *Stromat. pag. 304.* Sed ex Moysè ipsum, & qui ab eo sunt cognominati, multa summatos esse, testatur lib. 5. *pag. 560.* Imò Divus Ambrosius, Pythagoram censet genere fuisse Hebræum. Certè fuisse circumcisum tradit Clemens lib. 1. *pag. 302.* De Aristotele Clearchus peripateticus testatur, se nosse quemdam Judæum, cum

eum quo versatus est Aristoteles. Ità Clemens *lib. 1. pag. 304.*, & Iosephus *lib. 1. cour. Apionem*. Platonem verò non solum à Pytagora, sed à nostris etiam doctrinam accepisse, asserunt Clemens *Admonit. ad gentes pag. 46.*, ex Moyse *lib. 5. Strom. pag. 560.*, August. *lib. 2. de Doctr. Christ. cap. 28.*, & *lib. 8. de Civit. Dei c. 11.*, quamvis concludat, Platonem nec Jeremiam audire, nec libros sacros legere potuisse; contendit tamen multa ab hebræis hausisse: quod Ambrosius multis argumentis suadet; & Plato ipse in Timæo ingenuè fatetur. Cum ergo, inquit Canus *lib. 10. cap. 6.*, ea, quæ à Philosophis rectè, & sapienter dicta sunt, nostris non disputationibus inseruerimus, repetemus nostra, non aliena mutuabimur.

V. Sobriè tamen Philosophorum dicta in quaestiones Theologicas sunt transferenda, & ex necessitate potius, quam voluntate: ut si nobis opponantur, possimus de iis judicare, & eos convincere; quâ ratione dicit Hieronymus in *cap. 1. Daniel. relatus diss. 37. c. Qui de mensa*, tres Pueros sapientiam Babyloniorum discere: non ut sequantur, sed ut convincant: quomodo, si quispiam adversus Mathematicos velit scribere imperitus mathematicis, risui patet: & adversus Philosophos disputans, si ignoret dogmata Philosophorum.

Eorum etiam auctoritatibus uti possumus, ut eos (ut ajunt) *ad hominem* convincamus, & eorum principia in causam nostram vertamus. Sic Divus Paulus *ad. 17. v. 28.* Arati Poetæ dicto usus est ad probandum, Deum, nedum nobis esse intimè conjunctum tanquam omnium opificem, sed insuper tanquam nostrum parentem: & hoc, quia Apostolus non fidelibus loquebatur, sed Ethnicis, & quidem literatis, apud quos suorum auctorum testimonia valere debebant. Quod exemplum non favet Concionatori, aut Theologo, si fideles alloquens prophandictum usurparet.

Dicta etiam Philosophorum usurpanda sunt, ut veritas Christiana etiam testimoniis adversariorum congruere appareat. Sic Magos syderum adoratores per sydus ad sui adorationem Christus traxit. Hoc enim ait Chrysostomus *homil. 6. in Matth. Ad majorem Dei gloriam pertinebat, si virtus ejus, etiam inimicorum testimonia panderetur: & si ipsi quoque gentilitatis magistri consonam proferrent de veri Dei potestate sententiam*. Gentilium tamen testimonium servit quidem ad eorum falsitates evidentius improbandas, cum non solum à nobis, sed ab ipsismet, velint, nolint, ut mendacia improben- tur, non tamen ad auctoritatem eorum amplectendam, ut ait D. Augustinus *lib. 13. contra Faustum cap. 15.* Sybilla porro, vel Sybilla, & Orpheus, & nescio quis Hermes, & si qui alii vates, vel Theologi, vel Sapientes, vel Philosophi gentium de Filio Dei, aut de Patre Deo vera pradixisse, seu dixisse, perhibentur: valet quidem aliquid ad paganorum veritatem revincendam, non tamen ad illorum auctoritatem amplectendam, eum illum Deum nos colere, ostendimus, de quo nec illi tacere potuerunt. Cæterum si dicta Philosophorum nullo modo juvent Catholicam Veritatem, nec revincant paganorum falsitatem, nec fidem impugnent, eorum studio vacare vero Theologo supervacaneum est; illudque reprehendit D. Augustinus *epist. 56. nunc 118. in Dioscoro*, qui obstrepentibus undique Arianis, Eunomianis, Macedonianis, Cataphrygibus, Donatistis, Manichæis, Anaximenis, Anaxagoræ, aliorumque Philosophorum studio vacabat. Vide, inquit, atque ausculta, utrum aliquis adversus nos de Anaximene, & Anaxagora proferat aliquid: quando jam ne ipsorum quidem multò recentiorum, multamque loquacium Stoicorum, aut Epicureorum cineres calcant, unde aliqua contra fidem Christianam scintilla excitetur; sed circuli, atque conventiculi partim fugacia, partim etiam gaudæliæ promissa, vel Donatistarum,

tum, vel Maximianensium, vel Manicheorum, vel etiam ad quorum greges, turbamque venturus es, Arianorum, Eunomianorum, Macedonianorum, Cataphrygarum, ceterarumque pestium innumerabiliter perstrepat: quorum omnium errores, si cognoscere piget, quid nobis est propter defensionem Christiana Religionis querere, quid senseris Anaximenes, & olim sopitas lites inani curiositate recogere, cum quorundam etiam haeticorum, qui nomine Christiano gloriari voluerunt, ut Marcionistarum, & Sabellianorum, multorumque praeter, jam defensiones, quaestionesque flectantur? Num huiusmodi increpatio aptari possit nostri aevi Theologis non paucis, qui unice intenti quid senserit Aristoteles, quid Scotus, quid D. Thomas, in rebus merè opinabilibus, ac nullius ponderis, impune perstrepere sinunt, & Christi Ecclesiam lacerare Lutheranos, Calvinistas, Anabaptistas, judica prudens lector. Cum Augustino istis dicam. *Tamen si opus est veritati adversantes praeficere aliquas, & petrafastas habere sententias, de haeticis potius, qui se Christianos vocant, quam de Anaxagora, & Democrito, nobis cogitandum fuit.* Utinam hoc Augustini monitum studiosae juventutis animis altè infigatur! Ad rem ergo veniens.

VI. Dico. Philosophorum omnium una eademque consensio certam fidem facit philosophici dogmatis. Quod enim in aliis artibus valet, ut auctores probati tantum apud eos, qui eam artem sequuntur, auctoritatis habeant, ut inde nisi temerè discendi queat: id cur in Philosophia non valebit, ne habentes quos sequantur in rerum naturalium cognitione, vario Discipuli versentur errore? Si in omni disciplina, & arte oportet addiscentem credere, ut & Aristoteles idem prudenter admonuit, & Theodoretus lib. 1. de curand. Graec. affectionibus magnà exemplorum vi patefecit: in philosophica certè scientia perdiscenda, scientiae ejusdem Professoribus, in eandem

Tom. I.

praesertim sententiam conspirantibus fidem habeamus oportet. Deus ergo in quocumque rerum ordine, ut summus Provisor, dedit leges, & qui leges interpretarentur. Apud Judaeos, ubi crexit quasi divinae scientiae gymnasium, dedit Rabbinos, qui legem interpretarentur; apud Christianos Evangelicae Doctrinae Academies esse voluit, ideòque dedit Apostolos, Evangelistas, Pastores, Doctores; ergo, cum universis gentibus edocendis naturae leges, ac disciplinas ediderit, ejusmodi legum, ac disciplinarum Magistros instituit: quare Clemens Alexandr. lib. 6. Strom., ait, Graecis à Deo Philosophiam velut proprium testamentum esse datam. Si ergo ad ejus summam providentiam pertinuit, non permittere, ut omnes in Lege sive Moisaica, sive Evangelica interpretanda errarent; ità verosimile est, eum non permittere, ut in exponendis naturae legibus, aut in Dei cognitione, aut in vitae, ac morum regula, omnes Magistri, idest Philosophi hallucinantur; quae res fecit, ut juxta Pauli sententiam Roman. 1. Graeci fuerint inexcusabiles: excusabiles autem non essent, si eorum Praeceptores omnes à veritate deviasent.

VII. Dico secundò. Si de unius, vel alterius Philosophi secta sermo sit, quò quisque doctior, & gravior est, eò illius est probabilior auctoritas, & fide dignius testimonium: Nulli tamen Theologus ità se se adjudicare debet, ut ab eo ne latum quidem unquam putet discedendum. Non enim æquum est, ut apud Christi discipulos tantum unius Ethnici auctoritas possit, ut etiam sine ratione vincat. Refert certè in quacumque arte plurimum, unum in illa excellentem auctorem legere, quem sequaris; nullus tamen quamvis eruditus, ut olim Pythagoras suis discipulis, sentiendi sibi, aut dissentiendi auctor futurus est. Nemo illorum fuit, qui non ut homo hallucinaretur. In multis erravit Plato, erravit Aristoteles, erravit eo-

E c

tum

rum quilibet. Præterea quis primatum inter Philosophos habere debeat, quivse proinde ille sit, cui tutius adhaerere debeas, adhuc incertum est. Augustinus, ceterique veteres Platoni detulere multum. D. Thomas summum, & cum eo universa Theologorum schola, putat Aristotelem. Nullos esse Christianæ Theologiæ magis concordēs, quàm Platonicos, putat Augustinus. Plato siquidem fuit ex Hebræis Philosophus, ut supra dictum est. Imò verò, inquit D. Tho., Peripateticorum doctrina Christiano dogmati consentit plurimum. Clemens enim Alexandr. *lib. 5. Stromat. pag. 595.* refert, Aristobolum multis libris probasse Philosophiam Peripateticam ex lege Mosaica, & aliis dependisse Prophetiis.

Verùm D. Thomæ sententia (esto à recentioribus quibusdam impetita) omnium penè gentium multorum seculorum usu probata est. Platonem enim jam à multis annis vix in angulis homines otiosi legunt. Aristotelem verò magno consensu Orbis Academiæ resonant per antonomasiam Philosophum, hoc est inter Philosophos Principem. Jure igitur illum amplectimur, cujus de laude omnium est fama consentiens. Divo etiam Thomæ in hoc cum omnibus ferè scholasticis adhæremus: in illis tamen, in quibus non discordat à Religione Christiana: sicut nec improbamus Platonis Philosophiam, quando fidei dissonantia non docet; magis tamen Aristotelem sequimur, tam quia de naturalibus melius differit, tum quia modus ejus philosophandi melius servit explicandis Fidei nostræ Mysteriis.

VIII. At dicēs, Aristotelem his solis novissimis, ac miseris seculis Theologos adoptasse; Platonem verò melioribus seculis principem locum obtinuisse: cum Patres priorum seculorum Platonicus fuerint, non Peripatetici.

Respondeo, falli sic opponentem. Refert enim Eusebius *lib. 7. hist. cap.*

32., Diocletiano imperante, rogantibus Alexandrinis, ab Anatolio egregio Philosopho institutum fuisse in ea urbe celeberrimam Peripateticam Academiam ad normam Platonicæ, quæ Athenis florebat. Tunc autem ibi, ac eo seculo viri Apostolici vigeabant plurimum; non ergo omnes erant Platonicus, sed alii Peripatetici. Sed ut ut res sit, certum est, ex quo Theologi etiam philosophari cœperunt, atque Philosophiam in famulatum Theologiæ advocare, meliorem, & aptiorem, si-deique obediētiorem invenerunt Peripateticum philosophandi modum, quàm Platonicum, aliove, ut Cartesianum, & similes.

§. III.

Locus à Juris Civilis auctoritate.

IX. **J**uris Civilis facultatem in multis viro Theologo commodam esse, certum judico. Ei enim, ut vidimus, Canonica scientia est necessaria; sed huic peritia legum etiam Civilium aded conjuncta, & colligata est, ut vix altera ab altera possit separari; ergo à Theologo, cui Jus Pontificium familiare esse debet, non erit Juris Civilis cognitio aliena. Hinc S. Augustinus non improbat, si terrent Imperii leges in suum adiutorium hæretici assumant. Multò ergo magis probandus erit Theologus, si ad hæreticos undequaque vincendos, adversus eos legum etiam Civilium auctoritatem adiciat. Quare S. Augustinus contra Donatistas, qui nolebant legibus imperialibus corrigi, scripsit inter alia librum ad Bonifacium, seu *epist. 185.* ubi *cap. 7.* exemplo Pauli ostendit, ad tuendam Ecclesiam, bonum esse auxilium petere ab Imperatore; & prius laudaverat Theodosii legem hæreticis multam decem librarum auri statuentem.

Nedum autem ad hæreticos revincendos, sed & ad fidelium animas dirigendas Juris Civilis cognitio necessaria

ria est. Quomodo enim Theologus si-
ve confessiones excipiens, siue aliun-
de consultus satisfacere poterit ca-
sibus, & quæstionibus de Justitia &
Jure, de pactis, de stipulationibus, æ-
terisque contrahibus, de rerum domi-
nio, de præscriptione, donationibus,
testibus, aliisque similibus, nisi ea,
quæ in talibus rebus à viris in utro-
que jure clarissimis dicta sunt, ali-
qualiter noverit? esto enim justum in-
ter & injustum dignoscere, Philoso-
phorum, ac D. Thomæ libris Theo-
logus adjutus possit: at id solum
faciet in genere, in specie autem, &
in praxi sine juris aliqua peritia non
faciet.

X. Dico ergo. Argumentum, quod
à jure Civili ducitur, quamvis nec
certum, nec exploratum sit, probabi-
lissimum tamen est, maxime illud,
quod à legibus Christianæ Reipublicæ
usu probatis Theologus accipit. Ità
„Canus lib. 10. cap. 9. dicens, non
„enim sine divino nutu hujusmodi le-
„ges Romanis esse datas, credendum
„est. Quin divinitus per ora Princi-
„pum promulgatas fuisse Joann. VIII.
„prædicat: & Augustinus inquit,
„humana jura per Imperatores, ac
„Rectores seculi Deum humano generi
„distribuisse. Hæc Canus. Hinc Sa-
lomon Prov. 16. v. 10. *divinatio, in-
„errabit os ejus. Ad Dei ergo præ-
„curatorem pertinet, ut numine quodam
Legum latore afflatur, & quoad rei-
publicæ moderationem ea scita præ-
„scriberent, quæ essent justa, atque
legitima. Quamobrem si Theologus ex
illis argumentumumat, nihil abhor-
rebit à professionis suæ instituto, & si
non certò, probabiliter argumentabi-
tur.*

Hic tamen de Jure Civili loquor,
non de in tali jure peritis, & inter-
pretibus, maxime recentioribus, qui
ad lites non finiendas, sed protrahen-
das in immensum creverunt. Jus Ci-
vile, ac leges sub eo contentas, quas
in republica bene instituta longus u-

sus probatas reddidit, scitu utiles
Theologo judico. Jus enim Civile à
pluribus Philosophis graviter, pruden-
terque editum fuit, illud etiam non
nisi graves, prudentesque Philosophi
olim interpretabantur. Postea verò
quàm facultas hæc in eorum manu
esse coepit, qui nullà Philosophià,
nullà gravi disciplinà prævidè instructi,
& ornati ad eam accesserunt, soli ca-
ptando lucro intenti, illius potius
splendorem obscurarunt, ac fidei de-
traxerunt. Novitios ergo Jure Consul-
tos in usum Theologiæ non vendico.
Sed id dico, civiles leges, eas maxi-
mè, quæ Christiani populi usu, &
more consecratae sunt, Theologo ad
argumentandum esse utiles.

DUBIUM XI.

Locus ab Historiæ humanæ
auctoritate.

§. I.

Historia humana Theologo utilis.

I. Tanta est viro Theologo Histo-
riæ percurrendæ utilitas, imò
dixerim necessitas, ut rudes omnino
Theologos esse, in quorum lucubra-
tionibus historia muta est, omnes ve-
rè docti consentiant: & insuper ne-
minem in quacumque materia verè e-
ruditum fore, cui res olim gestæ, no-
tæ non sint. Multa enim nobis è the-
sauris suis historia suppeditat, quibus
si careamus, & in Theologia, & in
qualibet alia fermè facultate, inopes
sæpe numero, & indocti reperiemur;
quod sanè indicant hi, qui ex ejus
ignoratione in turpes errores lapsi fue-
runt.

Nec Sacræ solùm, aut Christianæ co-
gnitio, verùm & prophanæ, & ethni-
cæ, Theologo utilis est. S. Augusti-
nus lib. 1. de *Doctr. Christiana* cap. 18.
Ethnicorum etiam historias ad intel-
ligentiam Scripturæ Sacræ plurimum
conferre tradit; ostenditque, ex ea-

E c 1

rum

rum varia intelligentia quosdam circa Scripturas de ætate Christi variè opinatos fuisse, ut Irenæum, qui Christum passum fuisse aiserit quadragenario maiorem, & propè quinquagenarium lib. 2. *advers. hæres. cap. 39. & 40.* nunc cap. 22., Tertullianum, qui lib. *advers. Iudeos* c. 8. scribit, Christum habuisse annum quasi 30., cum pateretur, secutus Clement. Alexandr. lib. 1. *Ærom. pag. 340.*, cui adhæsit Lactantius lib. 4. *divin. Instit. cap. 10.*, cuique favit Augustinus ipse lib. 18. *de Civit. Dei cap. ultimo*, omnesque alii, qui Christum passum fuisse volunt, duobus Geminis Consulibus. Ex ignoratione historiarum ethnicarum Erasmus tenebras, quas Evangelista scribit in morte Christi effusas super universam terram, eas super Judæam tantum fufas intelligit, eò quòd nullus Latinus, aut Græcus Scriptor ejus meminerit: Si namque Historiam Ethnicam legisset, aliter tenebras illas interpretatus fuisset; Phlegon enim Olympiadem supputator egregius, in tertio decimo libro ita scribit: Quarto autem anno 202. Olympiadis magna, & excellens inter omnes, qua ante eam acciderant, defectio solis facta est. Dies horà sextà ita in tenebras nossem versus, ut stella in Cælo visa sint, terræque motus in Bitinia, Nicæa urbis multas ades subverterit. Quod referunt Chronicon Alexandrinum ad ann. Tiberii 19., S. Hieronymus in Chronico, & ante omnes Eusebius in Chronico, ubi annum illum, cum Passione Dominica concurrisse ostendit. Quod præstitit Origenes lib. 2. *contr. Celsum*, dicens de defectu solis sub Tiberio Cæsare, quo imperante Jesum constat Crucifixum, deque magnis ejus temporis motibus Terra scriptis etiam Phlegon in 13., ut opinor, Chronicon. Hoc argumento Lucianus Presbyter Antiochenus, vir moribus, & eruditione præcipuus, cum gentibus de Fide Christiana disputans usus est, ut refert Baron. ad ann. 34. num. 110. *Requirite* [inquit] *in annalibus vestris, & invenietis, temporibus Pilati, Christo*

paciente, fugato sole, interruptum tenebris diem. Et Tertullianus in apologet. c. 21. eodem [inquit] momento dies, medium Orbem signante Sole, subducta est. Deliquim utique putaverum, qui id quoque super Christo prædicatum non scierunt: & tamen cum mundi casum relatum in archivis vestris habetis. Quod etiam fuisse à Sybilla prædictum, testis est Lactantius lib. 4. *Divin. Instit. cap. 19.* Quomodo ergo negasset Erasmus, nullum latinum, aut græcum Scriptorem hujus rei meminisse, si hæc legisset.

Sapienter ergo S. Augustinus lib. 2. de Doctrina Christiana c. 28. laudato. *Quidquid igitur* [inquit] *de ordine temporum transfalorum indicat ea, quæ appellatur historia, plurimum nos adiuvatas ad sanctius libros intelligendos, etiam si præter Ecclesiam pusilli eruditione discatur.* Nam & per Olympiadas, & Consulium nomine multa sæpè quaruntur à nobis, & ignorantia Consulatus, quo natus est Dominus, & quo passus est, nannullos cogit errare, ut putarent quadraginta sex annorum ætate passum esse Dominum Græ., & infra de utilitate autem historia, ut omittam Græcos, quantam noster Ambrosius quæstionem solvit calumniantibus Platonis lectoribus, & dilectoribus, qui dicere ausi sunt, omnes Domini nostri Jesu Christi sententias, quas mirari, & prædicare coguntur, de Platonis libris eum didicisse, quoniam longè ante humanum adventum Domini Platonem fuisse, negari non potest. Nonne memoratus Episcopus considerat à historiâ gentium, cum reperisset, Platonem Jeremiam temporibus profectum fuisse in Ægyptum, ubi Propheta ille tunc erat, probabilius esse ostendit, quòd Plato potiùs nostris litteris per Jeremiam fuerit innotuit, ut illa posset docere, vel scribere, qua jure laudantur?... Ità consideratis temporibus, sit multò credibilius, istos potiùs de litteris nostris habuisse quarumque bonæ, & vera dixerunt, quàm de Platonis Dominum nostrum Jesum Christum, quod dementissimum est, credere.

II. Uti-

II. Utilis etiam valde est ad disputandum contra inimicos Fidei rerum gestarum historia. Tertullianus in *apologetico capite* 5. ex ipsis Romanorum historiis probat, persecutores Christianorum favos, crudeles, pessimos fuisse: *consulite* [inquit] *commentarios vestros. Illic reperietis primum Neronem in hanc sectam, maximè Romæ orientem, Casariano gladio ferocisse, sed tali dedicatore, damnationis nostræ etiam gloriamur. Qui enim scit illum, intelligere potest, nonnisi grande aliquod bonum à Nerone damnatum. Quasi diceret; hoc ipsum, quod primus Christianæ Religionis damnator fuit Nero, probat, eam esse bonam, ac sanctam: homo impius, ac in sola scelera pronus, nec nisi malum approbans, non damnasset eam, nisi esset bona.*

Pergit Tertullianus, ex eadem historia probando, è contra Principes, qui apud Romanos fuere sapientes, Christianis pepercisse, imò verò eis protrocinium dedisse: *Ceterum de tot exinde Principibus usque ad hodiernum, divinum, humanumque sapientibus edite aliquem debellatorem Christianorum. At nos è contrario edimus protectorem.* Ponitque exemplum in M. Aurelio, qui ob acceptum precibus Christianorum beneficium, eos omni metu liberavit, eorum delatores damnavit, voluitque, ut omnes palam, liberèque ferrentur, ac disseminarentur ubique, ac si diceret: Viri apud vos sapientes Religionem Christianam probant; ergo bona est: id enim ut bonum probandum est, quod viri sapientes probant.

Tertiò exinde probat, leges, quas contra Christianos Imperatores tulere, esse impias, quia à viris impiis latas. *Quales ergo leges istæ, quas adversus nos soli exercent impii, iniusti, turpes, truces, vani, dementes? Quas Trajanus ex parte frustratus est, vetando inquiri Christianos &c., ac si diceret: si virtus vitio contraria est, boni Imperatores, quales Vespasianus, Trajanus, Hadrianus, Pius, Aelius verus*

sustinere placita Christianorum nequiverissent, si quid in eis turpe, ac noxium comperissent. En quomodo ex ipsis Ethnicorum factis probat Tertullianus veritatem Religionis Christianæ. Quo argumento etiam uti possumus ad probandam contra hæreticos veritatem Religionis Catholicæ, quam soli viri impii, & in moribus pravi persecuti sunt.

Quartò in lib. ad Scapulam cap. 3. multarum rerum gestarum exemplis utitur, ut persuadeat, ob vexatos Christianos, multos Gentilium Præsides tristes exitus habuisse. Quo argumento Tertullianus intendit, Scapulam Africanæ Provinciæ Præsidem à persequendis Christianis detertere, & sic agere potius causam Ethnicorum, qui persequentes destruebantur, quam Christianorum, qui in persecutione ædificabantur: *Parce ergo* [inquit] *tibi, si non nobis. Parce Carthagini, si non tibi.... nec tamen deficiet hac secta; quam tunc magis adificari scias, eum cadi videtur.*

Nec Tertullianus solus. Cyprianus libro de *Idolorum vanitate* Idolorum omnium vanitatem historiarum commemoratione coarguit. Hieronymus lib. 1. *advers. Jovinianum* quot, quàmque varias, etiam phanas, historias in commendationem virginitatis, & castitatis commemorat? Eusebius lib. 1. *hist. cap. 6.*, lib. 2. *cap. 2.*, lib. 3. *cap. 7.*, & alibi ex historiis humanis Judæos, Paganosque confutat. Ergo historia nadem Ecclesiastica, sed Ethnica etiam ad fidei hostes revincendos utilissima est.

§. II.

Historia humana in Theologicis auctoritas.

III. UT historiæ humanæ auctoritatem conciliemus, illud à principio statuentium est, necessarium esse, homines hominibus credere, nisi vita pecudum more degenda sit.

Hanc

Hanc rem (ait Canus lib. 11. cap. 4.) Theodoretus lib. 1. de curandis grae. affect., & Augustinus lib. de fide rerum quæ non videntur, & lib. de utilitate credendi latè prosequuti sunt, ubi cap. 11. S. Augustinus sic arguit. *Quæro enim, si quod nescitur, credendum non est, quomodo seruiant parentibus liberi, eosque mutuâ pietate diligant, quos parentes suos esse non credant: non enim ratione ullo pacto sciri potest: sed interpositâ matris auctoritate de patre creditur, de ipsa verò matre plerumque nec matri, sed obstetricibus, nutricibus, famulis; & concludit, nihil omnino humana societatis incolute remanere, si nihil credere statuamus. Pergit verò ostendens, si credendum est, magis credendum esse sapientibus, & qui sapientiâ caret, non quærere sapientem, nisi sapientem esse credat; quæ consonant cum vulgari Aristotelis esato: in omni facultate, & doctrina oportere addiscentes credere; fides enim præcedit scientiam, scientia autem fidem subsequitur. Unde qui fidem ex humanis animis evellere conaretur, nedum stultus esset, sed omni intelligentiæ clauderet viam; quid enim cognoscere possemus, si ea, quæ viderunt alii, negaremus esse, quia ipsi non videmus? Videndum est, quomodo sit credendum maximè à Theologo Historicis referentibus, & quantè auctoritatis sit eorum dictum.*

IV. Dico primò. Nullus Historicus, præter Auctores sacros, idoneus est per se ad faciendam certam in Theologicis fidem. Assertio hæc cuique est manifesta, omnis enim historicus, præter Auctores sacros, homo est, loquitur ut homo, & spiritu proprio, seu humano; ergo potest falli, & fallere. Insuper nec omnia, quæ scribit, propriis oculis vidit, sed ex aliorum dicto, à quibus facillè poterat decipi, multa accepit. Quare non procul à vero Flavius Vopiscus in Aureliano ait, neminem scriptorum, quantum ad historiam pertinet, non aliquid esse mentium; eique à Julio Tiberiano porre-

âà manu responsum fuit, *scribe ut libet, securus quod velis dicas, habiturus mendaciorum comites.*

V. Dico secundò. Historici graves, & fide digni, quales nonnulli sine dubio, & in Ecclesiasticis, & in secularibus fuere, probabile argumentum suppeditant Theologo, cum ad ea, quæ sua sunt corroboranda, tim ad falsas adversariorum opiniones revincendas. Hæc assertio non minùs est explorata. Non enim est hominis benè instituti, & ad vitam humanam rectè compositi, viro gravi rem credibilem asserenti non credere. *Rem credibilem dixi, quoniam quædam interdum ab Historicis, cæteroquin gravissimis (ut fortè à Plinio) referuntur, quæ, cum vix credibilia sint, si ea fuisse negemus, non idèò historiæ auctoritatem lædimus. Uterque igitur, & qui credit etò, levis corde est Ecclesiastici 19. v. 4., & qui nimium tardus est ad credendum, jure reprehenditur. Nam & est qui emittit verbum certum enarrant veritatem: est qui nequit humiliter se, & interiora ejus plena sunt dolo Ecclesiastici c. 19. v. 13. Multò verò magis reprehensione dignus est eo, qui citò credit, ille, qui pertinacià quædam refugit credere, maximè Auctoribus probatis, & gravibus. Si namque in ore duorum, vel trium testium fiat omne verbum Matth. 18. v. 16., & hoc sufficit ad convincendum in judicio reum; cur adversus rem, pluribus testibus, ut olim gestam, comprobata contestantibus, Theologus, vel quisvis alius confurget? Eò vel maximè, quòd testimonia ex vetustate sumta potentiora ad probandum sunt, quia ea sola, ut ait Fabius, criminibus odii, gratiæque vacant. Quare Innocent. I. 10. distina. c. de quibus statuit, quòd si neque in libris canonicis invenias veritatem, Canones Apostolica Sedis intucere. Si nec in illis, ad Catholica Ecclesia historias Catholicas à Doctores Catholicis scriptas manum mitte.*

Hinc non possum non improbare, quo-

quorundam audaciam, ne dicam impudentiam, qui criticam, plusquam par est, profitentes hanc nostram ætate, res, quas esse gestas gravi. simi auctores testati sunt, in dubium vocant, & etiam negant. Quod si idoneas causas, probabilesque redderent, audiendi fortasse essent. Cum verò aut reddant nullas, aut nullius, vel parvi momenti, contemnendi sunt, ut qui communem omnium sensum exuerint, humanorum iudiciorum potissima instrumenta, hoc est, hominum gravium testimonia rejecerint, & historiam, lucem veritatis, neglexerint.

VI. Dico Tertio. Si omnes probati, & graves Historici in eandem rem gestam concurrant; tunc ex horum auctoritate certum ducitur argumentum, ut Theologica dogmata firmam ratione constituantur. Sic Petrum Romanæ fuisse, & collocasse Sedem, & pro Christo martyrio coronatum fuisse, omnes graves historici tradunt, tota credit antiquitas, & ex hoc certò probamus, Romanum Episcopum Petro in Episcopatu, & in Supremi totius Ecclesiæ Pastoris dignitate succedere. Sic Concilium Nicænum tempore Constantini coactum, & à Silvestro I. Ecclesiæ Pontifice comprobatum, historici quique gravissimi prodidere. Ex hoc arguimus certò, Concilium Nicæni statuta certa esse, quia certum est, Synodum Ecclesiæ Generalem, Romano Pontifice probante, errare non posse. Generalem verò fuisse, nos docet historia, quā habemus, ei universitatem Pastorum non defuisse. Plurima ejusmodi sunt, quæ communi historicorum consensione firmata, certa nobis dant argumenta ad Theologicos discursus.

Quis enim, nisi stultus, non modò negare, sed etiam in dubium vertere, quæ omnes asserunt contigisse, audebit? Quid enim stultius, quàm si crocodilos, qui in Nilo sunt, aut alia genera monstruosa belluarum, quæ in mari giguuntur, quæque esse omnes testantur, nulla esse dicamus, quia

nunquam vidimus? Si de medio tollimus id, quod nobis historiarum omnes, & testes graves asserunt, negabimus etiam Indias esse; & qui Mediterranei sunt, nec unquam mare, aut naves viderunt, mare, & naves esse, negare poterunt, dari Leones, Pantheras, Elephantes, ut fabulas deridere. Itā plane hæc omnia sequentur, si quod omnes historici asserunt, ad nos revincendos non sufficiat. Bene ergo scripsit Josephus lib. 1. contra Appionem: *Vera historia indicium est, si de eisdem rebus omnes eadem dicant, atque conscribant.* Et Sanctus Augustinus lib. 1. de moribus Ecclesiæ Catholica c. 29. Si falsum dicatur, quod omnes narrant historiarum, consequetur, inquit, omnium litterarum summa perverasio, & omnium, qui memoria mandati sunt, librorum abolitio, si quod tantæ populorum religione roboratum est, tantā hominum, & temporum consensione firmatum, in hanc dubitationem adducitur, ut ne historia quidem vulgaris fides possit, gravitatemque obtinere.

§. III.

Regula discernendi inter Historicos.

VII. Prima regula sumitur ex hominum honestate, atque integritate, quæ omnino locum habet, cum, quæ narrant historici, ea, vel ipsi viderunt, & se vidisse testantur, vel ab his, qui viderunt, accepisse. Pleraque hujusmodi invenies in *epistolis* Cypriani, Ambrosii, Hieronymi, Augustini, in *libris* quoque hujus de *Civit. Dei*, in *Dialogis* Gregorii, & in omnibus ferè *Dotorum Ecclesiæ scriptis*: in iis enim, quæ isti aut ex visu proprio, aut ex dicto eorum, qui viderunt, viri alioquin integerrimi, & sancti, mendacium aliquod suspicari, grande piaculum est. Quia in te Erasmus, & Heterodoxi recentiores sæpe errarunt; quid enim licentiùs, ac immoderatiùs dici potuit, quàm Hieronymum asserentem Matthæi Evangelium Hebraicum se vidisse, imò illud describendi

co-

copiam habuisse, in hoc virum sanctissimum, ac doctissimum mentiri?

Regula hæc in prophanis quoque historicis locum habet. Quædam enim Julius Cæsar, quædam Svetonius, quædam Cornelius Tacitus, quædam Plutarchus narrant, quæ auctores ipsi partim oculis conspexerunt, partim acceperunt ab his, qui ea præsentibus adspexerant. In hisce verò auctoribus, tametsi pietatem, veraque virtutum officia spectare non licet, licet tamen probitatem quandam, bonitatemque naturæ conjicere. Quidam enim aut veritatis amore inducitur, aut ingenui pudoris verecundiâ, usque adeo à mendacio abhorruerunt, ut jam pudendum fortasse sit, historicos gentium, quosdam veraciores fuisse, quàm nostros; qui sæpe studio partium nimium additi, aut vera ex odio tacuerunt, & tacent, aut ex nimio amore aliqua non vera, & aliquando inepta, & puerilia iis, de quibus scribunt, affingunt. Et hoc, non de prophanis solum, sed etiam de aliquibus sacris historicis dico. *Dolenter* [inquit Canus lib. II. c. 5. non longè à fine) *hoc dico potius, quàm contumeliosè, multò à Lærtio securiùs vitas Philosophorum scriptas, quàm à Christianis vitas Sanctorum; longèque incorruptius, & integriùs Svetonium res Cæsarum exposuisse, quàm exposuerint Catholici, non res dico Imperatorum, sed Martyrum, Virginum, & Confessorum. Quid factum est, ut dum falsis, mendacibus, & pleurumque vanis, ac ineptis præsertim revelationibus, & miraculis, mentes mortalium ad Sanctorum cultum accendere voluerit, nil aliud egerint, quàm ut veris propter falsa adimatur fides, vera æquè, ac falsa ab hæreticis rideantur, & quæ severè ab auctoribus planè veracibus edita sunt, ea etiam revocentur in dubium.*

Nec novum est, nostrisq; solis temporibus ceptum est, veras Sanctorum narrationes fabulis intermixtis contaminari; multa Sanctorum acta ità interpolata reperit Gelasius I., quæ

proinde in Concilio septuaginta Episcoporum reprobavit, atque spuria, vel suspecta à legitimis, & genuinis separavit. Hoc idè monitum volui Lectorem, ut à quorundam falsa imaginatione caveat, qui res Sanctorum præclarè gestas non se putant egregiè exposituuros, nisi eas fidelis revelationibus, ac miraculis adornarint: dumque studio erga sanctum plus æquo abrepti, illum extollere superceteros putant, Ecclesiæ Christi vehementer incommodant, impiis non levem subsannandi occasionem præbent, piis verò lacrymandi.

Hinc secunda regula pro historiæ judicio erit, ut eos historicos reliquos anteferamus, quos ingenii severitati quandam prudentiam adjunxisse, & ad eligendum, & ad judicandum cognoverimus; quos insuper ad scribendum excitatos fuisse amore veritatis, non complacendi, aut adulandi genio. Et hoc locum habet nedum in rebus, quas nec Scriptores viderunt, nec ab iis qui viderant accipere; sed etiam in iis, quas ipsi videre potuerunt, vel dum viverent, contigerunt.

Unde colliges primò, minorem fidem per se sibi meritò conciliare historicos illos, qui stipendia à Principibus, vel aliis accipiunt, ut eorum facta enarrant, vel in eorum obsequio commorantur. Dixi per se, nam esto illa, quæ pertinent ad talem Principem possint esse illis magis nota; prudenter timere possumus, ne potius adulationis, quàm veritatis amore conscripserint. Cautè ergo legendi sunt: & observandum, quomodo se gerant in scribendo. Si enim, quæ aliquis minùs rectè gessit, recenseat latè historicus, omisiss, vel leviter pertractatis illis, quæ honorificè gessit, ac laudabiliter, licet hæc fuerint multa, & insignia, illa verò pauca, & levia: vel viceversa narret solum laudabilia, quamvis pauca, eaquæ extollat ut magna, prætermisiss minùs laudabilibus, quamvis hæc nec pauca fuerint, nec oculata; Hic meritò in suspicionem venit,

ac

ne similitudine, & passione odii, aut amoris, aut adulandi animo potius, quam amore veritatis, conscripserit. Cautè propterea legendi sunt, qui de aliquo errore, vel hæresi suspecti, illius hæresis, vel illius auctorum, historias narrant, diminuti enim esse solent in iis, quæ contra se militant, effusi autem in iis, quæ sibi favent: & plerumque sibi solum favorabilia plùs nimio extollunt, & aliqua falsa comminiscuntur.

Secundò. Minor quoque fides habenda est illis historicis, qui quæcumque à quolibet fermè ad se delata, nullo habitu delectu, in annales suos congerere soliti sunt.

Tertiò. Tandem minorem certitudinem, ac probabilitatem per se habent scribentes illa, quæ suo non contigerunt tempore, nam sic ex fama, audituque multa necesse est ut proferant. Hæc indicavit Card. Baronius ad an. 34. num. 177. his verbis. *Non parum certè interèssè in veritate historica disquiri, auctorum, qui res gestas scripserunt, quo vixerint tempore, cuiusque fuerint eruditionis, atque existimationis, habere rationem: potissimumque, si huiusmodi scriptores rerum perspectarum, ac eorum ætate editarum, pietatem, ac virtutem cum doctrina, & veritate conjunxerint, ut plane digni sint, quibus fides integra adhibeatur: soli sint, quibus ceteri assentiantur: soli denique sint, quibus reliqui qua scripserint, vel scripserint, tanquam ab iis accepta referant.* Licet autem historici, qui scripserunt ea, quæ suo contigerunt tempore, regulariter majorem fidem mereantur; Interdum tamen potest esse veracior historia scripta ab illis, qui postea scripserunt, eò quòd cogi aliquando possunt historici ad reticenda multa, licet publica, vel semipublica, viventibus Principibus, ac aliis, quorum facta præsentia scribuntur. Insuper dum scribunt ea, quæ suo quidem tempore contigerunt, in remotissimis tamen locis acciderunt, idèque fieri potuit, ut mendacissima

Tom. I.

ad eos delata fuerint, quæ detecta, à posterioribus fuerint scriptoribus emendata. Vel tandem quòd qui res præsentis scripserunt, eas, ut supra dicebamus, non ex veritatis amore, sed prout eos animi affectus ferebat, exaraverint.

Tertia regula est. Si cui historico auctoritatem Ecclesia tribuit, hic procul dubio dignus est, cui nos etiam auctoritatem adjungamus. Contra verò, cui Ecclesia derogavit fidem, eò quoque nos merito fidem derogabimus. Porro, cum Gelasius Papa historiam de vitis Antomi, Pauli, Hilarionis, à S. Hieronymo conscriptis, cum omni honore suscepit, & collaudaverit Orosium, & Silvestri Acta, sicut & Eusebii Chronicon non repudiaverit, ea & nos suscipere, nec repudiare debemus; & si quas alias historias reperimus, ab Ecclesia vel collaudatas, vel non repudiatas. E contra verò cum idem Gelasius inter Apocrypha amandaverit Clementis libros octo, Acta Andreae, Philippii, Petri, Thomæ nominibus falsò edita, librum de infantia Salvatoris, alterum de ejus Nativitate, librum Pastoris, Acta Theclæ, & Pauli, aliaque ejusmodi, idè hæc omnia tanquam nullius auctoritatis à Theologo habenda sunt.

VIII. Dices. Gelasius inter Apocrypha rejecit etiam Eusebii historiam, & tamen ex ea Theologus sæpe sumit argumenta.

Respondeo, Eusebii historiam à Gelasio partim approbari, partim improbari; approbatur ob rerum notitiam singularem; improbatur ob Jesu ad Abgarum epistolam ab eo relata, quam ibi Gelasius rejicit, ut Apocrypham; ob nimias Origenis laudes; & ob Ariani dogmatis fuliginem, quæ aliquando historiam suam maculat, & Arianorum patrocinium. Unde Sanctus Hieronymus ep. ad Pammachium, & Oceanum: *Ecclesiasticam* (inquit) *pulchrè Eusebius historiam texuit, sed impietatis Arii apertissimus propugnator est, & epist. ad Ctesiphontem de Euse-*

E f

bio,

bio, quem (inquit) fuisse Arianum nemo est, qui nesciat. Quare cum Synodo VII. actione 6. testimonium Eusebii esset prolatum, Epiphanius respondens, Eusebius (inquit) Pamphili in testimonium ducitur, qui ab omni Ecclesia Catholica noscitur Patronus esse Arii hereses, quemadmodum in omnibus conscriptis suis, expositionibusque continetur &c. Ex hac ergo parte Eusebius jure, ejusque historia improbat, dum ait, Historia Eusebii Pamphili Apocrypha. Ex alia verò eam probaverat dicens, Chronicum Eusebii Cæsariensis, atque ejusdem Historia Ecclesiastica libros, quamvis in primo narrationis sua libro tepuerit (errorem Arianum scilicet ferendo) & postea in laudibus, & excusatione Origenis unum composuerit librum: propter rerum tamē notitiam singularem, qua ad instructionem pertinent, usquequaque non dicimus reuendos. Ejus propterea usus est testimonio Vigilii in constituto. Et Pelagius II. epist. 3. ad Ecliam Aquilejensem, & alios Episcopos

Istria Eusebii historiam impensè commendavit his verbis: Quid namque in Hæresarchis Origene deterius, & quid in Historiographis inveniri Eusebio bonorabilius potest? Et quis nostrum nescit, in libris suis quantum Origenem præconiis Eusebius attollat? sed quia, Sancta Ecclesia suorum fidelium corda benigniùs, quàm verba districtius pensat, nec in hæreticis sensum proprium, testatio Eusebii absolvere potuit: nec rursum Eusebium laudati Origenis culpa damnavit. Ecce quomodo absque ulla contrarietate unus Pontificum Eusebii historiam laudat, quam alter condemnarat. Imò uterque, quæ sana sunt laudat, quæ verò suspecta, uterque damnat. Plura hîc laudatus Canus de historia, ac historicis congerit, Criterium eorum faciens, & semper eruditè. Nos in locis his Theologicis satis, superque Studio sum detinuimus. Qui plura optarit, Canum adeat: Nos interim è vestibulo ad interiora Theologiæ transibimus.

Tomi Primi I. Partis finis.



I N D E X

Eorum, quæ in hoc Primo Tomo **I.** Partis
visa sunt notatu digna.

A

Academia Parisiensis. Vide *Parisienſis*. *Academiæ* auctoritas. pag. **203.**

Adrianus II., quid ſenſerit de Hono-
rio? **180.**

Adrianus VI. an erraverit? **179.**

Agathæ Papæ epiſtola damnat Mo-
notheliſis, inſalubilitatem aſſerit,
eamque ſexta Synodus probat. **165.**

166.

Apoſtoli tempore Paſſionis fidem non
amiſerunt. **134.**, & dato, quodd ami-
ſerint, Eccleſia errare in fide non
potest. **135.**

Arianorum tempore erat Eccleſia. **120.**

Arimineſe Concilium an erraverit? **130.**

Articulus fidei non eſt idem ac dogma
fidei. **11. 32. 33.**

Atreæ propoſitio. **48.**

S. Auguſtinus Romani Pont. inſallibi-
litate non deſtruit. **162. 170. 171.**,
nec Patrum auctoritatem. **195.** in
materia gratiæ multi faciendus. **198.**

B

Baſileenſe Concilium in iis, quæ
ſtatuit contra Papam, quanti ſit
faciendum. **181.**, à quo tempore,
deſierit eſſe legitimum: quomodo
ab Eugenio approbatum? **182. 183.**

S. Baſilius prudenter indulſit ſilentium
de Spir. S. divinitate Macedonianis,
non tamen Honorius de una, vel
duplici operatione in Chriſto Mo-
notheliſis. **141. 142.**

Biblia quomodo à Clemente VIII. c-

mendata.

177. 178.
Boniſacius VIII. ejus Conſtitutio non
fuit à Clemente V. abrogata. **177.**

C

Canonica cum Theologis compara-
ti. **203.** quorum auctoritas, & in
quibus præſerenda ſit? **204. 205.**
Canonicum Jus quibus partibus con-
ſtet? *ibid.* quantæ auctoritatis ſit in
rebus Theologicis? **206. 207.** Can-
oniſtarum ſententia quale argumen-
tum præbeat? **209. 210.**

Canus Melchior laudatur. **93. 111. &c.**

Catholica modò eſt Eccleſia. **126.**

Cenſura propoſitionis ad quem ſpe-
ſet? **48.**

Certitudo, quotuplex? **77.**

Chriſtus Eccleſiæ non deest. **136.**

Celeſtinus III. in materia ſeparationis
conjugum cauſa hæreſis ut Doctores
privatus locutus eſt. **175.**

Concilia. Quid tenendum ſit ut in eis
deſinitum. **32. 33.** Quid ſit Conci-
lium. **126.** Quotuplex. **128.** Ex
quibus conſtare debeat? **127.** Generalia
nec convocata, nec confirmata
à Rom. Pontif. firmum argumen-
tum dare non poſſunt. **128.** nec, et-
ſi convocata, ſi ab eo confirmata,
non ſint. **130.** benè tamen, ſi con-
vocata, & ſimul confirmata ab eo
ſint. **130. 131.** &c. Paſtores omnes
congregati errare non poſſunt. **134.**
135. &c. id non negant Patres. **137.**

neque factis probatur. **138.** &c.
Quid de Concilio Generali per Pa-
pæ Legatos celebrato? **145.** **146.**
Concilia non Generalia à Rom. Pon-
tif. non probata præ ſide certum ar-
gumen-

gumentum non præbent. 143. bend
tamen si probata sint. 144.
Concilia Judaica an erraverint. 136.

137.
Concilio Patres verè Judices sunt. 147.
148. 149.

Concilio auctoritas in quo differat ab
auctorit. Scripturæ? 140. 150. &c.
non lædit Papæ infallibilitatem. 158. 159. 170. 181. 182. &c.

Conclusio Theologica. 9. 78. 79. 80.

Congregationum Decreta quantæ sint
auctoritatis? 207. 208.

Conimbricensis Academia pro Papæ in-
fallibilitate. 185.

Constantinopolitanum III., seu Synodus
VI. an erraverit? 140. an ejus a-
cta fuerint corrupta? *ibi*. Tintius
est, non errasse, nec damnasse Hono-
rium Papam ut Hæreticum. 141.

142.
Constantiensis Concilium circa superio-
ritatem ejus ad Papam exponitur. 143.

119.
S. Cyprianus Rom. Pontificis infallibi-
litati non obstat. 163. 166. 167.
178.

D

D *Amasius* Papa petit fieri Synodum
Generalem ad condemnandum.
Macedonium. 168.

Decretalium libri quale argumentum
præbeant? 206. 207.

Decretum Gratiani quibus auctoritati-
bus consistit, quid *Palea* nomine. 205.
quanti sint faciendæ? 206.

Discretio Theologo non indigna. 26.
27.

Doctrina Sacra homini necessaria. 4.
&c. quid per eam intelligat D. Th.? 6.
purè Theologica, quæ sit? 36. &c.
neciva fider quatuorplex? 40. 41. &c.

Dogma Fidei quid sit? 27. 28. Debet
esse ab Ecclesiæ propositum. *ib.* 29.
30. quibus notis discernatur? 30.
31. an omne dogma Catholicum
sit fidei dogma, & hoc, an sit arti-
culus fidei? 40. &c. dogma non idem
est ac doctrina. 30.

E

E *Celestia*. Eius propositio ad creden-
dum requiritur. 28. nec circulus
viciosus committitur. 29. 30. Eccle-
siæ nomine quid veniat? 31. 32. 112.
116. Romana Ecclesia veritatis ma-
gistra. 34. quid sit Ecclesia? 111.
112. ab ea certum trahi potest ar-
gumentum. 113. hæretici refutan-
tur. 114. 115. nunquam tota defe-
cit. 117. 118. 120. &c. Vera Eccle-
sia monstrari potest. *ib.* & 119. 120.
Arca est, & Ovile. 121. in quo oves
sunt, & hædi. 122. Ecclesia quomo-
do sancta? 122. 123. ad eam perti-
nent peccatores fideles, quomodo? 123. 124. Græca schismatica non est
vera. 125. mortuo Summo Pontifice
adhuc perseverat. 125. est etiam
nunc verè Catholica. 126.

Eleutherius quid egerit circa Montani-
stas? 172.

Eliberitanum Concilium non erravit.
138.

Elia tempore monstrari Ecclesia pote-
rat. 119.

Ephesinum II. Concil. erravit. 132.

Erronea propositio, quæ sit. 43. er-
rori proxima. 44. errorem sapiens?
45.

Errores. Varii errorum gradus. 40. &c.
Eugenius IV. non præfert judicio Pa-
pæ judicium Ecclesiæ. 180.

F

F *Ides* Theologiâ gignitur, nutritur,
defenditur. 8. Non obicuratur Scho-
lasticâ. 25. 26. Fidei dogma quid
sit? 27. &c. Fidei articulus quid sit?
51.

Francfordiensis Synodus erravit erro-
re facti. 142.

G

G *Allianus* Conventus Romano Pon-
tifici asserit infallibilitatem. 119.
162.

Græca

Gelasius Papa quomodo inter Apocrypha rejiciat *Eusebii* historiam? [123.](#)
Græca Ecclesia schismatica non est vera. [125.](#)
S. Gregorius in causa Cœlibatus Subdiaconorum Sicilię non puguat cum Pelagio II. [175. 176.](#)

H

Hæretica propositio, quæ. [42. Hæ.](#) resim sapiens? [44.](#)
Hierosolymitanum Concilium norma aliorum, ex quibus constitit? [127.](#)
Hispalensis Academia pro Papæ infallibilitate. [185.](#)
Historia humana, ejus utilitas. [117.](#)
[118. 119.](#) ejus auctoritas in Theologicis. [120. 121.](#) regulæ discernendi inter historicos. [122. 123.](#)
Homo non deterior brutis, etsi suum finem per se nequeat attingere. [5. 6.](#)
Honorius Papa damnatus, non ut hæreticus. [141. 142.](#) non tamen excusatus. *ibid.* & [174. 180.](#)
Hypostasum trium controversia. [167.](#)

I

Imoia propositio. [47.](#)
Infallibilitas Romani Pont. Vide *Romanus Pontif.* per omnia secula probatur. [155. 166.](#) eam non everunt Pontifices, & Concilia. [178. &c.](#) nec Academix. [185.](#)
Injuriosa propositio. [47.](#)
Innocentius **L.** quomodo petiit Synodum? [169.](#)
Innocentius IV. de forma Sacrament. quid senserit? [176.](#)
Joannes XXII. non asserendo, sed opinando dixit. [174.](#) non contradicit Nicolao IV. de Paupertate FF. Minorum. [175. 177.](#)
Irenæus Rom. Pont. infallibilitatem asserit. [164. 166.](#)
Judaica propositio. [47.](#)
Jus Canonicum. Vide *Canonista*, *Decretum*, *Decretales*.
Jus Civile, an serviat Theologo? [116. 117.](#)

L

L *Ateranense* V., quid senserit de Concilio Basileensi? [183.](#)
S. Leo Papa **L.** quanti factus à Concilio Chalcedonensi. [165.](#) quare petiit illam Synodum? [159.](#)
Leo II. non damnat Honorium ut hæreticum. [180.](#)
Leo X. Concilium Basileense vocat Conciliabulum. [183.](#)
Liberius Papa cur petiit Concilium à Constantio? [158.](#) non subscripsit formulæ hæreticæ. [173.](#)
Loci Theologici, qui, & quot? [93. 94.](#) quomodo ex iis Theologus argumentetur? *ibi. Græ.*
Lovanienfis Academia Papæ infallibilitatem asserit. [184. 185.](#)
Lutherus Patres contemnit. [186.](#)

M

M *Acedonianis* silentium de divinitate Spiritus Sancti prudenter indulgit S. Basilus. [141. 142.](#)
S. Maximus Honorium ab hæresi defendit. [140.](#)
Monothelitis an Honorius **L.** consensit? [140.](#)

N

N *Aturalis* ratio non sufficit homini ad ultimum finem attingendum. [4. 5.](#)
Necessarium. Quotuplex? [3. 4.](#)
Nicæna II. Synodus non erravit. [142.](#)

O

O *Ecumenicum* Concilium quale? [118.](#)
 Certam fidem facit, à Papa tamē confirmatum. [130. 131.](#)

P

P *Agana* propositio. [48.](#)
Paphnutii historia suspecta. [148.](#)
Parisiensis Academia non tota, nec semper

per Papæ infallibilitatem negavit .

183. 184.

Pastores omnes errare non possunt .
116. 117. 132. 134. 135. in Concilio
Judices sunt . 148. 149. 150.

Patres . Eorum concors sententia circa
Scripturam tenenda est . 34. 35. eo-
rum auctoritas à Lutherò depressa .
186. qualiter sentiant S. Augustin. ,
& D. Thomas ? *ibi* . Quæ requiran-
tur ut aliquis sit Ecclesiæ Pater ?
187. Quale argumentum ex Patri-
bus , sive divisim , sive collectivè ac-
ceptis sumere possit Theologus ? 188.
189. 190. 191. 192. 193. 194. sunt tes-
tes Fidei , & Doctrinæ Ecclesiæ . 196.
197. eorum scripta , omnia saltem , non
cadunt sub dubio . 197. pluris au-
ditoritatis ii sunt , qui de aliquo dog-
mate ex professo scripsere . 198.

Paulus IV. Romanos Pontifices non
declarat fallibiles . 178.

Pelagius II. quomodo excuset Vigi-
lium ? 163. non pugnat cum Grego-
rio I . 175.

S. Petrus. Quomodo supèr eum ædificat-
ur Ecclesia præ cæteris Apostolis ?
156. 157. quomodo Personam Eccle-
siæ gerebat ? *ibid.* à D. Paulo repre-
hensus . 160. 161. vitio conversatio-
nis , non dogmatis . *ibid.* , & 162. 163.
primum hæreticum damnavit . 164.

Philosophi Gentiles , quia sine Theolo-
gia , erraverunt . 5. 6. eorum aucto-
ritas an Theologo serviat ? 212. 213.
quomodo adhibenda ? 214. quam si-
dem faciat ? 215. 216.

Pontifex Romanus. Vide *Romanus Pon-
tifex* .

Positiva Theologia . 3. 9. antiqua . 12.
utilitas . 17. ad obscura Scripturæ
loca . 18.

Propositio hæretica , erronea &c. 41. &c.
piarum aurium offensiva . 46. malè
sonans . *ibid.* simplicium seductiva ,
schismatica &c. 47. improbabilis .
48.

Protestantes Scripturam esse in aliqui-
bus obscuram , negant . 18. 19. Scho-
lasticos oderunt . 22. 22. &c. 23.

R

Ratio naturalis qualiter serviat Theo-
logo ? 211. 212.

Regularum Juris , quis auctor , qualis
auctoritatis ? 207.

Romanus Pontifex dat Conciliis firmi-
tatem . 128. & sequent. , ut pri-
vatus Doctor non est infallibilis .
175. Infallibilis in rebus fidei , &
morum toti Ecclesiæ proponendis .
152. 153. ex Scriptura probatur *ib.*
154. 156. exemplo Synagogæ . 155.
ex D. Thoma . 157. 158. ex Galli-
cano Conventu . 159. 160. hoc pri-
vilegium antiquæ Ecclesiæ non fuit
ignotum . 164. 165. factum Victoris ,
& Stephani . 166. 167. cur petierint
Synodos convocari ? 168. etiam si eo-
rum judicium sit infallibile . *ibid.*
supposita Romanorum Pontificum
errata , & repugnantes definitiones .
172. 173. &c. non se pronunciant
fallibiles . 178. &c. 179. 180. nec
Concilia eos fallibiles declarant .
181. distinctio inter Romanam Ec-
clesiam , & Romanum Episcopum ,
non probatur . 179. an errare possit
errore Personæ ? 179. 180. ejus in-
fallibilitatem Parisiensis Academia ,
nec tota , nec semper denegavit .
183. 184. eam aliæ Academiæ pro-
fiteantur . 184. 185.

Rotæ Rom. Auditorium unde ortum , cur sic
dictum , & quantæ auctoritatis ? 209.

S

Sapientia quid sit ? 83.
Scandalosa propositio quæ sit ? 46.

Schismatica propositio . 47.

Scholastica Theologia . 3. 9. ejus anti-
quitas . 12. &c. quovis tempore in
usu . 12. 13. &c. eà usi Christus ,
Paulus , Patres . *ibid.* 14. &c. quo-
modo Damascenus , & Petrus Lom-
bardus ejus auctores sint ? 14. non
reprobatur à Patribus . 15. nec à
Paulo . 16. utilis . 20. &c. defendi-
tur usus , abusus damnatur . 22. 23.
24. 25. 26.

Scho-

Scholastici. Vide Theologi.

Scientia quid, quotuplex? 55.

Scriptura Sacra in quibusdam obscura. 18. 19. 20. verus illius sensus, à quo accipiendus? 20. 30. 33. 34. quid. 95. quotuplex sit? 95. varii ejusdem sensus. 97. 98. 99. &c. ex litterali valde arguitur. 102. aliquando etiam ex mystico. *ibid.* ex accommodatio nunquam. 103. varieg editiones. 104. 105. 106. ex qua firmum trahatur argumentum? 107. ejus auctoritas auctoritate Conciliorum major est. 149. &c.

Sensus Sac. Scripturæ. Vide *Scriptura*. *Simplicium* seductiva. 47.

Siricius Papa quomodo remisit Bonosum ad Concilium? 168. 169. 171.

Stephanus I. Papa veritatis assertor. 164. 165. ejus controversia cum S. Cypriano non obest Romani Pontif. infallibilitati. 166. 167. non est lapsus in errorem extremum. 173.

Stephanus II. an validum judicaverit Baptisma in vino collatum? 175.

Synagoga, esto defecerit, non deficiet Ecclesia. 110. 111.

T

T *Emeraria* propositio, quæ sit? 45.

Theologia. Nomen. 1. apud Paganos quotuplex? 2. apud Christianos. 3. homini necessaria. 4. &c. etiam ad res naturales vestigandas. 6. ad salutem quomodo? 8. Positiva, & Scholastica. 3. discrimen inter utramque. 9. &c. antiquitas utriusque. 12. &c. Scientia est. 55. in Viatore. 56. 57. est actus non evidens. 58. 59. subalternatur Scientiæ Dei, & Beatorum minus propriè. 61. manebit in Patria. 61. quomodo evacuabitur? 63. 64. est supernaturalis

solum extrinsecè. 66. &c. ejus objectum est supernaturale solum radicaliter. 71. 72. est speculativa simul, & practica. 74. &c. certior, & dignior aliis scientiis. 78. 79. &c. 82. est sapientia. 83. 84. habet pro objecto quod Deum ut Deum. 85. 87. pro objecto quo divinam mediatam revelationem. *ib.* 90. alia ut objecta materialia. 85. 89. est argumentativa. 90. circa principia quomodo se gerat? 91. 92.

Theologici loci. Vide *loci*.

Theologi Scholastici nomine quid? 109. in pretio habendi. *ibid.* auctoritatis quantæ sunt divisi, & collectivè? 100. 101. veteres, & moderni. 102. 103. qui recentiores spernit, sperneret, & veteres. *ibid.* cum Canonistis comparati. 103. 104.

S. Thomas mens in sua summa. 1. circa Rom. Pontificis auctoritatem, & infallibilitatem. 157. 158. de D. Petro reprehensio à D. Paulo. 162.

Traditio multiplex est. 108. 109. 110. regulæ pro discernenda una ab alia. 111. ex qua firmum argumentum sumatur? 111. 112. ad hereticos confutandos major vis in traditione, quam in scriptura. 112. quæ tenenda sit? 113.

V

V *Isidorus* I. Papa in causa Quartodecimanorum. 166. firmat Rom. Pont. infallibilitatem. *ibid.* non excommunicavit Asiaticos. 166. 172.

Vigilius Papa in causa trium Capitulorum. 163.

Z

Z *Osimus* non favit Cælestio. 173. 174.



